


Библия пы сэрвицко
ромско чиб



Portions of the Holy Bible in the Servi dialect of the Vlax
Romani language of Ukraine

Библия пы сэрвицко ромско чиб
Portions of the Holy Bible in the Servi dialect of the Vlax
Romani language of Ukraine

copyright © 2021 Pioneer Bible Translators

Language: Romani (Romani, Vlax)

Dialect: Servi

Contributor: Pioneer Bible Translators

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-15

PDF generated using Haiola and XeLaTeX on 28 Dec 2024 from source files dated 15 Apr 2023
f17a2de7-6044-5cab-b8ec-c68fba3b8280

Contents

Руфь	1
Иона	6
Лукастар	9
Бути	63

Лил пала Руфь

Элимелехо тай лэхжэро їри пэрэладэн Вифлеемостар ды Моаво

¹ Калась, ды вряма сундисарэн, ды пхув Иудея авиля бокх, тай екх мануш Вифлеемостар екхтханэ ромняга тай донца чявэнца пэрэлагля ды пхув Моаво.

² Кадылэ манушэ акхарэнас Элимелехо, лэхкиря джювля — Нооми, а дон лэхкирэн чявэн — Махлоно тай Килионо. Вонэ джювэнас ды Эфрато пашэ ды Вифлеемо, со ды Иудея. Вонэ авиле ды пхув Моаво тай ачилепэ котэ.

³ Элимелехо, мурш Нооми, муля, тай вой ачиляпэ донца чявэнца.

⁴ Вонэ лиле пэсти джювлен моавитянкен; екха акхарэнас Орпа, авря — Руфь. Вонэ проджюдэ котэ паша дэш бэрш,

⁵ тай тунчи Махлоно тай Килионо кади ж муле. Нооми пэрэджюда дон чявэн тай пэхкэрэ муршэ.

Нооми рисявэл ды Вифлеемо екхтханэ моавитянкага Руфь

⁶ Кала Нооми уджянгля ды Моаво, со РАЙ срапирда пала пэхкирэн манушэн тай дыня лэнди хамо, вой закамля тэ рисявэ пхуятар Моаво ды пэхкири пхув, тай лага скамле тэ джя дуй латирэ боря.

⁷ Нооми ачявда тхан, тев джюда, тай лакирэ боря джиле лага. Вонэ джиле ды дром павпалэ ды пхув Иудея.

⁸ Нооми пхэнда пэхкирэнди дуэнди боренди:

— Рисявэн цэрэ, дэ тумарэн чяче їрен! Мэк РАЙ дэл тумэнди лачимо, сар и тумэ дэнас лачимо пэхкирэ мулэнди муршэнди тай манди.

⁹ Тэ дэл РАЙ тумэнди тэ аракхэн бахт ды цэр нэвэ муршэга.

Вой чюминдэня лэн, нэ вонэ фартэ подлиле гвалто тай заровине.

¹⁰ Тай пхэндэ:

— Амэ джяга туга, тирэ манушэндэ.

¹¹ Нооми пхэнда:

— Чяя, рисявэн павпалэ. Пэ со тумэнди тэ джя манца? Чи авэна мандэ инте чявэ, соб тэ авэн тумэнди муршэнца?

¹² Рисявэн, чяя мурэ, мэ фартэ пурани, соб тэ выджя пала ром. Тэ думисаравас бы мэ кади: «Мандэ исин надежда!», тэ пэрэрятаравас бы мэ кадья рят ромэга тай тэ быяндёнпэ бы чявэ,

¹³ со калэстар? Тумэнди тэ дожутярэ, кала вонэ выбарёна? Со калэстар, тэ ачепэ тумэнди на пала ром?! На трэбуни, чяя. Мурэ джювимо фартэ кырко, мэ фартэ пала тумэн пэрэджював. РАЙ счюта пы ман пэхкири холи.

¹⁴ Вонэ упалэ подлиле гвалто тай заровине. Орпа чюминдэня пэхкиря сасуя тай джиля, а Руфь отпхэндапэ тэ уджя.

¹⁵ Нооми пхэнда:

— Дыхх, тири ятровка рисявэл пэхкирэ манушэндэ тай пэхкирэ дэвлэндэ. Джя и ту лага.

¹⁶ Нэ Руфь пхэнда:

— На манг ман тэ ачявав тут тай тэ рисяв. Мэ джява пордэ, тев ту джях, тай ачявапэ котэ, тев ту ачехпэ; тирэ мануша авэна мурэ манушэнца, тиро Дэвэл — муро Дэвэл.

¹⁷ Тев мэрэга ту, котэ и мэ мэрава, тай котэ мэк ман гаравэна. Тэ помарэл ман РАЙ, какич мэримо розачявэла амэн!

¹⁸ Нооми полиля, со Руфь всеекх джяла лага тай пэрэачиля тэ мангэ ла тэ уджял.

¹⁹ Вонэ джиле дуйджинэ ды Вифлеемо. Кала вонэ авиле, ды форо подлиялпэ баро гвалто:

— Када со, Нооми?! — типисявэнас джювля.

²⁰ Нооми пхэнэлас лэнди:

— На акхарэн ман будэр Нооми, ай акхарэн Мара, колэсти со Всазорако бичялда манди бида!

²¹ Кала мэ уджявас, мандэ сля вса, нэ РАЙ рисарда ман павпалэ нисога. Пэ со тумэ акхарэн ман Нооми? РАЙ сундисарда ман, Всазорако бичялда манди бибахталимо.

²² Кади рисардапэ пхуятар Моаво Нооми тай лага латири бори моавитянка Руфь. Кала вонэ авиле ды Вифлеемо, ачиле тэ стидэ ячменё.

2

Руфь тай Боазо

¹ Муршэстэ Нооми сля родо пав лавэ Боазо, мануш пативало, колэстар родостар, со и Элимелехо.

² Моавитянка Руфь пхэнда Нооми:

— Мук ман тэ джя ды маля тэ стидэ ворзо, саво тэлэдыня, котэ, тев манди сикавэна мищимо.

Нооми пхэнда:

— Джя, чей мури.

³ Руфь джиля пы маля, тев стидэнас ворзо, тай ачила тэ подлэ кода, со тэлэдэлас пы пхув. Тай ачила кади, со кодыя маля сля маля Боазостири, саво сля родо Элимелехости.

⁴ Ды кадыва диво еджино Боазо авиля пордэ Вифлеемостар.

— РАЙ тумэнца! — пхэнда вов бутярнэнди.

— Тэ авэх бахтало РАЕСТАР! — пхэндэ вонэ лэсти.

⁵ Боазо пхучля пхурэдэрэ бутярнэстар:

— Кахкири када чей, кадыя тэрни джювли?

⁶ Пхурэдэр бутярно пхэнда:

— Када моавитянка, сави Нооми анда пхуятар Моаво.

⁷ Вой пхучля: «Мукэга ман тэ стидэ ворзо, саво тэлэдыня». Авиля дэнзор тай ачиляпэ вой катэ, тай на прыбэшля тэ отцинявэ.

⁸ Тунчи Боазо пхэнда Руфяти:

— Чей мури, пошун. На джя тэ стидэ ворзо пэ авэр маля, на уджя катар, нэ рицарпэ пашэ мурэ бутярнэндэ.

⁹ Дыкх, тев тирэн бутярнэ, тай джя пав шпэра бутярнен. Мэ прыпхэндом пэхкирэ манушэнди тэ на холярэн тут. Кала скамэга тэ пэ, поджя тай пи кхорэстар, савэстар лэн пани мурэ копыли.

¹⁰ Вой тэлиля лэсти ды пхуя тай пхэнда:

— Сости ту сикавэх манди кацаво мищимо? Сости ту човэх пы ман сама, мэ ж авря пхуятар?

¹¹ Боазо пхэнда лати:

— Манди роспхэндэ пала кода, со ту стирдан пэхкиряти сасуяти, кала муля тиро мури: сар ту ачявдан дадэ тай да, ачявдан пэхкири пхув, тев аракхляпэ, тай джилян манушэндэ, савэн ды калэ на джянэгас.

¹² Мэк РАЙ воздэла тути пала тирэ рындоря, савэ ту тирдан, тай дэла бахт тути Дэвэл, РАЙ Израилехкоро, пала лэхкирэ пхака ту камэх тэ ушаравэпé!

¹³ Вой пхэнда:

— Рай муро, ту сикавэх манди кацаво мищимо. Ту дынян пачя тиря копыляти, кала мэ на тирэ копылендар.

¹⁴ Кала авиля вряма тэ ха, Боазо пхэнда Руфяти:

— Джя кордэ, ха тай обмук пэхкоро котор мандро ды шуклима.

Руфь бэшла пашэ бутярнэн, тай вов дыня лати присардо ворзо. Вой чялила, тай латэ интэ ачиляпэ.

¹⁵ Кала Руфь упалэ джила тэ стидэ ворзо, Боазо прыпхэнда пэхкирэ манушэнди:

— Тай кала вой закамэла тэ стидэ помашкар снопуря, на холярэн ла.

¹⁶ Кала авэна тэ стидэ, на залэн вса тай ачявэн лати. Мэк подлэл, тай тумэ нисо на дэдумэн лати.

¹⁷ Ды бельвель Руфь стидэлас ворзо пэ маля. Нэ кала вой обмарда лэн, выджила іпаш гоно* ячмени.

¹⁸ Кала авиля ды форо, Руфь сикавда сасуяти, скацик вой стидыня. Тунчи вой доросля кода, со ачиляпэ хаматар, тай отдыня Нооми.

¹⁹ Сасуи пхучля латар:

— Тев ту стидэгас? Тев ту тирдан авдивэ? Тэ авэл бахтало кодыва, саво дыня тути зор.

Руфь пхэнда сасуяти, кастэ вой тирда пэ маля.

— Манушэ, пэ маля кастэ мэ авдивэ слём, акхарэн Боазо, — пхэнда вой.

²⁰ — Тэ дэл лэсти РАЙ бахт! Вов патив тховэл и пы джюдэн тай пы мулэн! — пхэнда Нооми боряти. — Кадыва мануш амаро пашутно родо, кастар авэла амэнди зор.

²¹ Руфь моавитянка пхэнда:

— Вов пхэнда манди тэ рицарэпэ екхтанэ лэхкирэ бутярнэнца ды колэ, кала вонэ стирэна всаворэ бутя пэ лэхкирэн мален.

²² Нооми пхэнда Руфяти, пэхкиря боряти:

— Чяёри, мишто, кала ту авэга лэхкирэ бутярнэнца. Тунчи нико на холярэла тут пэ авэр маля.

²³ Руфь рицардапэ екхтанэ бутярнэнца Боазостирэнца тай подлэлас када, со тэлэдэлас ды колэ, кала постидыне ячмени тай див. Джювэлас вой тунчи пэхкиря сасуяса.

3

Руфь тай Боазо пы токо

¹ Екхвар латири сасуи Нооми пхэнда лати:

— Мури чей, на трэбуни ли манди тэ аракхав тути тхан, соб тути тэ авэл мишто?

² Хыба Боазо, пэхкирэнца бутярнянца, савэнца ту слян, амэнди на родо? Авдивэ бельвеляга вов жужарэл ячмени пы токо.

³ Тай кади, джя, выхалавпэ, помакпэ лаче мастинага тай уряв тири лачи іда. Джя пы токо, кацик на сикавпэ лэсти ды кодыя вряма, кала вов на пэрэачела тэ ха тай тэ пэ.

⁴ Кала вов пэрэла, рапир кадыва тхан, тев вов пэрэла. Тунчи джя, оттер ушардо ды лэхкирэ пурэн тай пэр. Вов пхэнэла тути, со тэ тирэ.

⁵ — Мэ тирава вса, сар ту пхэндан, — пхэнда Руфь.

⁶ Вой джила пы токо тай тирда вса, со пхэнда лати тэ тирэ латири сасуи.

⁷ Кала Боазо пэрэачила тэ ха тай тэ пэ, тай ачиля лэсти мишто, вов оджиля, пэля ды угло скирдатэ. Руфь локхэ поджила, оттерда ушардо лэхкирэ пурэндэ тай пэля.

⁸ Ды іпаш рят вов сдарыняпэ, порисардапэ тай додыкхля джювля, сави пашлэлас ды лэхкирэ пурэн.

⁹ — Ко ту? — пхучля вов.

— Мэ тири копыля, Руфь — пхэнда вой.

* **2:17** Пав пурано еврейско чиб «екх эфа», тевсь 20-22 литра.

— Ушарав ман тиряя їдага, ту же екх пашутнэндар родостар амэнди, саво лиджял лав пала амэн.

¹⁰ Вов пхэнда:

— Тэ дэл тути РАЙ бахт, чей мури. Када лачё рындо барыдэр колэстар, саво ту тирэгас дыкалэ. Ту на ачильн тэ пхирэ пала тэрнэн муршэндэ — на пала барвалэн, тай на пала чёрорэн.

¹¹ Нэ кана, мури чей, на дара. Мэ тирава важ тути вса, со ту помангэга. Всаворо муро форо джанэл, со ту пативали джювли.

¹² Мэ пашутно родо, нэ исин родо пашэдэр тути.

¹³ Ачпэ пы рят катэ. Дэнзор, кала вов скамэла тэ выгинэ тут, када мишто – мэк кади и тэ авэл. Нэ сар на закамэла, чячимага, сар кода, со джюдо РАЙ, када тирава мэ. Сов катэ ды дэнзор.

¹⁴ Тай вой сля ды лэхкирэн пурэн ды дэнзор, нэ вшиля дыкалэ, кала ек мануш роздыкхэла аврэ манушэ. Боазо пхэнда ды пэ: «Мэк нико на джанэл, со пы токо авэлас джювли».

¹⁵ Вов пхэнда лати:

— Дэ манди упрани їда, сави пэ тут, тай рицар ла.

Кала вой тирда када, вов вычюта ды кадья їда баро гоно ячмени* тай дыня лати зор тэ зачювэ пы пхикен. Тунчи вов рисардапэ ды форо.

¹⁶ Кала Руфь авиля пэхкиря сасуятэ, Нооми пхучля:

— Нэ сар ту, чей мури?

Тай Руфь распхэнда лати пала вса, со тирда Боазо важ лати

¹⁷ тай прыпхэнда:

— Вов дыня манди їпаш гоно ячмени тай пхэнда: «На рисюв пэхкиря сасуятэ шушэ вастэнца».

¹⁸ Нооми пхэнда:

— Поач, мури чей, кала на уджянага, дысо вса доджяла. Кадыва мануш на прыбэшэла, вов авдивэ затирэла кадыва рындо.

4

Руфь ачел ромни Боазостири

¹ Боазо джиля тай бэшля ды форохкирэн ударэн. Тай акэ дыкхэл: джял кодыва родо, пала савэ вов дедуманя. Боазо акхарда лэ тай пхэнда:

— Амал, поджя, бэш.

Кодыва поджиля тай бэшля.

² Боазо анда дэшэн манушэн пхурэдэрэн ды форо тай пхэнда лэнди:

— Бэшэн катэ.

Вонэ бэшлэ.

³ Боазо пхэнда родости:

— Дума джял пала маля Элимелехостири, амарэ родохкири. Нооми рисиля пхуятар Моаво тай битинэл лэ.

⁴ Мэ думисардом, со трэбуни тэ пхэнэ тути пала када. Камэх, вытин кадья маля англа всаворэн, ко исин катэ, тай англа пхурэдэрэн мурэ народостар. Камэх — вытин. Сар на камэх — пхэн манди, соб мэ тэ джанав. Тути трэбуни англэ тэ вытинэ када, мэ — авэр, касти трэбуни тэ вытинэ.

— Мэ вытинава, — пхэнда кодыва.

⁵ Боазо пхэнда:

— Кала вытинэга маля Ноомиятири, тути трэбуни тэ лэ моавитянка Руфь, кастэ муля ром, соб, кала тумэндэ бяндэлапэ чяворо, всаворо хаббэ тэ ачелпэ лэсти.

⁶ Тунчи пашутно родо пхэнда:

* **3:15** Пав пурано еврейско чиб «шов мера ячмени».

— Нат, манди на выджял тэ вытинэ. Дарав, соб тэ на хасявэл мандэ вса. Мэк пала тут вса авэла, вытин ту, мандэ на выджял.

⁷ (Англал ды Израили сля упхэнимо: кала пэрэдэнас вытинимо тай парувэнас, соб ды калэ тэ авэл зор, мануш слэлас пэстар цэрюли тай отдэлас аврэсти. Кади ды Израили састярэнас упхэнимо.)

⁸ — Тин ту, — пхэнда пашутно родо Боазости тай слиля цэрюля.

⁹ Боазо пхэнда пхурэдэрэнди тай всаворэсти народости:

— Тумэ допхэнимаря: екхатар мэ тинав Ноомиятэ вса, со сля Элимелехостэ, Килиноностэ тай Махлоностэ.

¹⁰ Кади ж моавитянка Руфь, со сля ромни Махлонохкири, мэ лав пэсти ды ромнен, соб ко авэла латар тэ авэн хулая пхуяти, со сля лэстэ, тай соб тэ на хасявэл лэхкиро родо ды амаро форо. Тумэ калэсти допхэнимаря!

¹¹ Всаворэ ко котэ сля пашэ ударэн тай пхурэдэра пхэндэ:

— Акэ, амэ допхэнимаря! Мэк РАЙ дэла ромняти, сави заджял ды тиро цэр, бут чяворэн, сар сля Рахилятэ тай Лиятэ, савэндар джиля всаворя нородо Израилёхкоро! Тэ авэх зорало ды Эфрата, тай тэ джянэн тут ды Вифлеемо.

¹² Мэк РАЙ дэла тути чяворэн кала тэрня джювлятар! Мэк тиро цэр авэла пхуджило пы цэр Парецостиро, савэ Тамар быянда Иудасти!

Руфятэ аракхэлэ чяво

¹³ Боазо лиля Руфь пэсти ды ромнен. Вонэ сле екхтханэ, тай дыня РАЙ, вой быянда лэсти чявэ.

¹⁴ Джювля пхэндэ Нооми:

— Наис РАЕСТИ, саво на ачявда тут би чяворэндиरो! Тэ лашарэлпэ вов ды Израили!

¹⁵ Вов рисарэла тути джюймо тай подрицарэла тут ды пуранэн бэршэн! Бори тири, сави камэл тут, быянда лэ! Вой важ тути фэдэр, сар ефта чявэн.

¹⁶ Нооми пхиравэлас пы вастэн чяворэ, саво быяндапэ, тай дыкхэлас пала лэ.

¹⁷ Пашэ джювля дэдумэнас:

— Ноомиятэ быяндапэ чяворо!

Вонэ дыне лэсти лав тай ахардэ лэ Овидо. Када дад Иесеехкоро, саво сля дад Давидохкоро.

¹⁸ Акэ родо Давидохкоро, саво джял Парецостар: Парецо сля дад Хецронохкоро,

¹⁹ Хецроно сля дад Рамости, Рамо сля дад Аминадавости,

²⁰ Аминадаво сля дад Нахшоности, Нахшоно сля дад Салмоности,

²¹ Салмоно сля дад Боазости, Боазо сля дад Овидости,

²² Овидо сля дад Иесеести, Иесееи сля дад Давидости.

Ионастиро лил

Иона нашэл Дэвлэстар

- 1 Сля лав РАЕСТАР Ионасти, чявэ Амиттаёхкирэсти:
 2 — Вщи, джя ды Ниневия, баро форо, тай роспхэн ды лэ, со дума пала врыти рындурия кадылэн манушэн доджиля ды ман.
 3 Нэ Иона вщиля, соб тэ нашэ ды Таршыш РАЕСТАР, тай авиля ды Яффа, арахла корабли, саво оджялас ды Таршыш, потинда, соб лэ тэ пролиджян, и заджиля ды лэ, соб тэ авэ РАЕСТАР ды Таршыш.
 4 Нэ РАЙ бичялда пы море састо балвал. Тирдапэ баро гвалто, и кораблести трэбуни сля тэ розмарэпэ.
 5 Матросуря здарэнэпэ тай ачиле тэ типисявэ кожно пэхкирэ дэвлэсти. Вонэ вычютэ всаворэ бужэ кораблестар ды пане, соб тэ авэл локхэдэр.
 Нэ Иона ды калэ смукляпэ андрэ, пыля тай састэ засута.
 6 Капитано кораблехкоро авиля лэстэ тай пхэнда лэсти:
 — Со ту совэх? Вщи, типисяв тирэ Дэвлэсти. Ко джянэл, Вов ушунэла амэн, тай амэ на хасявага.
 7 Матросуря пхэндэ екхэкэсти:
 — Джям, чювага жребие, соб тэ уджянэ, пала ка кадья грыжа авиля пы амэн. Вонэ чютэ жребие, и жребие выпыля пы Иона.
 8 Тунчи вонэ пхэндэ лэсти:
 — Пхэн амэнди, пала ка дорэсля амэн кадья грыжа? Сога ту залэхпэ? Катар ту джях? Тев тири пхув? Савэндар ту манушэндар?
 9 Вов пхэнда лэнди:
 — Мэ еврее, даравпэ РАЕСТАР, Дэвлэ болыбнахкирэ, Саво стирда баро пани тай пхув.
 10 Тунчи Иона пхэнда лэнди, со вов нашэл РАЕСТАР. Кала мануша уджангле пала када, вонэ фартэ пэрэдэрэне тай пхэндэ лэсти:
 — Сости ту када тирдан?
 11 Море на пэрэачелас гвалтовать. Вонэ пхэндэ лэсти:
 — Со амэнди тэ тирэ туга, тэ на гвалтует море?
 12 Тунчи вов пхэнда лэнди:
 — Лэн ман и вычювэн ды море, тай море пэрэачела гвалтовать важ тумэнди. Мэ джянав, со кадья бари грыжа доросля тумэн пала ман.
 13 Нэ кала мануша ачиле фартыдэр тэ тирэ бути, соб тэ прыаче пхуютэ, лэндэ нисо на выджялас, колэсти со море на пэрэачелас гвалтовать.
 14 Тунчи вонэ типисине РАЕСТИ тай пхэндэ:
 — Мангах Тут, РАЕ, тэ на хасявах пала води кадылэ манушэ, тай на прычувэга амэнди навуджило рат. Ту, РАЕ, стирдан, со Ту камлян!
 15 Вонэ лиле Иона тай вычютэ ды пане, тай пы море авиля пачя.
 16 Матросуря фартэ пэрэдаранэпэ РАЕСТАР, андэ Лэсти жэртва и дыне солах.

2

Иона мангэлпэ Дэвлэсти андрал мачестар

- 1 РАЙ бичялда баро мачё, тай вой прозумавда Иона. Вов просля андрэ ды пэр мачестэ трин дивэ тай трин рятя.
 2 Кала Иона сля ды пэр мачестэ, вов помангляпэ РАЕСТИ, пэхкирэ Дэвлэсти.
 3 Вов пхэнда:
 — Ды беда мэ типисилём РАЕСТИ,

- и Вов задэдуманя мандэ.
 Мэ затиписилём кола люмлятар мулэндар —
 тай Ту ушундан муро гласо.
- 4 Ту обмуклян ман фартэ тэлэ ды пане,
 воль тирёлас тай подлэласпэ понад муро шэро.
- 5 Мэ пхэндом:
 «Отчюто мэ Тирэ яххэндар,
 нэ всаекх мэ джянав, со мэ удыхава свэнто Тиро цэр».
- 6 Пани ушаравда ман,
 чяря панестар обкхувдэ муро шэро.
- 7 Мэ тэлэ пхув сджилём, тев барён пляя,
 тай удара затердэпэ пала ман,
 соб тэ на вымукэ ман вако.
- Нэ Ту, РАЙ, муро Дэвэл,
 вылилян ман хывьятар джюдэга.
- 8 Кала джювимо муро мурдёлас,
 тай ачилёмпэ мэ би зорако,
 мэ РАЕ срапирдом,
 тай муро мангимо доджиля Тутэ,
 ды свэнто Тиро цэр.
- 9 Кола, ко тэлёл хохавнэ, шушэ дэвлэнди,
 прыдыне Тут.
- 10 А мэ ашаримахкирэ гласога анава Тути жэртва,
 со пхэндом англа Тут, стирава!
 Фирисаримо РАЕСТАР!
- 11 РАЙ пхэнда мачести, тай вов вычюта Иона мостар пы пхув.

3

Иона джял ды Ниневия

- 1 Авэр моло сля лав РАЕСТАР Ионасти:
 2 — Вщи, джя ды Ниневия, баро форо, тай роспхэн ды лэ када, со Мэ пхэндом
 тути.
- 3 Иона вщиля тай джиля ды Ниневия, сар пхэнда лэсти РАЙ. Ниневия сля баро
 форо Дэвлэстэ, пэ трин дивэ тэ джя пэза.
- 4 Иона заджиля ды форо и састо диво пхирэлас тай пхэнэлас: «Интэ саранда
 дивэ, и Ниневия хасявэла!»
- 5 Мануша ды Ниневия патиле Дэвлэсти тай отпхэндэпэ тэ ха и тэ пэ. Всаворэ —
 барвалэ и чёрорэ — урявдэпэ ды їда гонэндар.
- 6 Кала кадыва лав доджиля ды тхагари, вов вщиля троностар, слиля барвали їда,
 урявдапэ ды їда гонэндар тай бэшля ды прахо.
- 7 Вов прыакхарда барэ манушэн, тай вонэ пхэндэ всаворэнди ды Ниневия:
 «Мануша нисо тэ на хан, тэ на пэн пани. Тай хулаимо, гурува, бакрэ бузненца
 тэ на пхирэн пы мален и тэ на пэн пани.
- 8 Мануша тай хулаимо тэ авэн ушаравдэ ды похтан гонэндар тай зоралэс
 тэ типисявэн Дэвлэстэ. Соб кажно мануш отрисардапэ пэхкэрэндар мижэ
 дромэндар тай прохаризицики рындонэндар.
- 9 Ко джянэл, на парувэла ли Дэвэл Пэхкиро гындо тай отрисарэла амэндар
 Пэхкири холи, тай амэ на хасявага».
- 10 Дэвэл удыхля лэндирэ рындурия, со вонэ отрисардэпэ пэхкирэ мижэ
 дромэндар, и ачиля Лэсти дор лэн, тай на бичялда беда, сави камля тэ бичялэ.

4

Дэвэл сиклярэл Иона

- ¹Када сля бари бида ды якхэн Ионасти. Вов фартэ холявэлас.
- ²Вов ачиля тэ мангэпэ РАЕСТИ:
— РАЕ! Мэ ж дэдуманём пала када, кала мэ инте слём пэстэ цэрэ. Колэсти мэ наشلём ды Таршыш. Мэ джянаवास, со Ту, Дэвла, тирэх лачимо, Ту дороно, бут вряма на холявэх, Ту барвало камлимага тай на камэх тэ бичялэ бида.
- ³Екхатар, РАЕ, лэ мури води. Манди фэдэр тэ мэрэ, сар тэ джювэ.
- ⁴РАЙ пхэнда:
— Мишто када, со ту холявэх?
- ⁵Иона выджиля форостар тай бэшля, тев восточно риг форостэ, стирда пэсти котэ катуна рандендар тай бэшля тала ла, дэ шалин, соб тэ удыхкэ, со авэла форога.
- ⁶РАЙ Дэвэл прыпхэнда рандяти, и рандь подлиялэпэ понад шэро Ионасти, соб вов тэ авэл ды шалин, тэ авэл лэсти мишто. Иона сля фартэ лошало.
- ⁷Тала дэнзор Дэвэл бичялда термэ тэ подха кодья рандь, тай вой зашутяля.
- ⁸Кала вщиля кхам, Дэвэл бичялда зорало, пхабардо балвал,тай кхам ачиля тэ пхабарэ шэро Ионасти, кади со лэсти ачиля бибакт. Вов мангля мэrimo тай пхэнэлас:
— Манди фэдэр тэ мэрэ, сар тэ джювэ.
- ⁹Дэвэл пхэнда Ионасти:
— Мишто када, со ту холявэх пала кадья рандь?
Вов пхэнда:
— Мишто! На кацик тэ холявэ, нэ и тэ мэрэ.
- ¹⁰Тунчи РАЙ пхэнда:
— Тути дор кадья рандь, пала савля ту на пхирэгас тай на тирдан бути. Ды екх рят рандь выбариля, тай ды екх рят вой хасяля.
- ¹¹Манди ли на дор Ниневия, баро форо, ды саво фартэ бут хулаимо тай будэр тев шэл биш пхангля манушэн, савэ на джянэн, со мищимо, а со врытимо?

Бахтало Лав Лукастар

Драгэ амала!

Тумэ рицарэн дэ вастэн Евангелие, Бахтало Лав. Кадэва лав розпхэнэл пала кода, сар дуй пхангя бэрш палал дэ амари люмля авила Иусо Христосо, Саво исин амаро Фирисари. Сар Вов джювда пэ пхув, састярэлас и сиклярэлас манушэн, эртисарэлас лэнгэрэ бэзима, муля пала лэн и отджювдиня, и сар рисявэла павпалэ дэ люмля. Евангелие Лукастар сля чиндо дэ екхто веко пэ греческо чиб. Штар Евангелия и Бути апостолэнгэри, лил, тев розпхэнэлпэ пала кода, сар ачиля тэ авэ кхандири и сар вой барёлас, авэр лила, чиндэ патявнэнца дэ Иусо Христо, и кади ж лил Сикавимо (Откровение), всавэрэ вонэ сле стидэне їтханэ дэ Екх Лил, саво акхарэлпэ «Нэво Завето».

Пав дума, сави пэрэдэлпэ думутня вряматар, амэ уджнянах, со Евангелие, саво тумэ рицарэн дэ вастэн, чинда Лука, джянгло машкар патявнэн, сар «птивало састимари». Вов патиня дэ Дэвлэ и патявимо лэхкоро сля фартэ зорало; їтханэ апостолага Павлога Лука пхирэлас дэ дуратунэн пхуен, соб тэ долиджя манушэнди Дэвлэхкоро Лав и тэ ваздэ котэ кхандири.

Лука чинда Бахтало Лав майанглал важ ирвалэ манушэ, саво сля греко, пав лавэ Феофило, соб тэ сикавэ лэсти, Ко сля Иусо пав чычима и со Вов стерда важ амэн. Соб тэ терэ пэхкири бути, Лука розпхучля бутэн манушэн, савэ дыкхле, сар джювда Иусо пэ пхуя, и пробинда вса, со чиндэ пала Иусо дэ кодыя вряма.

Вса, со Лука уджянгля пала Иусо, вов зачинда дэ Бахтало Лав (Евангелие) пашэ 60-65 бэрша Иусохкэрэ бэнимастар. Дэ пэхкоро лил Лука майанглал розпхэнэл пала Иоанно Болдэмарэ и лэхкири бути важ Дэвлэ, и пала кода, со тердапэ ды люмля англа кода, сар бэняпэ Иусо. Лука бут со розпхэнэл пала барэ и цыкнэ рындурия Иусохкэрэ джювимастар и пала рындурия, савэ терэнаспэ дэ кодыя вряма. Кадэлэга вов сикавэл, со Иусо ачиля манушэга и авила дэ люмля важ кода, со кади сля пэ годя Дэвлэстэ, Саво на камэл, соб амэ тэ хасваха бэзимастар.

Амэ всавэрэ їлэстар наисарах амалэнди, савэ подрицарэнэ и терэнас бути їтханэ амэнца важ кода, соб тэ выджял кадэва лил: манушэнди, савэ пэрэлиджянас Евангелие пэ романи чиб и продыххэнас лэ, и всавэрэ ромэнди, савэ шунэнас и бинэнас лил англа кода, сар амэ вымукле лэ дэ люмля.

Баро наис тумэнди!

Тэ дэл Дэвэл тумэнди бахт!

Пативага, бутярнэ дэ организация «Переводчики Библии Украины»

¹ Кана бут ко манушэндар ачиле тэ зачинэ дума пала кода, со стердапэ машкар амэн,

² и сар амэнди розпхэндэ мануша, савэ англунэ дивэндар дыкхле кода, со сля, тай терэнас бути важ Дэвлэхкэрэ Лавэ,

³ тунчи и манди, птивало Феофило, авила пэ гындо тэ розлэпэ дэ кодэлэ, со стердапэ англунэ дивэндар, тай екх пала аврэ тэ чинэ тути,

⁴ соб ту тэ полэх, пэ скици исин чячюно сикляримо, саво ту прылилян.

Англо розпхэнэл пала Иоаннохкоро бэнимо

⁵ Дэ кодыя вряма, кала Иродо сля тхагари дэ Иудея, джювда екх рашай, саво вджялас дэ рашаенгири группа, тев сля пхурэдэрэга Авии. Лэ акхарэнас Захария, тай лэхкиря ромняга сля Елизавета, манушни Ааронохкэрэ родостар.

⁶ Вонэ лэдуй сле дэвликунэ мануша, и лэнгоро джювимо сля бидошакоро. И вонэ джювдэ пав Дэвлэ Раехкэрэ заповеди и пав дума Дэвлэхкири.

⁷ Лэндэ на сля чяворэн, колэсти со Елизаветатэ на выджялас тэ авэ пхаряга, и вонэ лэдуй сле дэ пуранэн бэршэн.

⁸ Екхвар поджиля вряма Захариясти рашаенца тэ лиджя бути англа Дэвлэ.

9 Сар прылито сля рашаендэ, вонэ чутэ жребии, касти тэ джя дэ храмо, тай Захариясти выпэля тэ заджя дэ храмо Раехкоро и тэ ваздэ тхув.

10 Дэ кодья вряма, кала Захария ваздэлас тхув дэ храмо, всавэрэ мануша мангэнаспэ аври, дэ грэда.

11 Тунчи сикавдапэ Захариясти Раехкоро ангело, пав чячи риг жэртвенникостар, пэ савэ ваздэнас тхув Дэвлэсти.

12 Кала Захария удыхля ангело, дэня пэ лэстэ дар, и затинисия даратар лэхкоро іло.

13 Ангело пхэнда лэсти:

— На дар, Захария! Шунда Дэвэл мангимо тиро, тай ромни тири, Елизавета, бэнёла тути чывэ, и дэга лэсти лав Иоанно.

14 Тиро іло авэла бахтало баря лошатар, и Иоаннохкэрэ бэнимасты лашавэна бут мануша.

15 Авэла вов барэ манушэга англа Рае: на пэла мол и мортхали тай Свэнтонэ Фанога авэла пхэрдо инте тала дакэрэ ілэ.

16 Бутэн манушэн дэ Израили вов рисарэла Раестэ, лэнгэрэ Дэвлэстэ.

17 Вов джяла англа Рае, тай Ильяхкэрэ фано и зор авэна пэ лэстэ, и вов рисарэла дадэнгэрэ ілэ лэнгэрэ чярэндэ, тай накандунэн рисарэла свэнтонэ годятэ, тай лачярэла манушэн, соб тэ авэн вонэ англа Дэвлэ.

18 Захария пхэнда ангелости:

— Сар манди тэ патя кадэлэсти? Мэ пхуро, тай ромни мури дэ пуранэн бэршэн.

19 Ангело пхэнда лэсти:

— Мэ Гавриило, саво ачел англа Дэвлэ, тай бичалдо тэ дэдумэ туга и тэ розпхэнэ тути пала када вса.

20 Акэ, ту авэга лало и ни екх лав на пхэнэга ды кодэлэ, сар вса стерэлапэ. Кодэлэсти со ту на патинян мурэ лавэсти, пав савэ стерэлапэ вса дэ пэхкири вряма.

21 А мануша дожутярэнас Захария аври тай на полэнас, сости вов на выджял храмостар скици вряма.

22 Кала вов выджия храмостар, тунчи на сгалювда тэ выпхэнэ ни екх лав, нэ кици сикавэлас вастэнца, сар лало. Тунчи мануша полиле, со Дэвэл сикавда лэсти вари-со дэ храмо.

23 Ай кала проджиля лэхкири вряма тэ лиджя бути дэ храмо, Захария рисия цэрэ.

24 Проджиля набут вряма, и Елизавета, ромни лэхкири, ачиля пхари тай гаравэласпэ манушэндар панч чён.

25 Тай пхэнэлас:

— Со терда манца Рай? Вздыхляпэ пэ ман! И слиля ладжявимо мандар англа манушэн!

Лав пала Исусохкоро бэнимо

26 Пэ шовто чён, сар Елизавета ачиля пхари, ангело Гавриило сля бичалдо Дэвлэстар дэ foro Назарето, саво ачел дэ пхув Галилея,

27 чятэ, савя акхарэнас Мария, пала савя дэне лав тэ отдэ ла пала Иосифо Давидохкэрэ родостар.

28 Ангело авия латэ тай пхэнда:

— Лошав, бахтали! Рай исин туга!

29 Вой на полиля, со када терэлпэ тай сар тэ полэ лэхкэрэ лава.

30 Ангело пхэнда лати:

— На дар, Мария! Дэвэл дэня тути бахт бари!

31 Акэ, ту авэга пхари тай бэнёга Чяворэ, и дэга Лэсти Лав Исусо.

32 Вов авэла баро, тай Лэ авэна тэ акхарэ Барэдэрэхкоро Чяво. Дэвэл Рай дэла Лэсти трено, пэ савэ бэшэлас тхагари Давидо, дад Лэхкоро.

33 И авэла Вов Тхагари дэ родо Иаковохкоро, и Тхагаримо Лэхкоро никала на пэрэачела.

34 Мария пхучля ангелостар:

— Сар откада вса авэла, кала мэ чей и муршэ на джянав?

35 Ангело пхэнда лати:

— Свэнто Фано сджяла упрал пэ тут, и зор Барэдэрэхкири ушарэла тут. И кодэлэсти Свэнто, Саво бэнэлапэ, акхарэлапэ Дэвлэхкэрэ Чявэга.

36 Акэ и Елизавета, тирэ родостар, пэ савя пхэнэнас «бичяворэнгири», шовто чён, сар ачиля пхари дэ пуранэн бэршэн.

37 Акэ, важ Дэвлэ нэнай нисо, соб Вов тэ на стерэл!

38 Тунчи Мария пхэнда:

— Дэвэл — муро Хулай, мэк авэла вса, сар ту пхэндан.

Тай оджиля латар ангело.

Мария джял Елизаветатэ

39 Проджиля набут вряма, и Мария стидэняпэ тай сигэдэр джиля дэ форо Иудеенгоро, саво ачелас машкар плаен.

40 Тай авиля дэ цэр Захариястэ и наисардапэ Елизаветага.

41 Кала Елизавета шунда лакэрэ лава, подхукля чяворо тала лакэрэ йлэ, и пэ Елизавета сджиля Свэнто Фано.

42 Вой ваздэня пэхкоро гласо тай пхэнда:

— Бахтали ту машкар джювлен, тай бахтало Чяворо, Савэ ту пхиравэх тала тирэ йлэ!

43 Пала со манди кадья бахт, со авиля мандэ Мурэ Раехкири дэй?

44 Кала ашундом тиро гласо, тунчи ваздэняпэ чяворо дэ мурэ йлэ лошага.

45 Бахтали ту, колэсти со патинян и Раехкэрэ лавэсти и со авэла кади, сар Вов пхэнда!

46 И пхэнда Мария:

— Ашарэл Рае води муро,

47 и лошавэл фано муро англа Дэвлэ мурэ,
Саво фирисарэл ман.

48 Вов удыхкля ман,

бутярня, сави нисо на ачел,
и акана всавэрэ родуря пхэнэна,
со бахтали мэ,

49 кала шунэна, со Дэвэл Зорало
стерда важ ман кадэва баро рындо.

И свэнто исин Лав Лэхкоро!

50 И родонэндэ, савэ полэн и трашан Лэстар,
Вов обрисявэл ковло йло Пэхкоро!

51 Барэ рындуря стерда Вов зоралэ вастэга,
розпхагля дрома пхутимаренди.

52 Вов счута раен лэнгэрэ трононэндар
и ваздэня упрэ чёрэн,

53 бокхалэн чялярда лачимага,
ай барвалэн мукля шушэ вастэнца.

54 Авиля Лэсти пэ гындо
тэ подрицарэ Израиле,
бутярнэ Лэхкэрэ,

55 сар дэня Вов лав амарэ дадэнди,
Авраамости тай лэхкэрэ родости пэ всавири вряма.

56 Мария просля латэ пашэ трин чён тай рисиля цэрэ.

Иоаннохоро бэнимо

57 Тай авиля вряма Елизаветати тэ бэнё, и вой бэня чяворэ.

58 Пашунэ мануша и родо лакоро шундэ, сар Рай дэня лати баро лачимо Пэхкоро, тай лошавэнас йтханэ лага.

59 Пэ охто диво авиле вонэ тэ обчинэ чяворэ, и камле тэ дэ лэсти лав Захария, кади, сар акхарэнас лэхкэрэ дадэ.

60 Нэ Елизавета, лэхкири дэй, пхэнда:

— Нат, дэн лэсти лав Иоанно.

61 Пхэндэ лати:

— Ника дэ тумаро родо кади на акхарэн!

62 Тай пхученас вастэнца лэхкэрэ дадэстэ, Захариястэ, камле тэ уджянэ лэстэ, сар вов камэл тэ акхарэ чяворэ.

63 Захария помангля сандёры важ лилэн тай чинда упрал: «Лэсти лав Иоанно». Всаверэ прылиле када пала диво.

64 Тунчи отмукия лэсти муй и чиб, и вов ачиля тэ дэдумэ тай тэ ваздэ слава Дэвлэсти.

65 И всавэрэн пашунэн облиля бари дар, и када вса розджиляпэ пав всавири Иудея плаенгири.

66 Мануша, савэ шундэ вса кода, пхученас еджинэ пэстэ:

— Кага дурэдэр авэла кадэва чяворо?

И Раехкоро васт сля пэ чяворэ.

Захария пхэнэл лав Дэвлэстар

67 Ай Свэнто Фано сджиля пэ Захария, Иоаннохкэрэ дадэ, и вов ачиля тэ дэдумэ Дэвлэстар:

68 — Тэлював англа Тут,
Бахтало Рай, Дэвэл Израилехкоро!

Ту авилян Тирэ манушэндэ
тай фирисардан лэн.

69 Ваздэня важ амэн Фирисаре
цэрэстар, савэстар исин Тиро бутярно Давидо,

70 зрицардан Тиро лав,
саво Ту пхэнэгас

дэ думутни вряма
Тирэ свэнтонэ англунаренца,

71 со фирисарэга амэн врыжымашэндар,
кодэлэндар, савэ вурьцён амэндар.

72 Вов сикавда ковло йло Пэхкоро
амарэ дадэнди

тай на бистарда, со спханглия лэнца Еджино Пэ
Свэнтонэ заветога.

73 Солаханя Вов Авраамости,
амарэ дадэсти,

74 со фирисарэла амэн врыжымашэндар,
соб амэ битрашакаро
тэ терах свэнто бути англа Лэстэ,

75 соб тэ авэл амаро джювимо свэнто тай чячюно
англа Лэхкоро Муй всавэрэ бэрша амарэ.

76 И тут, чяворо, акхарэна Барэдэрэхкоро англунари,
колэсти со ту джяга англа Рае
и лачярэга Лэсти дром,

77 и тховэга Лэхкэрэ манушэнди дэ гындо,
со Дэвэл злэл лэндар бэзимо
и фирисарэла лэнгэрэ вода.

78 Пэхкэрэ ковлэ їлэстар
Дэвэл бичалэла амэнди Кхам,
Саво ваздэлапэ дэнзор,

79 и манушэнди, савэ мэрэн дэ калима,
дэла одуд

и сикавэла амэнди дром,
саво анэл пачя.

80 Ай чяворо барэлас, тай фано лэхкоро ачелас зорало, и сля вов дэ шуки пхув
ды кодья вряма, кала трэбуни лэсти сля тэ сикавэпэ манушэнди дэ Израили.

2

Исусохкоро бэнимо

1 Дэ кодья вряма императоро Августо чинда упхэнимо, соб тэ пэрэдинэ и тэ
зачинэ, скици манушэн джювэл пав всавири римско пхув.

2 Када сля англуно упхэнимо пала кода, соб тэ пэрэдинэ и тэ зачинэ манушэн,
кодэла вряматар, кала Квиринии ачиля раега дэ Сирия.

3 И всавэрэ мануша джянас тэ зачинэпэ, кожно дэ пэхкоро форо.

4 Тунчи и Иосифо Назаретостар, саво ачел дэ Галилея, джила дэ Иудея, дэ форо
Давидохкоро, Вифлеемо, колэсти со вов сля Давидохкэрэ родостар.

5 Иосифо джиля, соб лэ тэ зачинэн, їтханэ Марияга, лэхкиря тэрняга, сави сля
пхари.

6 Дэ Вифлеемо авиля вряма, кала лати трэбуни сля тэ бэнё.

7 Тай бэня пэхкэрэ англунэ Чявэ, заххувда Лэ дэ похтан тай тховда дэ граждо,
колэсти со дэ цэр важ акхардэн манушэн на сля лэнди тхан.

Ангелура розпхэнэн чукнярендэ пала бэнимо Исусохкоро

8 Надур сле чукняря, савэ чяравэнас пэ маля пэхкэрэн бакрэн и бузнен и
прыдыкхэнас пала лэн ратяга.

9 И акэ, ачиля англа лэндэ ангело Раехкоро, и слава Дэвлэстар, сар баро одуд,
дэня пэ лэндэ. И бари дар облиля лэн.

10 Нэ ангело пхэнда лэнди:

— На даран! Мэ пхэнава тумэнди пала бари лош, сави авэла всавэрэ манушэнди.

11 Акана бэняпэ тумэнди дэ форо Давидохкоро Фирисари, Саво исин Рай
Христосо.

12 И акэ тумэнди шпэра: тумэ аракхэна Чяворэ, заххувдэ дэ похтан, Саво
пашлёл дэ граждо.

13 Тунчи упралимастар авиле фартэ бут ангелонэн, савэ ваздэне бари слава
Дэвлэсти тай пхэнэнас:

14 — Слава Дэвлэсти пэ упралима, а пэ пхуя пачя манушэнди, важ савэн ковлия
Дэвлэхкоро їло!

15 Кала ангелурия ваздэнепэ лэндар упрэ, чукняря пхэндэ екх екхэсти:

— Авэн дэ Вифлеемо, дыкхага, со котэ стердапэ, пала со амэнди пхэнда Рай.

16 Вонэ сиго авиле дэ форо Вифлеемо и аракхле Мария, Иосифо тай Чяворэ, Саво
пашлёлас дэ граждо.

17 Ай кала дыкхле Лэ, тунчи розпхэндэ лэнди вса, со вонэ ашундэ пала Чяворэ.

18 Всавэрэ, ко шундэ лэн, дэнас дьво лавэнди, савэ пхэндэ чукняря.

19 Ай Мария стховэлас кадэла лава дэ пэхкэрэ їлэ тай думисарэлас пала лэн.

20 Тунчи чукняря рисиле павпалэ, ашарэнас Дэвлэ и ваздэнас Лэсти слава пала
кода, со дыкхле и со лэнди сля пхэндо.

Иусо Чяворэ обчинэн

21 Пэ охто диво, кала авиля вряма тэ обчинэ Чяворэ, Лэсти дэне Лав Иусо. Кадэва Лав дэня Лэсти ангело, кала дэй Иусоохкири инте на сля пхари.

22 Авиля вряма, кала Мария тай Иосифо жужардэпэ пав Моисеехкэрэ Упхэнима, тай тунчи вонэ лиджялдэ Чяворэ дэ Ерусалимо, соб тэ свэнтисарэ Лэ Раести.

23 Сар чиндо дэ Дэвлэхкэрэ Упхэнима: «Чяворэ, саво бэняпэ англуно, трэбуни тэ свэнтисарэ Раести».

24 И тэ анэ свэнто жэртва, дон голубонэн чи дон голубонэнгэрэ пуицен, сар пхэндо дэ Упхэнима Раехкэрэ.

Симеоно тай Анна пхэнэн лав Дэвлэстар

25 Тунчи джювда дэ Ерусалимо екх мануш, савэ аххарэнас Симеоно. Вов сля дэвликуно тай жужэ їлэга и дожутярэлас, со Дэвэл подрицарэла Израиле, тай Свэнто Фано сля пэ лэстэ.

26 Свэнто Фано пхэнда лэсти, со вов на мэрэла ды кодэлэ, сар на удыххэла Христо Дэвлэхкэрэ.

27 Лэ лиджялда Свэнто Фано дэ храмо, кала дад и дэй андэ Чяворэ Иусо, соб тэ стерэ вса, сар трэбуни пав Упхэнима.

28 Симеоно лиля Чяворэ пэ вастэн, ваздэня слава Дэвлэсти тай пхэнда:

29 — Акана отмукех Ту, Дэвла, Хулае, Тирэ бутярнэ и дэх лэсти пачя кади, сар Ту и пхэндан.

30 Колэсти со дыкхле мурэ якса фирисаримо Тиро,

31 саво Ту лачярдан англа всавэрэн манушэн.

32 Вов — одуд,

саво дэла душлимо важ всавэрэ народуря и анэла слава Тирэ манушэнди, Израилести.

33 Дад и дэй прылиле пала дыво лава, савэ Симеоно пхэнда пала Чяворэ.

34 Тунчи Симеоно пхэнда бахталэ лава лэнди тай дэдуманя Марияти, Иусоохкиря дати:

— Важ Кадэлэ Чяворэ, Саво пашлёл катэ, бут манушэн дэ Израили тэлэдэна и бут ваздэнапэ. И тути еджиняти чюри заджяла дэ їлэ.

35 Вов авэла сар шпэра, сави бут мануша на прылэна. И оттерэлапэ вса чёрахано, со мануша рицарэн пэстэ дэ їлэн.

36 Катэ кади ж сля и англунарька Анна, чей Фануилохкири, Асирохкэрэ родостар. Вой сля манушни дэ пуранэн бэршэн, сави выджиля паларом тэрня чяга и пэхкэрэ ромэга проджювда эфта бэрш.

37 Тунчи латэ муля ром, и вой джювда еджини охтодэша штар бэрш. Диво и рят вой терэлас бути важ Дэвлэ, сля дэ мангима и посто и на уджялас храмостар.

38 Дэ кодыя вряма вой поджиля и ачяля тэ ашарэ Дэвлэ. Тай розпхэнэлас пала Чяворэ всавэрэнди, савэ дожутярэнас фирисаримо важ Ерусалимо.

39 Кала Мария и Иосифо стердэ Чяворэга вса пав Упхэнима Раехкэрэ, тунчи рисиле павпалэ дэ Галилея, дэ пэхкоро форо Назарето.

40 Чяворо ж барёлас тай бэршэнца прылэлас бари годи и зор, тай Дэвлэхкоро мицимо сля Лэга.

Чяворо Иусо пэ сырботори Патради

41 Иусоохкэрэ дад и дэй кожно бэрш пхирэнас пэ Патради дэ Ерусалимо.

42 И кала Лэсти сля дэшудуй бэрш, вонэ джиле дэ Ерусалимо пэ сырботори, сар сля прылито.

43 А кала проджиля сырботори и вонэ рисявэнас цэрэ, Чяворо Иусо ачяляпэ дэ Ерусалимо, нэ дад и дэй на додыкхле када.

44 Нэ думисардэ, со Вов джял аврэ манушэнца. Кала ж проджиле екх диво дромэга, тунчи ачиле тэ родэ Лэ машкар пэхкэрэн манушэн и джянглэн.

45 Тай на аракхле Лэ, тунчи рисиле дэ Ерусалимо и родэнас Лэ котэ.

46 Кала проджиле трин дивэ, аракхле Лэ дэ храмо. Вов бэшэлас сиклимаренца, шунэлас лэн тай пхучелас лэндэ.

47 Всаверэ шунэнас Лэ тай дэнас дыво Лэхкэрэ годяти тай лавэнди.

48 Кала дад и дэй удыххле Лэ, прылиле када пала баро дыво. Тунчи Лэхкири дэй пхэнда Лэсти:

— Чяворо! Со Ту стердан амэнца? Мэ тай дад Тиро родагас Тут баря дукхага дэ йлэн.

49 Вов пхэнда лэнди:

— Пэ со тумэ родэнас Ман? Чи на джянэн тумэ, со Манди трэбуни тэ авэ дэ цэр Мурэ Дадэстэ?

50 Нэ вонэ на полиле, пала со Вов пхэнда.

51 Вов рисила лэнца дэ Назарето тай сля кандуно лэнди. Лэхкири ж дэй стидэлас кодэла лава дэ пэхкэрэ йлэ.

52 Иусо барёлас, и Лэхкири годи ачелас барэдэр, а Дэвэл и мануша камэнас Лэ вса будэр и будэр.

3

Иоанно Болдэмари терэл бути важ Дэвлэ

1 Пэ дшупанчто бэрш, кала Тиверии сля императоро, и кала Понтии Пилато сля барэдэрэга дэ Иудея, а Иродо сля тетрархо дэ Галилея, лэхкоро пхрал, Филиппо, сля тетрархо дэ Итурея тай дэ пхув Трахонитско, а Лисании сля тетрархо дэ Авилияния.

2 Англунэ рашаенца тунчи сле Аннас тай Каиафа. Дэ кодыя вряма бичалдо сля Лав Дэвлэхкоро дэ шуки пхув Иоанностэ, Захарияхкэрэ чывэстэ.

3 Иоанно пхирэлас пав всавири пхув паша Иордано, прыакхарэлас манушэн тэ отрисявэ бэзимастар тай тэ болдэпэ, соб Дэвэл тэ эртисарэл лэнгоро бэзимо.

4 Сар чинда англунари Исаия:

«Гласо дэ шуки пхув типисявэл:

Лачярэн дром Раести,

терэн важ Лэ чяче дромора.

5 Тхана, савэ машкар плаен, — ваздэнапэ,

а вуче пляя тай цыкнэ плаёра — тэлёна,

бангэ дрома — выцырдэнапэ,

и помардэ дрома — авэна лачярдэ.

6 Тунчи всавэрэ мануша дыкхэна фирисаримо Дэвлэхкоро».

7 Иоанно пхэналас манушэнди, савэ авиле лэстэ тэ болдэпэ:

— Родо сапэнгоро! Ко пхэнда тумэнди тэ наше бидатар, сави пэ тумэн джял?

8 Мэк тумарэ рьндуря сикавэн, со тумэ ачявдэ бэзимо, и на думисарэн: «Амаро дад исин Авраамо». Пхэнав тумэнди, со Дэвлэстэ исин зор кадэла барэндар тэ терэ чявэн Авраамости.

9 Акэ, товэр лачярдо и тала каштэнгоро корни пашлёл: кожно кашт, саво на анэл лачё барило, сцинэн и чувэн дэ яга.

10 Пхученас лэ мануша:

— Со амэнди тэ терэ?

11 Вов пхэнда лэнди:

— Кастэ исин дуй гада, отдэ екх кодэлэсти, кастэ нэнай. И кастэ исин хамо, дэ епаш кодэлэсти, кастэ нэнай.

12 Авиле тэ болдэпэ стидэмаря, савэ лэнас налогоуря, тай пхучле лэстар:

— Сиклимари! Со амэнди тэ терэ?

13 Вов пхэнда лэнди:

— На лэн манушэндар будэр, сар тумэнди прыпхэндэ тэ лэн!

14 Пхученас лэ и халавдэ:

— Со амэ тэ терах?

Вов пхэнда лэнди:

— На залэн манушэндар зорага, на дошарэн манушэн ївья и джювэн пэ ловэн, савэ потинэн тумэнди.

15 Мануша дожутярэнас тай гинисардэ пала Иоанно:

— Чи на Христосо вов исин?

16 Иоанно пхэнда всавэрэнди:

— Мэ болдав тумэн панега, нэ джял пала ман зорэдэр мандар, мэ на ачяв тэ розпхэндэ Лэсти пундрангэ. Вов болдэла тумэн Свэнтонэ Фанога тай ягага.

17 Каштуни ганавди дэ вастэ Лэстэ, тай Вов жужарэла див и стховэла ла дэ граждо, а кода, со ачиляпэ, спхабарэла дэ яга, савя нащи тэ мурдарэ.

18 Бут инте со пхэнэлас Иоанно, кала дэдумэлас Бахтало Лав.

19 Кала ж Иоанно дошарда Иродо, саво сля тетрархо, пала кода, со вов лиля пала пэ пхралэхкиря ромня, и пала авэр налаче рындурия,

20 тунчи Иродо додэня пэхкэрэ бэзимастэ инте кода, со чута Иоанно дэ барунэ.

Исусо болдэллэ

21 Кала болдэнепэ всавэрэ мануша, болдэняпэ кади ж Исусо. И кала Вов мангэласпэ, оттердапэ упралимо,

22 и Свэнто Фано сджиля упрал пэ Исусо, сар голубо, тай сля гласо упралимастар, саво пхэнэлас:

— Ту — Муро камло Чяво! Ту — Мури бари бахт!

Родо Исусохкоро

23 Кала Исусо ачиля тэ терэ бути важ Дэвлэ, Лэсти сля пашэ трянда бэрш. Сар думисарэнас, Вов сля Иосифохкоро Чяво. И Лэхкэрэ пхурэнца сле Илья,

24 Матфато, Левии, Мелхии, Ианнаи, Иосифо,

25 Маттафия, Амосо, Наумо, Еслии, Наггеи,

26 Маафо, Маттафия, Шымьи, Иосифо, Иодаи,

27 Иоханано, Рисаи, Зоровавели, Шэалтиило, Нирии,

28 Мелхии, Аддии, Косамо, Элмадамо, Иро,

29 Иосии, Элиезеро, Иоримо, Матфато, Левии,

30 Симеоно, Иуда, Иосифо, Ионамо, Элиакимо,

31 Мелеаи, Маинаи, Маттафаи, Нафано, Давидо,

32 Иессеи, Овидо, Боазо, Сала, Нахшоно,

33 Аминадаво, Админо, Арнии, Хецроно, Парецо, Иуда,

34 Иаково, Исаако, Авраамо, Терахо, Нахоро,

35 Серуго, Реуо, Пелего, Еверо, Шэлахо,

36 Каинано, Арпахшадо, Симо, Нои, Ламехо,

37 Мафусало, Енохо, Иаредо, Малелеило, Каинано,

38 Еносо, Сифо, Адамо, Дэвэл.

4

Баро бэнг зумавэл Исусо

1 Исусо, пхэрдило Свэнтонэ Фанога, рисиля Иорданостар тай лиджялдо сля Фанога дэ шуки пхув.

2 Котэ Лэ саранда дивэ зумавэлас баро бэнг. Всаверэ кадэла дивэ Вов нисо на халас тай ачиля бокхало.

³Тунчи пхэнда Лэсти баро бэнг:

— Кала Ту — Дэвлэхкоро Чяво, тер мандро кадэлэ барэстар.

⁴Пхэнэл лэсти Иусо павпалэ:

— Чиндо: «На кици мандрэга джювэл мануш».

⁵Тунчи ваздэня Лэ баро бэнг пэ вучё плай тай сикавда Лэсти всавэрэ тхагарима, савэ исин пэ люмля, пала цыро вряма.

⁶Тай пхэнда Лэсти баро бэнг:

— Мэ отдава Тути всавэрэ зор тай слава, савэ исин дэ кадэлэн тхагаримэн. Вса када дэно манди, и мэ када дав, касти камав.

⁷Вса када авэла Тиро, кала Ту тэлэга англа ман.

⁸Иусо пхэнда лэсти:

— Чиндо: «Рае Дэвлэсти тэлюв тай кици Лэсти тер тири бути».

⁹Тунчи баро бэнг лиджялда Лэ дэ Ерусалимо, тховда пэ майвучё тхан дэ храмо тай пхэнда Лэсти:

— Кала Ту — Дэвлэхкоро Чяво, тунчи хук тэлэ.

¹⁰Колэсти со чиндо:

«Ангелонэнди Пэхкэрэнди Вов прыпхэнэла тэ фирисарэн Тут».

¹¹«Пэ вастэн пхиравэна Тут, тэ на дукхавэлпэ барэстар пура Тиро».

¹²Иусо пхэнда лэсти павпалэ:

— Пхэндо: «На зумав Тирэ Рае Дэвлэ».

¹³Тунчи баро бэнг пэрэачиля тэ зумавэ Лэ тай оджиля Лэстар пэ вряма.

Иусо ачел тэ сиклярэ дэ Галилея

¹⁴Тунчи Иусо рисиля дэ Галилея, пхэрдило зорага Фаностар, тай розджиляпэ пала Лэ дума пав савири кодья пхув.

¹⁵Вов сиклярэлас дэ синагоги, тай всавэрэ ашарэнас Лэ.

Иусо на прылэн дэ Назарето

¹⁶Тунчи Иусо авиля дэ Назарето, тев Вов выбариля, и, сар Лэстэ сля прылито, дэ суббота заджиля дэ синагога тай вщиля, соб тэ динэ.

¹⁷Лэсти дэне лил, саво чинда англунари Исаия. Иусо оттерда лэ тай аракхля тхан, тев сля чиндо:

¹⁸— Фано Раехкоро пэ Ман, колэсти со Вов помакхля Ман тэ пхэнэ Бахтало Лав чёрэнди. Вов бичалда Ман тэ дэдүмэ спханглэ манушэнди, со лэн отмукэна пэ воля, корэнди, со авэна тэ дыкхэ, и тэ фирисарэ кодэлэн, савэ хан грыжа,

¹⁹тай тэ розпхэнэ, со авиля лачи вряма Раехкири.

²⁰Тунчи Иусо стховда лил, оддэня павпалэ бутярнэсти дэ синагога тай бэшля. Тай всавэрэ ды екхэ дэ синагога дыкхэнас пэ Лэстэ.

²¹Тай ачиля тэ дэдүмэ лэнди:

— Авдивэ стердапэ пав лавэн, савэ тумэ шүндэ екхатар.

²²Всавэрэ ашарэнас Лэ тай фартэ лошавэнас Лэхкэрэ бахталэ лавэнди. Тай пхэнэнас:

— Чи на Иосифохкоро Вов Чяво?

²³Иусо пхэнда лэнди:

— Түмэ дэна Манди пэ гындо лав, сар мануша пхэнэн: «Састимари, састяр еджино пэ!» И кади ж пхэнэна: «Амэ шүндэ, со Ту тердан дэ Капернаумо. Стер када и катэ, тев Ту выбарилян».

24 Нэ пхэнав тумэнди чячимо: ни екхэ англунаре на прылэн котэ, тев вов бариля.

25 Пхэнав тумэнди чячимо: дэ вряма, кала джювда Илья, дэ Израили сля бут джювлен, савэндэ муле рома. Тунчи трин епашега бэрш на сля брышынд, тай пав всавири пхув сля бари бох.

26 Тай никастэ лэндар на сля бичалдо Илья, кици дэ Сарепта паша Сидоно джювлятэ, савятэ муля ром.

27 Кади ж дэ Израили бут сля насвалэн, пэ савэн сля проказа, кала джювда англунари Елисеи. Тай нико лэндар на састярдапэ, кици екх Неемано Сириятар.

28 Кала мануша дэ синагога шундэ кадэла лава, вонэ фартэ мижыле.

29 Тунчи вонэ всукле тай поцырдене Иусо аври пэ плай, пэ савэ сля ваздэно форо, соб тэ счувэ тэлэ.

30 Нэ Вов проджиля машкар лэн тай уджиля котарь.

Иусо вытрадэл бэнгэ манушэстар

31 Тунчи Иусо джиля дэ форо Капернаумо, саво дэ Галилея, тай дэ суббота сиклярэлас котэ манушэн.

32 Тай динэнас пала дыво сикляримо Лэхкоро, колэсти со дэ Лэхкэрэ лавэн сля бари зор.

33 Котэ, дэ синагога, сля мануш, дэ савэ сля нажужэ бэнгэхкоро фано. Тай вов фартэ затипсиля:

34 — Ааа! Со Тути трэбуни амэндар, Иусо Назаретостар? Ту авилян, соб тэ хасярэ амэн? Мэ джянав, Ко Ту Кацаво! Ту — Свэнто Дэвлэхкоро!

35 Нэ Иусо заххэнда лэсти:

— Заач мулком тай выдзя лэстар!

Тунчи бэнг аравда манушэ англа всавэрэн пэ пхуя, тай выджиля лэстар, тай на стерда манушэсти нисави беда.

36 Тунчи дэня пэ всавэрэн бари дар, тай пхэнэнас екх екхэсти:

— Катарь дэ Лэхкэрэ лавэн кацави бари зор, со Вов прыпхэнэл нажужэнди тай вонэ кандэн Лэ?

37 Тай дума пала Иусо розджиляпэ пав всавири кодья пхув.

Иусо састярэл бутэн манушэн

38 Тунчи Вов ачявда синагога тай джиля Симоностэ цэрэ. Симонохкири пхуромни пашлёлас насвали дэ пхабарима. Тай мангле Иусо, соб Вов тэ састярэл ла.

39 Вов тэлиля латэ тай прыпхэнда пхабаримасти тэ ачявэл ла. Тунчи пхабаримо ачявда ла, тай джювли екхатар уциля и ачиля тэ стидэ важ лэн скаминд.

40 Кала бэшэлас кхам, ачиле тэ анэ Иусостэ фартэ насвалэн манушэн. Вов тховэлас пэ лэндэ васта тай састярэлас лэн.

41 И бутэ манушэндар выджнянас бэнга тай типисьявэнас:

— Ту — Чяво Дэвлэхкоро!

Нэ Иусо пхандэлас лэнди муя тай заххэнэлас тэ дэдумэ, колэсти со вонэ джянгле, со Вов — Христосос.

Иусо джял дэ аврэн форонэн

42 Кала авиля диво, Иусо джиля дэ шуки пхув, нэ мануша родэнас Лэ. Тай кала аракхле, мангэнас Лэ, соб тэ ачелпэ лэнца.

43 Нэ Иусо пхэнда лэнди:

— Манди трэбуни тэ пхэнэ Бахтало Лав пала Дэвлэхкэрэ Тхагарима и дэ аврэн форонэн. Пэ кадэва рындо Мэ и слём бичалдо.

44 Тай сиклярэлас дэ синагоги пав Иудея.

5

Сиклярнэ астарэн бут мачен

¹ Екхвар Исусо ачиля паша Генисаретско озеро, тай бут манушэн стидэнепе паша Лэстэ, соб тэ шунэ Дэвлэхкоро Лав, и стасавэнас Лэ всавэрэ ригэндар.

² Вов удыхля дуй лодкы пэ пане паша пхуя и мачярэн, савэ выджиле лодкэндар и халавэнас кхувдя.

³ Исусо заджиля дэ Симонохкири лодка тай помангля Симоно тэ отлиджял ла пав пане надур пхуятар. Тунчи бэшля и лодкатар ачиля тэ сиклярэ манушэн.

⁴ Кала ж пэрэачиля тэ сиклярэ, пхэнда Симоности:

— Отлиджя лодка дурэдэр пхуятар, тев будэр пани, тай зачув кхувдя тэ астарэн мачё!

⁵ Симоно пхэнэл Лэсти:

— Пхурэдэр амаро! Амэ всавири рят терагас пхари бути и камле тэ астарэ мачё, тай вса ивьэ. Нэ сар Ту пхэнэх, мэ кандава Тут тай инте зачувава кхувди.

⁶ Кала вонэ кади стердэ, тунчи астардэ фартэ бут мачен, пэ скици бут, со кхувди ачиля тэ чинэпэ.

⁷ Тунчи вонэ сикавдэ вастэнца амалэнди, савэ сле пэ авэр лодка, соб тэ подрицарэн лэн. Кодэла авиле тай йтханэ зачутэ пхэрдо мачё дэ лэдуи лодкы, кади со лодкы ачиле тэ тасё.

⁸ Кала дыкхля вса откада Симоно Пётро, вов тэлиля Исусохкэрэ чянгэндэ тай пхэнда:

— Выдья мандар, Рае! Кодэлэсти со мэ мануш дэ бэзима!

⁹ Бари дар дэня пэ лэстэ тай пэ всавэрэн, ко дыкхля, скици мачё вонэ астардэ.

¹⁰ Трашане кади ж амала Симонохкэрэ, Иаково тай Иоанно, Зеведеехкэрэ чывэ. Нэ Симоности Исусо пхэнда:

— На дар. Акана манушэн авэга тэ астарэ.

¹¹ Тунчи вонэ выщырдене лодкы пэ пхув, ачявдэ вса тай джиле пала Исусо.

Исусо састярэл манушэ дэ проказа

¹² Екхвар Исусо сля дэ екх форо. Тунчи авиля Лэстэ мануш, пэ савэстэ сля насвалимо проказа. Вов пэля англа Исусо пэ муй тай мангля Лэ мангимага:

— Рае! Коли закамэга, Ту жужарэга ман!

¹³ Исусо процырдэня васт, лиляпэ лэстэ тай пхэнда:

— Камав, жужарпэ!

Тунчи проказа екхатар сджиля лэстар.

¹⁴ Исусо прыпхэнда лэсти:

— Никасти на розпхэн пала кода, нэ джя, сикавпэ рашаести тай ан жэртва пала кода, со жужарданпэ, сар пхэнда Моисеи, соб вонэ када тэ дыкхэн.

¹⁵ Нэ инте будэр розджиляпэ дума пала Исусо, тай фартэ бут манушэн джянас Лэстэ, соб тэ шунэ Лэхкэрэ лава тай тэ састярэпэ бутэ дукхэндар.

¹⁶ Нэ Вов уджялас дэ тханэн, тев манушэн на сля, соб тэ мангэлэпэ.

Исусо састярэл манушэ, саво на пхирэлас

¹⁷ Екхвар, кала Исусо сиклярэлас манушэн, котэ сле фарисея тай сиклимаря пав Упхэнима. Вонэ авиле всавэрэ тханэндар Галилеятар, Иудеятар тай Ерусалимостар. И зор Раехкири сля пэ Исусо, соб тэ састярэ манушэн.

¹⁸ Тай акэ, андэ пэ пато насвалэ, саво на пхирэлас, тай камле тэ залиджя лэ дэ цэр тай тэ тховэ англа Исусо.

¹⁹ Тай на аракхле, сар тэ анэ лэ дэ цэр, колэсти со фартэ бут манушэн сля паша цэрэ. Тунчи вонэ ваздэнепэ упрэ пэ цэр, розлиле ушарди тай змукле насвалэ пэ пато англа Исусо.

²⁰ Кала Вов удыхля лэнгоро патявимо, тунчи пхэнда насвалэсти:

— Мануша! Отмукэлпэ тути тиро бэзимо.

21 Сиклимаря пав Упхэнима тай фарисея ачиле тэ дэдүмэ еджинэ пэсти дэ гындо:

— Ко Вов исин, со дэдүмэл қацавэ бэзимахкэрэ лава? Кици Дэвлэстэ исин зор тэ эртисарэ бэзимо манушэсти!

22 Исусо полиля, со лэндэ дэ гындо, тай пхэнда лэнди:

— Сости тумэ гинисарэн кади дэ тумарэн ілэн?

23 Со локхэдэр, тэ пхэнэ: «Отмукэлпэ тиро бэзимо», — чи тэ пхэнэ: «Вщи тай пхир»?

24 Нэ соб тумэ тэ джянэн, со Манушыканэ Чявэстэ исин зор тэ эртисарэ бэзимо, — пхэнда Вов насвалэсти:

— Тути пхэнав: Вщи, лэ пато тиро тай джя цэрэ!

25 Тунчи Вов екхатар вщиля англа лэндэ, лиля кода, пэ со пашлёлас, джиля цэрэ и ваздэлас слава Дэвлэсти.

26 Тунчи и вонэ ваздэнас Дэвлэсти слава тай пхэнэнас:

— Авдивэ амэ пэхкэрэ якхэнца дыкхле кода, со на сля никала!

Исусо акхарэл Левие

27 Пала кадэлэ Исусо выджиля тай удыхля стидэмаре, саво лэлас налогуря, акхарэнас лэ Левии. Вов бэшэлас паша тханэ, тев здэнас налогуря. Тай пхэнда лэсти Исусо:

— Джя пала Ман!

28 Вов ачявда вса тай джиля пала Исусо.

29 Тунчи Левии тховда важ Исусо баро скаминд пэстэ цэрэ. Лэнца пала скаминдэ сля бут аврэн манушэн и стидэмарен.

30 Фарисея тай сиклимаря пав Упхэнима сле дэ холя и пхученас Исусохкэрэ сиклярнэн:

— Сости тумэ хан и пэн стидэмаренца тай бэзимахкэрэ манушэнца?

31 Исусо пхэнда лэнди:

— На састэ манушэнди трэбуни састимари, нэ насвалэнди.

32 Мэ авилём тэ прыакхарэ, соб тэ обрисьявэнпэ Дэвлэстэ на бидошакэрэ мануша, а кодэла, савэ джювэн дэ бэзима.

Исусо пхэнэл пала посто

33 Тунчи вонэ пхэндэ Исусости:

— Иоаннохкэрэ тай фарисеенгэрэ сиклярнэ мангэнпэ тай рицарэн посто, а Тирэ сиклярнэ хан тай пэн.

34 Исусо пхэнда лэнди:

— Сар тумэ пхэнэна пэ бьяв манушэнди тэ рицарэн посто, кала лэнца тэрно?

35 Нэ авла вряма, кала лэндар залэлапэ тэрно, тунчи авна тэ рицарэ посто.

36 Тунчи Вов пхэнда лэнди қацави дума:

— Нико на прысювэл пураня ідатэ котор, саво отчиндо нэвя ідатар. Кодэлэсти со тунчи и нэви іда мусарэла, и пуранятэ на поджяла.

37 Нико на чувэл тэрно мол дэ пурано гравличко гоноро, колэсти со и гоноро пхарола, и мол розчувэлапэ.

38 Нэ тэрно мол чувэн дэ нэвэн гравлицикунэн гонорэн.

39 Тай нико на закамэла тэ пэ тэрно мол, кала зумавда пурано мол, нэ пхэнэла: «Пурано фэдэр».

6

Исусо терэл буту дэ суббота

1 Екхвар дэ суббота джялас Исусо сиклярнэнца маляга, а сиклярнэ сцинэнас див, розкхосэнас вастэнца тай ханас ворзо.

2 Койсавэ фарисеендар пхэндэ Лэсти:

— Сости тумэ терэн кода, со нащи тэ терэ дэ суббота?

³ Иусо пхэнда лэнди:

— Тумэ со, на динэнас, со терда Давидо, кала вов тай лэхкэрэ мануша ачиле бокхалэ?

⁴ Вов заджила дэ Дэвликуно Цэр, лиля мандро, свэнтисардо Дэвлэсти. Вов еджино лэ халы тай дэня пэхкэрэ манушэнди. А кодэва мандро нащи никасти сля тэ ха, кичи рашаенди.

⁵ Тунчи Иусо пхэнда лэнди:

— Чяво Манушыкано исин субботакоро Хулай.

Иусо састярэл дэ суббота

⁶ Дэ авэр суббота Иусо заджила дэ синагога тай ачила тэ сиклярэ. Котэ сля екх мануш, савэстэ чячэ васт сля шуко.

⁷ Сиклимаря пав Упхэнима тай фарисея дыкхэнас пала Иусо, чи састярэла Вов дэ суббота, соб тэ дошарэ Лэ.

⁸ Нэ Вов джянэлас лэнгоро гындо тай пхэнда манушэсти шукэ вастэга:

— Вщи тай выдзя машкар!

Мануш подлиляпэ тай ачила машкар.

⁹ Тунчи Иусо пхэнда лэнди:

— Пхучяв тумэн: трэбуни дэ суббота тэ терэ лачимо чи бибахт? Тэ фирисарэ води чи тэ мулярэ?

¹⁰ Тунчи Вов подыкхля пэ всавэрэн тай пхэнда манушэсти:

— Процырдэ тиро васт!

Вов стерда кади, и васт ачила састо.

¹¹ Вонэ фартэ мижыле тай ачиле тэ дэдумэ екх екхэга, со лэнди тэ терэ Иусога.

Иусо вытидэл дэшудуен апостолонэн

¹² Дэ кодэлэн дивэн Иусо джила пэ плай тэ мангэпэ тай мангляпэ Дэвлэсти котэ всавири рят.

¹³ Кала авиля диво, Иусо акхарда Пэхкэрэн сиклярэнэн тай вытидэня лэндар дэшудуен, савэнди дэня лав «апостолуря»:

¹⁴ Симоно, савэ акхарэнас Пётро, лэхкоро пхрал Андреи, Иаково, Иоанно, Филиппо, Варфоломеи,

¹⁵ Матфеи, Фома, Иаково Алфеехкоро, Симоно, пэ савэ пхэнэнас «Зилото»,

¹⁶ Иуда Иаковохкоро тай Иуда Искариото, саво ачила здымарэга.

Ко исин бахталэ, тай ко исин бибахталэ

¹⁷ Тунчи Иусо змукляпэ лэнца плаестар пэ маля. Паша Лэстэ стидэняпэ фартэ бут манушэн: Лэхкэрэ сиклярнэ, мануша всавири Иудейтар тай Ерусалимостар, кади ж Тиростар тай Сидоностар, форонэндар, савэ ачен паша море.

¹⁸ Вонэ авиле тэ шунэ Лэхкэрэ лава тай тэ састярэпэ пэхкэрэ дукхэндар. Тай мануша, савэн марэнас нажужэ, састярэнаспэ.

¹⁹ Всаверэ вонэ камле тэ лэпэ Иусостэ, колэсти со Лэстар выдзялас бари зор тай састярэлас манушэн.

²⁰ Тунчи Иусо подыкхля пэ Пэхкэрэн сиклярнэнэн тай пхэнда:

— Бахталэ тумэ, чёrorэ!

Тумаро исин Тхагаримо Дэвлэхкоро.

²¹ Бахталэ тумэ, бокхалэ акана!

Тумэ авэна чялярдэ.

Бахталэ, савэ ровэн акана!

Тумэ авэна тэ лошавэ.

²² Бахталэ тумэ,

кала мануша тумэн на камэна,

кала авэна тэ вытрадэ тумэн,

тэ кошэ тумаро лав,
тэ пхэнэ пэ тумэн налаче лава пала Чявэ Манушыканэ.

²³ Кадики ж теренас англунаренца и дада кадэлэ манушэнгэрэ! Лошавэн тунчи тай хукэн лошатар! Бари цимин потинэна тумэнди пэ упралима.

²⁴ Нэ бида тумэнди, барвалэ!
Тумэ катэ ужэ чялиле джювимага.

²⁵ Бида тумэнди, чялэ!
Тумэ авэна бокхалэ.

Бида тумэнди, ко асалпэ акана!
Тумэ авэна тэ ровэ
и ваздэна типимо дэ грыжа.

²⁶ Бида тумэнди,
кала авэна тэ ашарэ тумэн всавэрэ мануша!
Колэсти со лэнгэрэ дада кади ж ашарэнас хохавнэн англунарен.

Исусо сиклярэл тэ камэ врыжымашэн

²⁷ Тумэнди, ко шунэн, Мэ пхэнав: камэн тумарэн врыжымашэн. Терэн лачимо кодэлэнди, ко тумэн на камэн.

²⁸ Пхэнэн бахталэ лава кодэлэнди, савэ придэн тумэн мрая. Мангэн Дэвлэ пала кодэлэн, ко акошэл тумэн.

²⁹ Ко дэла палма тут пав екх чямни, бандяр лэсти авэр. Ко залэл тутар упралуни їда, дэ лэсти тэ отлэ и гад тиро.

³⁰ Всавэрэнди, ко мангэл тутэ, дэ. Кодэлэстар, ко отлэл тутар, на манг павпалэ.

³¹ Сар тумэ камэн, соб тумэнди тэ терэн мануша, кади и тумэ терэн лэнди.

³² Кала камэн кици кодэлэн, ко камэл тумэн, пала со тумэн тэ ашарэ? Кади ж мануша дэ бэзима камэн кодэлэн, ко лэн камэл.

³³ Кала терэн лачимо кодэлэнди, ко тумэнди терэл лачимо, пала со тумэн тэ ашарэ? Мануша дэ бэзима кади ж терэн.

³⁴ Кала дэн ловэ дэ вуджилима кодэлэнди, кастар думисарэн тэ лэ павпалэ, тунчи пала со тумэн тэ ашарэ? Мануша дэ бэзима кади ж залэн кодэлэнди, кастар думисарэн тэ лэ павпалэ.

³⁵ Нэ тумэ камэн тумарэн врыжымашэн, терэн лачимо лэнди, залэн дэ вуджилима тай на дожутярэн, со тумэнди отдэна павпалэ. Тунчи бари цимин тумэнди потинэна. Тумэ авэна Барэдэрэхкэрэ чявэнца, колэсти со Вов терэл лачимо и налаченди, и мижэнди.

³⁶ Сар ковло їло тумарэ Дадэстэ, кади тумэ ковлисарэн тумарэ їлэ манушэндэ.

Исусо сиклярэл, со наци тэ сундисарэ манушэн

³⁷ На сундисарэн, тай еджинэ на авэна сундисардэ. На дошарэн, тай тумэн на дошарэна. Эртисарэн, тай тумэнди авэла эртисардо.

³⁸ Дэнтэ, и тумэнди дэлапэ. Дэлапэ дэ бэрг тумэнди пхэрдо, кади чувэлапэ, со авэла прытасавдо и авэла тэ вычувэпэ аври. Сар тумэ дэна, кади и тумэнди дэно авэла.

³⁹ Тунчи Исусо пхэнда кацави дума:

— Чи лиджяла коро корэ? Чи на пэрэна вонэ лэдуи?

⁴⁰ Сиклярно на барэдэр сиклимарестар, нэ сар высиклэлапэ, авэла, сар сиклимари.

⁴¹ Со ту дыкхэх сулуморы дэ якха тирэ пхралэстэ, нэ дэ пэхкиря якха баро кашт на дыкхэх?

⁴² Сар пхэнэга тирэ пхралэсти: «Пхрала, дэ, вылава сулуморы тиря якхатар!» — кала ту дэ пэхкиря якха баро кашт на дыкхэх? Домуенгоро, англал вылэ кашт тиря якхатар, тунчи мишто дыкхэга, сар тэ вылэ сулуморы якхатар тирэ пхралэстэ.

Дума пала лачэ барило

43 Лачё кашт на анэл цэрно барило. А цэрно кашт на анэл лачё барило.

44 Пав барило уджянэлпэ кашт. На стидэн инжыро пусанэ рандендар, на стидэн виноградо пусанэ чярендар.

45 Лачё мануш вылэл лачимо мицимастар, саво исин лэстэ дэ їлэ. Налачё мануш вылэл пэхкэрэ їлэстар бибакт. Кода, со пхэрдо дэ їлэ, выджял чибатар манушэстэ.

Цэр пэ барэ

46 Со тумэ акхарэн Ман: «Рае! Рае!» — а на терэн, сар Мэ тумэнди пхэнав?

47 Мэ пхэнава тумэнди, пэ кастэ счувэлпэ мануш, саво авэл Мандэ, ашунэл, со Мэ пхэнав, и терэл кода.

48 Вов — сар кодэва мануш, саво выганавда пхув ды барэн и ваздэня пэхкоро цэр пэ баруно фундаменто. Кала дэня пэ цэр баро пани лэнятар, вов на аравда цэр, колэсти со вов сля мишто стердо.

49 Мануш, саво шунэл Муру лав, нэ на джувэл пав лэ, счувэлпэ пэ манушэ, саво ваздэня цэр пэ пхуя. Тунчи дэня пэ цэр баро пани лэнятар, екхатар аравда кодэва цэр и фартэ розмарда лэ.

7

Исусо састярэл шэлякэрэ халавдэжкэрэ бутярнэ

1 Кала Исусо пэрэачила тэ дэдумэ манушэнди, Вов авила дэ Капернаумо.

2 Котэ сля екх шэлякоро пхурэдэр. Лэхкоро бутярно, саво важ лэ сля кучутно, фартэ занасвалила и сля пашэ мэримастэ.

3 Шэлякоро пхурэдэр шунда пала Исусо тай бичалда Лэстэ иудеенгэрэн пхурэдэрэн тэ мангэн Исусо, соб Вов тэ авэл и тэ састярэл бутярнэ.

4 Вонэ авиле Исусостэ, фартэ мангле Лэ и пхэнанс:

— Кадэва мануш ачел, соб Ту тэ терэх важ лэ кава рындо.

5 Колэсти со Вов камэл амаро народо тай ваздэня амэнди синагога.

6 Исусо джиля лэнца. Кала Вов сля пашэ цэрэстэ, шэлякоро пхурэдэр бичалда Лэстэ англал пэхкэрэн амалэн, соб вонэ тэ пхэнан:

— Рае! На трэбуни Тути тэ цинё! Мэ на ачяв, соб Ту тэ заджях мандэ дэ цэр!

7 Нэ мэ еджино на ачяв тэ авав Тутэ. Кици пхэн лав, и састярэлапэ бутярно муру.

8 Упрэ мандар исин пхурэдэра, савэн мэ кандав. Нэ исин мандэ халавдэ, савэ ман кандэн. Пхэнав екхэсти: «Джя!» — и вов джял. Пхэнав аврэсти: «Ав!» — и вов авэл. Пхэнав мурэ бутярнэсти: «Тер!» — тай вов терэла.

9 Исусо шунда кадэла лава, прылила пала дыво, обрисила тай пхэнда манушэнди, савэ джянас пала Лэ:

— Пхэнав тумэнди, со и дэ Израили на араклём Мэ кацаво патявимо.

10 Кала мануша, савэн бичалдэ Исусостэ, рисиле цэрэ, вонэ удыхкле, со насвало састярдапэ.

Исусо ваздэл мулэндар тэрнэ манушэ

11 Тунчи Исусо джиля дэ форо, саво акхарэлпэ Наино. Джянас пала Лэ бут Лэхкэрэн сиклярнэн и фартэ бут манушэн.

12 Кала Вов поджиля форохкэрэ вударэндэ, котарь вылидджянас тэ гаравэ тэрнэ чявэ. Вов сля екх пэхкиря датэ, савятэ муля ром. Фартэ бут манушэн кодэлэ форостар джянас їтханэ лага.

13 Кала Рай удыхкля ла, Лэсти ачила дор кадэла манушня. Тай пхэнда Вов лати: — На ров!

14 Тунчи Вов поджиля тай лиляпэ вастэга гробостэ. Мануша, савэ лиджянас гробо, ачиле. Вов пхэнда мулэсти:

— Чяво! Тути пхэнав, вщи!

15 Муло ваздэняпэ, бэшля тай ачиля тэ дэдүмэ. Тунчи Исусо отдэня лэ дати.

16 Пэ всавэрэн дэня бари дар. Вонэ ачиле тэ ваздэ слава Дэвлэсти тай пхэнэнас:
— Баро англунари ваздэняпэ машкар амэн, и Дэвэл авиля Пэхкэрэ манушэндэ.

17 Кади дэдүмане пала Исусо пав всавири Иудея тай дэ пхуен, савэ сле пашэ.

Исусо пхэнэл пала Иоанно

18 Иоаннохкэрэ сиклярнэ розпхэндэ Иоанности пала кода, со стердапэ. Иоанно акхарда дон пэхкэрэн сиклярнэн

19 тай бичалда Раестэ тэ пхучен Лэстар:

— Ту исин Кодэва, Касти трэбуни тэ авэ, чи трэбуни амэнди тэ дожутярэ аврэ?

20 Мурша авиле Исусостэ тай пхэндэ:

— Иоанно Болдэмари бичалда амэн тэ пхуче Тут: «Ту исин Кодэва, Касти трэбуни тэ авэ, чи трэбуни амэнди тэ дожутярэ аврэ?»

21 Дэ кодыя вряма Исусо бутэн манушэн састярэлас насвалимэндар и духхэндар, вытрадэлас налачен тай бутэ корэнди оттерэлас якха.

22 Тунчи Вов пхэнда Иоаннохкэрэ сиклярнэнди:

— Джян, пхэнэн Иоанности, со тумэ дыкхле тай шундэ: корэ дыкхэн, лангэ пхирэн, мануша дэ проказа жужарэнпэ латар, кашукэ шунэн, мулэ оджювдён, и чэрэнди пхэнэлпэ Бахтало Лав.

23 Бахтало кодэва, ко пала Ман на змарэлапэ дромэстар.

Исусо ашарэл Иоанно

24 Кала бичалдэ Иоанностар джиле, Исусо ачиля тэ пхэнэ манушэнди пала лэ:
— Со тумэ пхирдэ тэ дыкхэ дэ шуки пхув? Чяр, сави тинисявэл барвалятар?

25 А сар на кади, ка тумэ пхирдэ тэ дыкхэ: мануша дэ ковял їда? Нэ кодэла, савэ урвянпэ дэ райкани їда тай джювэн дэ барвалима, бэшэн дэ тхагарнэн цэрэн.

26 Ка тумэ пхирдэ тэ дыкхэ: англунаре? Кади, пхэнав тумэнди, вов барэдэр, сар англунаря.

27 Вов кодэва, пала кастэ чиндо:

«Акэ, Мэ бичалав Мурэ манушэ англа Тиро муй.

Вов лачярэла дром Тиро англа Тут».

28 Пхэнав тумэнди: машкар кодэлэн, савэ джювлендар бэнепэ, нэнай ни екхэ англунаре барэдэр Иоанностар. Нэ цыкнэдэр дэ Дэвлэхкэрэ Тхагарима исин барэдэр лэстар.

29 Всавэрэ мануша, савэ шундэ Исусо, тай стидэмаря прыджяngle, со Дэвлэхкоро дром исин чячюно. Тунчи болдэнепэ Иоаннохкэрэ болдимага.

30 А фарисея тай сиклимаря пав Упхэнима на прылиле Дэвлэхкири воля и на болдэнепэ.

31 Тунчи Рай пхэнда:

— Пэ кастэ счувэлпэ кадэва родо? Пэ кастэ счувэнпэ кадэла мануша?

32 Вонэ счувэнпэ пэ чяворэн, савэ бэшэн пэ форо, акхарэн екх екхэ тай пхэнэн:
«Амэ цэлдэ тумэнди пэ дудка,
нэ тумэ на цэлэнас пэ пурэн.
Амэ дилиябане тумэнди дилия ровимахкэрэ,
нэ тумэ на ровэнас».

33 Акэ, авиля Иоанно Болдэмари, на хал мандро и на пэл мол, а тумэ пхэнэн:
«Дэ лэстэ бэшэл бэнг».

34 Авиля Чяво Манушыкано, хал и пэл, а тумэ пхэнэн: «Акэ исин Мануш, Касти чялёл тэ ха и тэ пэ. Вов амал стидэмаренди тай бэзимахкэрэ манушэнди!»

35 Нэ кодэла, ко прылэн бари Дэвлэхкири годи, кадэлэга сикавэн, со када чячимо.

Джювли дэ бэзима макхэл кучутнэ мирога Исусохкэрэ пурэ

³⁶ Екх фарисеи акхарда Исусо скаминдэстэ, тай Вов заджиля лэстэ дэ цэр и залиля тхан пала скаминдэ.

³⁷ Тай акэ, екх джювли дэ бэзима кодэлэ форостар уджянгля, со Исусо дэ цэр фарисеестэ пала скаминдэ, анда алабастрово вакхор кучутнэ мирога.

³⁸ Вой вщиля павпалэ, паша Исусохкэрэн пурэн, заровиня, тай лакэрэ ясва ачиле тэ чюлё. А вой выкхосэлас Исусохкэрэ пурэ пэхкэрэ балэнца, чюминдэлас лэн и макхэлас мирога.

³⁹ Фарисеи, саво акхарда Исусо, удыхля када тай пхэнда пэсти дэ гындо: «Тэ авэл Кадэва Мануш чячимага англунари, Вов бы джянэлас, сави манушни Лэстэ лэлпэ тай дэ савэ бэзима вой джювлэ».

⁴⁰ Исусо пхэнда лэсти:

— Симоно! Камав тэ пхэнэ тути екх лав.

Кодэва дэдуманя:

— Пхэн, Сиклимари!

⁴¹ Исусо пхэнда:

— Екхэ хулаестэ дуй мануша залиле ловэ. Екх сля вуджило лэсти панчшэл динарии, ай авэр — пандэша.

⁴² Нэ сар лэндэ на сля ловэ, хулай эртисарда лэдуенди вуджилимо. Ко дуендар авэла будэр тэ камэ кадэлэ манушэ?

⁴³ Симоно пхэнда:

— Гинисарав, со кадэва, касти вов будэр эртисарда.

Исусо пхэнда:

— Тиро чячимо.

⁴⁴ Тунчи обрисиля манушнэтэ и пхэнда Симоности:

— Ту дыкхэх кадэла манушня? Мэ авилём дэ тиро цэр, и ту на дэнян Манди пани, соб Мэ пурэ тэ халавав. А вой ясвэнца обхалавда Манди пурэ и выкхосля лэн пэхкэрэ балэнца.

⁴⁵ Ту на чюминдан Ман, а вой всавири вряма, сар Мэ заджилём дэ цэр, на пэрэачел тэ чюминдэ Мурэ пурэ.

⁴⁶ Ту на помакхлян Муро шэро зэтога оливкэндар, а вой пурэ Манди помакхля кучутнэ мирога.

⁴⁷ Пхэнав тути: эртисардэ бут бэзима лакэрэ, кодэлэсти вой и покамля бут. Касти набут эртисарэлапэ, кодэва набут и камэла.

⁴⁸ Тунчи Исусо пхэнда джювляти:

— Эртисарэнпэ тути тирэ бэзима.

⁴⁹ Авэр мануша, савэ сле пала скаминдэ, ачиле тэ гинисарэ:

— Ко Вов Кацаво, соб бэзима тэ эртисарэ?

⁵⁰ Вов жэ пхэнда манушняти:

— Тиро патявимо тут фирисарда. Джя, и тэ авэл туга пачя!

8

Джювля джян пала Исусо

¹ Тунчи Исусо пхирэлас пав гавэн тай форонэн, сиклярэлас и розпхэнэлас Бахтало Лав пала Дэвлэхкэрэ Тхагарима. Паша Лэ сле дэшудуй апостолюря.

² Сле паша Лэстэ кади ж и джювля, савэндар Вов вытрадэня налачен тай састярда насвалимастар: Мария, савя акхарэнас Магдалина и савятар выджиле эфта бэнгэн,

³ Иоанна, ромни Хузохири, саво Иродостэ дыкхэлас пала цэр, Сусанна и бут аврэн джювлен, савэ подрицарэнас Исусо и сиклярэнэн пэхкэрэ барвалимага.

Дума пала манушэ, саво чувэл ворзэ дэ пхув

4 Екхвар, кала паша Иусо стидэняпэ бут манушэн, савэ авэнас Лэстэ бутэ форонэндар, Вов пхэнда кацави дума:

5 — Выджилия мануш тэ чувэ ворзо дэ пхув. Кала чувэлас, екх ворзо пэля паша дром. И койсаво ворзо чирикля упралимахкэрэ похале, а койсаво мануша тасавдэ пурэнца.

6 Авэр ворзо пэля пэ барэн тай сико барилия, нэ зашутулия, колэсти со котэ на сля пани.

7 Трито ворзо пэля машкар пусани чяр. Кодыя чяр барилия тай затасавда ворзо.

8 Штарто ворзо пэля дэ лачи пхув, ваздэняпэ тай анда барило дэ шэл молы будэр.

Тунчи Иусо пхэнда зоралэ гласога:

— Кастэ исин кана тэ шунэ, мэк шунэл!

9 Лэхкэрэ сиклярнэ пхучле Лэстар:

— Сар тэ полэ кадэла лава?

10 Вов пхэнда:

— Тумэнди дэно тэ джянэ чёраханэ лава пала Дэвлэхкэрэ Тхагарима. Ай аврэнди пхэнэлпэ дума,

соб вонэ тэ дыкхэн и тэ на удыхкэн,

тэ шунэн и тэ на полэн.

11 Акэ сар трэбуни тэ полэ кадыя дума. Ворзо — када исин Дэвлэхкоро Лав.

12 Ворзо, саво пэля паша дром, када исин мануша, савэ шунэн Лав. Нэ лэндэ авэл баро бэнг тай чэрэл Лав лэнгэрэ їлэндар, соб вонэ тэ на патян и тэ на фирисарэнпэ.

13 Ворзо, саво пэля пэ барэн, када мануша, савэ шунэн Лав тай прылэн лошага, нэ лэндэ нэнай корни. И набут вряма вонэ патян. Нэ кала авэл пхари вряма и вонэ зумавэнпэ, тунчи вонэ оджян Дэвлэстар.

14 Ворзо, саво пэля дэ пусани чяр, када мануша, савэ ашунэн Лав. Нэ пэ годя лэндэ кици, сар тэ джювэ пэ кадыя люмля и сар тэ затерэ барвалимо, и соб тэ авэл драго важ лэнгоро трупо. Вса када полонкхэ авэл и затасавэл Лав, и мануша на анэн барило.

15 Ворзо, саво пэля дэ лачи пхув, када мануша, савэ шунэн Лав, рицарэн лэ дэ лачё и пативало їло, вса пэрэлиджян и кодэлэсти анэн барило.

Дума пала лампа

16 Кала пхабарэн лампа, тунчи на тховэн ла тала вакхор чи тала пато. Нэ тховэн упрэ, соб мануша, савэ заджян, тэ дыкхэн одуд.

17 Нэнай нисо гаравдо, со на авэла аракхло, нэнай нисо чёрахано, со на авэла уджянгло и на выджяла аври.

18 Дыкхэн, сар тумэ шунэн! Кодэлэсти, кастэ исин, инте дэлапэ. А кастэ нэнай, лэстар залэлапэ и кода, со вов думисарэл, со лэстэ исин.

Чячюно Иусохкоро їри

19 Тунчи авиле Иусостэ Лэхкири дэй тай Лэхкэрэ пхрала и на поджиле Лэстэ, важ кода со паша Лэ стидэняпэ фартэ бут манушэн.

20 Тай пхэндэ Лэсти:

— Дэй Тири тай пхрала Тирэ ачен аври и камэн тэ дыкхэ Тут.

21 Иусо пхэнда лэнди:

— Мури дэй тай Мурэ пхрала исин кодэла, савэ шунэн Дэвлэхкоро Лав и терэн кади, сар вов пхэнэл.

Иусо улэл бари барвал

22 Екхвар Иусо заджила дэ лодка Пэхкэрэ сиклярнэнца тай пхэнда лэнди:

— Авэн пэ авэр риг.

Тай лагле.

23 Кала вонэ джянас пав пане пэ лодка, Иусо засута. Ваздэняпэ бари барвал пэ пане, лодка пхэрдэня панега, и вонэ ачиле тэ тасэ.

24 Поджиле Иусостэ, джюнгавдэ Лэ и пхэндэ:

— Сиклимари! Сиклимари! Амэ хасявах!

Иусо вщиля, запхэнда барваляти и барэ панести, саво ваздэласпэ. Тунчи барвал и пани улилэпэ, и вса заачилия мулком.

25 Тунчи Иусо пхэнда сиклярнэнди:

— Тев тумаро патявимо?

Вонэ фартэ дарэне, и лэнди на заджялас дэ шэрэ, со када терэлпэ. И вонэ кици пхэнэнас екх екхэсти:

— Ко исин Кадэва, со и барваляти запхэнэл, и панести, и вонэ кандэн Лэ?

Иусо вытрадэл нажужэн манушэстар

26 Тай авиле дэ пхув Гераса, сави исин пэ авэр риг Галилеятар.

27 Кала Иусо выджиля лодкатар, авиля Лэстэ форостар екх мануш, дэ савэ бэшэнас бэнга. Вов бут вряма пхирэлас нанго и джювлэлас на дэ цэр, нэ дэ склепо, тев мулэн гаравэнас.

28 Кала вов удыххла Иусо, чутапэ Лэхкэрэ пурэндэ тай затиписилия зоралэ гласога:

— Со Тути трэбуни мандар, Иусо, Чяво Дэвлэ Барэдэрэхкэрэ? Мангав Тут, на тер манди бида!

29 Вов типисилия, колэсти со Иусо прыпхэнда нажужэсти тэ выдджал манушэстар. Ай нажужо бут вряма марэлас кадэлэ манушэ, кади, со пхэндэнас лэхкэрэ васта и пурэ ланцога и дыкхэнас пала лэ. Нэ вов розчинэлас ланцурия, и бэнг традэлас лэ дэ мален.

30 Иусо пхучля лэстар:

— Сар тиро лав?

Вов пхэнда:

— Легионо, — колэсти со бут бэнгэн заджиле дэ лэ.

31 Тай мангле Иусо, соб Вов тэ на бичалэл лэн дэ хасютно тхан.

32 Котэ пэ плай чяравэнаспэ фартэ бут балэн, тай бэнга мангле Иусостар, соб лэнди тэ заджя дэ балэн. Иусо домукля лэнди.

33 Бэнга выджиле манушэстар тай заджиле дэ балэн. Тунчи всавэрэ балэ чутэпэ плаестар дэ пане тай потасиле.

34 Чукняря, савэ чяравэнас балэн, удыххле, со тердапэ, и тунчи прастэне и розпхэндэ пала кода дэ форо и пав гавэн.

35 Кала стидэнепэ мануша, соб тэ дыкхэ, со тердапэ, воне авиле Иусостэ тай дыкхле, со мануш, дэ кастэ сле бэнга, бэшэл дэ пурэн Иусостэ, урявдо и дэ пэхкиря годя, тай фартэ дарэне.

36 Ай кодэла, савэ еджинэ дыкхле, сар вса от када тердапэ, розпхэндэ лэнди, сар састярдапэ мануш, дэ савэ сле бэнга.

37 Всаверэ мануша кадэла пхуятар, сави акхарэлпэ Гераса, мангле Иусо, соб Вов тэ джял лэндар, колэсти со фартэ дарэне. Вов заджиля дэ лодка тай рисилия павпалэ.

38 Мануш, дэ савэ сле бэнга, мангя тэ джял лэсти Иусога. Нэ Иусо отмукля лэ тай пхэнда:

39 — Рисяв пэстэ цэрэ и розпхэн, со терда туга Дэвлэ.

Мануш джиля и всавэрэнди дэ форо розпхэнэлас, со терда лэсти Иусо.

Иусо састярэл джювля и ваздэл мулэндар чиёра

40 Кала Иусо рисилия павпалэ, мануша прылиле Лэ, колэсти со вонэ дожутярэнас Иусо.

41 Тай акэ, авиля екх мануш, савэ акхарэнас Иаиро и саво сля пхурэдэр дэ синагога. Вов тэлэдэня Исусости дэ пурэн тай мангя, соб Исусо тэ авэл лэстэ цэрэ.

42 Кадэлэ манушэстэ сля кици екх чей, савяти сля пашэ дэшудуй бэрш, и вой мэрэлас насвалимастар. Исусо джиля лэстэ, и мануша всавэрэ ригэндар стасавэнас Лэ.

43 Машкар кадэлэн манушэн сля екх джювли, савятар дэшудуй бэрш джиля рат. Вой отдэня састимаренди вса, со латэ сля, нэ нико ла на састярда.

44 Тунчи вой поджиля павпалэ, лиляпэ подятэ Исусохкиря їдатар, и екхатар рат пэрэачилия тэ джя.

45 Исусо пхучля:

— Ко лиляпэ Мандэ?

Нэ нико на прыджянгляпэ. Тунчи Пётро пхэнда:

— Сиклимари! Бут манушэн пашэ Тут и всавэрэ ригэндар Тут стасавэн.

46 Нэ Исусо пхэнда:

— Койсаво мануш лиляпэ Мандэ, и Мэ шундом, со Мандар выджиля зор.

47 Кодья джювли удыхкля, со лати на выджиля тэ гаравэпэ, затинисия, поджиля Исусостэ, тэлэдэня Лэсти дэ пурэн тай розпхэнда англа всавэрэн манушэн, сости вой лиляпэ Исусостэ и сар екхатар састярдапэ насвалимастар.

48 Исусо пхэнда лати:

— Чей! Тиро патьяймо тут састярда. Джя, и мэк авэл туга пачя!

49 Кала Вов инте пхэнэлас кадэла лава, авиля екх мануш цэрэстар, тев джювда пхурэдэр дэ синагога, тай пхэнда лэсти:

— Тири чей муля. Будэр на замисар Сиклимаре!

50 Нэ Исусо шунда када тай пхэнда лэсти:

— На дар, кици патя, и тири чей састярэлапэ.

51 Кала авиле дэ цэр, Исусо запхэнда тэ заджя пордэ манушэнди, а лиля Пэга кици Петро, Иаково тай Иоанно и чиёракэрэн дадэ и да.

52 Всавэрэ ровэнас тай марэнас пэ дэ колинэн дэ баря грыжа. Нэ Исусо пхэнда лэнди:

— На ровэн! Вой на муля, вой совэл.

53 И асанас Лэстар. Вонэ ж джангле, со чиёры сля мули.

54 Нэ Исусо лиля чиёра пала вастэ тай пхэнда:

— Вщи, чиёры!

55 Тай рисия лакоро фано, и чиёры екхатар вщиля. Тунчи Исусо пхэнда, соб тэ дэн лати тэ ха.

56 Лакэрэ дад и дэй прылиле када пала дыво, нэ Исусо запхэнда лэнди тэ розпхэнэ пала кода, со стердапэ.

9

Исусо бичалэл дэшудуен апостолонэн тэ пхэнэ Бахтало Лав

1 Тунчи Исусо акхарда Пэхкэрэн дэшудуен апостолонэн и дэня лэнди бари зор тэ вытрадэ бэнгэн и тэ састярэ насвалимэндар.

2 Тунчи бичалда лэн тэ розпхэнэ пала Дэвлэхкэрэ Тхагарима и тэ састярэ насвалэн.

3 Вов пхэнда лэнди:

— Нисо на лэнтэ дэ дром: ни дэсто, ни траста, ни мандро, ни рупь, ни инте екх гад.

4 Дэ саво цэр тумэ заджяна, котэ аченпэ и котарь джан дэ дром.

5 А кала тумэн на прылэна, тунчи джан кодэлэ форостар тай обмарэн прахо тумарэ пурэндар. И мэк кода авэла шпэра важ лэн.

⁶ Вонэ джиле пав гавэн, пхэнэнас Бахтало Лав и пав всавэрэ тхана састярэнас насвалэн.

Иродо шунэл пала Исусо

⁷ Дума пала кода вса доджиля Иродостэ, саво сля тетрархо. Вов на джянгля, сар када тэ полэ. Койсавэ мануша пхэнэнас, со када Иоанно Болдэмари одджювдиня мулэндар.

⁸ Авэр пхэнэнас, со када Илья авиля, а тритэ — со одджювдиня екх думутнэ англунарендар.

⁹ Тай пхэнда Иродо:

— Мэ отчиндом шэро Иоанности, а ко исин Кадэва, пала Ка мэ шунав?

И родэлас тэ дыкхэ Исусо.

Исусо парварэл бутэн манушэн

¹⁰ Апостолуря рисиле Исусостэ и розпхэндэ Лэсти, со вонэ тердэ. Вов стидэня лэн, и вонэ джиле форостэ, саво акхарэлпэ Вифсаида, еджинэ, би манушэн.

¹¹ Нэ мануша уджянгле пала кода тай джиле пала Исусо. Вов прылиля лэн тай дэдуманя лэнца пала Дэвлэхкэрэ Тхагарима. И касти сля трэбуни тэ састярэпэ, Вов састярэлас.

¹² Кала диво сля пашэ рятятэ, дэшудуй апостолуря поджиле Исусостэ тай пхэндэ Лэсти:

— Отмук манушэн, мэк джян вонэ дэ пашунэн гаворэн и гавэн, тэ аракхэн, тев лэнди тэ ратярэ и со лэнди тэ ха. Кодэлэсти со амэ катэ дэ шуки пхув.

¹³ Исусо пхэнда лэнди:

— Тумэ дэн лэнди тэ ха.

Вонэ пхэндэ:

— Амэндэ исин кици панч мандрэ и дуй маче. Чи амэнди тэ джя тай тэ тинэ всавэрэнди хамо?

¹⁴ А котэ стидэнепэ кици екхэн муршэн пашэ панч пхангля. Исусо пхэнда Пэхкэрэ сиклярнэнди:

— Пхэнэн манушэнди, мэк розмарэнпэ пав пандэша манушэн и бэшле.

¹⁵ Вонэ тердэ кади, и всавэрэ бэшле.

¹⁶ Исусо лиля панч мандрэ и дуй маче, подыкхля дэ упралима, наисарда Дэвлэ пала хама, розпхагля мандро и мачё пэ которэн тай дэня сиклярнэнди, соб вонэ тэ роздэн манушэнди.

¹⁷ Всавэрэ хале и чялиле, и стидэне дэшудуй трасты которэнца, савэ ачилепэ.

Исусо — Чячюно Христосо Дэвлэхкоро

¹⁸ Екхвар, кала Исусо ачяляпэ Еджино и мангляпэ, сиклярнэ поджиле Лэстэ. Тунчи Исусо пхучля лэндар:

— Пала кастэ динэн Ман мануша?

¹⁹ Вонэ пхэндэ:

— Пала Иоанно Болдэмаре, ай авэр — пала Илья. А тритэ пхэнэн, со када одджювдиня екх думутнэ англунарендар.

²⁰ Вов пхучля лэндар:

— А тумэ пала ка Ман прылэн?

Пётро пхэнда:

— Пала Христо Дэвлэхкэрэ.

Исусо пхэнэл пала кода, со Вов мэрэла и одджювдэла

²¹ Нэ Исусо запхэнда лэнди тэ дэдумэ пала кода.

²² Тунчи Вов дэдуманя лэнди, со Манушыканэ Чявэсти трэбуни авэла тэ ха бари грыжа, со Лэстар отпхэнэнапэ пхурэдэра, англунэ рашая тай сиклимаря пав Упхэнима, со Лэ умарэна, нэ пэ трито диво Вов одджювдэла мулэндар.

23 А всавэрэнди пхэнда:

— Кала ко камэл тэ джя пала Ман, тунчи отпхэнпэ еджино пэстар, лэ пэхкоро трушул кожно диво и джя пала Ман.

24 Ко камэл тэ фирисарэ пэхкоро води, кодэва хацарэла лэ. А ко хацарэла пэхкоро води важ Ман, кодэва сфирисарэла лэ.

25 Сави бахт кодэлэстар, со мануш затерэла всавира люмля, а еджино хасявэла чи терэла пэсти беда?

26 Ко ладжяла Мандар чи Мурэ лавэндар, кодэлэстар ладжяла и Чяво Манушыкано, кала авэла дэ Пэхкири слава, дэ слава Дадэжкири и свэнтононэ ангелонэнгири слава.

27 Чячимага пхэнав тумэнди: ачен катэ мануша, савэ инте ды мэрима дыкхэна Дэвлэхкоро Тхагаримо.

Исусо дэдумэл Моисеега тай Ильяга

28 Кала проджила пашэ охто дивэ, Исусо лиля Пэга Пётро, Иаково тай Иоанно и джиля пэ плай тэ мангэпэ.

29 И кала мангляпэ, парувдапэ англа лэн муй Лэхкоро, тай їда Лэхкири кади парниля, со дукхано сля тэ дыкхэ.

30 Тай акэ, авиле дуй мурша, савэ дэдумане Лэга. Када сле Моисеи тай Илья.

31 Вонэ авиле дэ бари слава и пхэнэнас, со Исусости трэбуни авэла тэ джя дэ Ерусалимо и тэ ачявэ кадья люмля.

32 Пётро и кодэла, савэ сле лэга їтханэ, совэнас, а кала джюнгавдэпэ, удыхкле слава Исусохкири и дон муршэн, савэ аченас Лэга.

33 Кала мурша ачиле тэ уджя, Пётро пхэнда Исусости:

— Сиклимари! Сар мишто амэнди катэ! Тховага трин катуны, екх Тути, екх Моисеести и екх Ильясти.

Ай еджино на полэлас, со пхэнэл.

34 И кала вов инте дэдуманя, авиля хмара и ушарда лэн упрал. Кала ж вонэ ачиле дэ хмара, лэн облиля бари дар.

35 Тай сля шундо гласо хмаратар:

— Када Чяво Муро выгидэно. Шунэн Лэ!

36 Кала гласо пэрэачиля тэ дэдумэ, Исусо ачиляпэ Еджино. И сиклярнэ аченас мулком и никасти на розпхэнэнас, со дыкхле дэ кодыя вряма.

Исусо састярэл чяворэ, дэ савэ сля нажужо

37 Пэ авэр диво, кала вонэ сджянас плаеатар, авиля Исусостэ гроза манушэн.

38 Екх мануш типисиля:

— Сиклимари! Мангав Тут, подыхк пэ мурэ чяворэ! Мандэ вов екхоро исин.

39 Дэ лэстэ заджял бэнгано фано и чяворо ачел тэ типисявэ. Нажужо марэл чяворэ кади, со лэхкэрэ мостар чюлэн саля. И вов дэл тэ ха чяворэсти бари грыжа, и паро отмукэл лэ.

40 Мэ манглём Тирэ сиклярнен, соб вонэ тэ вытрадэн нажужэ, нэ лэндэ нэнай зора.

41 Исусо пхэнда:

— Мануша бипатявнэ и родо мусардэ їлэнца! Скици инте тэ авэ тумэнца? Скици инте тэ вырицарав тумэн? Ан кордэ пэхкэрэ чявэ!

42 Кала чяворо джялас Исусостэ, бэнг аравда лэ пэ пхув тай ачиля тэ марэ. Тунчи Исусо запхэнда нажужэсти, састярда чяворэ и отдэня лэ дадэсти.

43 Всавэрэ дэнас дыво кодэлэсти, саво баро Дэвэл.

Исусо авэр моло пхэнэл пала Пэхкоро мэримо

И кала вонэ дэнас дыво кодэлэсти, со терда Исусо, Вов пхэнда Пэхкэрэ сиклярнэнди:

44 — Тховэн дэ тумарэ канэн кадэла лава: Чявэ Манушыканэ сиво здэна манушэнди дэ вастэн.

45 Нэ вонэ инте на полиле, пала со Исусо дэдуманя. Лэнгири годи инте сля затерди, а тэ пхуче Исусостар, сар тэ полэ Лэхкоро лав, вонэ даранас.

Ко пав чячима барэдэр

46 Екхвар Лэхкэрэ сиклярнэ ачиле тэ хапэ екх екхэга пала кода, ко лэндар исин барэдэр.

47 Исусо джянгля, со лэндэ пэ годен, тунчи Вов лиля цыкнэ чяворэ тай тховда паша Пэстэ.

48 Тай пхэнда сиклярнэнди:

— Ко прылэла кадэлэ чяворэ важ Мурэ Лавэ, кодэва Ман прылэла. Ай ко прылэла Ман, прылэла Кодэлэ, Ко Ман бичалда. Ко тумэндар исин цыкнэдэр всаврэндар, кодэва авэла всаврэндар барэдэр.

49 Тунчи Иоанно пхэнда Лэсти:

— Сиклимари! Амэ дыкхле манушэ, саво вытрадэл бэнгэн Тирэ Лавэга, и запхэндэ лэсти кади тэ терэ. Кодэлэсти со вов на пхирэл амэнца йтханэ.

50 Исусо дэдуманя:

— На запхэнэн лэсти. Кодэла, савэ на ваздэнпэ пэ тумэн, кодэла пала тумэн.

Исусо на прылэн дэ Самария

51 Кала поджялас вряма тэ ваздэпэ Исусости пэ упралима, Вов лиля Пэсти дэ гындо тэ джя дэ Ерусалимо.

52 Тунчи Исусо бичалда англал Пэстэ манушэн, и вонэ авиле дэ гав Самариякоро, соб вса важ Лэ тэ лачярэ.

53 Нэ самарянуря на прылиле Исусо, колэсти со Вов джялас дэ Ерусалимо.

54 Кала Исусохкэрэ сиклярнэ Иаково тай Иоанно дыкхле кода, вонэ пхэндэ:

— Рае! Камэх, амэ пхэнага, соб тэ сджял яг упралимастар и тэ спхабарэл лэн?

55-56 Нэ Исусо обрисиля лэндэ тай запхэнда када тэ терэ.* И джиле дэ авэр гав.

Сар тэ джя пала Исусо

57 Кала вонэ джянас пав дром, екх мануш пхэнда Исусости:

— Мэ джява пала Тут, курик Ту тэ на джях.

58 Исусо пхэнда лэсти:

— Рувэндэ исин тхан, тев вонэ отцинён, и чириклендэ кади ж. Ай Манушыканэ Чявэстэ нэнай тхан, тев шэро тэ притховэ.

59 Аврэ манушэсти Исусо пхэнда:

— Джя пала Ман!

Кодэва пхэнда:

— Рае! Мук ман майанглал тэ гаравав мурэ дадэ!

60 Исусо пхэнда лэсти:

— Мэк мулэ гаравэн пэхкэрэн мулэн, а ту джя тай розпхэн пала Дэвлэхкэрэ Тхагарима!

61 Трито мануш пхэнда Исусости:

— Рае! Мэ джява пала Тут, нэ дэ манди майанглал тэ джяв и тэ дыкхав муру йри.

62 Исусо пхэнда лэсти:

— Мануш, саво лэлпэ пала плуго, нэ обрисявлпэ павпалэ, на поджял важ Дэвлэхкэрэ Тхагарима.

* 9:55-56 Дэ койсавэ пуранэ греческа лила (манускрипты) исин инте кацавэ лава: «И дэдуманя: — На джянэн тумэ, саво дэ тумэн фано. Чяво Манушыкано авиля тэ на хасярэ манушэнгэрэ вода, а тэ сфирисарэ лэн».

10

Исусо бичалэл эфтадэша сиклярнэн

¹ Тунчи Рай Исусо выгидэня эфтадэша аврэн сиклярнэн тай бичалда лэн пав дуй англал Пэстар дэ всавэрэн форонэн и тханэн, тев Еджино камля тэ авэ.

² И пхэнда лэнди:

— Ваздэнялэ бут мандро пэ мален, а бутярнэн набут. Важ кода мангэн Хулае малякэрэ, соб Вов тэ бичалэл бутярнэн, тэ злэн див малендар.

³ Джянтэ! Мэ бичалав тумэн, сар бакрэн машкар рувэн.

⁴ На лэн пэга ни тышыла, ни траста, ни пундрангэ. И пав дромэ на наисарэнпэ манушэнца.

⁵ Дэ саво цэр заджяна, майанглал пхэнэн: «Пачя кадэлэ цэрэсти!»

⁶ Кала котэ джовэл мануш, саво камэл пачя, кадья пачя ачела пэ лэстэ. А кала нат, тумари пачя рисявэла тумэндэ павпалэ.

⁷ Аченпэ дэ кодэлэ цэрэ, хантэ тай пэнтэ кода, со тумэнди дэна. Бутярно мануш ачел кода, соб лэсти тэ потинэн важ лэхкири бути. На пэрэджан цэрэстар дэ цэр.

⁸ Кала авэна дэ foro и прылэна тумэн котэ, хантэ вса, со тумэнди дэна.

⁹ Састярэн лэнгэрэн насвалэн и пхэнэн лэнди: «Надур тумэндар Дэвлэхкоро Тхагаримо».

¹⁰ Кала авэна дэ foro тай на прылэна тумэн котэ, тунчи джан пэ гаса и пхэнэн:

¹¹ «И прахо, саво прыачилиа амарэ пурэндэ дэ тумаро foro, амэ обмарах. Нэ джанэн, со надур тумэндар Дэвлэхкоро Тхагаримо».

¹² Пхэнав тумэнди, дэ кодэва диво форости Содомо авэла локхэдэр, сар кадэлэ форости.

¹³ Бида тути, foro Хоразино! Бида тути, foro Вифсаида! Тэ дыкхэн форурия Тиро тай Сидоно дывуря, савэ сле тумэндэ, вонэ б думут обрисявэнаспэ пэжкэрэ бэзимастар, урявэнаспэ дэ їда гонэндар и бэшэнас дэ прахо.

¹⁴ Нэ Тирости и Сидоности пэ сындо авэла локхэдэр, сар тумэнди.

¹⁵ И ту, foro Капернаумо, гинисарэх тэ ваздэпэ упрэ? Ту дэ адо тэлэдэга.

¹⁶ Кодэва, ко шунэла тумэн, кодэва Ман шунэла, и ко отпхэнэлпэ тумэндар, отпхэнэлапэ Мандар. А ко отпхэнэлапэ Мандар, отпхэнэлапэ и Кодэлэстар, Ко Ман бичалда.

Сиклярнэ рисявэн павпалэ

¹⁷ Эфтадэша сиклярнэн рисиле баря лошага тай пхэндэ:

— Рае! И бэнга кандэн амэн важ Тиро Лав!

¹⁸ Исусо пхэнда лэнди:

— Мэ дыкхлём, сар сатана тэлэдэня упралимастар кади, сар тэлэдэл молния.

¹⁹ Акэ, дав тумэнди зор тэ тасавэ пурэнца сапэн и скорпионэн, и тэ чувэ пэ пхув врыжымашэн, и нисави бибахт вонэ тумэнди на терэна.

²⁰ Кици лошавэн на колэсти, со фануря кандэн тумэн, а колэсти, со тумарэ лава зачиндэ пэ упралима.

²¹ Тунчи Исусо лошыля дэ Свэнто Фано тай пхэнда:

— Наисарав Тут, Дадэ, Тхагари пэ пхуя и пэ упралима, со Ту оттердан цыкнэнди гаравдо їрвалэндар и годявэрэндар. Кади, Дадэ! Кацави сля Тири лачи воля!

²² Вса дэно Манди Мурэ Дадэстар. Нико на джанэл Чявэ, кици Дад, и нико на джанэл Дадэ, кици Чяво и кодэла, касти Чяво камэл тэ сикавэ Дадэ.

²³ Тунчи обрисила сиклярнэндэ тай пхэнда лэнди:

— Бахталэ якха, савэ дыкхэна кода, со тумэ дыкхэн екхатар!

²⁴ Пхэнав тумэнди, со бут ко англунарендар тай тхагарендар камле тэ дыкхэ кода, со тумэ акана дыкхэн, нэ на дыкхле. Камле тэ шунэ кода, со тумэ акана шунэн, нэ на шундэ.

Дума пала самарянино, савэстэ ковло їло

25 Тунчи екх сиклимарендар пав Упхэнима вциля, соб тэ зумавэ Исусо, тай пхучля:

— Сиклимари! Со манди тэ терэ, соб тэ авэл мандэ вечно дживимо?

26 Исусо пхэнда лэсти:

— Сар чиндо дэ Упхэнима? Сар ту полэх?

27 Кодэва пхэнда:

— Кам тирэ Рае Дэвлэ всавэрэ тирэ їлэга и всавэрэ тирэ водега, всавиря тиря зорага и всавиря годяга. И кам тирэ пашуно, сар еджино пэ камэх.

28 Исусо дэдуманя:

— Чячимо ту пхэндан. Тер кади и авэга тэ дживо.

29 Нэ кодэва камля тэ допхэнэ пэхкоро и пхучля Исусостар:

— А ко исин муро пашуно?

30 Исусо пхэнда:

— Екх мануш джиля Ерусалимостар дэ Ерихоно. Тай хутилдэ лэ прахаря, злиле лэстар їда, домардэ лэ и джиле, а вов ачиляпэ тэ пашлэ епашмуло.

31 Выджиля кади, со трэбуни сля тэ джя кодэлэ дромэга рашаести. Вов удыхкля кадэлэ манушэ, пэрэджиля пэ авэр риг и проджиля мамуй.

32 Джялас котэ и левито, удыхкля манушэ, пэрэджиля пэ авэр риг и проджиля мамуй.

33 Екх самарянино ладэлас кодэлэ дромэга, удыхкля манушэ, и ачиля лэсти дор лэ.

34 Вов поджиля манушэстэ, упрал чута мол, помакхля дукхавдэ тхана зэтога тай пэрэпхангя лэн. Тунчи тховда лэ пэ пэхкэрэ мугаре, анда дэ гостиница тай прыдыкхэлас пала лэ.

35 Пэ авэр диво, кала трэбуни лэсти сля тэ уладэ, вов дэня хулаести дуй динарии тай пхэнда: «Прыдыкх пала кадэлэ манушэ, а кала джяна будэр ловэ, мэ дава тути инте, кала рисявава павпалэ».

36 Ко тринэндар сля пашуно манушэсти, савэ домардэ прахаря, сар ту гинисарэх?

37 Сиклимари пав Упхэнима пхэнда:

— Кодэва, ко терда манушэсти лачимо.

Тунчи Исусо пхэнда лэсти:

— Джя и ту тер кади!

Марфа тай Мария

38 Кала вонэ джянас дурэдэр, Исусо заджиля дэ екх гав. Котэ манушни, савя акхарэнас Марфа, прылиля Лэ дэ пэхкоро цэр.

39 Латэ сля пхэнь Мария. Вой бэшля паша пурэн Раестэ тай шунда Лэхкэрэ лава.

40 Марфа ж змардапэ пурэндар, соб тэ тховэ баро скаминд. Тунчи поджиля Исусостэ и пхэнда:

— Рае! Чи ту на дыкхэх, со мури пхэнь всавири бути ачявда пэ ман? Пхэн лати, мэк терэл манца.

41 Рай Исусо пхэнда:

— Марфа! Марфа! Бут пала со ту думисарэх, и бут пала со тутэ дукхал шэро.

42 Нэ кици екх трэбуни. Мария ж вытидэня кода, со фэдэр, и када латар на залэлапэ.

11

Исусо сиклярэл, сар трэбуни тэ мангэпэ

1 Екхвар Исусо мангялэпэ, ай кала пэрэачиля, екх Лэхкэрэ сиклярэндар пхэнда Лэсти:

— Рае! Сикляр амэн тэ мангэпэ, сар Иоанно сиклярда пэхкэрэн сиклярнэн!

² Иусо пхэнда лэнди:

— Кала мангэнпэ, пхэнэн:

Дадэ! Мэк тэ свэнцолпэ Лав Тиро!

Мэк авэл Тхагаримо Тиро!

³ Пэ кожно диво мандро амэнди дэ авдивутно.

⁴ И бэзимо амаро эртисар амэнди,
сар и амэ дош эртисарах кодэлэнди,
ко исин амэнди вуджилэ.

И на домук, соб тэ змарахпэ дромэстар.

⁵ Тунчи Иусо пхэнда лэнди:

— Кала варико тумэндар авэла рятяга амалэстэ тай пхэнэла лэсти: «Морэ! Залэ манди трин питы мандро.

⁶ Амал дромэстар заджила мандэ, и нэнай мандэ, со тэ дав лэсти тэ ха».

⁷ Чи пхэнэла амал тиро тути андрал: «На замисар ман! Мэ вудара затердом, и мурэ чыворэ совэн манца. Нисар манди тэ вше и тэ дэ тути мандро?»

⁸ Пхэнав тумэнди: кала на вщела и на дэла тути мандро, сар амал тиро, тунчи вщела и дэла тути кодэлэсти, со ту на пэрэачех тэ мангэ.

⁹ И Мэ пхэнав тумэнди: мангэн — и Дэвэл дэла тумэнди, родэн — и тумэ аракхэна, марэн дэ вудара — и Дэвэл оттерэла тумэнди.

¹⁰ Акэ, кожно, ко мангэл — лэл, кодэва, ко родэл — аракхэл. И кодэлэсти, ко марэла дэ вударэн, — Дэвэл оттерэла.

¹¹ Чи исин машкар тумэн кацаво дад, саво подэла пэхкэрэ чыворэсти сапэ, кала вов мангэл лэстар мацэ?

¹² И саво дад подэла чыворэсти скорпионо, кала вов мангэл дадэстар парноро?

¹³ Кала тумэ, мижэ мануша, джанэн, сар тэ терэ лачимо тумарэ чыворэнди, тунчи пэ скици будэр Дад Упралимастар дэла Свэнто Фано кодэлэнди, савэ мангэн Лэстар?

Иусо традэл бэнгэн Дэвлэхкиря зорага

¹⁴ Екхвар Иусо вытрадэня бэнгэ, саво терэлас манушэ лалэга. Кала бэнг выджила, лало мануш ачила тэ дэдумэ, а всавэрэ мануша прылиле када пала баро дыво.

¹⁵ А койсавэ лэндар дэдумане:

— Вов вытрадэл бэнгэн зорага, сави дэл Лэсти Веельзевуло, барэдэр бэнгэнгоро.

¹⁶ Авэр мануша зумавэнас Лэ и мангле Лэстар шпэра упралимастар.

¹⁷ Нэ Иусо джангла лэнгоро гындо тай пхэнда лэнди:

— Тхагаримо, дэ савэ ханпэ екх екхэга, авэла шушо. Тай цэр, дэ савэ ханпэ екх екхэга, розпхагэлапэ.

¹⁸ И кала сатана халпэ еджино пэга, тунчи сар выачела лэхкоро тхагаримо? Тумэ пхэнэн, со Мэ вытрадав бэнгэн зорага, сави дэл Манди Веельзевуло.

¹⁹ А кала Мэ вытрадав бэнгэн зорага, сави дэл Манди Веельзевуло, тунчи савя зорага вытрадэн бэнгэн тумарэ сиклярнэ? Кодэлэсти вонэ сундисарэна тумэн.

²⁰ А кала Мэ вытрадав бэнгэн Дэвлэхкиря зорага, тунчи тумэндэ авила Дэвлэхкоро Тхагаримо.

²¹ Кала зорало мануш дэстэнца и чюренца дыкхэл пала пэхкэрэ цэрэ, лэхкоро хулаимо нико залэла.

²² Нэ кала авэла зорэдэр лэстар, тунчи марэла лэ, залэла лэстар дэста и чюря, пэ савэн лэстэ сля надия, и всаворо лэхкоро барвалимо роздэла.

²³ Ко на йтханэ Манца, кодэва ваздэлпэ пэ Ман. Ко на стидэл Манца, кодэва розчувэл.

Кала рисявэл нажужо

24 Кала нажужо выдзяла манушэстар, тунчи пхирэл пав бипаненгирэн тханэн, родэл тхан, тев лэсти тэ отцинё, нэ нисар на аракхэл. Тунчи пхэнэл: «Рисявава павпалэ дэ муро цэр, катарь мэ выджилём».

25 А кала авэл павпалэ, дыкхэл, со цэр шулавдо и прытидо.

26 Тунчи джял, акхарэл пэстэ эфта аврэн нажужэн, мижэдэр пэстар, и вонэ заджян тай джювэн котэ. И кода авэла важ манушэ инте шымай, сар сля.

Ко исин пав чычима бахталэ

27 Кала Исусо дэдуманя кадэва лав, екх манушни лэнгэрэ стидэмастар затиписиля зоралэ гласога:

— Бахтали джювли, сави бэня Тут и парварда!

28 Исусо пхэнда:

— Нат, на кади! Бахталэ кодэла, савэ шунэн Дэвлэхкоро Лав и джювэн кади, сар вов пхэнэл!

Шпэра Ионахкири

29 Кала инте будэр манушэн стидэняпэ паша Исусостэ, Вов ачиля тэ дэдумэ:

— Кадэва родо — хохавно. Вов родэл пэсти шпэра, нэ лэсти авэла кици шпэра Ионахкири.

30 Сар Иона ачиля шпэра важ манушэн Ниневиятар, кади Чяво Манушыкано авэла шпэра важ кадэва родо.

31 Тхагарни югостар ваздэлапэ пэ сындо йтханэ кадэлэ родога и дошарэла лэ, колэсти со вой авиля авря ригакиря пхуятар тэ пошунэ годявэр лава Соломонокхэрэ. Нэ акэ, катэ Кодэва, Саво исин барэдэр Соломоностар.

32 Мануша Ниневиятар ваздэнапэ пэ сындо йтханэ кадэлэ родога и дошарэна лэ. Колэсти со вонэ ачявдэ пэхкэрэ бэзима, кала Иона пхэнэлэс лэнди лав Дэвлэстар. Нэ акэ, катэ Кодэва, Саво барэдэр Ионастар.

Дума пала запхабарди лампа

33 Кала мануш запхабарэл лампа, вов на тховэл ла ни дэ граждо, ни тала вакхор, нэ тховэл ла упрэ, соб лакири яг тэ дэл душлимо манушэнди, савэ заджян.

34 Якха — када лампа важ тиро трупо. Кала якха тутэ жужэ, тунчи дэ трупо тиро пхэрдо одуд. А кала якха тутэ налаче, тунчи и дэ трупо тиро авэла пхэрдо калимо.

35 Кади дыкх: одуд, саво дэ тут исин, соб тэ на авэл вов калимага.

36 Кала дэ тиро трупо исин одуд и нэнай калимо, тунчи ту всаворо жужо, пхэнэга, сар душлимо лампатар марэл пэ тут.

Исусо дошарэл фарисеен

37 Кала Исусо пхэнда кадэла лава, екх фарисеендар акхарда Лэ пэстэ тэ ха. Исусо авиля лэстэ и залиля тхан пала скаминдэ.

38 Фарисеи удыхля, со Вов на халавда васта англа колэ, сар тэ ха, и дэняпэ дыво.

39 Нэ Рай пхэнда лэсти:

— Акэ тумэ, фарисея, жужарэн аврял тахтая тай чярэ, нэ андрал тумэндэ пхэрдо ханджэвалимо тай вурьитимо.

40 Бигодякэрэ! Кодэва, Саво стерда кода, со аврял, чи на стерда кади ж и кода, со андрал?

41 Кала тэ пхэнэ пала кода, со андрал, тунчи подэн богудээнди йлэстар, и вса тумэндэ авэла жужо.

42 Нэ бида тумэнди, фарисея! Тумэ дэн Дэвлэсти дэшто котор чярендар мята и рута и всавэрэстар, со барёл тумэндэ пэ баря, нэ бистарэн чячюно сындо и Дэвлэхкоро камавино. Трэбуни и када тэ терэ, и пала кода тэ на бистарэ.

43 Бида тумэнди, фарисея! Тумэ камэн тэ бэшэ пэ англунэн тханэн дэ синагоги, и чялёл тумэнди, кала пэ форо мануша наисарэмпэ тумэнца.

44 Бида тумэнди! Тумэ сар могилы, савэ на душон, пав савэн пхирэн мануша и на джянэн.

45 Екх сиклимари пав Упхэнима шунда кадэла лава и пхэнда Лэсти:

— Сиклимари! Кадэлэ лавэнца Ту и амэн кошэх.

46 Нэ Иусо пхэнда:

— Бида и тумэнди, сиклимаря пав Упхэнима! Тумэ чувэн пэ манушэн баро пхаримо, саво нащи тэ подваздэ, а еджинэ и ангуштэга лэстэ на лэнпэ.

47 Бида тумэнди! Тумэ ваздэн пэ кладбищен памятникурия ангунаренди, савэн мулярдэ тумарэ дада!

48 Тумарэ дада мулярэнас ангунарен, а тумэ ваздэн лэнди памятникурия. Кадэлэга тумэ сикавэн, со тумэ цырден васта пала тумарэн даден.

49 Колэсти пхэнэл Дэвлэхкири годи: «Бичалава лэндэ ангунарен и апостолонэн. Екхэн вонэ мулярэна, а аврэн авэна тэ вытрадэ».

50 Колэсти пхучелапэ кадэлэ родостар пала ангунаренгоро рат, саво сля прочуто кодэла вряматар, сар Дэвэл терда люмля.

51 Ратэстар, саво прочута Авели, ды Захарияхкэрэ ратэ, кала лэ умардэ машкар храмо и жэртвеннико. Чячимага пхэнав тумэнди, пхучелапэ кадэлэ родостар.

52 Бида тумэнди, сиклимаря пав Упхэнима! Тумэ залиле тии вударэндар, савэ лиджян джянимастэ. Нэ и еджинэ на заджиле, и аврэн, савэ камле тэ заджя, на мукле.

53 Кала Иусо джиля котарь, сиклимаря пав Упхэнима и фарисея фартэ мижыле пэ Лэстэ тай ачиле тэ долэ Иусо и тэ пхуче Лэстар бут пала со.

54 Вонэ родэнас, сар тэ астарэ Иусо пэ лавэн.

12

На авэн, сар домуенгэрэ мануша

1 Екхвар стидэняпэ бут пхангя манушэн, кади бут, со ачиле тэ тасавэ екх екхэ. Иусо ачилэ тэ дэдүмэ англэдэр Пэхкэрэ сиклярнэнди:

— Рицарэнпэ дурэдэр фарисеенгэрэ закваскатар, соб тэ на авэн тумэ домуенгэрэ мануша, сар вонэ.

2 Нэнай нисо гаравдо, со б тэ на оттерэлпэ, и нэнай чёрахано, со б тэ на авэл уджянгло.

3 Кода, со тумэ пхэндэ рятяга, шунэна дивэсэ, и со тумэ чёраханэ пхэндэ дэ цэр, пхэнэна зоралэ гласога пэ ушарди.

Даран кици Дэвлэстар

4 Пхэнав жэ тумэнди, Мурэ амалэнди: на даран кодэлэндар, савэ умарэн трупо, а будэр нисо на терэна.

5 Нэ сикавава тумэнди, кастар трэбуни тэ дара: даран Кодэлэстар, Кастэ исин зор на кици тэ мулярэ, нэ тэ чувэ дэ геенна. Кади, пхэнав тумэнди, Кодэлэстар даран.

6 Пала дуй харумэ мардэ тинэн панч чириклен. Нэ ника лэндар Дэвэл на бистарда.

7 А тумэндэ Вов джянэл, и скици бала исин пэ тумаро шэро. На даран! Тумэ пэ бутэ кучэдэр цыкнэн чириклен!

На ладжян Иусостар

8 Пхэнав жэ тумэнди: кодэлэ, ко прыджянэла Ман англа манушэн, прыджянэла и Чяво Манушыкано англа Дэвлэхкэрэн ангелонэн.

9 А ко отпхэнэлапэ Мандар англа манушэн, кодэлэстар и Чяво Манушыкано отпхэнэлапэ англа Дэвлэхкэрэн ангелонэн.

10 Манушэсти, саво пхэнэла налачэ лав пэ Чявэ Манушыканэ, эртисарэлапэ бэзимо, а кодэлэсти, ко кошэла Свэнто Фано, бэзимо на эртисарэлапэ.

11 Кала ж лиджяна тумэн дэ синагоги, пхурэдэрэндэ и раендэ, на пэрэдживэн пала кода, сар и со тэ пхэнэ лэнди дэ отпхэнима.

12 Дэ кодья вряма Свэнто Фано сиклярэла тумэн, со трэбуни тэ пхэнэ.

Дума пала барвалима

13 Екх мануш, саво ачиля машкар лэн, пхэнда Исусоси:

— Сиклимари! Пхэн мурэ пхралэсти, соб тэ дэл манди кодэлэ хулаимастар, саво ачиляпэ амарэ дадэстар!

14 Нэ Исусо пхэнда лэсти:

— Ко тховда Ман тэ сундисарэ тумэн и тэ розлэ тумаро рындо?

15 Тунчи пхэнда лэнди:

— Дыххэн, соб тэ на авэн тумэ ханджэвалэ. Саво б тэ на авэл мануш барвало, лэхкэрэ дживимастэ када бэрша на додэла.

16 Тунчи Вов розпхэнда лэнди кацави дума:

— Екхэ барвалэ манушэстэ выбариля бут ворзо пэ маля.

17 Тай дэдумэлас еджино пэсти: «Со манди тэ терэ? Нэнай мандэ, тев тэ стидэ див».

18 Тай пхэнда: «Пхагава мурэ граждуря и терава инте барэдэр. Стидава дэ лэн див и всаворо муро барвалимо.

19 Тай пхэнава пэхкэрэ водести: "Води муро! Бут исин тутэ барвалимо, саво ту стидэнян, хутилэла тути пэ бут бэрша. Отцинюв, ха, пи и ав лошало!"»

20 Нэ Дэвэл пхэнда кадэлэ манушэсти: «Бигодякоро! Кадэла рятяг'а тиро води залэна тутар. Тунчи касти доросэлапэ кода, со ту стидэнян?»

21 Кади авэла кодэлэга, ко стидэл барвалимо важ пэ, а англа Дэвлэ ачеллэ чёро.

На пэрэдживэн

22 И пхэнда Пэхкэрэ сиклярнэнди:

— Пхэнав тумэнди, на пэрэдживэн пала дживима, ни пала кода, со тумэнди тэ ха, ни пала трупо, дэ со тумэнди тэ урявэпэ.

23 Дживимо будэр хамастар, и трупо будэр їдатар.

24 Подыкхэнтэ пэ воронэн: вонэ на чувэн ворзо дэ пхув, на стидэн мандро малендар. Лэндэ нэнай ни цэра, ни граждо, нэ Дэвэл парварэл лэн. Тумэ ж пэ бутэ кучэдэр чириклендар!

25 Ко тумэндар, кала пэрэдживэл, додэла дживимастэ пэ екх чясо вряма?

26 И кала тумэ кадэва цыкно рындо на стерэна, сости пала аврэ пэрэдживэн?

27 Подыкхэн пэ маленгэрэн лулуден, сар вонэ барён. Вонэ на терэн бути и на сювэн пэсти їда. Нэ пхэнав тумэнди, со и тхагари Соломоно дэ пэхкири слава на урявэлэспэ кади, сар кадэла лулудя.

28 Кала чяр малякири, сави авдивэ барёл, а атаса чувэна ла дэ бов, Дэвэл кади урявэл, пэ скици будэр Вов тумэн урявэла, мануша набарэ патявимага?

29 И тумэ на родэн, со тэ ха чи со тэ пэ, и на пэрэдживэн пала кода.

30 Вса откада родэн народуря кадэла люмлякэрэ, нэ тумаро Дад джянэл, со тумэнди када трэбуни.

31 Нэ родэн Лэхкоро Тхагаримо, и вса откада тумэнди дэлапэ прэдэбэ.

32 На даран, цыкнэ бакрора! Тумаро Дад закамля тэ дэ тумэнди Тхагаримо.

33 Битинэн тумаро хулаимо и дэвн чёrorэнди! Лачярэн тышыла, савэ никала на чинэнапэ! Стидэн барвалимо, саво никала на хасявэла, пэ упралима, курик чёро на пашола и тев цэрмо на схала.

34 Тев тумаро барвалимо, котэ и тумаро їло авэла.

Дума пала бутярнэ, саво доджутярэл хулае

35 Мэк всавири вряма тумарэ кущика тэ авэн зацырденэ, и мэк всавири вряма пхабон тумарэ лампы.

36 Авэн, сар бутярнэ, савэ дожутярэн пэхкэрэ хулае бьявэстар. Вонэ екхатар лэсти оттерэна вудара, кала шунэна, со вов марэл дэ лэн.

37 Бахталэ кодэла бутярнэ, савэ на совэна, кала авэла лэнгоро хулай. Чячимага пхэнав тумэнди: вов еджино зацырделэ кущик, акхарэла лэн пала скаминд и терэла важ лэн бути.

38 Бахталэ кодэла, савэ дожутярэн хулае и дэ епашрят, и дэнзор.

39 Полэн, тэ джанэл хулай, кала авэла чёр, вов бы на домукэлас лэсти тэ загуле дэ цэр.

40 А тумэ дожутярэн и авэн гата, колэсти со Чяво Манушыкано авэла тунчи, кала тумэ на думисарэн.

41 Тунчи Пётро пхэнда Лэсти:

— Рае! Ту кици амэнди пхэнэх кадэла лава чи важ всавэрэн?

42 Рай пхэнда:

— Со терэла пативало и годявэр бутярно, савэ хулай ачявда тэ дыкхэ пала цэрэ и аврэн бутярнэн, соб тэ роздэл лэнди хамо дэ пэхкири вряма?

43 Кала рисявэла хулай и дыкхэла, со бутярно терэл пэхкири бути, тунчи кадэва бутярно авэла бахтало.

44 Чячимага пхэнав тумэнди, со хулай терэла кадэлэ бутярнэ пхурэдэрэга пав свавэрэ пэхкэрэ хулаима.

45 Нэ кала кодэва бутярно пхэнэла еджино пэсти: «Муро хулай на сиво авэла», — и ачела тэ марэ аврэн бутярнэн и бутярнен, обхалапэ тай матёла,

46 тунчи авэла хулай дэ дивэ, кала бутярно лэ на дожутярэл, и дэ вряма, пала савя бутярно на джанэл. И мулярэла лэ, и авэла лэсти бида йгханэ бидэвлэхкэрэ манушэнца.

47 Бутярно, саво джангля, со камэл лэстар хулай, нэ на сля гата, и на стерда кади, авэла фартэ мардо.

48 А бутярно, саво на джангля и стерда кода, пала со марэна, авэла мардо набут. Касти Дэвэл дэня бут, кодэлэстар бут и лэлапэ. И касти бут допатиня, кодэлэстар будэр пхучелапэ.

Мануша ханпэ екх екхэга пала Исусо

49 Мэ авилём, соб тэ запхабарэ яг пэ пхуя, и сар Мэ камав, соб вой сигэдэр тэ розпхаболпэ!

50 Манди трэбуни тэ болдэлэ, и стасавэл грыжа Муро йло, кала кода вса дожутярав!

51 Тумэ гинисарэн, Мэ авилём, соб тэ анэ пэ пхув пачя? Нат, пхэнав тумэнди: Мэ авилём тэ анэ врыжымо.

52 Акана йри панче манушэндар розджялапэ машкар пэстэ, трин ваздэнапэ пэ дон и дуй ваздэнапэ пэ тринэн.

53 Дад ваздэлапэ пэ чявэ, и чяво ваздэлапэ пэ дадэ. Дэй ваздэлапэ пэ чя, и чей ваздэлапэ пэ да. Сасуни ваздэлапэ пэ боря, а бори ваздэлапэ пэ сасуны.

Врямакэрэ шпэры

54 Тунчи Исусо пхэнда манушэнди:

— Кала тумэ дыкхэн, сар пэ западо ваздэлпэ хмара, тумэ пхэнэн: «Дэла брышынд». И кади исин, брышынд дэл.

55 И кала пхурдэл барвал южнона ригатар, тумэ пхэнэн: «Кхам пэкэла», — и кади выджял.

56 Домуенгэрэ! Тумэ дыкхэн пэ упралима и пэ пхуя и джанэн, со авэла аври, ай сави вряма авиля акана, тумэ на полэн?

57 И сости тумэ еджинэ на розлэнпэ, со исин чячимо?

⁵⁸ Кала ту джях пэхкэрэ врыжымашэга дэ сындо, стер вса, соб тэ допхэнэпэ лэга инте пав дром. А кала на допхэнэгапэ, вов цырделэ тут сындимарестэ, а сындимари отдэла тут халавдэсти, и халавдо чувэла тут дэ барунэ.

⁵⁹ Пхэнав тути: на выджяга котарь ды колэ, сар на отдэга ды екхэ мардэ.

13

Ачявэн тумаро бэзимо

¹ Дэ кодья вряма авиле Исусостэ койсавэ мануша и розпхэндэ пала манушэн Галилеатар, савэн Пилато прыпхэнда тэ мулярэ и мукля лэнди рат, кала вонэ анэнас жэртвы.

² Исусо пхэнда лэнди:

— Тумэ гинисарэн, со кадэла галилеянуря тердэ бэзимо будэр аврэ манушэндар дэ Галилея и кодэлэсти хале грыжа?

³ Нат, пхэнав тумэнди. Нэ кала тумэ на ачявэна бэзимо, хасявэна, сар и вонэ.

⁴ А кодэла дэшуохто манушэн, савэ помуле, кала тэлэдэня пэ лэн упрал башня дэ Силоамо? Тумэ гинисарэн, со вонэ сле дошадэр всавэрэндар, савэ джювэнас дэ Ерусалимо?

⁵ Нат, пхэнав тумэнди. Нэ кала тумэ на ачявэна бэзимо, тунчи всавэрэ хасявэна, сар и вонэ.

⁶ Тунчи пхэнда лэнди кацави дума:

— Екхэ манушэстэ сля инжырно кашт дэ лэхкоро виноградиико. Вов авила тэ родэ пэ кадэва кашт барило, нэ нисо на аракхля.

⁷ И пхэнда виноградарести: «Акэ, дыкх, мэ трито бэрш авав, соб тэ аракхэ барило пэ кадэва инжырно кашт, нэ нисо на аракхав. Сцин лэ! Пэ со вов ивьэ залэл пхув дэ садо?»

⁸ Нэ виноградаря пхэнда лэсти: «Хулае! Мэ кадэва кашт инте екх бэрш барёла. А мэ пхув ковлярава и гуниво чувава.

⁹ И кала пэ авэр бэрш анэла барило — мишто. А кала на анэла, сцинэга лэ».

Исусо састярэл джювля дэ суббота

¹⁰ Екхвар дэ суббота Исусо сиклярда дэ синагога.

¹¹ Котэ сля екх джювли, дэ кастэ дэшуохто бэрш сля налачэ фано, саво дэлэс лати духк. Вой сля банги, кади со нащи лати сля тэ ваздэ шэро.

¹² Исусо удыххля ла, акхарда тай пхэнда:

— Джювлие! Ту састярэхпэ тирэ насвалимастар!

¹³ И тховда пэ латэ васта. Вой екхатар пэрэачилия тэ авэ банги и ачили тэ ваздэ слава Дэвлэсти.

¹⁴ Тунчи пхурэдэр дэ синагога мижыля, со Исусо састярда дэ суббота, и пхэнда манушэнди:

— Исин шов дивэ, кала трэбуни тэ терэ бути. Дэ кадэлэн дивэн авэнтэ тэ састярэпэ, а на дэ суббота.

¹⁵ Рай пхэнда лэсти дэ отпхэнима:

— Домуенгэрэ! Чи на отпхэндэн тумэ пэхкэрэ мугаре чи гурувэ, на вылиджян лэ граждостар и на лиджан панестэ дэ суббота?

¹⁶ А вой исин чей Авраамохири. Дэшуохто бэрш ла спхандэлэс сатана! И со, на трэбуни сля тэ розпхэндэ ла дэ суббота?

¹⁷ Кала Исусо пхэнда кадэла лава, всавэрэ Лэхкэрэ врыжымашуря сле ладжъвардэ, а всавэрэ мануша лошавэнас важ кода, со Вов терэлэс барэ и лаче рындурия.

Дума пала Дэвлэхкоро Тхагаримо

¹⁸ Исусо ж пхэнда:

— Пэ со счувэлпэ Дэвлэхкоро Тхагаримо? Сар Манди када тэ сикавэ?

19 Вов счувэлпэ пэ цыкно горчично ворзо, саво мануш лиля и чута дэ пхув дэ пэхкоро садо. И кадэлэ ворзостар бария вучё кашт, кади со упралимахкэрэ чирикля джювэнас пэ лэхкэрэн ранден.

20 Инте пхэнда Исусо:

— Пэ со счувэлпэ Дэвлэхкоро Тхагаримо?

21 Вов счувэлпэ пэ закваска, савя лиля манушни тай чута дэ трин барэ чярэ варэга, а тунчи кадья закваска розджиляпэ пав всаворо хумэр.

Набуглэ вудара

22 Тунчи Исусо упалэ джиля дромэга дэ Ерусалимо, проджялас пав гавэн и форонэн и котэ сиклярэлас.

23 Екх мануш пхучля Лэстар:

— Рае! Када чячимо, со кици набут манушэн фирисарэнапэ?

Исусо пхэнда:

24 — Прытховэн зора кодэлэстэ, соб тэ заджя тумэнди набуглэ вударэнца. Чячимага пхэнав тумэнди, со бут мануша закамна тэ заджя, нэ нисо лэндэ на выдзяла.

25 Кала цэрэхкоро хулай вщела и затерэла вудара, тунчи тумэ авэна тэ аче аври, тэ марэ дэ вударэн тай тэ мангэ: «Рае, оттер амэнди!» Нэ Вов пхэнэла тумэнди: «На джянав, катарь тумэ».

26 Тунчи тумэ пхэнэна: «Амэ хале и пиле англа Тут, и пэ амарэн гасэн Ту сиклярэгас».

27 Нэ Вов пхэнэла: «На джянав, катарь тумэ. Нашэн Мандар всавэрэ, ко вурьитимо терэн!»

28 Котэ тумэ авэна тэ ровэ и тэ ха бари грыжа, кала дыкхэна, со Авраамо, Исаако тай Иаково и всавэрэ англунаря дэ Дэвлэхкэрэ Тхагарима, а тумэн котарь вытрадэна.

29 Авэна мануша штарэ пхуякэрэ ригэндар тай бэшэна пала скаминдэ дэ Дэвлэхкэрэ Тхагарима.

30 Тай акэ, мануша, савэ палунэ, авэна англэ. И кодэла, савэ англэ, авэна палунэ.

Исусо ровэл пала Ерусалимо

31 Дэ кодья вряма авиле койсавэ фарисеендар и пхэндэ Лэсти:

— Наш катарь, колэсти со Иродо камэл тэ мулярэ Тут.

32 Исусо пхэнда:

— Джян и пхэнэн кадэлэ хрантимарести кацавэ лава: «Акэ, Мэ авдивэ и атася авава тэ традэ бэнгэн и тэ састярэ, а пэ трито диво дотерава пэхкоро рындо».

33 Нэ Манди трэбуни тэ джя Мурэ дромэга авдивэ, атася и пэ авэр диво. Нэнай кади, соб ангунаре тэ умарэн на дэ Ерусалимо.

34 Ерусалимо, Ерусалимо! Ту мулярэх ангунарен и барэнца помарэх кодэлэн, савэ сле бичалдэ тутэ! Скаци молы Мэ камлём тэ стидэ Тирэ чяворэн кади, сар кагни стидэл пуицен тала пэхкэрэ пхака! Нэ тумэ на закамле кади.

35 Тай акэ, ачявав тумэн еджинэн дэ тумарэ цэрэ. Пхэнав тумэнди, со на дыкхэна Ман ды кодья вряма, сар пхэнэна: «Бахтало Кодэва, Саво джял важ Лав Раехкоро!»

14

Со трэбуни тэ терэ дэ суббота?

1 Екхвар дэ суббота Исусо заджиля дэ цэр фарисеенгэрэ пхурэдэрэстэ, соб тэ ха мандро. И всавэрэ дыкхэнас пала Исусо.

2 Тай акэ, англа Исусо бэшля екх мануш, саво сля всаворо шуло панехкиря дукхатар.

3 Исусо пхучля сиклимарендар пав Упхэнима и фарисеендар:

— Чи трэбуни пав Упхэнима тэ састярэ дэ суббота?

⁴Вонэ ачиле мулком. Исусо лиляпэ насвалэстэ, састярда лэ и отмуля.

⁵Тунчи пхэнда лэнди:

— Кала тумаро чяворо чи гурув тэлэдэла дэ ханиг, чи тумэ на выщырде́на лэн екхатар и дэ суббота?

⁶Вонэ на джянгле, со тэ пхэнэ Исусости.

На бэшэн англал всавэрэндар

⁷Кала Исусо дыкхля, сар мануша, савэн акхардэ, выгидэнас пэсти фэдэр тхана, Вов пхэнда қацави дума:

⁸— Кала тут акхарэна пэ бьяв, на бэш пэ фэдэр тхан. Кала машкар манушэн, савэн акхардэ пэ бьяв, авэла пативэдэр тутар,

⁹тунчи кодэва, ко акхарда и тут, и лэ, поджяла и пхэнэла тути: «Уштав тхан кадэла манушэсти». И авэла тути ладжяво, и прыджялапэ тути тэ залэ шымай тхан.

¹⁰Нэ кала акхарэна тут, бэш пэ шымай тхан. Тунчи кодэва, ко акхарда тут, поджяла тутэ и пхэнэла: «Морэ, бэш англэ!» И кодэла, ко бэшэна пала скаминдэ паша тут, дыкхэна, со тути дэне патив.

¹¹Кодэва, ко ваздэлпэ упрэ, авэла тэлярдо. Нэ кодэва, ко тэлярэл еджино пэ, авэла ваздэно.

¹²Пхэнда Исусо и манушэсти, саво акхарда Лэ:

— Кала ту тховэх скаминд дивэсэ чи пашэ рятятэ, на акхар пала лэ ни тирэ амалэн, ни тирэ пхралэн, ни тиро родо, ни пашунэн, савэ исин барвалэ. Колэсти со и кадэла мануша акхарэна тут, кала терэна скаминд, и терэна тути кади, сар и ту лэнди тердан.

¹³Нэ кала ту терэх скаминд, акхар пала лэ чёrorэн, помардэн, лангалэн и корэн.

¹⁴Бахтало ту авэга, кала кадэла мануша на дэна тути павпалэ кода, со ту важ лэн стердан. Нэ рисявэлапэ вса тути дэ кодэва диво, кала дэвликунэ мануша отджювдэна мулэндар.

Дума пала манушэн, савэн акхардэ пала баро скаминд

¹⁵Екх мануш, саво бэшэлас Исусога пала скаминдэ, пхэнда:

— Бахтало мануш, саво хала мандро дэ Дэвлэхкэрэ Тхагарима!

¹⁶Исусо пхэнда лэсти:

— Екх мануш терда баро скаминд и акхарда бутэн манушэн.

¹⁷И кала авиля вряма, соб тэ бэшэн пала скаминдэ, бичалда бутярнэ, соб вов тэ пхэнэл акхардэ манушэнди: «Авэн, вса дожутярэл тумэн».

¹⁸Нэ всавэрэ мануша сар допхэндэпэ и ачиле тэ мангэ патив. Екх мануш пхэнда: «Мэ тиндом пхув, и манди трэбуни тэ джя и тэ дыкхэ ла. Мангав патив тутар!»

¹⁹Авэр мануш пхэнда: «Мэ тиндом дэшэн гурувэн, и манди трэбуни тэ дыкхэ, сар вонэ терэн бути. Мангав патив тутар!»

²⁰Трито мануш пхэнда: «Мэ лилём хуланя, на выджял мандэ тэ авэ тутэ».

²¹Кала бутярно рисиля, вов вса розпхэнда хулаести. Тунчи хулай холиля и пхэнда пэхкэрэ бутярнэсти: «Джя сигэдэр пав барэн и цыкнэн гасэн дэ форо тай стидэ кордэ чёrorэн, помардэн, корэн и лангалэн!»

²²Бутярно пхэнда: «Хулае! Вса тердом, сар ту манди прыпхэндан, нэ инте исин тхана».

²³Хулай пхэнда бутярнэсти: «Джя пав дромэн и паша грэдэн, и манг манушэн, соб муρο цэр тэ авэл пхэрдо.

²⁴Пхэнав тумэнди, со нико кодэлэндар, савэ сле акхардэ майанглал, на хана муρο хамо пала мурэ скаминдэ».

Сар тэ джя пала Исусо

²⁵ Джянас їтханэ Исусога бут манушэн. Тунчи Исусо обрисилия лэндэ и пхэнда:

²⁶ — Кала мануш, саво авэл Мандэ, на покамэла Ман будэр пэхкэрэн дадэ и да, ромня, чяворэн, пхралэн, пхэнен и будэр пэхкэрэ дживимастар, тунчи вов нисар на авэла Мурэ сиклярнэга.

²⁷ Мануш, саво на лиджял пэхкоро трушул и на джял пала Ман, нисар на авэла Мурэ сиклярнэга.

²⁸ Кала ко тумэндар закамэла тэ ваздэ башня, чи на бэшэла вов англал и на бинэла, скици ловэ пэ када трэбуни, соб тэ дотерэ рындо?

²⁹ Кала вов чувэла фундаменто тала башня, нэ на дотерэла кадэва рындо, мануша асанапэ лэстар пачя.

³⁰ И пхэнэна: «Кадэва мануш ачиля тэ терэ бути, нэ на дотерда».

³¹ Кала тхагари стидэлпэ пэ марима аврэ тхагарега, чи на бэшэла вов англал и на гинисарэла, исин ли лэстэ зор дэшэ пхангленца манушэн тэ выдья пэ марима тхагарега, кастэ исин биш пхангля манушэн?

³² А кала нат, тунчи бичалэла пативалэн манушэн тхагарестэ, кала вов инте дур и мангэла лэстар пачя.

³³ Кади и тумэндар нико на авэла Мурэ сиклярнэга, кала на ачявэла вса, со лэстэ исин.

³⁴ Лон — када мишто. Нэ кала лон хацарэла пэхкири зор, сар тэ терэ, соб тэ авэл вов лондо?

³⁵ Ни дэ пхув, ни дэ гуниво лэ на чувэга. Лэ кици вычувэн аври. Кастэ исин кана тэ шунэ, мэк шунэл!

15*Дума пала бакря, сави хасиля*

¹ Авэнас Исусостэ всавэрэ стидэмаря, савэ лэнас налогоуря, и бэзимахкэрэ мануша, соб тэ шунэ Лэ.

² Нэ фарисеэнди и сиклимаренди пав Упхэнима на чялэлас, со терда Исусо, и вонэ пхэнэнас:

— Вов прылэл бэзимахкэрэ манушэн и хал лэнца.

³ Нэ Исусо пхэнда лэнди кацави дума:

⁴ — Пхэнага, екхэстэ тумэндар исин шэл бакря, и екх лэндар хасиля. Чи на ачявэла вов енядэша тай еня бакрен дэ маля и чи на джяла тэ родэ бакря, сави хасиля?

⁵ Ай кала аракхэла бакря, баря лошага тховэла ла пэ пхикэ и лиджяла.

⁶ Кала авэла цэрэ, акхарэла пэхкэрэн амалэн и пашунэн и пхэнэла лэнди: «Лошавэн манца, мэ аракхлём бакря, сави хасиля».

⁷ Пхэнав тумэнди, со кади ж пэ упралима пала екхэ манушэ, саво ачявда бэзимо, будэр лошавэна, сар пала енядэша еня патявнэн манушэн, савэнди на трэбуни тэ ачявэ бэзимо.

Дума пала драхма

⁸ Кала манушнятэ исин дэш драхмы и вой хацарэла екх лэндар, чи на пхабарэла вой лампа, на шулавэла всаворо пэхкоро цэр и на авэла тэ родэ, соб тэ аракхэ кадья драхма?

⁹ А кала аракхэла ла, тунчи стидэла пэхкэрэн амалкэн и пашунэн дживлен тай пхэнэла: «Лошавэн манца, мэ аракхлём драхма, сави хацардом!»

¹⁰ Кади, пхэнав тумэнди, лошавэн ангелуря Дэвлэхкэрэ и пала екхэ манушэ, саво ачявда пэхкоро бэзимо.

Дума пала чявэ дадэхкэрэ, саво уджиля цэрал

11 Инте пхэнда Исусо:

— Екхэ манушэстэ сле дуй чявэ.

12 И тэрнэдэр лэндар пхэнда дадэсти: «Дадэ! Дэ манди тирэ барвалимастар котор, саво манди доросэлапэ». И дад розмарда вса, со лэстэ сля, пэ дон и дэня пэхкэрэ чявэнди.

13 Проджиля набут вряма, и цыкнэдэр чявэндар стидэня вса, со лэсти доросляпэ, и джиля дур, дэ авэр пхув. Котэ розтерда вса, со лэстэ сля, и пав диниманэ розчувэлас ловэ.

14 Кала вов розчута всавэрэ ловэ, дэ кодья пхув авиля бари бокх, и чяво мэрэлас бокхатар.

15 Тунчи джиля и намисардапэ екхэ манушэстэ кодэла пхуятар, тэ чяравэ баличен пэ маля.

16 Вов мэрэлас бокхатар и сля лошало тэ ха їтханэ баличенца, нэ лэсти и кода на дэнас.

17 Кала чявэстэ рисиля годи, тунчи вов пхэнда: «Бут намисардэн бутярнэн мурэ дадэстэ, и вонэ хан, скици закамэна, а мэ бокхатар катэ мэрав!

18 Вщява, рисявава павпалэ мурэ дадэстэ и пхэнава лэсти: "Дадэ! Мэ тердом бэзимо англа Дэвлэ пэ упралима и англа тут

19 и на ачяв тэ акхарэпэ тирэ чявэга. Нэ прылэ ман сар тирэ бутярнэ"».

20 Тунчи вщиля и джиля пэхкэрэ дадэстэ.

Кала чяво сля дур цэрэстар, дад удыхкля лэ. И ачиля лэсти дор пэхкэрэ чявэ. Тунчи вов прастэня лэстэ, облиля и чюминдэня лэ.

21 Чяво пхэнда дадэсти: «Дадэ! Мэ тердом бэзимо англа Дэвлэ пэ упралима и англа тут и на ачяв тэ акхарэпэ тирэ чявэга».

22 Нэ дад пхэнда пэхкэрэ бутярнэнди: «Джан сигэдэр! Анэн фэдэр їда, сави исин, и урявэнтэ чявэ, дэнтэ лэсти ангрусни пэ ангушт и пундрангэ пэ лэхкэрэ пурэн.

23 Анэн парвардэ гурувэ и чинэн лэ пэ мас. Тховага баро скаминд и авага тэ лошавэ!

24 Кадэва муро чяво сля муло, нэ отджювдиня, сля хацардо, нэ кана аракхляпэ». Тай ачиле тэ лошавэ.

25 Пхурэдэр чяво сля пэ маля. Кала вов рисиля малятар и сля паша цэр, шунда, сар цэлэн и дилябэн.

26 Тунчи акхарда екхэ бутярнэ и пхучля: «Со када терэлпэ?»

27 Бутярно пхэнда лэсти: «Авиля тиро пхрал. И тиро дад прыпхэнда тэ чинэ парвардэ гурувэ, колэсти со лэхкоро чяво рисиля цэрэ джювдо».

28 Тунчи пхурэдэр чяво холиля и на камля тэ заджя дэ цэр. Нэ дад выджиля цэрэстар и ачиля тэ акхарэ лэ.

29 Нэ вов пхэнда дадэсти: «Акэ, мэ скици бэрш терав бути важ тут, со никала тэ ваздэ шэро, и дэ всавэрэ кандав тут. Нэ ту и цыкнорэ бузнорэ на дэнян манди, соб мэ тэ лошавав мурэ амалэнца.

30 А кала кадэва тиро чяво, саво протерда пэхкэрэ ловэ налаче джювленца, авиля цэрэ, ту важ лэ чиндан парвардэ гурувэ».

31 Нэ дад пхэнда чявэсти: «Чяворо! Ту свабири вряма манца. И вса, со мандэ исин, када тиро.

32 Нэ важ кода трэбуни тэ лошавэ, со тиро пхрал сля муло, нэ отджювдиня, сля хацардо, нэ аракхляпэ».

16

Дума пала бипативалэ бутярнэ

1 Тунчи Исусо пхэнда Пэхкэрэ сиклярнэнди:

— Екхэ барвалэстэ сля бутярно, саво дыкхэлас пала лэхкоро цэр. Екхвар хулаести пхэндэ пэ кан, со бутярно протерэл вса кода, со лэстэ исин.

² Тунчи хулай акхарда бутярнэ и пхэнда: «Со када мэ пала тут шунав? Здэ манди тири бути. Колэсти со ту будэр на терэга мандэ».

³ Тунчи бутярно пхэнда еджино пэсти: «Со манди тэ терэ? Муро хулай вытрадэл ман кадэла бутятар. Тэ ганавэ пхув мандэ зора нэнай, а тэ мангэ ловэ манди ладжяво.

⁴ Джянав, со тэ терэ, соб тэ прылэн ман мануша дэ пэхкэрэн цэрэн, кала хацарава бути!»

⁵ Тунчи акхарда манушэн, савэ сле вуджилэ лэхкэрэ хулаести, тай пхэнда екхэсти: «Скици ту вуджило мурэ хулаести?»

⁶ Кодэва пхэнда: «Шэл барэ вакхор зэто». Бутярно пхэнда: «Залэ тиро лил, бэш и чин, со ту вуджило пандэша барэ вакхор».

⁷ Тунчи пхучля аврестэ: «А ту скици вуджило?» Кодэва пхэнда: «Екх пхангли гонэ див». Бутярно пхэнда лэсти: «Залэ тиро лил, бэш и чин, со ту вуджило охтошэл гонэ див».

⁸ И ашарда хулай бипативалэ бутярнэ пала кода, сар годяга выджиля кадэлэ рындостар. Кадэла люмлякэрэ чявэ лиджан рындурия пэхкэрэ амалэнца годявэдэр, сар чявэ Дэвлэхкэрэ, Саво исин Одуд.

⁹ Мэ ж пхэнав тумэнди: азбан пэсти амалэн хасютнэ барвалимага. И кала тумаро барвалимо проджяла, тумэн прылэна дэ катунэн, савэ авэна тэ аче вечно.

¹⁰ Ко дэ набарэ исин чячюно, кодэва и дэ барэ авэла чячюно. А ко начячюно дэ набарэ, кодэва и дэ барэ на авэла чячюно.

¹¹ И кала нащи тэ допатя тумэнди хасютно барвалимо, ко тумэнди дэла барвалимо чячюно?

¹² И кала тумэ на сле чячюнэ на дэ пэхкэрэ барвалима, ко тумэнди дэла тумаро?

¹³ Нисаво бутярно на авэла тэ терэ бути дуге хулаендэ. Важ кода со вов екхэ хулае на камэла, а аврэ камэла, екхэ хулаести авэла чячюно, ай пэ аврэ авэла тэ чюнгардэ. Нащи дэ екхэ вряма тэ тэрэ бути важ Дэвлэ и важ барвалима.

¹⁴ Шундэ вса откада фарисея, савэ камле ловэ, тай ваздэне Исусо пэ асама.

¹⁵ Исусо пхэнда лэнди:

— Тумэ камэн тэ сикавэпэ пативалэ манушэнца, нэ Дэвэл джянал тумарэ їлэ. И кода, со драго важ манушэн, исин гряцимо важ Дэвлэ.

Исусо пхэнэл пала Дэвлэхкэрэ Упхэнима

¹⁶ Упхэнимо тай англунаря сле англа Иоанно, нэ кана пхэнэлпэ Бахтало Лав пала Дэвлэхкэрэ Тхагарима, и всавэрэ прытховэн зора, соб тэ заджя дэ лэ.

¹⁷ Нэ сигэр пхув и упралимо хасявэна, а Упхэнимастар на хасявэла ни екхэ цыкно лаворо.

¹⁸ Кожно мануш, саво чувэл пэхкиря ромня и уджял аврятэ, терэл бэзимо и прэдэл пэхкиря ромня. И кодэва, ко лэл джювля, сави розлиджалдапэ, терэл бэзимо.

Барвало мануш и Лазари

¹⁹ Сля екхэ барвало мануш, саво урявэласпэ дэ фартэ кучутни їда санэ похтаностар тай кожно диво джювда шукар дэ пэхкэрэ барвалима.

²⁰ И паша вударэн лэстэ аври пашлёлас чёро мануш, савэ акхарэнас Лазари, и трупэ лэхкоро сля помардо насвалимастар.

²¹ Вов фартэ камля тэ чялэ хамага, саво тэлэдэлас скаминдэстар. Авэнас лэстэ риконэ и чибэнца тиндярэнас лэхкэрэ дукха.

²² Тай акэ, муля чёро, и ангелуря отлиджалдэ лэ Авраамостэ. Муля и барвало мануш, тай заганавдэ лэ.

²³ И кала барвало халас грыжа дэ адо, вов подыкхля упрал и удыкхля дур пэстар Авраамо и Лазаре, саво сля паша лэстэ.

²⁴ А тунчи акхарда: «Дадэ Авраамо! Ковлисар тиро іло важ ман! Бичал Лазаре, соб вов тэ тиндярэл пэхкоро ангушт дэ пани и тэ подлиджял муря чыбатэ, колэсти со мэ хав бари грыжа».

²⁵ Нэ Авраамо пхэнда: «Чяво! Взгинисар, со дэ тирэ джювима ту лилян лачимо, а Лазарестэ сля екх бида. Кана Лазари катэ улэлпэ грыжатар и лошавэл, а ту прылэх бари грыжа».

²⁶ Када инте на вса, нэ машкар тумэн и амэн стердэ бари выганавди, соб тумэндар нащи сля тэ пэрэдэжя амэндэ и амэндар — тумэндэ».

²⁷ Тунчи барвало пхэнда: «Мангав тут, дадэ, бичал Лазаре мурэ дадэстэ дэ цэр».

²⁸ Мандэ исин панч пхрала. Мэк Лазари розпхэнэла лэнди, соб и вонэ тэ на попэрэн дэ кадэва тхан, тев хан грыжа».

²⁹ Авраамо пхэнда: «Лэндэ исин Моисеи и ангунаря, мэк шунэн лэн».

³⁰ Нэ барвало пхэнда: «Нат, дадэ Авраамо! Нэ кала ко мулэндар вщела и авэла лэндэ, тунчи вонэ ачявэна бэзимо».

³¹ Авраамо пхэнда лэсти: «Кала вонэ на шунэн Моисее тай ангунарен, тунчи вонэ на патяна, кала и муло оджювдэла».

17

Исусо сиклярэл, сар трэбуни тэ эртисарэ, тэ патя и тэ терэ бути важ Дэвлэ

¹ Тунчи Исусо пхэнда Пэхкэрэ сиклярнэнди:

— Бут исин, со цырдел манушэ бэзимастэ. Нэ бида кодэлэсти, ко залиджял манушэн дэ бэзима.

² Фэдэр важ лэ, соб тэ прыпхандэн лэсти баро и пхаро бар пэ кора и тэ чувэн лэ дэ море, сар тэ залиджял вов дэ бэзима екхэ кадэлэн цыкнэндар.

³ Дыкхэн пала пэстэ! Кала пхрал тиро терэла бэзимо, запхэн лэсти када тэ терэ! И кала вов ачявэла бэзимо, эртисар лэ!

⁴ И кала пхрал тиро эфта молы дэ дивэ терэла бэзимо и эфта молы авэла тутэ и пхэнэла: «Дошало! Мангав патив!» — эртисар лэ.

⁵ Апостолуря екхвар пхэндэ Раести:

— Баряр амаро патявимо!

⁶ Рай пхэнда:

— Кала тумэндэ исин патявимо, сар цыкно горчично ворзо, и тумэ пхэнэна кадэлэ тутовонэ каштэсти: «Вычинпэ пхуятар, джя дэ море и барюв», — тунчи кашт кандэла тумэн.

⁷ Ко тумэндар пхэнэла бутярнэсти, саво рисиля малятар, тев вов вушарэлас пхув чи чяравэлас бакрэн: «Джя сигэдэр, бэш пала скаминд»?

⁸ Нат, тумэ на кади дэдумэна, нэ пхэнэна лэсти: «Вщи, тав манди тэ ха! Обпхандэпэ кущикага, подэ и прылэ скаминдэстар, кала мэ авава тэ ха и тэ пэ! Тунчи еджино хага и пэга!»

⁹ Чи наисарэна тумэ бутярнэ пала кода, со стерда бути, сави лэсти трэбуни сля тэ терэ?

¹⁰ Кади и тумэ, кала терэна вса, со тумэнди прыпхэндо, дэдумэн пала пэстэ: «Амэ бутярнэ, савэ нисо на ачен. И стердэ кода, со амэнди трэбуни сля тэ стерэ».

Исусо састярэл дэишэн, кастэ сля насвалимо проказа

¹¹ Пав дром дэ Ерусалимо Исусо проджялас машкар Самария тай Галилея.

¹² Кала Вов заджиля дэ екх гав, авиле Лэстэ дэш мануша, савэндэ сля насвалимо проказа. Вонэ ачиле дэ рига

¹³ тай типисиле зоралэ гласога:

— Исусо Сиклимари! Ковлисар іло Тиро важ амэн!

14 Кала Исусо удыхля лэн, Вов пхэнда:

— Джян и сикавэнпэ рашаенди!

И кала мануша джиле, пав дромэ вонэ састярдэпэ насвалимастар.

15 Екх лэндар дыкхля, со састярдапэ, рисиля павпалэ и ашарда Дэвлэ зоралэ гласога.

16 Вов тэлэдэня Исусостэ дэ пурэн и наисарда Лэ. А кодэва мануш сля самарянино.

17 Тунчи Исусо пхэнда:

— Чи на дэш манушэн састярдэпэ? Тев жэ инте еня?

18 Сости вонэ на рисиле, соб тэ ваздэ слава Дэвлэсти? Ай рисиля кици кадэва самарянино?

19 И пхэнда кадэлэ манушэсти:

— Вщи, джя цэрэ! Тиро патявимо тут фирисарда.

Исусо пхэнэл пала Дэвлэхкоро Тхагаримо

20 Тунчи фарисея пхучле Исусостар, кала авэла Дэвлэхкоро Тхагаримо. Исусо пхэнда:

— Дэвлэхкоро Тхагаримо на авэла кади, соб всавэрэ лэ тэ дыкхэн.

21 Нико на пхэнэла: «Акэ, вов катэ исин». Чи: «Акэ, вов котэ». Нэ Дэвлэхкоро Тхагаримо машкар тумэн исин.

22 Тунчи Исусо пхэнда Пэхкэрэ сиклярнэнди:

— Авэла вряма, кала закамэна тэ дыкхэ екх дивэндар Манушыканэ Чявэхкэрэ, нэ на дыкхэна.

23 Кала пхэнэна тумэнди: «Акэ, Вов катэ!» Чи: «Акэ, Вов котэ исин!» — на джян пордэ и на прастан пала лэн.

24 Сар молния марэл упралимастар и дэл яг и душлимо пав всавири пхув, кади ж и Чяво Манушыкано рисявэла павпалэ.

25 Нэ англал кадэлэстар Чяво Манушыкано хала бари грыжа и кадэва родо Лэстар отпхэнэлапэ.

26 Сар сля дэ вряма, кала джювда Нои, кади авэла и дэ вряма, кала рисявэла Чяво Манушыкано.

27 Мануша ханас, пэнас, лэнас ромнен и джянас паларом аж ды кодья вряма, сар Нои заджиля дэ ковчего, а тунчи джиля баро пани и всавэрэ хасиле.

28 Кади ж сля дэ вряма, кала джювда Лото: мануша хале, пиле, тинэнас, битинэнас, чувэнас ворзо дэ пхув, ваздэнас цэра.

29 Нэ дэ дивэ, кала Лото выджиля форостар Содомо, джиле упралимастар ягуно брышынд и сера и всавэрэ хасиле.

30 Кади ж авэла и дэ кодэва диво, кала Чяво Манушыкано сикавэлапэ.

31 Дэ кодэлэ дивэ мануш, саво авэла упрэ пэ ушарди, а кырпы лэхкэрэ — дэ цэр, мэк на змукэлпэ тэлэ пала лэн. Ко авэла пэ маля, мэк на рисявэл цэрэ.

32 Рипэрэн Лотохкиря ромня!

33 Ко камэл тэ фирисарэ пэхкоро джювимо, кодэва хасярэла лэ. Ай ко хасярэла пэхкоро джювимо, кодэва сфирисарэла лэ.

34 Пхэнав тумэнди: дэ кодья рят совэна дуй мануша, екхэ залэна, ай авэр мануш ачелапэ.

35-36 Дуй манушня авэна тэ терэ варо ворзостар: екха манушня залэна, ай авэр ачелапэ.

37 Тунчи пхэндэ Исусости:

— Рае, тев када авэла?

Исусо пхэнда:

* 17:35-36 Дэ койсавэ пуранэ греческа лила (манускрипты) исин инте кацавэ лава: «Дуй мануша авэна пэ маля, екхэ манушэ залэна, ай авэр ачелапэ».

— Пордэ, тев пашлёл муло трупо, стидэнапэ орлура.

18

Дума пала кода, сар трэбуни тэ мангэпэ

¹ Тунчи Иусо пхэнда лэнди пала кода, со трэбуни всавири вряма тэ мангэпэ и тэ на грисявэ:

² — Дэ екх форо сля сындимари, саво Дэвлэстар на даралас и манушэндар на ладжяласпэ.

³ Дэ кодэва форо сля и екх джювли, савятэ муля ром. Вой пхирэлас сындимарестэ и мангэлас: «Пав чячима розлэ муро рындо! Фирисар ман кодэлэстар, ко дошарэл ман!»

⁴ Нэ сындимари бут вряма нисо на камля тэ терэ. Тунчи пхэнда еджино пэсти: «Мэ Дэвлэстар на дарав и манушэндар на ладжявпэ.

⁵ Нэ важ кода со кадья джювли на пэрэачел тэ доха ман, пав чячима розлава лакоро рындо, соб вой будэр мандэ тэ на пхирэл и тэ на дохал ман».

⁶ И пхэнда Рай:

— Шунэн, со пхэнэл бибахтало сындимари?

⁷ А кала кади, Дэвэл ли на фирисарэла пав чячима кодэлэн, савэн выгидэня и савэ зоралэ гласога акхарэн Лэ диво и рят? Чи помукэла лэн Дэвэл?

⁸ Пхэнав тумэнди, со Дэвэл сиво лэн фирисарэла пав чячима. Нэ Чяво Манушыкано кала авэла, чи аракхэла Вов пэ пхуя патявимо?

Дума пала фарисее тай стидэмаре

⁹ Пхэнда Иусо кацави дума манушэнди, савэ гинисарэнас пала пэстэ, со вонэ фартэ пативалэ, а пала аврэн пхэнэнас, со вонэ бибахталэ:

¹⁰ — Дуй мануша заджиле дэ храмо тэ мангэпэ. Екх лэндар сля фарисеи, ай авэр — стидэмари, саво лэлас налогура.

¹¹ Фарисеи ачелас тай мангяпэ дэ пэхкэрэ ілэ кади: «Дэвла! Наисарав тут пала кода, со мэ на кацаво, сар авэр мануша, савэ исин чёра, хохавнэ, терэн биладжявимо ромнятар, чи сар кадэва стидэмари.

¹² Мэ рицарав посто дуй молы дэ курко, отдав дэшто котор муря ворхатар».

¹³ Стидэмари жэ ачиля дэ рига и ладжяво лэсти сля тэ ваздэ якха упрэ, нэ марэлас дэ колинэ еджино пэ и пхэнэлас: «Дэвла! Ковлисар іло Тиро важ ман, бэзимахкэрэ манушэ!»

¹⁴ Пхэнав тумэнди, со стидэмари джиля бидошакоро англа Дэвлэ, а фарисеи ачиля дошало. Кодэлэсти со кожно мануш, саво ваздэл еджино пэ, авэла обмукло, а саво тэлярэл еджино пэ, авэла ваздэно.

Иусо мангэлпэ пала чяворэн

¹⁵ Анэнас Иусостэ цыкнэн чяворэн, соб Вов тэ лэлпэ лэндэ, а сиклярнэ дыкхле кода и запхэндэ лэнди.

¹⁶ Нэ Иусо акхарда сиклярнэн и пхэнда:

— Мукэн чяворэн, соб тэ авэн Мандэ, и на запхэнэн лэнди, колэсти со Дэвлэхкоро Тхагаримо исин лэнгоро.

¹⁷ Чячимага пхэнав тумэнди: ко на прылэла Дэвлэхкоро Тхагаримо кади, сар прылэн цыкнэ чяворэ, кодэва дэ Дэвлэхкэрэ Тхагарима на заджяла.

Барвало мануш пхучел Иусо пала вечно джювимо

¹⁸ Екх пхурэдэрэндар пхучля Иусостар:

— Сиклимари лачё! Со манди тэ терэ, соб тэ доросав вечно джювимо?

¹⁹ Иусо пхэнда лэсти:

— Сости ту пхэнэх пала Ман «лачё»? Кици Екх Дэвэл исин лачё.

20 Ту джянэх заповедь: на тер биладжявимо тирэ їрестар, на умар, на чёр, на пхэн хохавимо пэ сындо, полэ тирэ дадэ и да.

21 Кодэва мануш пхэнда:

— Вса откада мэ терав тэрнэ бэршэндар.

22 Исусо шунда када и пхэнда лэсти:

— Екх тути на хутилэл: битин вса, со тутэ исин, и роздэ ловэ чёрорендэ, соб тэ авэл тутэ барвалимо пэ упралима. Тунчи ав и джя пала Ман!

23 Кала пхурэдэр шунда када, вов загрисиля, колэсти со сля фартэ барвало.

24 Исусо дыкхля, со вов загрисиля, и пхэнда:

— Сар пхаро барвалэнди тэ заджя дэ Дэвлэхкэрэ Тхагарима!

25 Локхэдэр верблюдоности тэ проджя машкар сувякоро каноро, сар барвалэсти тэ заджя дэ Дэвлэхкэрэ Тхагарима.

26 Кодэла, ко шундэ, пхучле:

— Кастэ тунчи исин зора тэ фирисарэпэ?

27 Исусо пхэнда:

— Кода, со манушэсти наши тэ стирэ, кода стирэла Дэвэл.

28 Пётро пхэнда Исусости:

— Акэ, амэ вса ачявдэ и джиле пала Тут.

29 Исусо пхэнда лэнди:

— Чячимага пхэнав тумэнди: мануш, саво ачявда важ Дэвлэхкэрэ Тхагарима цэр, чи ромня, чи пхралэн, чи дадэ и да, чи чяворэн,

30 лэла будэр дэ кадэлэ джювима, а дэ вряма, сави авэла, — вечно джювимо.

Исусо дэ трито моло пхэнэл пала Пэхкэрэ мэрима

31 Тунчи Исусо отлиджялда дэ рига Пэхкэрэ сиклярнэн и пхэнда лэнди:

— Акэ, амэ заджях дэ Ерусалимо, и терэлапэ вса, со чиндэ англунаря пала Чяво Манушыканэ.

32 Кади со здэна Лэ бидэвлэхкэрэ манушэнди, и вонэ стерэна Лэстар асамо, дэна Лэсти бари дукх и бари грыжа, авэна тэ чунгардэ пэ Лэстэ,

33 тэ марэ Лэ чукняга, а тунчи умарэна. Нэ пэ трито диво Вов одджювдэла.

34 Нэ сиклярнэ нисо кадэлэстар на полиле, кадэла лава сле гаравдэ лэндар. Вонэ на джянэнас пала со Вов дэдүмэл.

Исусо састярэл корэ

35 Кала Исусо поджялас форостэ, саво акхарэлпэ Ерихоно, екх коро бэшэлас паша дром и мангэлас ловэ.

36 Кала коро шунда, со пашэ лэстар джян мануша, вов пхучля:

— Со када терэлпэ?

37 Лэсти пхэндэ:

— Када джял Исусо Назаретостар.

38 Тунчи коро ачиля тэ типисявэ:

— Исусо, Чяво Давидохкоро! Ковлисар Тиро їло важ ман!

39 Мануша, савэ джиле англал, прыпхэндэ лэсти, соб вов тэ заачел мулком, нэ коро типисиля инте зоралэдэр:

— Чяво Давидохкоро! Ковлисар тиро їло важ ман!

40 Исусо ачиля пэ дром и прыпхэнда, соб тэ анэн кадэлэ корэ Лэстэ. Кала коро поджиля, Исусо пхучля:

41 — Со ту камэх, соб Мэ тэ терав важ тут?

Коро пхэнда:

— Рае! Камав тэ дыкхэ!

42 Исусо пхэнда лэсти:

— Дыкх! Тиро патявимо тут фирисарда!

⁴³ Коро екхатар ачила тэ дыкхэ и джила пала Иусо, а еджино ачила тэ ваздэ слава Дэвлэсти. И всавэрэ мануша, ко дыкхле кода, ваздэнас Дэвлэсти слава.

19

Закхеи ачявэл пэхкоро бэзимо

¹ Тунчи Иусо заджила дэ форо Ерихоно и проджялас пав лэ.

² Тай акэ, екх барвало мануш, стидэмаренгоро пхурэдэр, савэ акхарэнас Закхеи,

³ закамля тэ дыкхэ Иусо, Ко Вов исин. Нэ Закхеи сля цыкноро вучимага, и лэсти нащи сля тэ дыкхэ Иусо, колэсти со котэ стидэняпэ фартэ бут манушэн.

⁴ Колэсти вов прастэня англэ, загульда пэ тутово кашт, соб тэ дыкхэ Иусо, кала Вов проджяла мамуй.

⁵ Кала Иусо авиля пэ кодэва тхан, Вов вздыкхля упрэ и пхэнда:

— Закхеи! Змукпэ тэлэ! Авдивэ Манди трэбуни тэ авэ тутэ цэрэ!

⁶ Закхеи сиго змукляпэ и баря лошага прылиля Иусо.

⁷ Манушэнди, савэ сле котэ, фартэ на чялиля кода, и вонэ пхэнэнас:

— Кастэ Вов заджила дэ цэр! Манушэстэ, саво джювэл дэ бэзима!

⁸ Закхеи ж вщиля англа Рае тай пхэнда:

— Рае! Епаш мурэ хулаимастар мэ отдава чёrorэнди, и кастэ лилём будэр, сар трэбуни, мэ рисарава шарвар будэр.

⁹ Иусо пхэнда лэсти:

— Авдивэ фирисаримо авиля дэ кадэва цэр, колэсти со и Закхеи исин Авраамохкоро чяво!

¹⁰ Чяво Манушыкано авиля тэ аракхэ и тэ фирисарэ кодэлэн, савэ хасиле.

Дума пала барвалэ манушэ и лэхжэрэн бутярнэн

¹¹ Қодэлэнди, ко када шунда, Иусо пхэнда инте екх дума. Колэсти со Иусо сля паша Ерусалимо, и мануша гинисардэ, со сиго оттерэлапэ Дэвлэхкоро Тхагаримо.

¹² Иусо пхэнда:

— Екх мануш барвалэ родостар лагля дэ дуратуни пхув, соб тэ аче лэсти тхагарега, а тунчи камля тэ рисявэ павпалэ.

¹³ Вов акхарда дэшэн бутярнэн, дэня лэнди пав шэл драхмы и пхэнда: «Затерэн пэ кадэлэн ловэн манди ворха ды кодыя вряма, сар мэ рисявава павпалэ».

¹⁴ Нэ мануша лэхкиря пхуятар на камле кадэлэ рае и бичалдэ пативалэн манушэн пала лэ дэ дром, соб вонэ тэ пхэнэн: «Амэ на камах, соб кадэва мануш тэ авэл амарэ тхагарега».

¹⁵ Нэ вов ачиля тхагарега и рисиля павпалэ. Тунчи акхарда пэстэ бутярнэн, савэнди дэня ловэ, соб тэ уджянэ, скици вонэ затердэ лэсти ворха.

¹⁶ Авиля англуно бутярно и пхэнда: «Хулае! Пэ тирэ шэл драхмы мэ затердом екх пхангли!»

¹⁷ Хулай пхэнда лэсти: «Мишто. Ту — лачё бутярно! Пала кода, со ту слян чячюно дэ кадэва набаро рындо, дава дэш форурия тала тиро васт».

¹⁸ Авиля авэр бутярно и пхэнда: «Хулае! Тирэ шэл драхмы затердэ панч шэла драхмы!»

¹⁹ Хулай пхэнда кадэлэ бутярнэсти: «И ту ав пхурэдэрэга пэ панчен фонэн».

²⁰ Авиля трито бутярно и пхэнда: «Хулае! Акэ тути тирэ шэл драхмы! Мэ запханглём лэн дэ кхоснэ и гаравдом.

²¹ Мэ даравас тутар, колэсти со ту мануш, саво бут мангэл: ту лэх кода, со на тховэгас, и чинэх кода, со на чувэгас дэ пхув».

²² Хулай пхэнда лэсти: «Бибахтало бутярно, тирэ лавэнца сундисарава тут! Ту джангян, со мэ — мануш, саво бут мангэл, и со мэ лав котэ, тев на тховавас, и чинав кода, со на чувавас дэ пхув?»

23 Сости ту на дэнян мурэ ловэ дэ рындо? И кала мэ рисилём, тунчи залилём бы лэн и ворха упрэ».

24 И пхэнда пашунэ манушэнди: «Залэнтэ лэстар шэл драхмы и дэнтэ кодэлэсти, кастэ исин екх пхангли!»

25 Мануша пхэндэ хулаести: «Хулае! Лэстэ и кади исин екх пхангли!»

26 Нэ хулай дэдуманя лэнди: «Пхэнав тумэнди, кастэ исин, кодэлэсти дэлапэ инте. А кастэ нэнай, залэлапэ и кода, со лэстэ исин.

27 Мурэн врыжымашэн, савэ на камле, соб мэ тэ авав лэнгэрэ тхагарега, анэн кордэ и мулярэн англа ман».

Исусо дэ бари слава заджял дэ Ерусалимо

28 Исусо розпхэнда када и джиля пав дром дэ Ерусалимо.

29 Кала Вов поджила гавэндэ Виффагия тай Вифания, савэ аченас паша Оливково плай, Вов бичалда англэ дон Пэхкэрэн сиклярнэн

30 и пхэнда:

— Джян дэ гав, саво англа тумэн. Кала заджяна, дыкхэна, со ачел прыпхангло тэрно мугари, пэ савэ инте нико на бэшэлас. Отпхандэн лэ и лиджян Мандэ.

31 Кала ко пхучела тумэндар: «Пэ со тумэ отпхандэн мугаре?» — пхэнэн кади: «Вов трэбуни Раести».

32 Бичалдэ сиклярнэ джиле тай аракхле мугаре, сар пхэнда Исусо.

33 Кала вонэ отпхандэнас мугаре, хулая пхучле лэндар:

— Пэ со тумэ отпхандэн мугаре?

34 Сиклярнэ пхэндэ:

— Вов трэбуни Раести.

35 Тунчи андэ мугаре Исусостэ, чутэ пэ лэстэ пэхкири упралуни їда тай тховдэ Исусо упрал.

36 Кала Исусо ладэлас, мануша чувэнас пэ дром пэхкири упралуни їда.

37 Кала Исусо подлагля тханэстэ, тев дром змукэлпэ Оливковонэ плаестар, фартэ бут сиклярнэн подваздэне пэхкоро гласо и лошага ачиле тэ ашарэ Дэвлэ пала барэ рындурия, савэ вонэ дыкхле.

38 И пхэнэнас:

— Бахтало исин Тхагари, Саво авэл важ Раехкоро Лав! Пачя пэ упралима и слава Дэвлэсти пэ вуче упралима!

39 Койсавэ фарисея аченас котэ и пхэндэ Исусости:

— Сиклимари! Улэ Тирэ сиклярнэн!

40 Нэ Исусо дэдуманя лэнди:

— Пхэнав тумэнди: кала вонэ заачена мулком, тунчи бара затиписявэна.

Исусо ровэл пала Ерусалимо

41 Кала вонэ поджиле пашэдэр Ерусалимостэ, Исусо вздыкхля пэ форо и заровиня.

42 Тай пхэнда:

— О, тэ полэх бы ту авдивэ, со анэла тути пачя! Нэ кана гаравдо када тирэ якхэндар.

43 Авэна дивэ, кала тирэ врыжымашурия выджяна маримага пэ тут, ваздэна пэ тут пхуэнэ плая, поджяна тутэ тай стасавэна тут всавэрэ ригэндар.

44 Розпхагэна тут, тирэ чяворэн мулярэна, бар пэ барэ тути на ачявэна, пала кода со ту на уджянглиян вряма, кала Дэвэл авиля тутэ.

Исусо дэ храмо

45 Тунчи Исусо заджиля дэ храмо и ачиля тэ выградэ тимисарен.

46 И пхэнэлас:

— Кади исин чиндо: «Муро цэр — када цэр мангимахкоро», а тумэ тердэ лэстар прахарицико цэр.

⁴⁷ Диво дивэстар Исусо сиклярэлас манушэн дэ храмо. Нэ англунэ рашая, сиклимаря пав Упхэнима тай манушэнгэрэ пхурэдэра родэнас, сар тэ мулярэ Исусо.

⁴⁸ И на джянгле, сар када тэ стерэ, колэсти со всавэрэ мануша шундэ Исусохкэрэ лава и на камле тэ промукэ ни екх лэндар.

20

Катарь Исусостэ зор

¹ Екхвар, кала Исусо сиклярэлас манушэн дэ храмо и пхэнэлас Бахтало Лав, поджиле Лэстэ англунэ рашая тай сиклимаря пав Упхэнима йтханэ пхурэдэрэнца ² и пхучле Лэстар:

— Пхэн амэнди, савя зорага Ту вса кода терэх? И ко дэня Тути кадья зор?

³ Исусо пхэнда лэнди дэ отпхэнима:

— Пхучява и Мэ тумэн, пхэнэн Манди:

⁴ катарь Иоанностэ зор тэ болдэ, упралимастар чи манушэндар?

⁵ Тунчи вонэ дэдумане машкар пэстэ:

— Кала пхэнага: «Упралимастар», — Вов пхучела: «Сости ж тумэ лэсти на патине?»

⁶ А кала пхэнага: «Манушэндар», — тунчи всавэрэ мануша марэна амэн барэнца, вонэ ж динэн, со Иоанно сля англунари.

⁷ И пхэндэ:

— Амэ на джнянах, кастар.

⁸ Исусо пхэнда лэнди:

— Тунчи и Мэ на пхэнава тумэнди, савя зорага терав вса откада.

Дума пала бихаталэн бутярнэн дэ виноградиико

⁹ Тай пхэнда кацави дума:

— Екх мануш выбарярада виноградиико. Тунчи здэня лэ манушэнди пала ловэн, а еджино улагля пэ бут вряма.

¹⁰ Кала поджиля вряма, бичалда лэндэ пэхкэрэ бутярнэ, соб тэ залэ котор виноградостар, саво стидэне. Нэ виноградаря дукхавдэ бутярнэ и отбичалдэ лэ павпалэ шушэ вастэнца.

¹¹ Хулай бичалда лэндэ аврэ бутярнэ, нэ вонэ мардэ лэ тай тэлярдэ лэхкири патив, и отбичалдэ шушэ вастэнца.

¹² Хулай бичалда лэндэ инте екхэ бутярнэ. Нэ виноградаря и кодэлэ домардэ и вычутэ аври.

¹³ Тунчи хулай пав виноградиико пхэнда: «Со манди тэ терэ? Бичалава лэндэ мурэ камлэ чявэ, чи на ладжяна лэстар?»

¹⁴ Нэ виноградаря дыкхле чявэ и пхэндэ екх екхэсти: «Акэ кодэва, касти доросэлапэ всаворо хулаимо, мулярага лэ, тунчи хулаимо доросэлапэ амэнди».

¹⁵ Тунчи вылиджалдэ чявэ аври виноградиикостар тай мулярдэ лэ. И со терэла лэнца виноградиикохкоро хулай?

¹⁶ Авэла тай мулярэла кадэлэн виноградарен, а виноградиико отдэла аврэ манушэнди.

Мануша, савэ шундэ Исусо, пхэндэ:

— Тэ на авэл кади!

¹⁷ Исусо въздыкхля пэ лэн и пхучля:

— Сар тэ полэ кода, со чиндо: «Бар, саво вычутэ кодэла, ко ваздэнас цэр, ачиля шэрутнэ барэга дэ вэнгло?»

18 Қо тэлэдэла пэ кодэва бар, розмарэлапэ, а пэ кастэ кодэва бар пэрэла, розтасавэла лэ.

19 Дэ кодья вряма сиклимаря пав Упхэнима тай англунэ рашая полиле, со Исусо пала лэн розпхэнэлас, и камле екхатар тэ хутилэ Лэ, нэ дарэне манушэндар.

Чи трэбуни тэ потинэ налогоуря императости

20 Тунчи вонэ ачиле тэ дыкхэ пала Исусо и подбичалэнас Лэстэ манушэн, савэ поддыкхэнас пала Лэ и прытховэнаспэ пативалэ манушэнца, нэ родэнас, сар тэ астарэ Исусо пэ лавэн тай тэ здэ Лэ раенди и прыбэшлэсти Римостар.

21 Вонэ пхучле Исусостар:

— Сиклимари! Амэ джянах, со Ту пхэнэх тай сиклярэх пав чячима. И на дыкхэх пэ мо манушэсти, нэ сиклярэх манушэн чячюнэ Дэвлэхкэрэ дромэсти.

22 Чи мишто пав Упхэнима тэ потинэ налогоуря императости, чи нат?

23 Исусо полиля лэнгоро хрантимо тай пхэнда лэнди:

24 — Сикавэнтэ манди динарии: кахкоро муй исин вымардо пэр лэстэ и кахкоро катэ лав?

Вонэ пхэндэ:

— Императохкэрэ.

25 Исусо пхэнда лэнди:

— Тунчи одэн императости императохкоро, а Дэвлэсти одэн Дэвлэхкоро.

26 Лэндэ на выджиля тэ схутилэ Исусо пэ лавэ англа манушэн. Вонэ дэнэпэ дыво Лэхкэрэ лавэнди и заачиле мулком.

Пала одджюндивимо мулэндар

27 Тунчи авиле койсавэ саддукея. Вонэ на патянах, со мулэ одджювдэна, тай пхучле Исусостар:

28 — Сиклимари! Моисеи чинда амэнди, со, кала мэрэла мануш, кастэ сля ромни и на сля чяворэн, тунчи лэхкэрэ пхралэсти трэбуни тэ лэл боря паларом, соб тэ авэл пхралэстэ родо.

29 Сля эфта пхралэн. Пхурэдэр лэндар лиля пэсти ромня, нэ тунчи муля, и чяворэн на сля лэндэ.

30 Кади ж и авэр пхрал.

31 И трито пхрал лиля пэсти кадэла ромня, и кади ж всавэрэ эфта пхралэн. Всаверэ пхрала помуле, и чяворэн лэндэ на сля.

32 Тунчи муля и ромни.

33 Кала мулэ одджювдэна, кахкири ромни кадья манушни авэла? Вой жэ эфта молы паларом выджялас!

34 Исусо пхэнда лэнди:

— Мануша дэ кадэва вако лэн пэсти ромнен и джян паларом.

35 А касти вытэлэдэла патив тэ джювэ дэ авэр вако тай савэ одджювдэна мулэндар, кадэла мануша на лэн пэсти ромнен и паларом на выджян.

36 Вонэ на мэрэна, нэ исин сар ангелуря. Вонэ важ Дэвлэ чявэ и чея, колэсти со авэна ваздэнэ мулэндар.

37 Ай кода, со мулэ одджювдэн, сикавда Моисеи паша терново кашт, саво пхаболас, кала пхэнда Раести, со Вов — Дэвэл Авраамохкоро, Дэвэл Исаакохкоро тай Дэвэл Иаковохкоро.

38 Вов — Дэвэл джювдэн, а на мулэн. Лэстэ всавэрэ исин джювдэ.

39 Пэ кода койсавэ сиклимаря пав Упхэнима пхэндэ:

— Сиклимари! Ту мишто пхэндан.

40 И всавэрэ даранас тэ пхуче Исусостар дурэдэр.

Ко исин Исусо

41 Тунчи Исусо пхучля лэндэ:

— Сар пхэнэн, со Христосо исин Чяво Давидохкоро?

⁴² Кала еджино Давидо пхэнэл дэ лил «Псалмы»:

«Пхэнда Рай Дэвэл мурэ Раести:

Бэш пав чяче вастэ Мандар

⁴³ ды кодыя вряма,

сар Мэ чувава Тирэ врыжымашэн

тала пурэн Тути».

⁴⁴ Давидо акхарэл Лэ Раега. Сар Вов прыджялпэ Давидости чявэга?

Исусо пхэнэл пала домуенгэрэн манушэн

⁴⁵ И кала Исусо шундэ всавэрэ мануша, Вов пхэнда Пэхкэрэ сиклярнэнди:

⁴⁶ — Даран сиклимарендар пав Упхэнима, савэнди чялёл тэ пхирэ дэ лунго їда и соб мануша тэ наисарэнпэ лэнца пэ форо. Дэ синагога и дэ цэрэн, курик лэн акхарэн, вонэ камэн тэ бэшэ пэ ангулно тхан.

⁴⁷ Вонэ залэн цэра джювлендар, савэндэ муле рома, и бут мангэнпэ кади, соб тэ дыкхэн лэн мануша. Лэн дожутярэл барэдэр сындэ.

21

Манушни дэл ловэ пэ храмо

¹ Тунчи Исусо дыкхля, сар барвалэ мануша чувэнас даруля дэ храмохкоро сыртали.

² Дыкхля кади ж, сар чёроры манушни, савятэ муля ром, чута дэ сыртали дуй харумэ хурдэ ловэнца.

³ Исусо пхэнда:

— Чячимага пхэнав тумэнди, со кадыя чёроры манушни чута будэр всавэрэндар.

⁴ Всавэрэ пэхкэрэ барвалимастар дэне даро Дэвлэсти, а кадыя чёры отдэна всавэрэ ловэ, савэ сле латэ пэ джювима.

Исусо пхэнэл пала кода, со авэла

⁵ Кала мануша пхэнэнас пала храмо, сар вов стердо кучутнэ барэндар тай шукар обтохво дарэнца, савэ анэнас Дэвлэсти, Исусо пхэнда:

⁶ — Авэла вряма, кала кодэлэстар, со тумэ катэ дыкхэн, на ачелапэ бар пэ барэ, вса авэла розмардо.

⁷ Тай пхучле Исусостар:

— Сиклимари! Кала вса откада авэла? Сави шпэра, со када вса сиго авэла?

⁸ Исусо пхэнда:

— Дыкхэн, соб тумэн тэ на хохавэн! Бут манушэн авэна тала Муро Лав и пхэнэна: «Када Мэ» и «Авиля вряма». На джан пала лэндэ.

⁹ Кала шунэна пала маримо и пала кода, сар ваздэнпэ мануша екх пэ екхэстэ, тунчи на даран. Анггал кадэлэсти трэбуни тэ авэ. Нэ агор авэла на екхатар.

¹⁰ Исусо пхэнэлас дурэдэр:

— Народуря ваздэнапэ пэ марима екх екхэга, и тхагаримо выдзяла пэ марима тхагаримага.

¹¹ Пхув затинисявэла баря зорага, авэна пав тханэн бокха, насвалимо и бари дар, тай упралимо парувэлапэ.

¹² Нэ анггал мануша авэна тэ хутилэ тай тэ традэ тумэн, тэ отлиджа дэ синагоги тай тэ чувэ дэ барунэн. Вонэ лиджяна тумэн тхагарендэ и раендэ пала Муро Лав.

¹³ Тунчи тумэндэ авэла вряма тэ пхэнэ пала Ман.

¹⁴ Нэ тховэн пэсти дэ їлэ: на пхагэн шэро, со тэ пхэнэ.

¹⁵ Мэ дава тумэнди кацавэ лава и годи, со тумарэ врыжымашуря пхэндэна муя и на выачена англа тумэн.

16 Доджяла ды кодэлэ, со дада и дэя, пхрала, родо тумаро и амала авэна тэ здэ тумэн, а койсавэн тумэндар мулярэна.

17 Всавэрэ мижона пэ тумэн пала Ман.

18 Нэ ни екх балоро тумарэ шэрэстар на хасявэла.

19 Кодэлэсти рицарэнпэ тумарэ патявимастэ, соб тэ фирисарэ тумаро джювимо.

20 Кала ж дыкхэна, со бут халавдэн стасавэн Ерусалимо, тунчи джянэн, со авиля вряма, кала форо кадэва авэла розмардо и ачявдо.

21 Тунчи кодэла, савэ дэ Иудея, мэк нашэн дэ плаен, и кодэла, ко дэ форо, мэк выдждан лэстар, и савэ джювэн дэ гавэн, мэк дэ форо на заджян.

22 Кода исин вряма, кала Дэвэл дэла лэнди пав лэнгэрэн рындонэн и кала стерэлапэ вса, со чиндо.

23 Бида дэ кодэлэн дивэн джювленди, савэ исин пхарэ и савэ парварэн цыкнэ чяворэн. Важ кода со бари грыжа джял пэ кадья пхув и бари холи пэ кадэлэн манушэн.

24 Койсавэн мулярэна барэ чюренца, бутэн схутилэна тай отлиджяна дэ пхуя, тев джювэн авэр народуря. Наиудея авэна тэ тасавэ пурэнца Ерусалимо ды кодэлэ, сар на пэрэачела лэнгири вряма.

Иусо пхэнэл, сар Вов рисявэла

25 Тунчи парувэнапэ кхам, чён тай чергэня. Народуря пэ пхув шунэна, сар море дэла баро гласо, и лэн облэна бари дар и бари грыжа.

26 Вонэ авэна тэ хацарэ зора даратар, кала авэна тэ дожутярэ кода, со джял пэ кадья люмля, и зора пэ упралима издрана.

27 Тунчи дыкхэна Чявэ Манушыканэ, Саво джял пэ хмара баря зорага и дэ бари слава.

28 Кала вса кода авэла, тунчи вшен ворта и ваздэн тумарэ шэрэ упрэ, колэсти со фирисаримо тумаро пашэ.

29 И пхэнда лэнди Иусо кацави дума:

— Подыкхэнтэ пэ инжырно кашт и пэ авэр кашта.

30 Кала тумэ дыкхэна, со пэ лэн рандя розмукэнпэ, тунчи джянэн, со сиго авэла милай.

31 Кала тумэ дыкхэна, со вса кода терэлпэ, джянэн, со надур тумэндар исин Дэвлэхкоро Тхагаримо.

32 Чячимага пхэнав тумэнди: родо кадэва на проджяла, сар вса откада терэлапэ.

33 Упралимо тай пхув проджяна, нэ лава Мурэ на проджяна никала.

Дыкхэн пала пэстэ

34 Дыкхэн пала пэстэ, соб тумарэ ілэ тэ на тасавэн биладжывимо, матимо и годи, сави кици думисарэл, сар дурэдэр тэ джювэ. Дыкхэн, соб кадэва диво тэ на авэл пэ тумэн, кала тумэ лэ на дожутярэн.

35 Сар кхувди чувэн пэ чириклен, кала вонэ на дожутярэн кода, кади ж и кадэва диво авэла пэ всавэрэн, ко джювэн пэ люмля.

36 Всавири вряма дыкхэн пала пэстэ тай мангэнпэ, соб тумэндэ тэ авэл зор тэ пэрэлиджя кода, со авэла пэ кадья пхув, и тэ аче англа Чявэ Манушыканэ.

37 Дивэсэ Иусо сиклярэлас дэ храмо. Кала ж бэшэлас кхам, Вов джялас пэ Оливково плай и ратярэлас котэ.

38 Дэнзор всавэрэ мануша авэнас Иусостэ дэ храмо, соб тэ шунэ Лэ.

22

Иуда джял рашаэндэ

1 Сля пашэ сырботори, саво акхарэлпэ Биквасно мандро, а инте — Патради.

2 Англунэ рашая и сиклимаря пав Упхэнима родэнас, сар тэ мулярэ Исусо, нэ даранас манушэндар.

3 Тунчи сатана заджиля дэ Иуда, савэ акхарэнас Искариото, екхэ дэшудуе сиклярнэндар.

4 Иуда джиля тай допхэндапэ англунэ рашаенца и халавдэнца, со вов здэла лэнди Исусо.

5 Вонэ лошыле тай пхэндэ Иудасти, со потинэна лэсти.

6 Вов дэня лав и родэлас поджили вряма, кала Исусо ачелапэ Еджино, соб тэ здэ Лэ.

Исусо прыпхэнэл тэ лачярэ скаминд

7 Авиля диво, саво акхарэлпэ Биквасно мандро, кала трэбуни тэ чинэ патрадякэрэ бакрорэ.

8 Тунчи Исусо акхарда Петро тай Иоанно и пхэнда лэнди:

— Джян и лачярэн патрадякоро хамо.

9 Вонэ пхэндэ Исусости:

— Тев Ту камэх, соб амэ тэ лачярах?

10 Исусо пхэнда лэнди:

— Акэ, кала тумэ заджяна дэ форо, дыкхэна манушэ, саво лиджял вакхор панегэ. Джян пала лэ и заджян дэ кодэва цэр, курик вов заджяла.

11 Тай пхэнэн цэрэхкэрэ хулаести: «Сиклимари пхучел тутар: "Тев цэр, соб Манди тэ ха патради Мурэ сиклярнэнца?"»

12 Хулай сикавэла тумэнди баро цэр упрэ, саво прытидэне важ сырботори. Котэ терэн скаминд.

13 Вонэ джиле тай вса аракхле, сар пхэнда лэнди Исусо, и лачярдэ патрадякоро хамо.

Сиклярнэ тай Исусо хан патрадякоро хамо

14 Кала авиля вряма, Исусо тай апостолуря бэшле пала скаминдэ.

15 Тунчи Исусо пхэнда:

— Сар Мэ камлём тэ ха кадэва патрадякоро хамо тумэнца англа кода, сар прылава бари грыжа.

16 Пхэнав тумэнди, со будэр на хава Мэ лэ ды кодья вряма, сар терэлапэ кадья патради дэ Дэвлэхкэрэ Тхагарима.

17 Тунчи Вов лиля тахтай, наисарда Дэвлэ тай пхэнда:

— Прылэн кадэва тахтай и всавэрэ пэн лэстар.

18 Пхэнав тумэнди, со будэр на авава тэ пэ пимо виноградостар аж ды кодья вряма, сар авэла Дэвлэхкоро Тхагаримо.

19 Тунчи Исусо лиля мандро, наисарда Дэвлэ, пхаглия мандро пэ которэн, дэня лэнди и пхэнда:

— Када исин Муро трупо, саво пала тумэн отдава. Кади терэн, соб тэ папирэн Ман.

20 Кала вонэ хале, Исусо кади ж лиля тахтай и пхэнда:

— Кадэва тахтай исин нэво завето дэ Мурэ ратэ, саво пала тумэн прочувэлпэ.

21 Тай акэ, васт кодэлэхкоро, ко здэл Ман, Манца пала екхэ скаминдэ.

22 Чяво Манушыкано джял кади, сар Лэсти трэбуни тэ проджя. Нэ бида кодэлэ манушэсти, саво здэл Лэ.

23 Тунчи сиклярнэ ачиле тэ пхуче екх екхэстар, ко лэндар камля кода тэ терэ.

Подритарэн екх екхэ

24 Тунчи вонэ ачиле тэ хапэ екх екхэга пала кода, ко лэндар барэдэр.

25 Исусо пхэнда лэнди:

— Тхагаря народонэнгэрэ прыпхэнэн лэнди. Кодэла, кастэ исин зор, пхэнэн, со вонэ терэн лачимо.

26 Нэ тумэ на терэн кади. Барэдэр тумэндэр мэк тэ авэл сар цыкнэдэр всаэрэндэр, и кодэва, ко прыбэшло тумэндэ, мэк авэл сар бутярно.

27 Екх бэшэл пала скаминдэ, ай авэр стховэл пэ скаминдэ хамо. Ко лэндэр барэдэр? Чи на кодэва, ко бэшэл пала скаминдэ? А Мэ машкар тумэн сар бутярно.

28 Тумэ пэрэлиджялдэ Манца бут зумавимо.

29 Сар Дад Мурэ дэня Манди Тхагаримо, кади и Мэ дав тумэнди,

30 соб тумэ тэ хан и тэ пэн пала Мурэ скаминдэ дэ Мурэ Тхагарима. Тумэ бэшэна пэ тронуря тэ сундисарэ дэшудуй родуря Израилёхкэрэ.

Иусо дэдумэл, со Пётро отпхэнэлэпэ Лэстар

31 — Симоно, Симоно! Акэ, сатана мангля тэ зумавэ тумэн, соб тумэ тэ авэн жужардэ, сар див жужарэлпэ сулумэндэр.

32 Нэ Мэ манглёмпэ пала тут, соб тэ на хацарэх патявимо. И кала ту рисвявэга павпалэ Мандэ, тунчи подрицарэга тирэ пхралэн.

33 Пётро пхэнди Лэсти:

— Рае! Пала Тут мэ и дэ барунэ, и пэ мэрима джява!

34 Иусо дэдуманя:

— Пхэнав тути, Пётро, англа колэ, сар задилабэла башно авдивэ, ту тривал Мандар отпхэнэгапэ.

35 Тунчи Иусо пхэнди лэнди:

— Кала Мэ бичалавас тумэн и тумэндэ на сля ни тышыла, ни траста, ни пундрангэ, чи на хутилэлас со тумэнди?

Вонэ пхэндэ:

— Нат.

36 Тунчи Иусо пхэнди лэнди:

— Нэ екхатар, кала кастэс исин тышыла чи траста, лэнтэ лэн. Ай кастэ нэнай, мэк кодэва битинэла пэхкири їда тай тинэла чюри.

37 Пхэнав тумэнди, со Манца авэла кода, сар чиндо: «И пала прахаре динэнас Лэ». Трэбуни, соб тэ стерэлпэ вса, со пхэндо пала Ман.

38 Вонэ пхэндэ:

— Рае! Акэ, амэндэ исин дуй чюрэ!

Иусо пхэнди лэнди:

— Када хутилэла.

Иусо мангэлпэ пэ Оливково плай

39 Тунчи Иусо выджия цэрэстар тай джиля, сар Лэстэ сля прылито, пэ Оливково плай. Джиле Лэга и Лэхкэрэ сиклярнэ.

40 Кала вонэ авиле пэ кодэва тхан, Иусо пхэнди:

— Мангэнпэ, соб тэ на авэн тумэ зумавдэ!

41 Еджино джиля лэндэр пэ скици чувэн бар, пэля пэ чянгэн, ачиля тэ мангэпэ 42 тай пхэнди:

— Дадэ! Кала исин Тири воля, залэ кадэва тахтай Мандар! Нэ мэк авэла, на сар Мэ камав, а сар камэх Ту.

43 Тай авиля ангело упралимастар и подрицарэлас Иусо.

44 Сля Лэсти фартэ пхаро, и Вов инте зоралэдэр мангэласпэ, кади со Лэхкоро пото сля сар рат и тэлэдэлас пэ пхув.

45 Кала помангяпэ, Иусо вщиля, поджиля сиклярнэндэ и дыкхля, со вонэ засутэ баря грыжатар.

46 Иусо пхэнди лэнди:

— Сости тумэ совэн? Вцен и мангэнпэ, соб тэ на авэн тумэ зумавдэ!

Иуда здэл Иусо

47 Кала Иусо инте пхэнэлас кадэла лава, авиля гроза манушэн. Англал лэндар джялас екх дэшудуендар, савэ акхарэнас Иуда. Вов поджиля Иусосэтэ тэ чюминдэ Лэ.

48 Иусо пхэнда лэсти:

— Иуда! Ту чюминдэх и дэ кодья ж вряма здэх Чявэ Манушыканэ?

49 Кадэла, ко аченас пашэ, полиле, со екхатар авэла, тай пхэндэ:

— Рае! Чи тэ на малавэ амэнди чюряга?

50 Екх лэндар вылиля чюри, малавда англунэ рашаекхэрэ бутярнэ тай отчинда лэсти чячэ кан.

51 Тунчи Иусо пхэнда:

— Авэла тумэнди!

Вов лиляпэ канэстэ и састярда бутярнэ.

52 Англунэ рашаендэ, халавдэндэ храмостар тай пхурэдэрэндэ, савэ авиле тэ схутилэ Иусо, Вов пхучля:

— Сар пэ прахарэ, выджиле тумэ пэ Ман чюренца тай дэстэнца?

53 Диво дивэстар Мэ слём тумэнца дэ храмо, и тумэ на ваздэне пэ Ман пэхкоро васт. Нэ екхатар тумари вряма, кала калимо лиля зор.

Пётро отпхэнэлпэ Иусосатар

54 Тунчи вонэ схутилдэ Иусо тай отлиджялдэ англунэ рашаестэ дэ цэр. А Пётро рицардапэ лэндар ригага, нэ джялас пала лэн.

55 Машкар грэда розлиджялдэ яг, и бэшле всавэрэ пашэ ягатэ. Бэшля и Пётро лэнца.

56 Екх бутярни дыкхля Петро, кала вов бэшэлас паша яга, прыдыкхляпэ лэстэ тай пхэнда:

— И кадэва сля Лэга.

57 Нэ Пётро на прыджангялпэ тай пхэнда джювляти:

— Нат, джювлие, мэ на джянав Лэ.

58 Проджиля набут вряма, авэр мануш дыкхля Петро и пхэнда:

— И Ту екх лэндар!

Нэ Пётро пхэнда кадэлэ манушэсти:

— Нат, мануша, када на мэ!

59 Проджиля екх мардо вряма, тай инте екх мануш пхэнда дэ якхэн:

— Чячимага, кадэва кади ж сля Лэга, вов исин галилеянино.

60 Нэ Пётро пхэнда кадэлэ манушэсти:

— Мануша, на джянав, пала со ту пхэнэх.

И екхатар, кала вов инте пхэнэлас кадэва лав, затиписиля башно.

61 Тунчи Рай обрисиляпэ тай вздыкхля пэ Петро. И Пётро взгинисарда Раехкоро лав, сар Вов пхэнда лэсти: «Ды колэ, сар задилабэла башно авдивэ, ту тривал Мандар отпхэнэгапэ».

62 Вов выджиля котарь и заровиня кэркэ ясвэнца.

63 Мануша, савэ рицарэнас Иусо, марэнас Лэ тай асанас Лэстар.

64 Вонэ запхангле Лэсти якха, мардэ Лэ пав муй и пхученас:

— Ту, англунари, пхэн, ко малавда Тут?

65 И бут налаче лава пхэнэнас пала Иусо.

Синедрионо сундисарэл Иусо

66 Кала проджиля рят, стидэнепэ манушэнгэрэ пхурэдэра, англунэ рашая и сиклимаря пав Упхэнима, андэ Иусо дэ лэнгоро Синедрионо

67 тай пхучле Лэ:

— Ту исин Христосо? Пхэн амэнди.

Иусо дэдуманя:

— Кала пхэнава тумэнди, тумэ на патяна.

68 А кала Мэ пхучява тумэндар, тумэ нисо на пхэнэна Манди.

69 Нэ екхатар Чяво Манушыкано авэла тэ бэшэ пав чячи риг Дэвлэхкиря зоратар.

70 Тай пхэндэ всавэрэ:

— И кади, Ту исин Дэвлэхкоро Чяво?

Исусо пхэнда лэнди:

— Тумэ еджинэ пхэнэн, со Мэ исин Дэвлэхкоро Чяво.

71 Кодэла мануша пхэндэ:

— Саво допхэнимо амэнди инте трэбуни? Амэ еджинэ шундэ, со Вов пхэнда.

23

Исусо англа Пилато

1 Тунчи всавэрэ, ко сле котэ, вциле и отлидждэ Исусо Пилатостэ.

2 Тай ачиле тэ дошарэ Лэ и пхэнэнас:

— Амэ уджянгле, со Вов змарэл амаро народо дромэстар, пхэнэл, со на трэбуни тэ потинэн налогурия императости, и дэдумэл пала Пэстэ, со Вов — Христосо, Тхагари.

3 Пилато пхучля Лэстар:

— Ту Тхагари иудеенгоро?

Исусо пхэнда:

— Ту кади пхэнэх.

4 Пилато дэдуманя англунэ рашаенди и всавэрэ манушэнди:

— Мэ на аракхав дэ Кадэлэ Манушэ нисави дош.

5 Нэ вонэ на пэрэаченас тэ дошарэ Исусо и пхэндэ:

— Вов ваздэл манушэн и сиклярэл пав свавири Иудея, англал дэ Галилея, а тунчи авиля пэ кадэва тхан.

Иродо допхучел Исусо

6 Пилато шунда када и пхучля:

— Вов Галилеятар?

7 Кала Пилато уджянгля, со Исусо кодэлэ тханэстар, тев сля тхагарега Иродо, вов бичалда Исусо Иродостэ, саво дэ кадэлэн дивэн сля дэ Ерусалимо.

8 Иродо дыкхля Исусо и фартэ лошыля. Вов думут камля тэ дыкхэ Исусо, колэсти со бут ашунда пала Лэ и камля, соб Вов тэ сикавэл лэсти варисаво дыво.

9 И бут пала со розпхучелас Лэ, нэ Исусо нисо на пхэнда Иродости.

10 Ай англунэ рашая и сиклимаря пав Упхэнима аченас котэ и дурэдэр дошарэнас Лэ.

11 Иродо итханэ халавдэнца ачиле тэ обмукэ патив Исусохкири тай асанеп Лэстар. Тунчи урявда Лэ дэ барвали йда тай отбичалда павпалэ Пилатостэ.

12 Дэ кодэва диво Иродо тай Пилато ачиле амалэнца, а ды колэ вонэ сле врыжымашэнца.

Пилато упалэ допхучел Исусо

13 Пилато ж акхарда англунэ рашаен, пхурэдэрэн и всавэрэн манушэн.

14 Тай пхэнда лэнди:

— Тумэ андэ мандэ Кадэлэ Манушэ и пхэндэ, со Вов ваздэл манушэн. Тай акэ, мэ англа тумэн роздыкхлём Лэхкоро рындо и на аракхлём дэ Кадэлэ Манушэ нисави дош, дэ савя тумэ Лэ вуджилисарэн.

15 Тай Иродо на дошарда Лэ и бичалда павпалэ. Вов нисо кацаво на терда, пала со Лэ трэбуни тэ сундисарэ пэ мэрима.

16-17 Мэ прыпхэнава тэ марэн Лэ чукненца, а тунчи отмукава.*

* **23:16-17** Дэ койсавэ пуранэ греческа лила (манускрипты) исин инте кацавэ лава: «Пилатости сля трэбуни пэ сырботори Патради тэ отмукэ екхэ манушэ барунастар».

18 Нэ всавэрэ мануша затиписиле:

— Мэримо Лэсти! Отмук амэнди Варавва!

19 Ай Варавва бэшля дэ барунэ пала кода, со вов мулярэлас и ваздэлас манушэн дэ форо.

20 Пилато упалэ подваздэня пэхкоро гласо, колэсти со камля тэ отмукэ Исусо.

21 Нэ мануша типисиле:

— Прымар, прымар Лэ пэ трушул!

22 Пилато дэ трито моло пхэнда лэнди:

— Сави бида Вов терда? Мэ на араклём дэ Лэстэ нисави дош, пала савя Лэ трэбуни тэ сундисарэ пэ мэрима. Мэ прыпхэнава, соб Лэ тэ марэн чукненца, тай тунчи отмукава.

23 Нэ мануша затиписиле зоралэ гласога, соб тэ прымарэ Лэ пэ трушул, и типимага домардэпэ пэхкоро.

24 Тунчи Пилато сундисарда Исусо кади, сар вонэ камле.

25 И отмукля барунэстар прахаре, саво мулярэлас и ваздэлас всавэрэн манушэн дэ форо, а Исусо отдэня дэ лэнгэрэн вастэн, сар и мангле иудея.

Исусо лиджян пэ мэрима

26 Кала халавдэ лиджянас Исусо пэ мэрима, вонэ схутилдэ Симоно кирениянино, саво джялас малятар, и прыпхэндэ лэсти тэ лиджя трушул пала Исусо.

27 Фартэ бут манушэн джянас пала Исусо. Джянас пала Лэ и джювля, савэ марэнас еджинэ пэ дэ колинэн баря грыжатар тай фартэ ровэнас пала Лэ.

28 Исусо обрисилэпэ лэндэ тай пхэнда:

— Чейлэ Ерусалимостар! На ровэн пала Ман! Нэ ровэн пала пэстэ и пала тумарэн чяворэн.

29 Акэ, поджял вряма, кала пхэнэна: «Бахталэ бичяворэнгэрэ, савэ на бэнэнас и на парварэнас цыкнэ чяворэн!»

30 Тунчи мануша пхэнэна вуче тай цыкнэ плаенди: «Тэлэдэн пэ амэн!» тай «Ушарэн амэн!»

31 И кала терэн када джювдэ каштэга, со тунчи терэна шукэга?

Исусо прымарэн пэ трушул

32 Лиджялдэ пэ мэрима ітханэ Лэга дон прахарен.

33 Кала авиле пэ тхан, саво акхарэлпэ Черепо, котэ прымардэ пэ трушул Исусо тай дон прахарен, екхэ пав чячи риг, ай аврэ пав зэрво риг Лэстар.

34 Исусо пхэнэлас:

— Дадэ! Эртисар лэн! Вонэ на джянэн, со терэн.

Халавдэ чутэ жребии и розлиле Лэхкири їда.

35 А мануша аченас и дыкхэнас. Пхурэдэра терэнас асамо Исусостар тай пхэнэнас:

— Аврэн фирисарда, а екхатар мэк Еджино Пэ фирисарэл, кала Вов исин Христосо, Савэ Дэвэл выгидэня.

36 Кади ж и халавдэ асанас Исусостар, поджянас Лэстэ тай дэнас Лэсти шукло мол.

37 И пхэнэнас:

— Кала Ту исин Тхагари иудеенгоро, тунчи фирисар Еджино Пэ!

38 Упрэ Лэстар сля чиндо: «Кадэва исин иудеенгоро Тхагари».

39 Екх прахарендар, саво сля амблавдо пэ трушул, кошэлас Исусо и пхэнэлас:

— Кала Ту исин Христосо, фирисар Еджино Пэ и амэн!

40 Авэр прахари улэлас лэ тай пхэнэлас:

— Ту Дэвлэстар на дарах? Ту еджино сундисардо пэ мэрима, сар и Вов.

41 Амэн сундисардэ пала амари дош и дэне амэнди кода, со амэ затердэ. Нэ Вов на терда нисаво вуритимо.

42 Тай пхэнда Лэсти:

— Исусо, взгинисар пала ман, кала Ту авэга дэ Тирэ Тхагарима!

43 Тай пхэнда лэсти Исусо:

— Чячимага пхэнав тути: авдивэ ту авэга Манца дэ раі.

Исусохоро мэrimo

44 Сля диво аври, пашэ дэшудуй чясо вряма, тай пав всавири пхув змуқляпэ калимо ды тритонэ чясо вряма.

45 Кхам калиля, тай похтан, саво сля амблавдо дэ храмо, пхарилия поепаш.

46 Тунчи Исусо затиписилия зоралэ гласога:

— Дадэ! Дэ Тирэ вастэн отдав Муρο фано!

Вов пхэнда када и отдэня фано.

47 Кала шэлякоро пхурэдэр дыкхля вса откада, вов ваздэня слава Дэвлэсти тай пхэнда:

— Чяче, Вов сля дэвликуно Мануш!

48 Всавэрэ мануша, савэ стидэнепэ, соб тэ дыкхэ Лэхкоро мэrimo, дыкхле, со тердапэ, джиле павпалэ тай марэнас еджинэ пэ дэ колинен.

49 Дурал ачиле и дыкхэнас пэ кода мануша, савэ джянгле Исусо, тай джювля, савэ джянас пала Лэстэ Галилеятар.

Исусо гаравэн

50 Котэ сля лачё и пативало мануш, савэ акхарэнас Иосифо. Вов сля екх пхурэдэрэндар дэ Синедрионо,

51 нэ на подрицарэлас лэнгэрэ лава и рындурия. Вов выбариля дэ foro Аримафея тай дожутярэлас, кала авэла Дэвлэхкоро Тхагаримо.

52 Вов авиля Пилатостэ тэ мангэ, соб кодэва тэ отдэл лэсти Исусохоро трупo.

53 Иосифо слиля трупo трушулэстар, обкхувда похтанoга, дэ савэ гаравэн мулэн, тай тховда дэ склепо, саво сля вымардо дэ барэ и тев инте ника на гаравэнас.

54 Када сля диво, кала лачярэнаспэ субботатэ. И суббота сля пашэ.

55 Пала Иосифо джянас джювля, савэ авиле Исусога Галилеятар. Вонэ дыкхле склепо и сар тховэнас пордэ Исусохоро трупo.

56 Тунчи рисиле цэрэ и лачярдэ мастина и миро. Ай кала авиля суббота, вонэ отцинёнас, сар чиндо дэ заповедь.

24

Исусо отджювдёл мулэндар

1 Пэ англуно куркэхкоро диво, дэнзор, кала кхам вщелас, джювля лиле лачярдэ мастина и джиле склепостэ.

2 Нэ кала авиле, удыхкле, со бар склепостар оттховдо дэ рига.

3 Кала заджиле андрал дэ склепо, на аракхле Рае Исусохоро трупo.

4 Джювля на джянгле, сар кода тэ полэ. Тунчи ачиле англа лэн дуй мурша дэ їда, савятар марэлас одуд, сар молния.

5 Джювля фартэ дарэне и обмукле шэрэ тэлэ, нэ мурша пхэндэ лэнди:

— Сости тумэ родэн джювдэ машкар мулэн?

6 Лэ нэнай катэ, Вов отджювдиня мулэндар. Взгинисарэн, сар Вов пхэнэлас тумэнди инте дэ Галилея:

7 «Чяво Манушыкано авэла отдэно дэ вастэн бэзимахкэрэ манушэнди, авэла прымардо пэ трушул и отджювдэла мулэндар пэ трито диво».

8 Тунчи вонэ взгинисардэ Исусохкэрэ лава.

9 Тунчи рисиле склепостар и розпхэндэ пала вса кода дэшуекхэнди и всавэрэнди, савэ лэнца сле.

10 Кадэла джювля сле Мария Магдалина, Иоанна, дэй Иаковохкири, савя кади ж акхардэ Мария. И авэр джювля, савэ сле лэнца, кади ж пхэнэнас пала кода апостолонэнди.

11 Апостолуря думисардэ, со джювля дэдумане динимо, и на патине лэнди.

12 Нэ Пётро всаекх вщиля и прастэня склепостэ. А кала тэлювда склепостэ, вов дыкхля, со котэ пашлёл екх похтан. Тай джиля павпалэ, а еджино на патялас колэсти, со дыхле лэхкэрэ якха.

Иусо сикавэлэ сиклярнэнди нав дром дэ Эммаусо

13 Дэ кодэва диво дуй сиклярнэндар джянас дэ гав Эммаусо, саво сля пашэ дэшудуй километры Ерусалимостар.

14 Тай дэдумэнас екх екхэгa пала вса, со тердапэ.

15 Кала вонэ дэдумэнас тай розпхученас екх екхэ, Еджино Иусо пашыня лэндэ и джиля лэнца.

16 Нэ лэнди сля затердо, и вонэ на уджянгле Иусо.

17 Иусо пхучля лэндар:

— Пала со тумэ дэдумэн дромэгa?

Вонэ ачиле и помукле муя.

18 Екх сиклярнэндар, Клеопа, пхэнда:

— Всавэрэндар, ко авиля дэ Ерусалимо, Ту, выджял, екх, Саво на джянал, со стердапэ пэ дивэн?

19 Иусо пхучля:

— Пала со Мэ на джянав?

Вонэ пхэндэ Лэсти:

— Пала кода, со стердапэ Иусога Назаретостар, Саво сля англунари, зорало дэ всавэрэ, со терэлас и пхэнэлас англа Дэвлэ и англа манушэн.

20 Сар амарэ англунэ рашая и пхурэдэра отдэне Лэ пэ мэрима и прымардэ Лэ пэ трушул.

21 Ай амэндэ сля надия, со Вов фирисарэла Израили. Тай акэ, джиля трито диво, сар вса откада стердапэ.

22 Нэ койсавэ амарэ джювлендар розпхэндэ амэнди кода, состар амэ дэнepэ дыво. Вонэ авиле дэнзор, кала кхам вщелас, склепостэ

23 тай на аракхле котэ Иусохкоро трупо. Тунчи рисиле тай розпхэндэ амэнди, сар лэнди сикавдэпэ ангелуря и пхэндэ, со Иусо джювдо.

24 Койсавэ амэндар джиле склепостэ и аракхле, со котэ вса кади, сар и пхэндэ джювля, нэ Иусо на дыкхле.

25 Тунчи Вов пхэнда лэнди:

— Чи нэнай тумэндэ годи? Сар пхаро тумэ патян кодэлэсти, со пхэндэ англунаря!

26 Чи на трэбуни сля Христости тэ ха бари грыжа и тэ заджя дэ бари слава?

27 И ачиля тэ розпхэнэ джикай Моисеестар тай всавэрэн аврэн англунарен и сикавда, со чиндо сля пала Лэ дэ всавэрэн Лилэн.

28 Тунчи сиклярнэ поджиле пашэ гавэстэ, курик джянас. Иусо сикавда лэнди, со камля тэ джя дурэдэр.

29 Нэ вонэ фартэ мангэнас Лэ:

— Ачпэ амэнца! Диво поджиля пашэ рятятэ.

Вов заджиля дэ цэр и ачиляпэ лэнца.

30 Кала Вов бэшла лэнца пала скаминдэ, тунчи лиля мандро, наисарда, розпхагля и подэня лэнди.

31 Тунчи оттердэпэ лэнгэрэ якха, и вонэ уджянгле Иусо. Нэ Лэ на ачиля душло.

32 Вонэ ачиле тэ пхэнэ екх екхэсти:

— Чи на пхабонас амарэ їлэ, кала Вов дэдуманя амэнца дромэга и оттерда амэнди, со чиндо дэ Лилэн?

33 Вонэ екхатар вщиле тай рисиле дэ Ерусалимо. Кала авиле, котэ аракхле дэшуекхэн и кодэлэн, савэ лэнца сле.

34 Апостолурия розпхэндэ лэнди, со Рай чячимага отджювдиня мулэндар тай сикавдапэ Симоности.

35 Тунчи кодэла розпхэндэ, со тердапэ лэнца пав дром и сар вонэ уджянгле Иусо, кала Вов пхагля мандро.

Иусо авэл сиклярнэндэ

36 Кала вонэ инте дэдумане, Еджино Иусо ачила машкар лэн и пхэнда:

— Пачя тумэнди!

37 Вонэ замуле даратар и гинисардэ, со дыкхэн мулэхкоро фано.

38 Нэ Иусо пхэнда лэнди:

— Сости тумэ даран? Сости тумаро патявимо исин кацаво цыкно?

39 Подыкхэнтэ пэ Мурэ вастэн и пурэн! Када Мэ исин. Лэнпэ Мандэ тай роздыкхэнтэ. Фаностэ нэнай трупо и кокала, а Мандэ исин.

40 Иусо пхэнда откада тай сикавда лэнди Пэхкэрэ васта и пурэ.

41 Кала вонэ лошатар инте на патянас и дэнаспэ дыво, Иусо пхучля лэндар:

— Исин тумэндэ хамо?

42 Вонэ дэне Лэсти котор пэклэ мачестар.

43 Иусо лиля кода и халя англа лэн.

44 Тай пхэнда лэнди:

— Акэ пала со Мэ пхэнаvas, кала инте слём тумэнца: трэбуни, соб тэ авэл vsa, сар чиндо пала Ман дэ Моисеехкэрэ Упхэнима, англунарендэ и дэ Псалмэн.

45 Тунчи Вов оттерда лэнди годи, соб тэ полэн кода, со чиндо.

46 И пхэнда лэнди:

— Чиндо, со Христосо хала бари грыжа и пэ трито диво отджювдэла мулэндар.

47 Важ Лэхкоро Лав джикай Ерусалимостар, ай тунчи vsавэрэ народонэнди авэла розпхэндо, со, кала вонэ ачявэна бэзимо, тунчи Дэвэл эртисарэла лэн.

48 Тумэ авэна тэ розпхэнэ пала кода vsавэрэ манушэнди.

49 Акэ, Мэ бичалава тумэнди кода, пала со Мурэ Дад пхэнда. Нэ тумэ аченпэ дэ форо джикай кодыя вряма, кала сдзяла пэ тумэн зор упрал.

Иусо ваздэлпэ пэ упралима

50 Тунчи Иусо вылиджялда лэн форостар и джиля лэнца дэ Вифания. Котэ Вов ваздэня Пэхкэрэ васта и пхэнда бахталэ лава пала лэн.

51 И кала инте пхэнэлас, ачявда лэн и ачила тэ ваздэпэ пэ упралима.

52 Сиклярнэ тэлювдэ Лэсти тай баря лошага рисиле дэ Ерусалимо,

53 тев vsавири вряма сле дэ храмо и ваздэнас слава Дэвлэсти.

Бути апостолэнгири

Мурэ амала!

Тумэ рицарэн ды вастэн книга, ды савля вджян дуй части: «Евангелие Лукастар» тай «Бути апостолонэнгири». Вонэ сле заискрисардэ екхэ манушэга, сыклярно Иисусохкоро Лука, тай исин лил ды Библия, лав Дэвлэстар. Ды Библия вджян дуй барэ части: «Пурано Завето» тай «Нэво Завето». Дэ «Пуранэ Завето» роспхэнэлпэ, саво сля джоимо англал пэ пхув, кадиж пала израильские мануша, савэн вытидыня Дэвэл. Ды «Нэво Завето» заискрисардэ допхэнимо пала джоимо Иисусо Христокоро, кадиж роспхэнэлпэ, сар быяндяпэ кхандирь тай розджиляпэ пав всавори пхув.

Еджино лав «евангелие» — када «лошало лав». Кадыя дума пала кода, со дуй пхангля бэрш павпалэ ды миро авиля Иисусо Христосо, саво сля Фирисари, пала када со Вов джоуда амэнца, састярэлас тай сыклярэлас манушэн, отмукулэлас лэнди бээх, муля пала всаворэн манушэн тай одждюдила, кади пала кода со Вов упалэ рисявэла ды кадыва миро. Евангелие сикавдапэ ды перво вако джоимо манушэндирэ тай сля заискрисардо пы греческо чиб. Штар евангелия, искрисардэ Иисусохкирэ апостолонэнца (Матфега тай Иоаннога) тай савэ сле амала, савэ тирэнас бути апостолонэнца (Лука тай Марко), исин англал ды Нэво Завето. Пала лэн книга «Бути апостолонэнгири». Ды ла роспхэнэлпэ пала кода, сар вытидынэ Иисусога апостолы роспхэнэнас Лашало Лав Дэвлэстар, кадиж пала кода, сар быяндёнаспэ кхандиря. Кадиж ды пэрво вако авиле лила Иисусохкирэ сыклярнэндар тай книга Откровение. Всаворэ кадыла книги сле залиджалдэ ды екх книга, сави аххарэлпэ Нэво Завето, ды саво вджял 27 книг тай лила.

Пы кадыва диво книги ды Нэво Завето тай евангелие пэрэлиджалдэ пав всаворэ чибэ ды люмля, ды савэ исин искрисаримо. Библия тай лакирэ толмачи исин каци книга, сави динэн ды всавори люмля. Амэ патях, со тумэ тховэна циминд, сар искрисардэ дымутнэ рындуря.

Амэ наисарах їлэстар ко тирэлас бути, соб тэ выджян кала книги — толмачи, редакторы тай бутэндэ ромэнди, пала кода со вонэ продинэнас кодыла книги тай човэнас пэхкири сама, сар вонэ заискрисардэ. Баро тумэнди наис!

Да благословит тумэн Дэвэл!

Пативага тумэнди,

Мануша, савэ тирэн бути ды организация «Переводчики Библии Украины»

Иисусо ваздэлпэ дэ болыбэн

¹ Пативало Феофило, дэ муро англуно лил мэ искрисардом пала вса, со терэлас Иисусо и сости Вов сиклярэлас

² ды колэ дивэ, кала Свэнтонэ Фанога прыпхэнда вытидэне апостолонэнди кода, со лэнди трэбуни тэ терэ, и сля лито дэ болыбэн.

³ Пала Пэхкири бари грыжа Вов сикавдапэ лэнди джовдэга тай допхэнда, со кода чячимо. Иисусо сикавэласпэ лэнди саранда дивэ и дэдумэлас пала Дэвлэхкоро Тхагаримо.

⁴ Екхвар, кала вонэ сле їтханэ, Иисусо прыпхэнда лэнди тэ на уджян Ерусалимостар, нэ тэ дожутярэн кода, со Дад камля лэнди тэ дэ.

— Акэ, терэлпэ кода, со тумэ шундэ Мандар.

⁵ Иоанно болдэня панега, нэ тумэ сико авэна болдэ Свэнтонэ Фанога.

⁶ Тунчи кодела, савэ котэ сле, пхучле Лэстар:

— Рае, на дэ кадыя вряма Ту камэх тэ ваздэ упалэ Израилэхкоро тхагаримо?

⁷ Вов пхэнда лэнди:

— На тумаро рындо тэ джянэ вряма и чясо, савэ Дад тховда Пэхкиря зорага.

8 Нэ кала пэ тумэн сджяла Свэнто Фано, тумэ лэна зор и авэна тэ розпхэнэ пала Ман дэ Ерусалимо, пав всавири Иудея, дэ Самария и пав всавири люмля.

9 Кала Вов пропхэнда када, вонэ дыкхле, сар Вов ваздэняпэ упрал, и хмара затерда Лэ лэнгэрэ яххэндар.

10 Вонэ на пэрэаченас тэ дыкхэ пэ болыбэн, кала Вов ваздэлеспэ. Тай акэ, паша лэн ачиле дуй мануша дэ парни йда.

11 — Галилеянуря, — пхэндэ вонэ, — сости тумэ ачен и дыкхэн дэ болыбэн? Кадэва Исусо, Саво сля лито тумэндар дэ болыбэн, рисявэла кади ж, сар тумэ дыкхле Лэ, кала уджялас.

Апостолурия вытидэн нэвэ манушэ пэ Иудахкоро тхан

12 Тунчи вонэ рисиле дэ Ерусалимо плаестар, саво акхарэлпэ «Оливково». Вов сля надур форостар, дром, саво домукэнас тэ проджя дэ суббота.

13 Кала вонэ авиле дэ цэр, дэ саво джювдэ набари вряма, тунчи ваздэнепэ дэ упралуни цэра. Котэ сле Пётро тай Иоанно, Иаково тай Андреи, Филиппо тай Фома, Варфоломеи тай Матфеи, Иаково, Алфеёхкоро чяво, Симоно Зилото тай Иуда, Иаковохкоро чяво.

14 Всавэрэ вонэ йтханэ сле дэ мангима. Лэнца сле набут джювлен, дэй Исусохкири, Мария, тай Лэхкэрэ пхрала.

15 Дэ кодья вряма Пётро вщиля машкар патякунэн (а лэн стидэняпэ паша шэл тай биш мануш) и пхэнда:

16 — Мурша! Пхралалэ! Трэбуни сля, соб тэ стерэлпэ кода, со чиндо дэ Лилэн, тев Свэнто Фано пхэнда чэрэз Давидо пала Иуда, саво лиджялас колэн, савэ пхангле Исусо.

17 Иуда сля екх амэндар, саво терэлас амэнца екх бути.

18 (Пэ ловэ, савэ вов затерда пала пэхкоро вурито рындо, вов тинда маля. Нэ тэлэдэня и кади фартэ замардапэ, со пхариля лэхкоро води и выгульдэ лэстар всавэрэ пара.

19 Пала кода уджянгле всавэрэ, ко джювдэ дэ Ерусалимо, и проакхардэ маля пав пэхкири чиб Акелдама, ай пав аврэ — «Ратэхкири маля».)

20 Дэ лил «Псалмы» искриисардо:

«Мэк лэхкоро цэр тэ авэл шушо,
и мэк котэ нико на джювэл».

Тай инте:

«Мэк авэр лэхкоро тхан залэла».

21 Колэсти амэнди трэбуни тэ вытидэ екхэ кодэла манушэндар, ко пхирэлас амэнца всавири вряма, тев бы тэ на джял Рай Исусо,

22 кодэла вряматар, кала Иоанно болдэня Лэ ды колэ дивэ, кала Исусо сля лито амэндар. Кадэва мануш, сар и амэ, трэбуни тэ авэл допхэнимари пала Исусохкоро отджюндивимо.

23 Вытидэне дон: Иосифо, савэ инте акхарэнас Варсавва, а кади ж — Иусто, тай Матфие.

24 Тай поманглевэ:

— Рае, Ту джянэх йло кожнонэхкоро; сикав екхэ кадэлэндар дондар, ка Ту вытидэнян

25 тэ лиджя бути апостолэнгири, соб вов тэ парувэл Иуда, саво ачявда амэн и джילה дэ тхан, тев трэбуни лэсти тэ авэ.

26 Тунчи вонэ чутэ жребии, тай вов выпэля пэ Матфие, саво прыачиля дэшукэхэ апостолонэндэ.

2

1 Авила Пандэшахкоро* диво, и всавэрэ вонэ сле їтханэ.

2 Екхатар болыбнастар шундапэ фоно, саво сджялпэ, сар пхурдэл фартэ бари балвал, и саво пхэрдила всаворо цэр, тев вонэ бэшле.

3 Сиклярнэ дыкхле сось, со поджило пэ ягунэ чибэ, савэ розджилепэ и ачиле по екхэ пэ кожно лэндар.

4 Всавэрэ вонэ пхэрдиле Свэнтонэ Фанога и ачиле тэ дэдумэ аврэ чибэнца, сар дэлэс лэнди Фано.

5 Дэ кадья вряма дэ Ерусалимо сле дэвликунэ иудея всавэрэ тханэндар, савэ исин дэ люмля.

6 Пэ кадэва фоно стидэнепэ бут манушэн, тай на полэнас, со катэ терэлпэ, колэсти со кожно лэндар шунда, сар кодэла дэдуманэ пав лэхкири чячи чиб.

7 Вонэ фартэ дэнас дыво тай пхученас:

— Чи всавэрэ кадэла мануша, савэ дэдумэн, на галилеянуря?

8 Сар же када кожно амэндар шунэл, сар вонэ дэдумэн пав амари чячи чиб?

9 Машкар амэн исин кацавэ иудея: парфянуря, мидянуря, еламитурия, кодэла, ко джювэн дэ Месопотамия, Иудея тай Каппадокия, дэ Понто и дэ Цыкни Азия,

10 дэ Фригия тай Памфилия, дэ Египто, дэ котор Ливийско пхув, саво паша Кирена, и кодэла, ко джювэн дэ Римо,

11 иудея и кодэла, савэ прылиле иудеенгоро сикляримо, критянуря тай арабурия. И всавэрэ амэ шунах, сар вонэ дэдумэн пала барэ рындурия Дэвлэхкэрэ пэ амарэн чибэн!

12 Вонэ дэнас дыво, на джянгле, сар кода тэ полэ, тай пхученас екх екхэстар:

— Со када исин?

13 А койсавэ подасанаспэ:

— Вонэ пиле тэрно мол тай матиле!

Петрохкири дума

14 Пётро вщиля їтханэ аврэнца дэшуекхэнца, ачилэ тэ дэдумэ манушэндэ, ваздэня пэхкоро гласо тай пхэнда:

— Мурша иудея и всавэрэ, ко джювэн дэ Ерусалимо! Соб тумэ тэ полэн вса, шунэн тай чувэн сама, со мэ пхэнав.

15 Кадэла мануша на матэ, сар тумэ думисарэн: екхатар енякоро чясо дэ дэнзор.

16 Нэ када терэлпэ пав лавэн, савэ пхэнда англунари Иоили:

17 «Дэ кодэлэн дивэн, — пхэнэл Дэвэл, —

Мэ чувава Фано пэ всавэрэн манушэн.

Тумарэ чявэ и чея авэна тэ дэдумэ сар англунаря,

тумарэ тэрнэ чявэ дыкхэна сунэ англунарехкэрэ дивэсэга,

А тумарэ пуранэ — рятяга.

18 Пэ Мурэн копылен, муршэн тай джювлен,

Мэ дэ кодэлэн дивэн чувава Фано

тай авэна тэ дэдумэ сар англунаря.

19 Мэ сикавава дывурия упрэ дэ болыбэн

и барэ рындурия тэлэ пэ пхув:

рат, яг и тхува.

20 Кхам калёла,

а чён лолёла, сар рат

англа кода, сар авэла баро и чудно диво Дэвлэхкоро.

21 Тай кожно, ко прыакхарэла Раехкоро Лав,

авэла фирисардо».

* 2:1 Праздник Недель, иудейский праздник сбора урожая, праздновался на 50-й день после праздника Пасхи.

22 Мурша израильтянуря, вышунэн, со мэ пхэнава! Бари бути, зоралэ рындурия и допхэнимо Дэвэл стерда чэрэз Исусо англа амарэн якхэн, и тумэ джянэн пала кода. Кадэлэга Дэвэл сикавда, со Мурш Исусо Назаретогстар авиля Лэстар.

23 Пав воля Дэвлэхкири и пав кода, со Лэстэ сля пэ годя майанглал, тумэ умардэ Лэ, кала отдэне дэ вастэн кодэлэнди, ко на джювэн пав Упхэнима, соб вонэ тэ прымарэн Лэ пэ трушул карфинэнца.

24 Нэ Дэвэл отджювдырда Лэ, фирисарда мэримахкиря грыжатар, и мэримастэ на сля зор Лэ тэ урицарэ.

25 Давидо дэдумэл пала Лэ:

«Всавири вряма мэ дыкхлём Рае англа пэ:

Вов пав чячэ васт мандар —

тэ на зджяв дромэстар.

26 Колэсти цэлэл іло муро, тай лошавэл чиб, и трупо муро авэла тэ джювэ дэ надия.

27 Ту ж на ачявэга муро води дэ адо тай на дэга, соб свэнто Тиро тэ лэлпэ прахога.

28 Ту сикавдан манди дрома джювимакхэрэ, Ту дэга манди лош англа муй Тиро».

29 Пхралалэ, дэн манди тэ пхэнэ тумэнди ворта, со пропапо Давидо муля и сля загаравдо. Тай лэхкоро склепо ачел амэндэ и авдивэ.

30 Вов сля англунари и джянгля, со Дэвэл дэня лэсти солах тэ тховэ пэ лэхкоро трону манушэ, лэхкэрэ родостар.

31 Вов дыкхля ангуни вряма и дэдумэлас пала Христокоро отджюндивимо, со Вов на авэла ачявдо дэ адо, и со Лэхкоро трупо на лэлапэ прахога.

32 Тай акэ, Дэвэл отджювдырда Кадэлэ Исусо, и амэ всавэрэ допхэнимаря кадэлэсти!

33 Исусо сля ваздэно чяче Дэвлэхкэрэ вастэга, прылиля Дадэстар, кода, со сля пхэндо — Свэнто Фано, тай чута Лэ пэ амэн, сар тумэ екхатар и дыкхэн и шунэн.

34 Давидо на ваздэласпэ пэ болыбэн, нэ дэдуманя:

«Пхэнда Рай Дэвэл мурэ Раести:

Бэш пав чяче вастэ Мандар,

35 Ды коя вряма, сар Мэ чувава Тирэ врыжимашен Тути тала пурэн».

36 Колэсти, мэк всаворо цэр Израилёхкоро джянэл, со Кадэлэ Исусо, Савэ тумэ прымардэ пэ трушул, Дэвэл терда и Раега и Христога!

37 Кала мануша шундэ када, вонэ вса прылиле пашэ ілэстэ, и лэнди ачиля ладжяво. Вонэ пхученас Петро тай аврэн апостолонэн:

— Пхралалэ, со амэнди тэ терэ?

38 Пётро пхэнда:

— Ачявэн тумаро бэзимо, и мэк кожно тумэндар авэла болдо пала лав Исусо Христокоро, соб тэ отмукэнпэ тумарэ бэзима, тай тумэ прылена бициминакоро даро — Свэнто Фано.

39 Колэсти со кади сля пхэндо тумэнди, тумарэ чяворэнди и всавэрэнди, ко дурал тумэндар: всавэрэнди, ко авэла прыакхардо Раега, амарэ Дэвлэга.

40 Тай бутэ аврэ лавэнца Пётро прыакхарэлас лэн, тай дэдумэлас:

— Фирисарэнпэ кадэлэ хасютнэ родостар.

41 Кодэла, савэ прылиле лэхкири дума, болдэнепэ. Дэ кодэва диво прыачиля лэндэ пашэ трин пхангля мануш.

Джювимо патякунэн манушэн

42 Вонэ рицарэнаспэ апостолонэнгэрэ сикляримастэ, всавири вряма сле ітханэ, прэпахэнас мандро и мангэнаспэ.

⁴³ Всаверэ даранас Дэвлэстар и апостолурия терэнас баро допхэнимо тай барэ дывурия.

⁴⁴ Всаверэ патякунэ мануша сле їтханэ, и вса лэндэ сля екх.

⁴⁵ Вонэ битинэнас вса, со лэндэ сля, и всаворо пэхкоро хулаимо, и роздэнас всаверэндэ, касти скаци трэбуни.

⁴⁶ Кожно диво вонэ стидэнаспэ дэ храмо, тай пав цэрэн прэпхагэнас мандро и ханас лошага и жужэ їлэга,

⁴⁷ ашарэнас Дэвлэ и сле дэ лачима всавэрэ манушэндэ. И кожно диво Рай прытховэлас лэндэ фирисардэн.

3

Пётро састярэл чёрорэ, саво сля ланго

¹ Екхвар, дэ трито чясо дэ дивэ, дэ вряма мангимахкири, Пётро тай Иоанно джянас дэ храмо.

² Паша храмохкэрэн вударэн, савэнди сля лав «Шукар», бэшэлас мануш, ланго бэнимастар. Кожно диво лэ ачявэнас паша вударэн, и вов мангля хурдимо кодэлэндар, ко заджялас дэ храмо.

³ Кала вов удыхля Петро тай Иоанно, савэ джиле дэ храмо, тунчи мангля и лэндар.

⁴ Пётро тай Иоанно вхалепэ дэ лэ якхэнца, тай Пётро пхэнда:

— Подыхк пэ амэн!

⁵ Мануш ваздэня пэхкэрэ якха, дожутярэлас, со вонэ сось дэна лэсти.

⁶ Нэ Пётро пхэнда:

— Рупь тай совнак нэнай мандэ. Нэ кода, со исин, мэ дав тути. Дэ Лав Иусо Христохкэрэ Назаретостар — вщи тай пхир!

⁷ Тунчи Пётро лиля лэ пала чячэ васт, подрицарда, соб вов тэ вщел, и дэ кодыя ж вряма пурэ тай чянга лангэхкэрэ састиле.

⁸ Вов всхукля пэ пурэн и ачиля тэ пхирэ. Тунчи вов заджиля лэнца дэ храмо, пхирэлас, хукэлас и ашарэлас Дэвлэ.

⁹ И всавэрэ мануша дыкхле, со вов пхирэл и ашарэл Дэвлэ.

¹⁰ Вонэ уджянэнас, со када исин мануш, саво бэшэлас и мангэлас хурдимо аврял храмостар, паша Шукар вударэн, и дэнаспэ дыво кодэлэсти, со лэга тердапэ.

Пётро дэдумэл манушэнца дэ Соломонохкоро пусынд

¹¹ Чёро ро рицардапэ пала Петро тай Иоанно, тай всавэрэ мануша дэнаспэ дыво и стидэнаспэ лэндэ всавэрэ ригэндар дэ Соломонохкоро пусынд.

¹² Пётро удыхля када и ачиля тэ дэдумэ манушэнди:

— Мурша израильтянурия, сости тумэ кади дэнпэ дывости? Сости тумэ дыкхэн пэ амэн кади, сар бы амэ пэхкирия зорага тай пативага тердэ кода, со кадэва мануш пхирэл?

¹³ Дэвэл Авраамохкоро, Исаакохкоро тай Иаковохкоро, Дэвэл амарэ дадэнгоро лошарда Пэхкэрэ Копыле Иусо, Савэ тумэ прэдэне, и Савэстар отпхэндэпэ англа Пилато, кала кодэва камля Лэ тэ отмуке.

¹⁴ Нэ тумэ отпхэндэпэ Свэнтонэстар и Пативалэстар и вымангле, соб тумэнди тэ отмуке пряхаре.

¹⁵ Тумэ умардэ Кодэлэ, Ко дэл джювимо, нэ Дэвэл отджювдырда Лэ мулэндар, и амэ кадэлэсти допхэнимаря.

¹⁶ Лэхкоро Лав дэня зор кадэлэ манушэсти, савэ тумэ дыкхэн и джянэн, и патявимо, саво Лэстар, састярда лэ тумэндэ пэ якхэн.

¹⁷ Пхралалэ! Мэ полав, со тумэ и тумарэ пхурэдэра на джянгле, со тердэ.

¹⁸ Нэ кади Дэвэл терда кода, со Вов пхэнэлас чэрэз всавэрэн ангунарен, кала дэдуманя, со Христости трэбуни тэ прылэ кадья грыжа.

¹⁹ И кади, ачявэн тумаро бэзимо и рисявэн Дэвлэстэ, соб тумарэ бэзима тэ авэн скхослэ.

²⁰ Соб Раестар тэ авэл вряма тэ отцинявэн, и соб Вов тэ бичявэл тумэнди Кодэлэ, Ка англэ выгидэня, Иусо Христо.

²¹ Нэ Иусости трэбуни тэ ачелпэ дэ болыбэн, кала авэла Лэхкири вряма и кала Дэвэл возтховэла вса; вряма, пала сави Вов думут пхэнэлас чэрэз Пэхкэрэн свэнтонэн англунарен.

²² Сар пхэнда Моисеи:

«Тумарэ пхралэндар

Рай, тумаро Дэвэл,

тховэла тумэнди Англунаре, кацавэ, сар мэ.

Тумэнди трэбуни тэ кандэ Лэс дэ всавэрэ,

со Вов тумэнди пхэнэла.

²³ И кожно, ко на кандэла кадэлэ Англунаре, авэла вычиндо кадэлэ манушэндар».

²⁴ И всавэрэ англунаря, Самуило тай авэр пала лэ, кади ж допхэнэнас пала кадэлэн дивэн.

²⁵ Тумэ ж англунаренгэрэ чявэ, и тумэ прылиле завето, саво дэня Дэвэл тумарэ дадэнди. Вов пхэнда Авраамости:

«Тирэ родостар прылэна бахталимо
всавэрэ мануша дэ люмля».

²⁶ Кала Дэвэл отджювдырда Пэхкэрэ Копыле, Вов англа всавэрэ бичалда Лэ тумэндэ, соб тэ дэ бахталимо и тэ прыакхарэ кожнонэ тумэндар тэ отджян налаче рындостар.

4

Пётро тай Иоанно англа иудеенгоро Синедрионо

¹ Кала Пётро тай Иоанно дэдумане манушэндэ, лэндэ поджиле рашая, халавдэнгоро пхурэдэр дэ храмо и саддукея,

² савэ сле фартэ холярдэ кодэлэга, со вонэ сиклярэн манушэн и розпхэнэн, со кацик дэ Иусо исин отджювдинимо мулэндар.

³ Вонэ захутилдэ Петро тай Иоанно, и, кади сар сля бельвель, бэшардэ лэн ды дэнзор дэ барунэ.

⁴ Бут мануша, савэ шундэ лав, патине, и кодэлэн, савэ патянас, ачиля паша панч пхангя.

⁵ Пэ авэр диво барэ рая, пхурэдэра и сиклимаря пав Упхэнима стидэнепэ йтханэ дэ Ерусалимо.

⁶ Котэ сле англуно рашай Аннас, Каиафа, Иоанно, Александро и всавэрэ мануша англунэ рашаехкэрэ родостар.

⁷ Вонэ тховдэ Петро тай Иоанно помашкар и ачиле лэндар тэ пхуче:

— Савя зорага и савэ лавэга тумэ када тердэ?

⁸ Тунчи Пётро, саво пхэрдиля Свэнтонэ Фанога, пхэнда лэнди:

— Рая манушэнгэрэ и пхурэдэра!

⁹ Кала тумэ авдивэ пхучен амэндар пала лачимо, саво амэ тердэ кадэлэ лангэсти, и сар амэ лэ высастярдэ,

¹⁰ тунчи джанэн тумэ и всавэрэ мануша Израилёхкэрэ: кадэва мануш екхатар ачел англа тумэн высастярдо важ лав Иусо Христосо Назаретогтар, Савэ тумэ ваздэне пэ трушул и Савэ Дэвэл отджювдырда мулэндар!

¹¹ Иусо исин кодэва

Бар, Саво сля отчуто тумэнцар, ко ваздэн цэра,

и Саво ачиля шэрутнэ барэга.

12 Нико авэр на дэла фирисаримо, колэсти со на дэно манушэнди нисаво авэр лав тала болыбэн, савэга трэбуни амэнди тэ фирисарэпэ.

13 Всаверэ дыкхле, со дэ Петро тай Иоанно нэнай дар, а душолас, со вонэ сле наирвалэ и набарэ мануша. Кала ж полиле, со вонэ сле Иусога, тунчи дэнепэ дыво.

14 Дыкхэнас паша лэн и высастярдэ манушэ, колэсти никастэ на сля зор сось лэнди тэ пхэнэ.

15 Тунчи вонэ прыпхэндэ лэнди тэ ачявэ Синедрионо и ачиле тэ дэдумэ машкар пэстэ.

16 — Со амэнди тэ терэ кадэла манушэнца? — пхэнэнас вонэ. — Всаверэ, ко джовэн дэ Ерусалимо, джянэн, со вонэ тердэ баро дыво, и амэ колэстар на отрисарахпэ.

17 Соб када тэ на розджялпэ инте буглэдэр помашкар мануша, прыдаравага лэн, соб вонэ никасти тэ на пхэнэн пала кадэва лав.

18 Вонэ акхардэ апостолонэн тай прыпхэндэ лэнди тэ на дэдумэн и тэ на сиклярэн важ Иусохкэрэ лавэ.

19 Нэ Пётро тай Иоанно пхэндэ лэнди:

— Акэ, пхэнэн еджинэ, чи мишто англа Дэвэл тэ кандэ будэр тумэн, а на Дэвлэ?

20 Нэнай амэндэ зор тэ аче мулком пала кода, со амэ дыкхле тай шундэ.

21 Кодэла, ко вджянас дэ лэнгоро Синедрионо, инте екхвар прыдаравадэ лэн тай отмукле. Вонэ на аракхле дэ лэн нисави дош, а всаверэ мануша ашарэнас Дэвлэ пала кода, со тердапэ.

22 Важ кода со манушэсти, савэга тердапэ кадэва састяримахкоро дыво, сля будэр саранда бэрш.

Мангимо патякунэн

23 Кала отмукле Петро тай Иоанно, вонэ рисиле пэхкэрэндэ тай розпхэндэ пала вса, со дэдумане англунэ рашая и пхурэдэра.

24 Кала патякунэ мануша шундэ пала када, вонэ всаверэ йтханэ ваздэне гласо Дэвлэстэ тай пхэндэ:

— Дэвла Баро! Ту стердан болыбэн, пхув, море и вса, со дэ лэн исин.

25 Ту пхэндан Свэнтонэ Фанога вуштэндар амарэ дадэ и Тирэ копыле Давидо: «Сости ваздэнпэ тай мижон люмлякэрэ родуля, и мануша камэн сось тэ терэ, нэ вса лэндэ выдзяла йвья?

26 Ваздэнepэ пхувякэрэ тхагаря, и пхурэдэра стидэнepэ йтханэ, соб тэ выдзя пэ Рае Дэвлэ и пэ Христо Лэхкэрэ».

27 Чячюнэ, стидэнepэ дэ кадэва форо Иродо тай Понтии Пилато наиудеенца и Израилэхкэрэ манушэнца пэ Тиро Свэнто Копыли Иусо, Савэ Ту помакхлян.

28 Вонэ тердэ кода, со Ту тховдан Тиря зорага и пав Тири воля.

29 И екхатар, Рае, подыкх, сар вонэ даравэн амэн, и дэ Тирэ копыленди бидаракоро тэ розпхэнэ Тиро лав.

30 Процырдэ васт Тиро и састяр насвалэн, сикав допхэнимо и барэ дывурия важ лав Тирэ Свэнтонэ Копыле Иусо!

31 Кала вонэ помангленэ, тхан, теv вонэ сле, затинисиля. Вонэ всаверэ пхэрдице Свэнтонэ Фанога тай бидаракоро пхэнэнас Дэвлэхкоро лав.

Патякунэ мануша подрицарэн екх екхэ

32 Бутэ манушэндэ, савэ патине, сле екх йло и води. Нико на бинэлас, со лэхкоро хулаимо исин кици важ лэ, нэ вса лэндэ сля екх.

33 Апостолурия баря зорага пхэнэнас пала отджондивимо Раехкоро Иусохкоро, и Дэвэл дэлас Пэхкоро бахталимо лэнди всаверэнди.

³⁴ Помашкар лэн на сля ниекх мануш, саво авэлас бы чёроро. Колэсти со кодэла, кастэ сля пхув тай цэра, битинэнас лэн, анэнас всавэрэ ловэ

³⁵ тай стховэнас паша пурэн апостолонэндэ. Кадэла ловэ роздэнаспэ кожнонэ манушэсти, пэ со лэсти трэбуни.

³⁶ Акэ, Иосифо, савэ апостолурия акхарэнас Варнава (пав аврэ «чяво подрицаримахкоро»), левито Кипростар,

³⁷ савэстэ сля пхув, битинда пэхкири маля, анда ловэ и тховда паша пурэн апостолонэндэ.

5

Анания тай Сапфира

¹ Екх мануш, савэ акхарэнас Анания, йтханэ пэхкирия ромняга Сапфирага, битинда епаш хулаимо

² и ловэндар, савэ лиля пала хулаимо, епаш ачявда пэсти, тай лэхкири ромни джянэлас пала кода. А епаш ловэ вов анда и тховда паша пурэн апостолонэндэ.

³ Пётро пхэнда лэсти:

— Анания, сар када выджиля, со сатана залиля тиро йло пэ скацик, со ту пхэндан начячимо Свэнтонэ Фаности и ачявдан пэсти ловэ, кала битиндан пэхкири пхув?

⁴ Пхув, сави ту битиндан, и кади сля тири, и ловэ, савэ ту лилян пала ла, всавэрэ тирэ сле. Пэ со ту лилян када пэсти дэ гындо? Ту пхэндан начячимо на манушэнди, нэ Дэвлэсти.

⁵ Сар кацик Анания шунда кадэла лава, вов тэлэдэня тай выджиля лэстар води. Всаверэ, ко сле котэ, фартэ пэрэдаравдэпэ.

⁶ Поджиле тэрнэ мануша, залашардэ лэхкоро трупо, вылиджялдэ тай гаравдэ лэ.

⁷ Проджиля пашэ трин чясурия, тай авиля лэхкири ромни, сави на джянэлас, со котэ тердапэ.

⁸ Пётро пхучля латар:

— Пхэн манди, тумэ ромэга пала скацик ловэ битиндэ пхув?

— Нэ, — пхэнда вой, — пала скацик.

⁹ Пётро пхэнда лаги:

— Со када тумэ сдэдуманепэ тэ зумавэ Раехкоро Фано? Ту шунэх пасурия паша вудара? Када джян павпалэ кодэла, савэ гаравдэ тирэ ромэ. Вонэ и тут вылиджяна.

¹⁰ Тай дэ кодья вряма вой тэлэдэня лэхкэрэ пурэндэ тай выджиля латар води. Тэрнэ мануша заджиле, аракхле ла муляга, вылиджялдэ тай гаравдэ паша лакоро ром.

¹¹ Пэ всавиря кхандиря и кодэлэн, ко шунда пала када, сджиля бари дар.

Апостолурия терэн баро допхэнимо тай дывуря

¹² Апостолэнгэрэ вастэнца терэнаспэ баро допхэнимо тай дывуря машкар манушэн. Всаверэ ж сиклярнэ стидэнаспэ йтханэ дэ Соломонохкоро пусын.

¹³ И аврэ манушэндар даранас лэндэ тэ прыаче, нэ дэ патива вонэ сле всавэрэ манушэндэ.

¹⁴ А кодэлэн, ко патялас дэ Рае, ачелас будэр и будэр, мушэн тай джювлен.

¹⁵ Мануша вылиджянас пэ гаса насвалэн, тховэнас лэн пэ патурия тай пэ париндора, соб шалин Петрохкири тэлэдэлас пэ лэн, кала вов авэла тэ проджи пашэ.

¹⁶ Тай форонэндар, савэ сле паша Ерусалимо, авэнас фартэ бут манушэн. Вонэ анэнас насвалэн тай кодэлэн, дэ ка бэшэнас нажужэ фанурия, и всавэрэ састярэнаспэ.

Сар ачиле тэ традэ апостолонэн

17 Англуно рашай и всавэрэ паша лэ саддукея ханас пэ лэн данда.

18 Вонэ пхангле апостолонэн тай бэшардэ лэн дэ форохкэрэ барунэ.

19 Нэ ангело Раехкоро отрисарда рятяга вудара барунэстар тай вылиджялда лэн котарь.

20 — Джян тай ачен дэ храмо, — пхэнда вов, — тай дэдумэн манушэнди вса пала кадэва нэво джювимо.

21 Вонэ кандэне лэ, авиле дэнзор дэ храмо тай ачиле тэ сиклярэ. Кала авиле англуно рашай и всавэрэ паша лэ, вонэ акхардэ Синедрионо и всавэрэн Израилэхэкэрэн пхурэдэрэн тай бичалдэ дэ барунэ пала апостолуря.

22 Нэ кала бутярнэ авиле дэ барунэ, апостолонэн котэ на сля. Вонэ рисардэпэ и допхэндэ:

23 — Вудара дэ барунэ мишто затердэ, паша лэн ачен халавдэ, нэ кала амэ заджиле пордэ, амэ ника котэ на аракхле.

24 Халавдэнгоро пхурэдэр дэ храмо и англунэ рашая вышундэ лэн, тай нико на полиля, со ж када сля.

25 Тунчи кось авиля и пхэнда лэнди:

— Мануша, савэн тумэ тховдэ дэ барунэ, ачен дэ храмо тай сиклярэн кодэлэн, ко стидэняпэ котэ.

26 Тунчи халавдэнгоро пхурэдэр джиля бутярнэнца тай анда апостолонэн. Нэ вонэ на тердэ кода зорага. Вонэ даранас, со мануша помарэна лэн барэнца.

27 Апостолонэн андэ и тховдэ англа Синедрионо. Англуно рашай пхэнда лэнди:

28 — Амэ тумэнди прыпхэндэ, соб тумэ тэ на сиклярэн пала кадэва лав. Нэ тумарэ розлиджян пэхкоро сикляримо пав всаворо Ерусалимо тай чувэн пэ амэн дош дэ мэрима Кадэлэ Манушэхкэрэ.

29 Пётро тай авэр апостолуря пхэндэ:

— Амэнди трэбуни будэр тэ кандэ Дэвлэ, а на манушэн.

30 Дэвэл амарэ дадэнгоро оджювдырда Иусо, Савэ тумэ умардэ тай амблавдэ пэ каштунэ трушулэ.

31 Нэ Дэвэл ваздэня Лэ и бэшарда пав чячэ васт Пэстар сар Пхурэдэрэ и Фирисаре, соб Израили тэ ачявэл пэхкоро бэзимо, и Дэвэл тэ отмукул лэхкири дош.

32 Допхэнимаря кадэлэсти — амэ тай Свэнто Фано, Савэ Дэвэл дэня кодэлэнди, ко кандэл Лэ.

33 Кала кодэла, савэ сле котэ, шундэ када, вонэ ачиле мижэ и камле тэ умарэ апостолонэн.

34 Нэ тунчи вщиля екх мануш, саво вджялас дэ Синедрионо. Лэ акхарэнас Гамалиило, вов сля сиклимари пав Упхэнима и дэ патива всавэрэндэ. Вов прыпхэнда тэ вылиджя апостолонэн пэ набут вряма.

35 Тунчи вов пхэнда:

— Израильтянуря, мишто думисарэн пала кода, со тумэ камэн тэ терэ кадэла манушэнца.

36 Надэмут катэ подлиляпэ Февда, вов выдэлас пэ пала савэсь барэ манушэ. Пала лэ джянас пашэ штаршэла манушэн. Нэ кала лэ умардэ, всавэрэ, ко джиле пала лэ, розпрастэнепэ, и вса упалэ ачиля пэ пэхкэрэ тханэ.

37 А пала лэ сля Иуда Галилеятар. Вов авиля дэ кодыя вряма, кала искрисарэнас манушэн, тай улиджялда бутэн пала пэ. Вов кади ж хасиля, тай всавэрэ, ко джиле пала лэ, кади ж розпрастэнепэ.

38 Колэсти мэ пхэнав тумэнди екхатар: ачявэн кадэлэн манушэн. Отмукул лэн. Кала када вса исин манушэндар, тунчи када хасявэла.

39 А сар када Дэвлэстар, тумэ нисо на терэна, кацик еджинэ ачена врыжымашы Дэвлэсти.

И лэхкири дума прылиле дэ лэн кодэла, ко котэ сля.

40 Вонэ прыакхардэ апостолонэн и прыпхэндэ лэн тэ марэ чукненца. Тунчи инте екхвар запхэндэ лэнди тэ дэдумэ Исусохкэрэ лавэга тай отмукле лэн.

41 Апостолура ачявдэ Синедрионо тай лошавэнас колэсти, со лэнди сля дэно тэ прылэ ладжь пала Исусохкоро лав.

42 Тай кожно диво дэ храмо тай пав цэрэн вонэ на пэрэаченас тэ сиклярэ и тэ пхэнэ Бахтало Лав пала Исусо Христосо.

6

Вытидимо эфта бутярнэн

1 Дэ кадэла дивэ, кала ачиля бут сиклярнэн, эллинистура* холявэнас пэ катутнэн евреем. Вонэ дэдумэнас, со кодэла обджан лэнгэрэн джювлен, савэндэ муле рома, кала роздэн кожно диво хамо.

2 Тунчи Дэшудуй акхардэ всавэрэн сиклярнэн тай пхэндэ:

— Амэнди наши тэ ачявэ бути важ лав Дэвлэхкоро, соб тэ лашарэ скаминда.

3 Колэсти, пхралалэ, вытидэн пэстар эфта манушэн, савэндэ лачи патив и савэ пхэрдиле Фанога тай годяга, и амэ дага лэнди тэ терэн кадья бути.

4 Еджинэ амэ авага тэ мангэпэ и тэ лиджа бути лавэга.

5 Со вонэ пхэндэ, всавэрэнди чялиля, тай вытидэне Стефано, манушэ, дэ кастэ сля патявимо тай Свэнто Фано, Филиппо, Прохоро, Никаноро, Тимоно, Пармено тай Николае форостар Антиохия, саво прылиля иудеенгоро сикляримо.

6 Лэн тхөвдэ англа апостолонэн, и кодэла поманглэпэ пала лэн и возтхөвдэ пэ лэн васта.

7 Лав Дэвлэхкоро роздьяласпэ, и дэ Ерусалимо ачиля фартэ бут сиклярнэн, и бут рашая прылиле кадэва патявимо.

Стефано схутилдо иудеенца

8 Стефано, мануш, дэ кастэ сле Дэвлэхкэрэ лачимо тай зор, терэлас машкар манушэн барэ дьвурия тай допхэнимо.

9 Лэга ачиле тэ розлэпэ койсавэ мануша, ко пхирэнас дэ синагога отмуклэн пэ воля. Пордэ кади ж пхирэнас киренеянурия, александриянурия, тай кодэла, ко джювдэ дэ Киликия тай дэ Цыкни Азия.

10 Нэ Стефано дэдумэлас годяга и зорага Фаностар, тай вонэ кадэлэга нисо на галэнас тэ терэ.

11 Тунчи вонэ поддэдумане койсавэн манушэн тэ пхэнэ: «Амэ шундэ, сар Стефано дэдумэл начячюнэ лава пала Моисее и пала Дэвлэ».

12 Вонэ подваздэне манушэн, пхурэдэрэн и сиклимарен пав Упхэнима. Тунчи схутилдэ Стефано и андэ дэ Синедрионо.

13 Тай подтхөвдэ хохавнэн допхэнимарен, савэ пхэндэ:

— Кадэва мануш всавири вряма пхэнэл налаче лава пала свэнто храмо и Упхэнимо.

14 Амэ шундэ, сар вов дэдуманя, со Исусо Назаретостар розмарэла кадэва храмо и парувэла сикляримо, саво пэрэдэня амэнди Моисеи.

15 Всавэрэ кодэла, ко бэшле дэ Синедрионо, чувэнас сама пэ Стефано и дыкхле, со лэхкоро муй исин сар муй ангелостэ.

7

Стефанохкири дума англа Синедрионо

1 Тунчи англуно рашай пхучля Стефаностар:

— Када чячимо?

2 Стефано пхэнда:

* 6:1 Кади акхарэнас евреем, савэ дэдумане пав греческо, а на пав еврейско чиб.

— Пхралалэ тай дада! Пошунэн ман! Пативакоро Дэвэл авиля амарэстэ пропастэ Авраамостэ, кала вов инте джювда дэ Месопотамия — ды кодэлэ, сар вов ачиля тэ джювэ дэ Харрано.

³ «Ачяв кадэва тхан тай пэхкоро родо, — пхэнда лэсти Дэвэл, — тай джя дэ пхув, сави Мэ сикавава туты».

⁴ Авраамо ачявда пхув халдеенгири тай пэрэлагля дэ Харрано. Котарь, сар муля Авраамохоро дад, Дэвэл пэрэлиджялда Авраамо дэ кодья пхув, дэ сави тумэ екхатар джювэн.

⁵ Дэвэл на дэня лэсти катэ нисави пхув, и которици пхуякоро на дэня. Нэ Дэвэл пхэнда, со дэла кадья пхув лэсти тай лэхкэрэ родости, кала Авраамостэ инте на сля чяворэн.

⁶ Дэвэл пхэнэлас лэсти: «Тирэ чявэ на авэна хулая котэ, тев джювэна; вонэ авэна котэ копыля и лиджяна грыжа штаршэл бэрша.

⁷ Нэ Мэ марава кодэлэн манушэн, ко терэла лэн копыленца, — пхэнда Дэвэл, — и тунчи вонэ выджяна котарь тай авэна тэ тэлэ Манди пэ кадэва тхан».

⁸ Тунчи Дэвэл дэня Авраамости завето тэ обчинэпэ. Авраамо ачиля дадэга Исаакости и обчинда лэ пэ охтанго диво. Исаако ачиля дадэга Иаковости, а Иаково — дэшудуенди патриархонэнди.

⁹ Патриархуля калэ ілэга дыкхэнас пэ Иосифо и битиндэ лэ дэ Египто. Нэ Дэвэл сля Иосифога

¹⁰ тай фирисарда лэ всавири бидатар. Вов дэня Иосифости годи тай терда кади, тэ авэл вов дэ патива фараоностэ, саво сля тхагари дэ Египто. Кодэва терда Иосифо прыбэшлэга дэ всаворо Египто тай дэ всаворо лэхкоро цэр.

¹¹ Тунчи дэ всаворо Египто тай Ханаано ачиля бокх тай сля бари грыжа. Тай амарэ пропатура нитев на аракхэнас хамо.

¹² Кала Иаково шунда, со дэ Египто исин ворзо, вов бичалда пордэ амарэн пропонэн пэрво моло.

¹³ Кала вонэ авиле авэр моло, Иосифо оттердапэ пэхкэрэ пхралэнди, тай фараоно уджянгля пала родо Иосифохкоро.

¹⁴ Тунчи Иосифо бичалда тэ акхарэ пэхкэрэ дадэ Иаково тай всаворо пэхкоро родо, савэн сля эфтадэша панч манушэн.

¹⁵ Иаково авиля дэ Египто, тев муля и вов, и амарэ пропатура.

¹⁶ Лэнгэрэ трупуля пэрэлиджялдэ дэ Шэхемо и тховдэ дэ склепо, саво Авраамо тинда пала рупь Хаморохкэрэ чявэндэ дэ Шэхемо.

¹⁷ Кала поджила пашэ вряма, соб тэ терэлпэ пав лавэ, саво дэня Дэвэл Авраамости, амарэн манушэн дэ Египто ачеласпэ будэр.

¹⁸ Кади сля ды колэ, сар ваздэняпэ дэ Египто авэр тхагари, саво на джянгля пала Иосифо.

¹⁹ Вов прытасавэлас амарэн пропатуэнэн тай хронтимага выджялас пэ амарэн манушэн: вов заачявэлас тэ вычувэ чяворэн, савэ бэяндепэ, соб вонэ тэ мэрэн.

²⁰ Дэ кадья вряма бэяндяпэ Моисеи и сля фартэ шукар англа Дэвэл. Трин чён лэ парварэнас дэ дадэхкоро цэр,

²¹ а кала поджила вряма тэ ачявэ лэ, Моисее лиля пэстэ фараонохкири чей тай выбарярда лэ, сар пэхкэрэ чявэ.

²² Моисеи сля сиклярдо дэ всавири Египтохкири годи; вов сля зорало и дэ лав, и дэ рындонэн.

²³ Кала лэсти сля саранда бэрш, вов задумисарда тэ дыкхэ, сар джювэн лэхкэрэ пхрала израильтянурия.

²⁴ Тунчи вов удыхля, со екхэ лэндар марэл египтянино. Лэсти ачиля дор кадэлэ манушэ, тай вов умарда египтянино.

25 Моисеи думисарэлас, со лэхкэрэ пхрала полэна: чэрэз лэ Дэвэл отмукал лэн пэ воля, нэ вонэ када на полиле.

26 Пэ авэр диво Моисеи удыхкля, сар марэнпэ дуй израильтянурия. Вов камля тэ слидж лэн, соб тэ на марэнпэ. «Чявалэ, тумэ ж пхрала, — пхэнда вов, — пэ со ж тумэ задэн холи екх екхэсти?»

27 Тунчи кодэва, саво марэлас аврэ, отчута пэстар Моисее тай пхэнда: «Ко тховда тут, соб ту тэ авэх пхурэдэрэга тай сундисарэга понад амэн?

28 Чи ту камэх и ман тэ умарэ, сар арати умардан египтянино?»

29 Кала Моисеи шунда кадэла лава, вов нашля тай ачиля тэ джювэ дэ Мадианохири пхув, сар мануш авря пхувятар. Котэ лэстэ дэ ире бэяндепэ дуй чявэ.

30 Проджиля саранда бэрш, тай Моисеести авиля ангело дэ шуки пхув, надур плаестар Синаи, дэ яга, савяга пхаболас терново рандь.

31 Моисеи дэласпэ дыво, кала када дыкхля. Вов поджиля пашэ, соб фэдэр тэ роздыкхэ, и шунда гласо Раехкоро:

32 «Мэ Дэвэл тирэн пропапонэн, Дэвэл Авраамохкоро, Исаакохкоро тай Иаковохкоро». Моисеи ж тинисявэлас даратар и даралас тэ подыхкэ.

33 Рай пхэнда лэсти: «Злэ пэхкэрэ цуруля, колэсти со тхан, пэ саво ту ачех — свэнто пхув.

34 Мэ удыхклём, дэ савэ бибахталима джювэн Мурэ мануша дэ Египто и ушундом лэнгоро ровимо. Мэ сджилём, соб тэ дэ лэнди воля. А кана джя, Мэ бичалав тут дэ Египто».

35 Кодэлэ Моисее, ка вонэ отчутэ пэстар тай пала ка дэдумане: «Ко тховда тут, соб ту тэ авэх пхурэдэрэга тай сундисарэга понад амэн?» — Дэвэл бичалда кана сар пхурэдэрэ и фирисаре чэрэз ангело, саво сикавдапэ лэсти дэ терново рандь.

36 Моисеи вылиджалда лэн Египтостар, терэлас дывурия тай допхэнимо дэ Египто, паша Лоло море и дэ шуки пхув, тев сле вонэ саранда бэрш.

37 Кадэва ж Моисеи пхэнда израильтянонэнди: «Тумарэ пхралэндар Дэвэл ваздэла тумэнди Англунаре, сар ман».

38 Кала вов йтханэ Израилёхкэрэ манушэнца стидэняпэ дэ шуки пхув, ангело пхэнэлас лэга тай амарэ пропалунэнца пэ плай Синаи. Тунчи Моисеи прылила джювдо лав и пэрэдэня лэ амэнди.

39 Нэ амарэ дада отпхэндэпэ тэ кандэ лэ, отчутэ лэ тай скамле тэ рисявэ дэ Египто.

40 Вонэ пхэндэ Аароности: «Стер амэнди дэвлэн, савэ англа амэн джяна. Колэсти со амэ на джнянах, со тердапэ кадэлэ Моисеега, саво вылиджалда амэн Египтостар».

41 Дэ кодэлэ дивэ вонэ тердэ совнакунэ гуруворэ, андэ кадэлэ дэвлорэсти жэртва тай сле лашалэ рындостар, саво тердэ пэхкэрэ вастэнца.

42 Дэвэл же отрисардапэ лэндар и ачявда лэн тэ тэлён болыбнахкэрэ чэргэнэнди, сар искриисардо пала када дэ лилэн англунаренгэрэн:

«Цэр Израилёхкоро! Чи важ Ман тумэ чинэнас тай анэнас жэртвы дэ шуки пхув, сар саранда бэрш котэ сле?»

43 Тумэ лиле пэга дэвлорэ Молохохири катуна, чэргэнь тумарэ дэвлорэстар Ремфаностар,

и кода, со тердэ тумарэ васта, соб кадэлэсти тэ тэлё.

Пала кода Мэ бичалава тумэн дэ копылен дурэдэр Вавилоностар».

44 Тумарэ дадэндэ дэ шуки пхув сля Катунэ Допхэнимахири, стерди пав прыпхэнимо, саво Дэвэл дэня Моисеести, и пав кодэва рындо, саво дыкхля Моисеи.

45 Кала амарэ дада прылиле кадья Катуна, вонэ тай лэнгоро пхурэдэр Иусо Навиёхкоро влиджялдэ ла дэ пхувен, тев джювдэ манушэнгэрэ родуля, савэн Дэвэл розтрадэня англа лэн. И кади сля ды колэ, кала ачилия тхагарега Давидо,

46 савэ Дэвэл камэлас и саво мангля Дэвлэстар тэ аракхэ цэр, тев тэлён, важ родо Иаковохкоро.

47 Нэ цэр Дэвлэсти стерда Соломоно.

48 Барэдэрэхкоро же на джювэл дэ цэрэн, савэ стердэ мануша. Англунари дэдумэл пала када:

49 «Болыбэн — трено Муро,
тай пхув исин тхан, тев ачен Мурэ пурэ.
Саво тумэ камэн тэ терэ Манди цэр?
— пхэнэл Рай.

— Тев тхан, соб Манди тэ отцинявэ?

50 Чи на Мурэ вастэга вса откада стердо?»

51 Тумэ — накандинэ, тумэ — мануша барунэ їлэнца и кашукэ канэнца! Тумэ, сар тумарэ пропапурия, всавири вряма на уштавэн Свэнтонэ Фаности!

52 Ка англунарендар на камле тэ вытрадэ тумарэ пропапурия? Вонэ умардэ кодэлэн, ко пхэнэнас пэ англал, со авэла Чячюно. А кана тумэ прэдэне тай умардэ Лэ!

53 Тумэ прылиле Упхэнимо, саво пэрэдэне тумэнди ангелурия, нэ на тердэ пав лэ.

Стефанохкоро мэримо

54 Кала вонэ шундэ када, вонэ мижыле и ачиле тэ стасавэ пэхкэрэ данда.

55 Стефано же пхэрдила Свэнтонэ Фанога и ваздэня якха дэ болыбэн, и удыхля патив Дэвлэхкири тай Иусо, Саво ачелас пав чячи риг Дэвлэстар.

56 — Дыххэн, — пхэнда вов, — мэ дыкхав оттердо болыбэн и Чявэ Манушыканэ, Саво ачел пав чячэ васт Дэвлэстар.

57 Тунчи вонэ всавэрэ затердэ пэхкэрэ кана, фартэ типисиле и чутэпэ пэр лэстэ.

58 Вонэ выцырэдэне Стефано пала форо тай ачиле тэ чувэ дэ лэ бара. Кодэла, ко дыкхле сар лэ дошарэнас, тховдэ пэхкири їда паша пурэн тэрнэ чявэстэ, савэ акхарэнас Савло.

59 Кала вонэ чувэнас пэр лэстэ барэнца, Стефано мангляпэ:

— Рае Иусо! Прылэ муро фано!

60 Тунчи вов тэлэдэня пэ чянгэн и фартэ затиписиля:

— Рае, отмук лэнди кадэва бэзимо!

Кадэлэ лавэнца вов муля.

8

Савло традэл патякунэн манушэн

1 Савло же подэлас гласо пала кодэлэн, ко умарда Стефано. Кодэлэ дивэстар ачиле фартэ тэ традэ кхандири дэ Ерусалимо. И всавэрэ розпрастэнепэ пав Иудея и Самария, кици апостолурия ачилепэ дэ Ерусалимо.

2 Пативалэ мануша гаравдэ Стефано и фартэ ровэнас пала лэ.

3 Ай Савло традэлас кхандири. Вов захукэлас дэ цэрэн патякунэ манушэндэ, выцырделас муршэн тай джювлен тай чувэлас лэн дэ баруне.

Филиппо пхэнэл Дэвлэхкоро лав дэ Самария

4 Машкар колэ мануша, савэн традэнас лэнгэрэ тханэндар, розпхэнэнас Бахтало Лав пав всавэрэ рига.

5 Филиппо ж авиля дэ екх форо Самариякоро и розпхэнэлас котэ пала Христосо.

6 Гроза манушэн чувэнас сама, кала шунэнас лэхкэрэ лава, тай дыкхэнас допхэнимо, саво вов терэлас.

7 Бутэ манушэндар выджянас барэ типимага нажужэ фануря, тай бут попхаглэ и лангэ высастярэнаспэ.

8 Тай дэ кодэва форо сля бари лош.

9 Котэ сля екх мануш, саво акхарэласпэ Симоно. Ды колэ вов врысарэлас дэ кодэва форо, и мануша, ко джювдэ дэ Самария, дэнаспэ дыво кадэлэсти. Вов выдэлас еджино пэ пала савэсь барэ манушэ.

10 Всаверэ мануша, и тэрнэ, и пхурэ, фартэ прышунэнаспэ лэстэ тай пхэнэнас: — Кадэва мануш исин бари зор Дэвлэхкири.

11 А прышунэнаспэ вонэ колэсти, со вов бут вряма сикавэлас дыво пэхкэрэ врысаримага.

12 Нэ кала мануша патине Филиппости, саво розпхэнэлас пала Дэвлэхкоро Тхагаримо тай лав Исусохкоро Христокоро, тунчи бут мушэн тай джювлен болдэнэпэ.

13 Симоно кади ж патиня тай болдэняпэ. Вов всавири вряма пхирэлас пала Филиппо, дыкхэлас баро допхэнимо тай барэ рындуля, и дэлэспэ дыво кадэлэсти.

14 Кала апостолуря дэ Ерусалимо шундэ, со дэ Самария прылиле Дэвлэхкоро лав, вонэ бичалдэ пордэ Петро тай Иоанно.

15 Кодэла авиле тай манглэпэ, соб Дэвэл дэня манушэнди Свэнто Фано.

16 Ни пэ кастэ лэндар Фано инте на сджялас, вонэ кацик болдэнэпэ важ Рае Исусохкоро лав.

17 Тунчи Пётро тай Иоанно тховдэ пэ лэн васта, тай кадэла мануша прылиле Свэнто Фано.

18 Кала Симоно удыххля, со Свэнто Фано дэлпэ, кала апостолуря тховэн васта пэ манушэн, вон анда лэнди ловэ

19 тай пхэнда:

— Дэн и манди кацави зор, соб кодэва, пэ кастэ мэ тховава васта, тэ лэл Свэнто Фано.

20 Нэ Пётро пхэнда:

— Мэк тиро рупь хасявэла йтханэ туга, колэсти со ту Дэвлэхкоро даро камлян тэ тинэ пала ловэ!

21 Ту на вджяга дэ кадэва рындо, важ кода со тиро йло начячюно англа Дэвлэ.

22 Прыджян кадэва бэзимо тай мангпэ Раести, соб Вов тэ отмукэл тути кода, со тутэ исин пэ годя.

23 Мэ дыкхав, со дэ тиро йло пхэрдо кэркимо тай со ту спхангло ланчукога, саво исин начячимо.

24 Симоно пхэнда:

— Помангэнпэ пала ман Раести, соб манца тэ на авэл кади, сар тумэ пхэндэ.

25 Апостолуря ж допхэнэнас котэ тай розпхэнэнас Раехкоро лав. Тунчи вонэ джиле павпалэ дэ Ерусалимо и пав дром розпхэнэнас Бахтало Лав дэ бутэн гавэн дэ Самария.

Ефиопско мануш обрисявэл Дэвлэстэ

26 Ангело Раехкоро пхэнда Филиппости:

— Джэ пэ юго, пэ дром, саво проджял пав шуки пхув Ерусалимостар дэ Газа.

27 Филиппо вщиля тай джиля. Дэ кадья вряма котэ сля ефиопско мануш. Вов терэлас бути прыбэшлэга тхагарнятэ дэ Ефиопия, Кандакиятэ, тай прыдыкхэлас пала всаворо лакоро барвалимо. Вов авэлас дэ Ерусалимо тэ тэлэ Дэвлэсти,

28 и кана рисявэлас цэрэ. Кала кадэва мануш бэшэлас дэ пэхкоро вурдон тай динэлас лил, саво искриисарда англунари Исаия.

29 Фано пхэнда Филиппости:

— Поджя кадэлэ вурдонэстэ и джэ пашэ.

30 Филиппо подпрастэня вурдонэстэ тай шунда, со котэ динэлпэ лил, саво искриисарда англунари Исаия.

— Ту полэх, со ту динэх? — пхучля Филиппо.

31 — Сар же мэ лава, кала манди нико на розпхэнэл, — пхэнда кодэва мануш тай акхарда Филиппо, соб вов тэ подваздэлпэ и тэ бэшэл лэга дэ вурдонэ.

32 Ай вов динэлас кацаво тхан Лилэндар:

«Сар бакрорэ, лиджялдэ Лэ, соб тэ чинэ,
и, сар бакроро на ваздэл пэхкоро гласо англа кодэлэ, ко злэл лэстар бал,
кади ж и Вов ушта Пэхкэрэ на оттерэлас.

33 Вов сля ладжьювардо и на домукло чячюнэ сындостэ.

Ко розпхэнэла пала Лэхкоро родо?

Колэсти со джювимо Лэхкоро пхуятар залэлпэ».

34 Ефиопско мануш пхучля Филиппо:

— Мангав тут, пхэн манди, пала ка дэдумэл катэ англунари? Пала пэ чи пала кась аврэ?

35 Тунчи Филиппо ачила тэ розпхэнэ кадэлэ тханэстар Бахтало Лав пала Исусо.

36-37 Вонэ ладэнас дурэдэр пав дром тай подлагле пашэ панестэ.

— Дыкх, акэ исин пани, — пхэнда ефиопско мануш. — Со на дэл манди тэ болдэпэ?*

38 Вов прыпхэнда, соб тэ тэрдёл вурдон, и дуйджинэ вонэ, ефиопско мануш тай Филиппо, заджиле дэ пани. И Филиппо болдэня лэ.

39 А кала вонэ выджиле панестар, Фано Раехкоро улиджялда Филиппо, тай ефиопско мануш будэр лэ на дыкхля. Баря лошага вов лагла дурэдэр.

40 Ай Филиппо попэля дэ форо Ашдодо. Вов розпхэнэлас Бахтало Лав пав всавэрэн фронэн, а тунчи авиля дэ Кесария.

9

Савло обрисявэл Дэвлэстэ

1 Савло жэ пхурдэлас холяга и мэримага пэ Раехкэрэн сиклярнэн. Вов авиля англунэ рашаестэ

2 и мангля лэстар лила дэ синагоги, савэ сле дэ Дамаско, соб вов, кала аракхэла кодэлэн, ко прырицарэлпэ Дромэстэ, мурушэн тай джювлен, тэ спхандэл лэн тай тэ анэл дэ Ерусалимо.

3 Кала вов поджялас дэ Дамаско, пэр лэстэ сджиля душлимо болыбнастар.

4 Вов тэлэдэня пэ пхув и ушунда гласо, саво пхэнда лэсти:

— Савло, Савло, сости ту традэх Ман?

5 — Ко Ту, Рае? — пхучля Савло.

— Мэ Исусо, Савэ ту традэх, — пхэнда Вов.

6 — Вщи тай джя дэ форо. Котэ тути пхэнэна, со трэбуни тэ терэ.

7 Мурша, савэ сле Савлога дэ дром, ачиле сар мутуля: вонэ шундэ гласо, нэ ника на дыкхле.

8 Савло вщиля пхуятар, нэ кала вов оттерда якха, тунчи полиля, со корыля, и лэ пала васт андэ дэ Дамаско.

9 Трин дивэ вов на халас и на пэлас, и сля коро.

10 Дэ Дамаско джювда сиклярно, савэ акхарэнас Анания. Рай пхэнда лэсти дэ дыкхлима:

— Анания!

— Кади, Рае! — пхэнда вов.

11 Рай дэдуманя лэсти:

* **8:36-37** Дэ койсавэ пуранэ греческа манускрипты исин инте кацавэ лава: «Филиппо пхэнда: "Кала ту патях всавэрэ ілэга, нисо тут на рицарэл". Ефиопско мануш пхэнда: "Мэ патях, со Исусо Христосо исин Дэвлэхкоро Чяво"».

— Джя пэ гаса, сави акхарэлпэ «Вортага», аракх котэ Иудахкоро цэр, и пхуч Савло, саво акхарэлпэ «Тарсянино». Вов екхатар мангэлпэ.

¹² И дэ лэхкэрэ дыкхлима мануш пав лавэ Анания авиля и тховда пэр лэстэ васта, соб вов тэ на авэл коро.

¹³ Анания пхэнда:

— Рае, мэ бутэ манушэндар шундом пала лэ, саво вурытимо вов терда Тирэ свэнтонэнди дэ Ерусалимо.

¹⁴ И лэстэ катэ исин бари зор англунэ рашаендар тэ пхэндэ всавэрэн, ко прыакхарэл Тиро Лав.

¹⁵ Нэ Рай пхэнда лэсти:

— Джя, колэсти со кадэва мануш — вытидэно Манца, соб тэ розпхэнэ пала Муро Лав англа наиудеен, англа тхагарен тай англа Израилэхкэрэн манушэн.

¹⁶ Мэ сикавава лэсти, сави бари грыжа вов прылэла пала Муро лав.

¹⁷ Анания джиля, заджиля дэ кодэва цэр, тховда пэ Савло васта тай пхэнда:

— Пхрал Савло, Рай Иусо, Саво сикавадэпэ пэ тиро дром, бичалда ман тутэ, соб ту упалэ тэ дыкхэх и тэ пхэрдэх Свэнтонэ Фанога.

¹⁸ Дэ кодья вряма калимо уджиля лэхкэрэ якхэндар, и вов ачиля тэ дыкхэ. Савло вщиля тай болдэняпэ.

¹⁹ А тунчи вов халя, и лэстэ рисардапэ зор.

Савло пхэнэл Дэвлэхкоро лав дэ Дамаско

Савло сля набут дивэн сиклярнэнца дэ Дамаско

²⁰ тай сиво ачиля тэ пхэнэ дэ синагоги пала кода, со Иусо исин Дэвлэхкоро Чяво.

²¹ Всавэрэ, ко лэ шундэ, дэнаспэ дыво тай пхэнэнас:

— Чи када на вов, ко умарэлас манушэн Ерусалимостар, савэ прыакхарэнас кадэва лав? И чи на авиля вов кордэ, соб тэ пхэндэ лэн и тэ лиджя англунэ рашаендэ?

²² Савло же инте зоралэдэр пхэнэлас тай допхэнэлас, со Иусо исин Христосо. Тай иудея, савэ джювэнас дэ Дамаско, на джангле, со лэсти тэ пхэнэ.

²³ Кала проджиля бут дивэн, иудея стидэне дума, соб тэ умарэ Савло.

²⁴ Нэ Савло уджангля пала кода. Иудея диво и рят дожугярэнас паша вударэн дэ форо, соб тэ умарэ лэ,

²⁵ нэ сиклярнэ рятяга лиле тай обмукле лэ дэ бари траста пав форицико ванта.

Савло дэ Ерусалимо

²⁶ Савло авиля дэ Ерусалимо и камля тэ прыаче сиклярнэндэ, нэ всавэрэ даранас лэстар и на патянас, со вов кади ж ачиля сиклярнэга.

²⁷ Тунчи Варнава анда лэ апостолонэндэ тай розпхэнда, сар Савло пэ дром дыкхля Рае, сар Рай дэдумэлас лэга, и сар дэ Дамаско Савло бидаракоро пхэнэлас важ Иусохкоро лав.

²⁸ Савло сля лэнца койсави вряма, пхирэлас пав Ерусалимо и битрашакоро пхэнэлас пала Раехкоро лав.

²⁹ Вов бут молы дыкхэлэспэ эллинистонэнца, розпхэнэлас тай допхэнэлас лэнди, и кодэла терэнас вса, соб лэ тэ умарэ.

³⁰ Кала пхрала уджангле пала када, вонэ отлиджялдэ Савло дэ Кесария, а котарь отбичалдэ лэ дэ Тарсо.

³¹ А манушэн кхандирятар пав всавири Иудея, Галилея тай Самария будэр нико на традэлас. Кхандири прылэлас зор тай барёлас, джювда дарага англа Рае, тай Свэнто Фано подричарэлас ла.

Пётро састярэл Энее

³² Кала Пётро джялас форо форостэ, вов авиля свэнтонэндэ, савэ джювдэ дэ Лидда.

33 Котэ вов удыххля екхэ манушэ, савэ акхарэнас Энеи, вов сля насвало, попхагло мануш и пашлёлас пэ пато охта бэрш.

34 Пётро пхэнда лэсти:

— Энеи! Иисусо Христосо састярэл тут. Вщи тай стидэ тиро тхан.

Дэ кодыя ж вряма Энеи вщиля.

35 Кала всавэрэ мануша, савэ джювдэ дэ Лидда тай Шароно, удыххле, со вов састярдяпэ, вонэ обрисиле Раестэ.

Тавита отджювдёл мулэндар

36 Дэ Яффа сля екх сиклярни, савя акхарэнас Тавита, ай пав аврэ «Бузнори». Вой всавири вряма терэлас лаче рындурия и подрицарэлас чёrorэн.

37 Тай акэ, дэ кодыя вряма вой занасвалиля тай муля. Лакоро трупо обхалавдэ и тховдэ дэ упралуни цэра.

38 Важ кода со Лидда надур Яффатар, кала сиклярнэ шундэ, со Пётро исин котэ, вонэ бичалдэ лэстэ дон манушэн, соб кодэла мангле лэ:

— Ав амэндэ сигэдэр!

39 Пётро джиля лэнца, и кала вов авиля, лэ пролиджялдэ дэ упралуни цэра. Паша лэ стидэнепэ всавэрэ джювля, савэндэ муле рома. Вонэ ровэнас тай сикавэнас лэсти гада тай авэр їда, савэ сювда Бузнори, кала сля джювди.

40 Пётро выбичалда всавэрэн цэратар, вщиля пэ чянгэн тай помангялэ. Тунчи вов обрисардапэ мулятэ тай пхэнда:

— Тавита, вщи!

Вой оттерда якха, удыххля Петро тай бэшля.

41 Вов лиля ла пала вастэ и подрицарда, соб вой тэ вщел. Тунчи вов акхарда джювлен и патякунэн, и сикавда лэнди, со Тавита джювди.

42 Пала када уджянгле пав всавири Яффа, и бут манушэн патине Раести.

43 Пётро сля дэ Яффа инте бут дивэн, вов джювда Симоностэ, саво вытерэлас морця.

10

Корнилиехкоро дыкхлимо

1 Дэ Кесария сля мануш, савэ акхарэнас Корнилии, шэлякоро пхурэдэр, халавдэнгэрэ Италиякэрэ стидэмастар.

2 Корнилии, сар и всавэрэ лэхкэрэ цэрунэ, сля пативалэ манушэга тай даралас Дэвлэстар, роздэлас чёrorэнди пэхкэрэ хулаимастар и всавири вряма мангялэ Дэвлэсти.

3 Екхвар, паша трин чясуря дэ дивэ, Корнилиести сля дыкхлимо. Вов мишто дыкхля Дэвлэхкэрэ ангело, саво авиля лэстэ тай пхэнда:

— Корнилии!

4 Вов подыххля пэр лэстэ дарага тай пхэнда:

— Со, рае?

Ангело пхэнда:

— Дэвэл срапирда пала тут. Тиро мангимо и лачимо, саво ту терэх манушэнди, ваздэнепэ Лэстэ.

5 Бичал манушэн дэ Яффа, соб вонэ акхарэн Симоно, савэ инте акхарэн Петрога.

6 Вов джювэл Симоностэ, саво вытерэл морця, дэ цэр паша море.

7 Кала ангело, савэга вов дэдуманя, уджиля, Корнилии акхарда дон пэхкэрэн копьлен тай пативалэ халавдэ, саво терэлас важ лэсти бути.

8 Вов розпхэнда лэнди пала вса, со тердапэ, и бичалда лэн дэ Яффа.

Петрохкоро дыкхлимо

9 Пэ авэр диво, кала бичалдэ поджянас форостэ, паша дэшудуй чясуря, Пётро ваздэняпэ пэ цэрэхкири стрэха, соб тэ помангэпэ.

10 Вов ачила бокхало и фартэ закамля тэ ха. Кала тавэнас хамо, Петрости сля дыкхлимо.

11 Вов дыкхля оттердо болыбэн и кода, со сля поджило пэ бари цэрга, сави обмукэласпэ пэ пхув пала штар рига.

12 Дэ кадыя цэрга сля всаворо штарэпурэнгоро ското, сапа тай болыбнахкэрэ чирикля.

13 Тунчи роздэняпэ гласо тай пхэнда лэсти:

— Пётро, вщи, чин и ха!

14 — Нат, Рае! — пхэнда Пётро. — Мэ никала на халём кода, со исин магрисардо тай нажужо.

15 Тунчи гласо пхэнда лэсти авэр моло:

— На акхар магрисардэга кода, со Дэвэл жужарда.

16 Кади сля тривар, и тунчи цэрга сля подлито дэ болыбэн.

17 Пётро вса на полэлас, со када за дыкхлимо, кала мануша, савэн бичалда Корнилии, розпхучле, тев исин Симонохкоро цэр, поджиле тай ачиле паша вударэн.

18 Вонэ ачиле тэ пхуче, чи на джювэл катэ екхатар Симоно, савэ инте акхарэн Пётро.

19 Пётро инте думисарэлас пала дыкхлимо, кала Фано пхэнда лэсти:

— Тут родэн трин мануша.

20 Вщи тай змукпэ тэлэ. Дзя лэнца тай на думисар ни пала со. Колэсти со када Мэ лэн бичалдом.

21 Пётро змукляпэ тэлэ тай пхэнда кадэлэ манушэнди:

— Мэ кодэва, ка тумэ родэн. Пав саво рындо тумэ авиле?

22 Вонэ пхэндэ:

— Шэлякоро пхурэдэр Корнилии, мануш пативало, саво дарал Дэвлэстар, и пэ савэ тховэл патив родо иудеенгоро, прылиия свэнтонэ ангелостар лав тэ акхарэ тут дэ пэхкоро цэр тай тэ вышунэ, со ту лэсти пхэнэга.

23 Тунчи Пётро акхарда лэн тэ заджа дэ цэр тай стховда лэнди патив. Пэ авэр диво Пётро и койсавэ пхрала Яффатар джиле лэнца.

Пётро дэ Корнилиехкоро цэр

24 Пэ авэр диво вонэ авиле дэ Кесария. Корнилии дожутярэлас лэн. Вов акхарда всаворо пэхкоро родо тай пашунэн амалэн.

25 Кала Пётро авиля, Корнилии выджиля лэстэ, тэлэдэня лэхкэрэ пурэндэ тай тэлиля лэсти.

26 Нэ Пётро подлиля лэ тай пхэнда:

— Вщи, мэ кацаво ж мануш, сар и ту.

27 Кала Пётро инте дэдуманя Корнилиегэ, вов заджиля дэ цэр тай дыкхля, со котэ стидэняпэ бут манушэн.

28 Тай пхэнда лэнди:

— Тумэ еджинэ джянэн, со иудеести нащи тэ авэ амалэга наиудеенгэрэ манушэга тай тэ заджа лэстэ дэ цэр. Нэ Дэвэл сикавда манди: нащи тэ дэдумэ ни пала савэ манушэ, со вов магрисардо чи нажужо.

29 Колэсти, кала пала ман авиле, мэ джилём и нисо на пхэнаvas. Кана мэ камав тумэндар тэ пхуче: пэ со тумэ бичалдэ пала ман?

30 Корнилии пхэнда:

— Штар дивэ павпалэ, дэ кадыя вряма, паша трин чясурия дэ дивэ, мэ манглёмпэ дэ пэхкоро цэр. Тай англа ман ачила мануш дэ їда, сави сар яг пхаболас.

31 «Корнилии, — пхэнда вов, — тиро мангимо ушундо, тай лачимо, саво ту терэх, срапирда Дэвэл.

³² Бичал манушэн дэ Яффа пала Симоно, савэ инте акхарэн Пётро. Вов екхатар джювэл дэ цэр паша море, Симоностэ, саво выгерэл морця».

³³ Мэ сиво бичалдом пала тут, тай ту мишто тердан, со авилян. Екхатар амэ всавэрэ катэ, англа Дэвлэ, и камах тэ шунэ кода, со Рай прыпхэнда тути тэ пхэнэ.

³⁴ Пётро ачиля тэ дэдүмэ:

— Кана мэ полав, со Дэвэл на дыкхэл пэ муй манушэккоро,

³⁵ нэ дэ всавэрэн манушэнгэрэн родонэн Лэсти чялёл кодэва, ко дарал Лэстар и терэл чячимо!

³⁶ Вов бичалда Израилёхкэрэ родости Бахтало Лав пала кода, со Иусо Христосо, Саво исин Рай всавэрэ манушэндэ, слиджял амэн Дэвлэга.

³⁷ Түмэ джянэн пала кода, со тердапэ пав сваири Иудея, майанглал Галилеятар и пала кодэлэ, сар Иоанно прыакхарэлас манушэн тэ болдэпэ.

³⁸ Дэвэл помакхля Свэнтонэ Фанога тай зорага Иусо Назаретостар тай Вов пхирэлас, терэлас лаче рындурия и састярэлас всавэрэн, ко сля дэ копылен барэ бэнгэстэ, колэсти со Лэга сля Дэвэл.

³⁹ Амэ — допхэнимаря пала кода, со терэлас Иусо дэ иудеенгири пхув тай дэ Ерусалимо. Лэ амблавдэ пэ каштунэ трушулэ тай умардэ,

⁴⁰ нэ Дэвэл пэ трито диво отджювдярда Лэ и дэня, соб Вов тэ сикавэлпэ манушэнди, —

⁴¹ на всавэрэнди, нэ амэнди, допхэнимаренди, ка майанглал выгидэня Дэвэл. Тай амэ хале и пиле Лэга пала колэ, сар Вов отджювдиня мулэндар.

⁴² Вов прыпхэнда, соб амэ тэ розпхэнах манушэнди тай тэ авах допхэнимаря, со Вов исин Кодэва, Ка выгидэня Дэвэл тэ сундисарэ джювдэн тай мулэн.

⁴³ Пала Лэ допхэнэн всавэрэ англунаря, кала дэдүмэн, со кожно мануш, саво патял дэ Лэ, фирисарэлапэ бэзимастар важ Лэхкоро лав.

⁴⁴ Кала Пётро инте дэдүмэлас пала кода, пэ всавэрэн, ко шунда лэхкэрэ лава, сджия Свэнто Фано.

⁴⁵ Патякунэ иудея, савэ авиле Петрога, дэнаспэ дыво, со Дэвэл бичалда Свэнто Фано дэ даро кади ж и наиудеенди,

⁴⁶ колэсти со вонэ шундэ, сар кодэла дэдүмэнас пэ аврэн чибэн и ашарэнас Дэвлэ. Тунчи Пётро пхэнда:

⁴⁷ — Ко на дэла тэ болдэпэ панега кадэлэ манушэнди, савэ прылиле Свэнто Фано кади ж, сар и амэ?

⁴⁸ И вов прыпхэнда лэнди тэ болдэпэ важ Иусохкоро Христокоро лав. Тунчи хулая мангле Петро, соб тэ ачелпэ лэнца пэ набут дивэн.

11

Пётро дэдүмэл дэ Ерусалимо

¹ Апостолурия тай пхрала, савэ джювдэ дэ Иудея, шундэ, со кади ж и наиудея прылиле Дэвлэхкоро лав.

² Колэсти, кала Пётро авиля дэ Ерусалимо, патякунэ иудея ачиле тэ выпхэнэ лэсти:

³ — Ту пхирдан наобчиндэ манушэндэ и халян лэнца, — пхэнэнас вонэ.

⁴ Тунчи Пётро ачиля тэ розпхэнэ лэнди вса, со сля майанглал и пала кодэлэ.

⁵ — Мэ слём дэ форо Яффа тай манглёмпэ, — пхэнда вов, — и дэ кадья вряма мандэ сля дыкхлимо: кода, со сля поджило пэ бари цэрга, сави пала штар рига обмукэласпэ болыбнастар ворга пордэ, тев мэ слём.

⁶ Мэ подыкхлём андрал тай удыкхлём штарэпурэнгоро ското, сапэн тай болыбнахкэрэн чириклен.

⁷ Тунчи мэ шундом гласо, саво дэдүмэлас манди: «Пётро, вщи, чин тай ха!»

8 Мэ пхэндом: «Нат, Рае! Ни пала со! Мэ никала на халём кода, со исин маґрисардо тай нажужо».

9 Гласо большнастар пхэнда манди авэр моло: «На акхар маґрисардэга кода, со Дэвэл жуужарда».

10 Кади сля тривар, и тунчи цэрга сля подлители дэ большбэн.

11 Дэ кодыя ж вряма паша цэр, дэ саво мэ слём, пашыле трин мануша, бичалдэ мандэ Кесариятар.

12 Фано прыпхэнда манди тэ джяв лэнца и тэ на розпхучяв ни пала со. Акэ кадэла шов пхрала кади ж джиле манца, тай амэ авиле дэ цэр кодэлэстэ, ко ман акхарда.

13 Вов розпхэнда амэнди пала кода, сар дыкхля пэстэ ангело. Ангело пхэнда лэсти: «Бичал манушэн дэ Яффа пала Симоно, савэ инте акхарэн Пётро,

14 и вов розпхэнэла, сар тэ фирисарэпэ туту и всавэрэ тирэ цэрэсти».

15 Кала мэ ачилём тэ дэдумэ, пэ лэндэ сджила Свэнто Фано, кади, сар Вов сджила англэ и пэ амэн.

16 Тунчи мэ срапердом лава Раехкэрэ: «Иоанно болдэня панегэ, а тумэ авэна болдэ Свэнтонэ Фанога».

17 Колэсти, кала Дэвэл дэня лэнди кацаво даро, сар и амэнди, савэ патине Раести Исусости Христости, ко ж мэ кацаво, соб тэ запхэнэ Дэвлэсти?

18 Кала вонэ вышундэ када, тунчи пэрэачиле тэ розпхуче тай ваздэне патив Дэвлэсти. Тай дэдумэнас:

— Выджял кади, со Дэвэл дэня и наидуенди тэ уджян бэзимастар тай тэ лэн джювимо!

Кхандири дэ Антиохия

19 Патякунэ, савэ розджилепэ, кала лэн ачиле тэ традэ пала кодэлэ, сар муля Стефано, проджиле Финикия, Кипро тай Антиохия, нэ розпхэнэнас Лав кацик иудеенди.

20 Нэ койсавэ лэндар, савэ сле Кипростар тай дэ Киренятар, авиле дэ Антиохия тай ачиле тэ розпхэнэ Бахтало Лав пала Рае Исусо эллинистонэнди.

21 Раехкоро васт сля лэнца, и бут манушэн патине тай обрисардэпэ Раестэ.

22 Дума пала кода доджила кхандирятэ дэ Ерусалимо. Котарь бичалдэ дэ Антиохия Варнава.

23 Кала Варнава авиля тай удыхля Дэвлэхкоро мищимо, вов лошыля тай умангэлас всавэрэн, соб тэ аченпэ дэ патявима Раести.

24 Варнава сля лачё мануш, пхэрдо Свэнтонэ Фанога тай патявимага. Тай фартэ бут манушэн ачиле тэ патя Раести.

25 Тунчи Варнава джила дэ Тарсо, соб тэ аракхэ котэ Савло.

26 И кала аракхля лэ, тунчи анда дэ Антиохия. Састо бэрш вонэ аченаспэ дэ антиохийско кхандири тай сиклярэнас бутэн манушэн. Дэ Антиохия сиклярэнэн дэ перво моло ачиле тэ акхарэ «христиануря».

27 Дэ кадья вряма Ерусалимостар дэ Антиохия авиле койсавэ ангунаря.

28 Екх лэндар, савэ акхарэнас Агаво, вщиля тай Фанога пропхэнда, со пав сваири пхув авэла бари бокх. Кади и тердапэ, кала Клавдии сля императоро.

29 Колэсти сиклярнэ допхэндэпэ, со кожно лэндар дэла пэхкэрэ хулаимастар скици исин, тэ подрицарэ пхралэн дэ Иудея.

30 Кади вонэ и тердэ. Тай бичалдэ Варнава тай Савло тэ отлиджя ловэ, савэ вонэ стидэне, и тэ отдэ лэн пхурэдэрэнди.

1 Тевсь дэ кадья вряма тхагари Иродо спхангля койсавэн манушэн кхандирятар, соб тэ терэ лэнди бибахт.

2 Вов прыпхэнда тэ умарэ чюряга Иоаннохкэрэ пхралэ, Иаково.

3 Кала вов удыхля, со када чялила иудеенди, тунчи прыпхэнда тэ пхэндэ и Петро. Када сля пэ сырботори, саво акхарэлпэ Биквасно мандро.

4 Петро пхангле, чутэ дэ барунэ и тховдэ дэшушов халавдэн, по штар мануша дэ череда. Иродо камля тэ вылиджя Петро манушэндэ, кала проджяла Патради.

5 Петро сля дэ барунэ, а кхандири фартэ мангляпэ пала лэ Дэвлэсти.

6 Рятяга, англа колэ, сар Иродо камля тэ вылиджя лэ пэ сындо, Пётро совэлас машкар дон халавдэн тай сля спхангло донца ланчугонэнца, а халавдэ паша вударэн прыдыкхэнас пала барунэ.

7 Тай акэ, авиля ангело Раехкоро, тай дэ барунэ запхабиляпэ душлимо. Ангело малавда Петро дэ рига тай джюнгавда лэ.

— Вщи сигэдэр! — пхэнда вов, тай ланчугурия тэлэдэне Петрохкэрэ вастэндар.

8 Тунчи ангело пхэнда:

— Подпхандэпэ кущикага тай уряв цыруля.

Пётро терда када.

— Уряв упралуни їда и джя пала ман, — пхэнда ангело.

9 Пётро выджиля пала ангело барунэстар тай на полэлас, со ангело терэл вса пав чячима. Вов думисарэлас, со када дыкхлимо.

10 Вонэ проджиле англунэн халавдэн, тунчи — аврэн тай поджиле саструнэ вударэндэ, савэндар выджянас дэ форо. Вудара еджинэ оттердэпэ англа лэн, тай вонэ выджили. Вонэ проджиле екх гаса, тай акэ, ангело уджиля.

11 Кала Пётро авиля дэ пэстэ, вов пхэнда:

— Кана мэ чяче джянав, со Рай бичалда пэхкэрэ ангело и фирисарда ман Иродохкэрэ вастэстар и кодэлэ бибахталимастар, саво камле тэ терэ манди иудеенгерэ мануша.

12 Кала Пётро полиля, со тердапэ, вов джиля цэрэстэ, тев джювда Мария, дэй Иоаннохкири, савэ инте акхарэнас Марко. Котэ бут манушэн стидэнепэ тэ мангэпэ.

13 Пётро помарда дэ вударэн, тай лэстэ выджиля бутярни, савя акхарэнас Роза.

14 Вой уджянгля Петро пав гласо тай лошатар бистарда тэ оттерэ вудара. Тунчи вой прастэня павпалэ, соб тэ пхэнэ, со Пётро ачел паша вударэн.

15 — Ту на дэ пэхкиря годя! — пхэндэ лати.

Нэ вой на пэрэачелас лэнди тэ допхэнэ.

— Када лэхкоро ангело! — дэдумане вонэ.

16 Пётро вса ж марэлас дэ вударэн, и кала вонэ оттердэ вудара и удыххле лэ, тунчи дэнепэ дыво.

17 Пётро сикавда лэнди вастэга, соб вонэ тэ заачен мулком, тай розпхэнда, сар Рай вылиджялда лэ барунэстар.

— Розпхэнэн пала кода Иаковости и аврэ пхралэнди, — дэдуманя вов лэнди тай уджиля котарь дэ авэр тхан.

18 Дэнзор халавдэ ачиле тэ прастэ пордэ котарь, и нико на джангля, со тердапэ Петрога.

19 Иродо родэлас лэ тай на аракхля, колэсти допхучля халавдэн тай прэдэня лэн мэримасти. Тунчи Иродо лагля Иудеятар дэ Кесария тай ачеласпэ котэ набут вряма.

Иродохкоро мэримо

20 Иродо ж фартэ мижыля пэ манушэн, савэ джювдэ дэ Тиро тай Сидоно. Кодэла ж допхэндэпэ машкар пэстэ, авиле Иродостэ тай помангле Бласто, саво прыдыкхэлас пала тхагарехкири цэра, соб вов тэ подрицарэл лэн. Тунчи мангле

тхагаре, соб тэ на рицарэл холи пэ лэн, колэсти со лэнгири пхув парварэласпэ тхагарехкиря пхуятар.

²¹ Дэ екх диво, саво вов вытидэня, Иродо урявда тхагаримахкири їда, бэшля пэ сундисарехкоро тхан и ачילה тэ дэдумэ манушэндэ.

²² Мануша затиписиле:

— Када гласо дэвликуно, а на манушыкано!

²³ Нэ дэ кодья ж вряма ангело Раехкоро малавда Иродо, колэсти со вов на вадэня лашаримо Дэвлэсти, тай цэрмэ захале лэ, и вов муля.

²⁴ Лав Дэвлэхкоро роздзяласпэ дурэдэр тай дурэдэр.

²⁵ Варнава ж тай Савло стердэ пэхкоро рындо тай рисиле дэ Ерусалимо. Пэгэ вонэ лиле Иоанно, савэ инте акхарэнас Марко.

13

Варнава тай Савло бичалдэ пэ бутя

¹ Дэ антиохийско кхандири сле англунаря тай сикляримаря: Варнава, Симеоно, савэ инте акхарэнас «Нигеро», киренейнино Луции, Манаино, саво бариля їтханэ тетрархога Иродога, тай Савло.

² Екхвар, кала вонэ тэлэнас Раести и рицарэнас посто, Свэнтэ Фано пхэнда:

— Отгховэн Манди Варнава тай Савло важ рындо, ды савэ Мэ лэн прыакхардом.

³ Тай вонэ, кала проджиле посто и мангимо, тховдэ пэ лэн васта и отмукле лэн.

Савло тай Варнава пхэнэн лав пэ Кипро

⁴ Кадэла дуй, савэ сле бичалдэ Свэнтонэ Фанога, джиле дэ Селевкия, а котарь лагле пав пане пэ Кипро.

⁵ Вонэ авиле дэ Саламино и котэ пхэнэнас Дэвлэхкоро лав дэ иудеенгерэ синагоги. Иоанно сля лэнца тай дэлас лэнди зор.

⁶ Вонэ облагле всаворо острово тай авиле дэ Пафосо. Котэ вонэ удыхкле екхэ иуде, пав лавэ Вар-Исусо, саво сля джянимари тай хохавно англунари.

⁷ Вов сля пашэ римско проконсуло пав лавэ Сергии Павло, манушэ баря годяга. Проконсуло камля тэ пошунэ Дэвлэхкоро лав тай акхарда пэстэ Варнава и Савло.

⁸ Нэ кадэва Вар-Исусо, савэ инте акхарэнас Элима, (пав аврэ «джянимари»), камля тэ терэ лэнди бибахт тай тэ отмарэ пхурэдэрэ патявимастар.

⁹ Тунчи Савло, вов же Павло, пхэрдила Свэнтонэ Фанога, вхалепэ дэ Элима яххэнца

¹⁰ тай пхэнда:

— Чяво барэ бэнгэхкоро, врыжымашо всавэрэ чячимаста, пхэрдо хохавимага тай хрантимага! Кала ту пэрэачега тэ выбандярэ чячюно Раехкоро дром?

¹¹ Акэ, екхатар васт Раехкоро вадзэняпэ пэ тут! Ту авэга коро и савись вряма на дыкхэга душлимо кхамэхкоро!

Тунчи сджиле пэр лэстэ рят тай калимо, тай вов ачילה тэ чувэпэ дэ всавэрэн ригэн и тэ родэ кодэлэ, ко лиджяла лэ пала васт.

¹² Кала проконсуло удыххля, со тердапэ, вов патиня, колэсти со дэняпэ дыво сикляримаста пала Дэвлэ.

Бути дэ писидийско Антиохия

¹³ Павло и кодэла, ко сле лэга, отджиле пав пане Пафосостар тай авиле дэ Перга, сави сля дэ Памфилия. Котэ Иоанно ачявда лэн и рисиле дэ Ерусалимо.

¹⁴ Пергатар вонэ лагле дурэдэр дэ писидийско Антиохия. Дэ суббота вонэ авиле дэ синагога тай бэшле котэ.

¹⁵ Пала колэ, сар продиндэ Упхэнимастар и Англунарендар, пхурэдэра дэ синагога пхэндэ лэнди:

— Пхралалэ, сар исин тумэндэ лав, соб тэ подрицарэ манушэн, тунчи дэдумэн.

16 Павло вщиля, подлиля васт и пхэнда:

— Мурша израильтянуря и всавэрэ, ко даран Дэвлэстар, шунэн ман!

17 Дэвэл Израилёхкэрэн манушэн вытидэня дадэн амарэн. Вов ваздэня манушэн, кала вонэ сле дэ Египто, и зоралэ вастэга вылиджялда лэн котарь.

18 Саранда бэрш Вов прыдыкхэлас пала лэн дэ шуки пхув.

19 Вов прэдэня мэримасти дэ Ханаано эфта манушэнгэрэн родонэн и отдэня лэнгири пхув амарэ дадэнди.

20 Кади проджиля пашэ штар шэла пандэша бэрш. Ды колэ, сар авиля англунари Самуило, Дэвэл дэлас лэнди сундисарен.

21 Тунчи мануша помангле тхагаре, тай Дэвэл дэня лэнди Сауло, Кишохкэрэ чявэ, Вениаминохкорэ родостар. Сауло сля тхагарега саранда бэрш.

22 Тунчи Дэвэл залиля тхагаримо Саулостар тай терда тхагарега Давидо. Вов допхэнэлас пала лэ: «Мэ аракхлём Давидо, Иессеехкэрэ чявэ, кадэва мануш Манди пав йлэ, вов терэла вса, со Мэ камав».

23 Давидохкэрэ родостар Дэвэл дэня Израилёхкэрэ Фирисаре — Исусо, сар и дэлас лав пала кода.

24 Англа колэ, сар авиля Исусо, Иоанно пхэнэлас всавэрэ Израилёхкэрэ манушэнди, со трэбуни тэ ачявэ бэзимо тай тэ болдэпэ.

25 Кала ж Иоаннохкири бути проджялас, вов пхэнэлас: «Пала ка тумэ ман прылэн? Мэ на Вов. Нэ пала ман джял Кодэва, Касти мэ на ачяв тэ розпхандэ доря пэ цыруля».

26 Пхралалэ! Чяворэ Авраамохкэрэ и кодэла тумэндар, савэ даран Дэвлэстар! Кадэва лав фирисаримахкоро сля бичалдо амэндэ!

27 Кодэла, савэ джювэн дэ Ерусалимо тай лэнгэрэ пхурэдэра на уджянгле Фирисаре. Вонэ сундисардэ Лэ и кади тердэ пав англунаренгэрэн лавэн, савэ динэн кожно суббота.

28 Вонэ на аракхле дэ Лэ нисави дош, пала со Лэ трэбуни сля тэ умарэ, нэ умангле Пилато, соб тэ прэдэ Лэ мэримасти.

29 Кала вонэ стердэ вса, со сля пала Лэ искриисардо, вонэ слиле Лэ каштунэ трушулэстар тай тховдэ дэ склепо.

30 Нэ Дэвэл отджювдярда Лэ мулэндар,

31 и бут дивэн кодэла, савэ авиле Лэга Галилеятар дэ Ерусалимо, дыкхэнас Лэ. Тай екхатар вонэ Лэхкэрэ допхэнимаря англа манушэн.

32 И амэ кади ж дэдумах кадэва Бахтало Лав: кода, пала со Дэвэл пхэнэлас амарэ дадэнди,

33 Вов терда важ амэн, лэнгэрэ чяворэн, кала отджювдярда Исусо. Дэ авэр псалмо искриисардо:

«Ту — Чяво Муро,

авдивэ Мэ ачилём Тирэ Дадэга».

34 Тай пала кода, со Дэвэл отджювдярда Лэ мулэндар, кади, со трупо Лэхкоро на прахола, Вов пхэнда:

«Мэ дава тумэнди свэнто Давидохкоро бахталимо, саво на парувэлапэ».

35 Тай дэ авэр тхан Вов дэдумэл:

«Ту на дэга, соб Свэнто Тиро тэ лэлпэ прахога».

36 Давидо дэ пэхкири вряма терэлас бути пав воля Дэвлэхкири. Тунчи вов муля, лэ прахосардэ лэхкэрэ дадэнца, тай трупо лэхкоро лиляпэ прахога.

37 Нэ Кодэва, Ка Дэвэл отджювдярда, прахога на лиляпэ.

38 Калэсти, пхралалэ, джянэн: чэрэз Лэстэ Дэвэл отмукул тумэнди бэзимо.

39 И сар тумэндэ на сля зор тэ ачявэ бэзимо пав Моисеехкэрэ Упхэнима, кожно ко патяла дэ Лэстэ, ачявэла пэхкоро бэзимо.

40 Дыкхэн, соб тумэнца тэ на терэлпэ кода, пала со дэдүмэнас англунаря:

41 «Подыкхэн, асамаря,
дэнпэ дывости и хасявэн!

Мэ терава дэ тумарэн дивэн кацаво рындо,
со тумэ никала б на патине,
кала б тумэнди розпхэндэ пала кода».

42 Кала Павло тай Варнава джянас котарь, лэн помангле тэ дэдүмэ пала кода дэ авэр суббота.

43 Мануша розджилепэ, нэ бут иудея тай пативалэ, савэ прылиле иудеенгоро сиклярино, джиле пала Павло тай Варнава. Вонэ дэдүманэ лэнца тай умангэнас лэн тэ джювэ пав Дэвлэхкоро мищимо.

44 Дэ авэр суббота гроза манушэн кодэлэ форостар стидэняпэ, соб тэ шунэ лав Раехкоро.

45 Кала иудея удыхкле скацик манушэн, вонэ мижыле тай ачиле намишто тэ дэдүмэ пала Павлохкэрэн лавэн тай тэ кошэ Павло.

46 Тунчи Павло тай Варнава пхэндэ лэнди ворта:
— Лав Дэвлэхкоро трэбуни сля англал всавэрэстар тэ дэдүмэ тумэнди. Нэ кала тумэ отпхэнэнпэ лэстар, тай на бинэн, со вечно джювимо исин важ тумэн, амэ джых наиудеенгэрэ манушэндэ,

47 сар и прыпхэнда амэнди Рай:

«Мэ тердом Тут душлимага важ всаворо манушыкано родо,
тэ авэн фирисардэ Тутар пав всавири люмля».

48 Кала наиудея шундэ када, вонэ сле лошалэ тай лашарэнас Рае пала Лэхкэрэ лавэ. Тай патине всавэрэ, савэ сле вытидэне вечно джювимастэ.

49 Раехкоро лав розджиляпэ пав всавири кодья пхув.

50 Иудея ж подмардэ пативалэн джювлен барвалэ їрендар тай форохкэрэн пхурэдэрэн. Тай всавэрэ вонэ ачиле тэ традэ Павло и Варнава и вытрадэне лэн пэхкиря пхуятар.

51 Тунчи вонэ обмардэ прахо пэхкэрэ пурэндар тай джиле дэ Иконии.

52 А сиклярнэ пхэрдэнас лошага тай Свэнтонэ Фаного.

14

Дэ Иконии

1 Дэ Иконии Павло тай Варнава їтханэ заджиле дэ иудеенгири синагога тай дэдүманэ кади, со патине фартэ бут иудеен тай греконэн.

2 Ай иудея, савэ отпхэндэпэ лэнди тэ патя, ваздэне тай мижардэ пэ пхралэн наиудеен.

3 Нэ вса ж Павло тай Варнава сле котэ бут вряма. Вонэ бидаракоро дэдүманэ пала Рае, Саво допхэнэлас лав пала Лэхкоро мищимо и дэлас лэнди зор тэ терэ допхэнимо тай дывурия.

4 Кодэла, ко джювэнас дэ форо, розмардэпэ по епаш. Екх мануша подрицарэнас иудеен, ай авэр — апостолонэн.

5 Нэ кала наиудея тай иудея їтханэ пэхкэрэ пхурэдэрэнца закамле тэ прытховэ зор тай тэ помарэ лэн барэнца,

6 вонэ уджянгле пала кода, нашле тай проджиле пхув Ликаония, форуля Листра тай Дервия и пхуя, савэ сле пашэ лэн,

7 теv дурэдэр розпхэнэнас Бахтало Лав.

Бути дэ Листра

8 Дэ Листра джювда бизоракоро мануш, саво пэхкэрэ бэнимастар на пхирэлас пурэнца. Екхвар, кала вов бэшэлас,

⁹ вов шунда Павлохкоро лав. Павло же подыкхля пэр лэстэ тай полиля, со лэстэ исин патявимо, соб тэ састярэпэ.

¹⁰ — Вщи пэ тирэ пурэ тай пхир! — зоралэ гласога пхэнда Павло.

Кодэва всхукля тай ачиля тэ пхирэ.

¹¹ Мануша удыххле, со терда Павло тай типисиле пав ликаонско чиб:

— Амэндэ сджиле дэвэла, поджилэ пэ манушэн!

¹² Вонэ пхэнэнас пэ Варнава «Зевсо», а пэ Павло — «Гермесо», колэсти со вов будэр дэдумэлас.

¹³ Англа форо сля храмо, тев тэлэнас Зевсости, тай лэхкоро рашай анда форохкэрэ вударэндэ гурувэн тай винци, колэсти со камля йтханэ манушэнца тэ анэ лэнди жэртва.

¹⁴ Кала апостолурия Павло тай Варнава ушундэ пала кода, вонэ розчиндэ пэхкири йда, чутэпэ машкар манушэн тай ачиле тэ типисявэ:

¹⁵ — Муршалэ, со тумэ терэн? Амэ — кацавэ ж мануша, сар и тумэ! Амэ андэ тумэнди Бахтало Лав тай камах, соб тумэ тэ отпхэнэнпэ хохавнэ дэвлэндар и обрисиле джювдэ Дэвлэстэ, Саво стерда болыбэн, пхув, море и вса, со дэ лэн исин.

¹⁶ Дэ думутни вряма Вов помукэлас всавэрэ манушэнгэрэ родонэнди тэ пхирэ лэнгэрэ дромэнца,

¹⁷ нэ на пэрэачелас тэ допхэнэ пала Пэ, кала терэлас мищимо тай бичалэлас тумэнди брышынд болыбнастар и вряма тэ стидэ плодуря, кала дэлас тумэнди хамо тай пхэрдярэлас тумарэ йлэ лошага.

¹⁸ Тай кацик кадэлэ лавэнца вонэ допхэндэ манушэнди, соб важ лэн тэ на анэн жэртва.

¹⁹ Иудея, савэ авиле Антиохиятар тай Икониестар, пэрэцырдэне гроза манушэн пэ пэхкири риг. Павло помардэ барэнца тай выцырдэне пала форо. Вонэ думисардэ, со вов муля.

²⁰ Нэ кала сиклярнэ стидэнепэ паша лэ, вов ущиля тай упалэ джиля дэ форо. Пэ авэр диво вов тай Варнава джиле дэ Дервия.

Апостолурия рисявен дэ сирийско Антиохия

²¹ Вонэ дэдумане Бахтало Лав дэ кадэва форо тай тердэ сиклярнэнца бут манушэн. Тунчи вонэ упалэ проджиле Листра, Иконии тай Антиохия.

²² Котэ вонэ подрицарэнас сиклярнэнгоро фано тай прыакхарэнас, соб кодэла тэ аченпэ дэ патявима.

— Англа колэ, сар тэ заджа дэ Дэвлэхкоро Тхагаримо, амэнди трэбуни тэ прылэ бут грыжа, — пхэнэнас вонэ.

²³ Павло тай Варнава дэ кожно кхандири возтховэнас васта пэ манушэн тай терэнас лэндар пхурэдэрэн. Тунчи лиле посто тай поманглепэ, и пэрэдэне лэн Раести, дэ Савэ вонэ упатине.

²⁴ Тунчи вонэ проджиле Писидия тай авиле дэ Памфилия.

²⁵ Кала ж вонэ пхэндэ лав дэ Перга, котарь авиле дэ Атталия.

²⁶ Котарь вонэ лагле пав пане дэ Антиохия, тев, пав Дэвлэхкоро мищимо, лэн майанглал вытидэне пэ бути, сави вонэ и тердэ.

²⁷ А кала вонэ авиле дэ Антиохия, тунчи стидэне кхандири тай розпхэндэ пала вса, со Дэвэл терда лэнгэрэ вастэнца, и сар Вов оттерда вудара патявимаствэ наиудеэнди.

²⁸ Тай бут вряма просле котэ йтханэ сиклярнэнца.

15

Кхандирякэрэ пхурэдэра стидэнпэ дэ Ерусалимо

¹ Иудеятар дэ Антиохия авиле мануша, савэ ачиле тэ сиклярэ пхралэн:

— Кала тумэ на авэна тэ обчинэпэ пав прыпхэнима Моисеехкэрэ, тумэ на фирисарэнапэ.

² Павло и Варнава бут молы допхэнэнас лэнди тай вджянас дэ бари дума. Тунчи Павлости и Варнаvasti прыпхэндэ тэ джя дэ Ерусалимо їтханэ койсавэ авэр патьякунэ манушэнца тай тэ обдэдүмэ кадэва рындо апостолонэнца и пхурэдэрэнца.

³ Кхандири пролиджялда лэн, тай вонэ джиле пав Финикия и Самария тай розпхэнэнас котэ, сар наиудея обрисиле Дэвлэстэ. Кадэлэсти фартэ лошылле всавэрэ патьякунэ мануша.

⁴ Дэ Ерусалимо лэн прылиле кхандири, апостолурия тай пхэрэдэра, а вонэ розпхэнца пала вса, со Дэвэл терда лэнгэрэ вастэнца.

⁵ Нэ патьякунэ, савэ сле фарисеенгэрэ стидэмастар, пхэнэнас, со наиудеен трэбуни тэ обчинэ тай тэ прыпхэнэ лэнди, соб тэ джювэн вонэ пав Моисеехкэрэ Упхэнима.

⁶ Апостолурия тай пхурэдэра стидэнепэ, соб тэ мишто роздыхкэ кадья дума.

⁷ Вонэ лунго вряма дэдүмэнас пала кода, тунчи Пётро вциля тай подэня пэхкоро гласо:

— Пхралалэ, сар тумэ джянэн, проджиля бут вряма кодэлэ дивэстар, кала Дэвэл вытидэня всавэрэндар амэндар ман, соб тэ розпхэнав Бахтало Лав наиудеенди, и соб вонэ тэ патян.

⁸ Дэвэл джянэл їлэ манушэнгэрэ, тай Вов дэня допхэнимо, со прылэл и наиудеен, кала бичалда лэнди Свэнто Фано кади ж, сар и амэнди.

⁹ Вов на думисарэл, со амэ фэдэр лэндар, колэсти со патявимага жужарда лэнгэрэ їлэ!

¹⁰ Сости ж тумэ зумавэн Дэвлэ и тховэн пэ кор сиклярнэнди гамо, тэ лиджя саво на сля зора и амарэ дадэндэ и амэндэ?

¹¹ Амэ патях дэ колэ, со прылах фирисаримо пав мищимо Рае Исусохкоро, кади ж, сар и вонэ.

¹² Тунчи всавэрэ прыачиле мулком тай ачиле тэ шунэ, сар Варнава и Павло розпхэнэн пала допхэнима тай дывурия, савэ Дэвэл терэлэс лэнгэрэ вастэнца машкар наиудеен.

¹³ Кала вонэ вса розпхэндэ, Иаково пхэнца:

— Пхралалэ, пошунэн ман!

¹⁴ Симоно екхатар розпхэнца амэнди, сар Дэвэл перво моло авиля наиудеендэ, соб тэ вытидэ лэндар кодэлэн, ко лашарэла Лэхкоро лав.

¹⁵ И кадэлэстэ подлиджянас англунаря, кала пхэнэнас:

¹⁶ «Тунчи Мэ рисявава
тай подваздава катуна Давидохкири, сави тэлэдэня.

Вса стерава упалэ, со розпхагялпэ,
вортасавава ла,

¹⁷ соб авэр мануша

тай всавэрэ манушэнгэрэ родуля,
савэ акхарэнаспэ Мурэ Лавэга,
ачиле тэ родэ Рае.

Кади пхэнэл Рай, Саво терэл вса откада,

¹⁸ со джянэл англунимастар».

¹⁹ Колэсти мэ думисарав, со амэнди на трэбуни тэ тховэ пхаримо пэ наиудеен, савэ обрисывэн Дэвлэстэ.

20 Нэ трэбуни тэ искриисарэ лэнди лил, соб вонэ на тэ магрисарэнпэ стердэ дэвлорэндар, тэ на терэн биладжявимо їрестар, тэ на хан мас затасавдэ хулаимастар тай тэ на пэн рат.*

21 Колэсти со Упхэнимо Моисеехкоро англунэ родостар розпхэнэн тай динэн кожно суббота дэ всавэрэ синагоги пав всавэрэн форонэн.

Лил науудеендэ

22 Тунчи апостолурия тай пхурэдэра їтханэ всавиря кхандиряга прылиле дэ гындо тэ выгидэ манушэн, тай тэ бичалэ лэн дэ Антиохия Павлога и Варнавага. Вонэ выгидэне Иуда, савэ инте акхарэнас Вар-Савва, тай Сила. Кадэла сле пхурэдэра машкар пхралэн.

23 Лэнца пэрэдэне кацаво лил:

«Пхрала апостолурия тай пхурэдэра, пхралэнди науудеендар, савэ джювэн дэ Антиохия, Сирия тай Киликия. Тэ авэн бахталэ!»

24 Сар доджия амэндэ дума, со койсавэ амэндар змардэ тумэн годятар пэхкэрэ лавэнца и тховдэ калимо дэ тумарэн їлэн, нэ амэ на пхэнагас лэнди тэ терэ кади.

25 Колэсти амэ прылиле дэ гындо тэ выгидэ койсавэн мурушэн тай бичалдэ лэн тумэндэ їтханэ амарэ пативалэнца Варнавага тай Павлога,

26 савэ отдэн пэхкоро джювимо важ Лав амарэ Рае Иусо Христо.

27 Амэ бичалах тумэнди кади ж Иуда тай Сила, соб вонэ розпхэндэ тумэнди кода, со амэ искриисарах.

28 Свэнто Фано тай амэ прылиле дэ гындо, соб тэ на тховах пэ тумэн нисаво пхаримо, кацик откада, со трэбуни:

29 Тэ на хан кода, со андэ дэ жэртва стердэ дэвлорэнди и мас затасавдэ хулаимастар, тэ на пэн рат, тэ на терэн биладжявимо їрестар. Сар авэна када тэ терэ, терэна мишто.

Тэ авэн састэ!»

30 Бичалдэ джиле дэ Антиохия. Котэ вонэ стидэне кхандири тай пэрэдэне лил.

31 Мануша динэнас лэ тай лошавэнас подрицаримасте.

32 Иуда тай Сила, савэ сле ангунаря, кади ж подрицарэнас пхралэн пэхкэрэ лавэнца дэ патявима.

33-34 Вонэ сле котэ койсави вяма тай пхрала бахтага отмукле лэн кодэлэндэ, ко лэн бичалда.†

35 Павло тай Варнава ачилепэ дэ Антиохия, тев вонэ аврэ бутэ пхралэнца сиклярэнас Раехкэрэ лавэсти тай розпхэнэнас Бахтало Лав.

Павло тай Варнава розджянпэ

36 Проджила набут вяма, тай Павло пхэнда Варнавасти: — Заджяга пхралэндэ дэ всавэрэн форонэн, тев амэ дэдумане Раехкоро лав, тай подыкхага, сар вонэ джювэн.

37 Варнава камля тэ лэ пэга Иоанно, савэ инте акхарэнас Марко.

38 Нэ Павло прылила дэ гындо, со на трэбуни тэ лэ кодэлэ, ко ачявда лэн дэ Памфилия тай на терэлас лэнца бути.

39 Вонэ нисар на допхэндэпэ машкар пэстэ, колэсти розджилепэ. Варнава лила Марко и вонэ лагле пав пане пэ Кипро.

40 Ай Павло выгидэня Сила, и, кала пхрала прэдэне лэн Раехкэрэ мицимасти, джила дэ дром.

41 Тунчи вов проджялас Сирия тай Киликия, тев подрицарэлас кхандиря дэ патявима.

* **15:20** Дэ койсавэ пуранэ греческа манускрипты исин инте кацавэ лава: «Тай соб тэ на терэн аврэнди кода, со на камэн пэсти». † **15:33-34** Дэ койсавэ пуранэ греческа манускрипты исин инте кацавэ лава: «Сила закамля тэ ачепэ котэ, нэ Иуда рисила дэ Ерусалимо».

16

Тимофеи заджял дэ бутя Павлога тай Силага

¹ Тунчи Павло авиля дэ Листра тай дэ Дервия. Котэ джювда сиклярно, савэ ахкарэнас Тимофеи. Лэхкири дэй сля патякуни иудеянка, ай дад сля греко.

² Пала Тимофее мишто дэдумане пхрала дэ Листра тай дэ Иконии.

³ Павло закамля тэ лэ Тимофее дэ пэхкоро дром. Тай важ иудеен, савэ джювдэ дэ кодэлэн тханэн, обчинда лэ. Важ кода, со всавэрэ джянгле: Тимофеехкоро дад исин греко.

⁴ Кала Павло тай мануша, савэ сле лэга, пэрэджнянас форо форостар, вонэ прыаххарэнас патякунэн тэ терэ кади, сар пэрэдэне апостолурия тай пхурэдэра Ерусалимостар.

⁵ Кхандирия састёнас дэ патявима, тай патякунэн диво дивэстар ачелас будэр.

Павло дыкхэл манушэ Македониятар

⁶ Вонэ проджнянас пав Фригия тай Галатиякири пхув, нэ Свэнто Фано на домукля лэн тэ пхэнэ лав дэ Цыкни Азия.

⁷ Вонэ поджиле Мисиятэ и камле тэ джя дэ Вифиния, нэ Исусохкоро Фано на домукля лэн.

⁸ Тай вонэ проджиле Мисия и авиле дэ Троада.

⁹ Рятяга Павлости сля дыкхлимо: лэсти сикавдапэ мануш Македониятар. Вов ачелас тай мангэлас Павло:

— Ав дэ Македония тай дэ амэнди зор!

¹⁰ Пала кодэлэ дыкхлима амэ полиле, со Дэвэл прыаххарэл амэн тэ пхэнэ котэ Бахтало Лав. Тай екхатар лагле дэ Македония.

Лидия обрисявэл Дэвлэстэ

¹¹ Троадатар амэ лагле пав пане дэ Самофракия тай котарь пэ авр диво лагле дэ Неаполи.

¹² Котарь амэ лагле дэ Филиппы. Када сля Римохкири колония и баро форо дэ Македония. Дэ кадэва форо амэ сле набут вряма.

¹³ Дэ суббота амэ выджиле пала форохкэрэн ударэн лэнятэ. Котэ, сар амэ думисардэ, сля тхан важ мангима. Амэ бэшле и ачиле тэ дэдумэ джювленца, савэ котэ стидэнepэ.

¹⁴ Машкар лэн сля екх, савя аххарэнас Лидия. Вой тэлэлас Дэвлэсти, сля форостар Фиатира тай битинэлас кучутнэ шукар похтана. Лидия шунда Павло, и Рай оттерда лакоро іло тэ прылэ лэхкэрэ лава.

¹⁵ Тунчи, кала вой тай лакэрэ цэрунэ болдэнepэ, вой аххарда амэн пэстэ.

— Сар тумэ динэн, со патяв Раести, тунчи джян и поавэн мандэ цэрэ, — фартэ аххарэлас вой амэн, тай амэ джиле.

Павло тай Сила бэшарэн дэ барунэ

¹⁶ Екхвар, кала амэ джиле дэ тхан важ мангима, пав дром амэ удыхкле екха бутярня. Дэ латэ бэшэлас нажужо фано врэжакоро. Вой врысарэлас и кадэлэга затерэлас барэ ловэ пэхкэрэ хулаенди.

¹⁷ Бутярни джялас пала Павло тай пала амэн тай типисявэлас:

— Кадэла мануша — копыла Дэвлэ Барэдэрэхкэрэ! Вонэ розпхэнэн тумэнди пала дром фирисаримастэ!

¹⁸ Вой терэлас када диво дивэстар. И кала Павлости вса откада вурыцыля, вов обрисия тай пхэнда фаности:

— Важ Лав Исусо Христокоро мэ прыпхэнав тути: выджя латар!

Дэ кодья ж вряма фано ачявда ла.

¹⁹ Кала хулая полиле, со лэндэ хасиля затирино, вонэ схутилдэ Павло тай Сила тай цырдене пэ бари гаса форохкэрэ раендэ.

20 Вонэ андэ лэн пхурэдэрэндэ тай пхэндэ:

— Кадэла мануша — иудея. Вонэ подваздэн амаро форо.

21 Вонэ влиджян дэ амаро джювимо кода, со амэнди, римсконэ манушэнди, нащи ни тэ прылэ, ни тэ терэ.

22 Гроза манушэн кади ж ачиля тэ вуджилисарэ Павло тай Сила. Тунчи пхурэдэра прыпхэндэ тэ злэ лэндар їда тай тэ марэ лэн дэстэнца.

23 Лэн фартэ помардэ тай чутэ дэ барунэ. А барунэхкэрэ бутярнэсти прыпхэндэ мишто тэ дыкхэ пала лэн.

24 Кала вов шунда кадэва прыпхэнимо, вов затерда лэн дэ андралатуни цэра дэ барунэ и замарда лэнгэрэ пурэ дэ лэпунза.

25 Пашэ епашрят Павло тай Сила мангледэ тай дилэнца лашарэнас Дэвлэ. И авэр мануша, савэ котэ бэшле, шундэ лэн.

26 Экхатар пхув тинисиля баря зорага, кади, со тинисиле и ванты дэ барунэ. Дэ кодья ж вряма всавэрэ удара оттердэпэ, и всавэрэ барунарендэ ланчугурия тэлэдене пурэндар.

27 Кала барунэхкоро бутярно проджюнгавадэпэ тай удыххля, со всавэрэ удара дэ барунэ оттердэ, вов думисарда, со всавэрэ барунаря унашле. Колэсти хутилда чюри тай камля тэ зачинэпэ.

28 Нэ Павло затиписиля лэсти:

— На тер нисо пэсти! Амэ всавэрэ катэ!

29 Бутярно прыпхэнда, соб тэ анэн яг, запрастэня дэ цэр, затинисиля даратар тай тэлэдэня англа Павло и Сила.

30 Тунчи вылиджялда лэн барунэстар тай пхучля:

— Рая мурэ! Со манди тэ терэ, соб тэ фирисаравпэ?

31 — Патя дэ Рае Исусо, — пхэндэ вонэ, — и фирисарэгапэ ту тай всаворо тиро цэр.

32 Вонэ розпхэндэ лав Раехкоро лэсти тай всавэрэнди, ко сля лэстэ дэ цэр.

33 Дэ кодья ж рятуни вряма барунэхкоро бутярно халавда лэнгэрэ дукхавдэ тхана, а тунчи болдэняпэ вов и всавэрэ, ко сля лэстэ дэ цэр.

34 Вов анда Павло тай Сила пэстэ цэрэ и тховда важ лэн скаминд. Всавэрэнца, ко сля лэстэ дэ цэр, вов лошаваэлас, со ачиля тэ патя Дэвлэсти.

35 Авилэ диво, тай форохкэрэ пхурэдэра бичалдэ пэхкэрэн дэстарен дэ барунэ тай прыпхэндэ лэнди:

— Отмукэн пэ воля кадэлэн манушэн!

36 Барунэхкоро бутярно пхэнда Павлости:

— Пхурэдэра прыпхэндэ тэ дэ тумэнди воля! Джян бахтага!

37 Нэ Павло пхэнда лэнди:

— Амэ — римска мануша, ай вонэ бисындохкоро помардэ амэн англа всавэрэн тай чутэ дэ барунэ. Акана камэн чёраханэ амэн тэ вытрадэ? Нат! Мэк вонэ еджинэ авэна тай вылиджяна амэн.

38 Бутярнэ розпхэндэ када форохкэрэ пхурэдэрэнди. Кала кодэла шундэ, со Павло тай Сила — римска мануша, тунчи пэрэдаравадэпэ.

39 Вонэ авиле, помангле лэндар патив, вылиджялдэ лэн барунэстар и помангле, соб кодэла ачявдэ форо.

40 Кала Павло тай Сила выджиле барунэстар, вонэ джиле Лидиятэ. Котэ вонэ удыххлэпэ пхралэнца тай подрицардэ лэн. Тунчи вонэ джиле.

17

Бути дэ Фессалоника

1 Кала вонэ проджиле Амфиполи тай Аполлония, тунчи авиле дэ Фессалоника, тев сля иудеенгири синагога.

2 Павло, сар лэстэ сля прылито, джиля дэ синагога и котэ трин субботы дэдүмэлас иудеенца пала Лила.

3 Вов оттерэлас тай допхэнэлас лэнди, со Христости трэбуни сля тэ прыла грыва тай тэ отджювдэ мулэндар.

— Иусо, пала Савэ мэ тумэнди розпхэнав, исин Христосо, — пхэнэлас Павло.

4 Лэнди патине койсавэ иудея, бут пативалэн греконэн и бут джювлен барэ родостар. И всавэрэ вонэ прыачиле Павлостэ тай Силастэ.

5 Авэр иудея холиле пала кода. Вонэ лиле пэга налачен манушэн, савэн аракхле пэ форо, стидэне инте гроза манушэн и ачиле бутэн тэ подваздэ. Тунчи джиле Иасонокхэрэ цэрэстэ, родэнас Павло тай Сила, соб тэ вылидзя лэн манушэндэ.

6 Ай кала на аракхле лэн котэ, цырэдэне Иасоно тай аврэн пхралэн форохкэрэ пхурэдэрэндэ.

— Кадэла мануша терэн бибхаталимо пав всавири люмля, тай екхатар авиле амэндэ, — типисиле вонэ.

7 — Тай Иасоно прылиля лэн дэ пэхкоро цэр. Вонэ на прылэн императохкоро упхэнимо, тай дэдүмэн, со исин авэр тхагари, Савэ акхарэн Иусо.

8 Гроза манушэн и форохкэрэ пхурэдэра ушундэ када тай пэрэдаравдэпэ.

9 Тунчи Иасоно тай авэр потиндэ пала пэ, тай лэн отмукле.

Бути дэ Верия

10 Сар кацик авиля рят, пхрала отбичалдэ Павло и Сила дэ Верия. Кала вонэ авиле пордэ, тунчи заджиле дэ иудеенгири синагога.

11 Вериниянуря сле мануша оттердэ їлэга, а на кади, сар дэ Фессалоника. Вонэ прылиле Павлохкири дума всавэрэ їлэга и кожно диво розлэнас Лила, соб тэ продыкхэ, чячимо када чи нат.

12 Бут лэндар патине. Патине кади ж греконэнгэрэ пативалэ джювля тай бут греконэн.

13 Нэ кала иудея дэ Фессалоника уджянгле, со Павло пхэнэл Дэвлэхкоро Лав дэ Верия, вонэ авиле пордэ и ачиле тэ подмарэ и тэ подваздэ манушэн.

14 Пхрала сиго отбичалдэ Павло морестэ, а Сила тай Тимофеи ачилепэ дэ форо.

15 Кодэла, савэ отлиджялдэ Павло, авиле лэга дэ Афины, а тунчи рисиле павпалэ. Павло прыпхэнда лэнди тэ пэрэдэ, соб Сила тай Тимофеи сигэдэр тэ авэн лэстэ.

Бути дэ Афины

16 Кала Павло дожутьрэлас лэн, вов пхирэлас пав Афины и лэсти сля пхаро тэ дыкхэ, сар бут дэвлорэн исин дэ кадэва форо.

17 Вов пхэнэлас дэ синагога иудеенца тай кодэлэнца, савэ тэлэнас Дэвлэсти. И кожно диво дэдүмэлас кодэлэнца, кага дыкхэласпэ пэ форо.

18 Лэга дэдүмане койсавэ ирвалэ мануша — эпикурейцурия тай стоикурия. Екх мануша пхученас:

— Со кадэва башлимури камэл тэ пхэнэ?

Авэр пхэнэнас:

— Амэнди сикавэлпэ, со вов дэдүмэл пала аврэпхуякэрэн дэвлэн, — колэсти со Павло дэдүманя Бахтало Лав пала Иусо тай Отджюндивимо.

19 Павло андэ пэ форохкоро стидэмо, Ареопаго, тай помангле:

— Розпхэн амэнди, со када за нэво сикляримо, пала савэ ту дэдүмэх?

20 Ту пхэнэх пала кода, со на полах. И амэ камах тэ уджянэ, со када исин.

21 Афинянурия ж и мануша авря пхуятар, савэ котэ джювенас, фартэ камэнас тэ залэпэ кодэлэга, соб тэ дэдүмэ чи тэ шунэ сось нэво.

22 Тунчи Павло вщиля машкар Ареопаго тай пхэнда:

— Афинянурия! Мэ дыкхав, со тумэ будэр аврэн манушэндар тэлэн дэвлэнди.

²³ Кала мэ пхиравас и роздыкхавас тумарэ свэнтый тхана, мэ дыкхлём, со пэ екх жэртвеннико сля искриисардо: «Наджянглэ Дэвлэсти». Пала Кадэлэ Дэвлэ, Ка тумэ на джянэн, нэ Касти тэлён, мэ тумэнди и розпхэнэв.

²⁴ Дэвэл, саво стерда люмля и вса, со дэ латэ исин, Вов исин Рай болыбнасти тай пхуяти. Вов на джювэл дэ храмонэн, савэ тердэ манушэнгэрэ васта.

²⁵ Тай на мангэл, соб мануша тэ терэн бути Лэсти пэхкэрэ вастэнца, сар бы Лэсти сось на хутилэл. Вов Еджино дэл манушэнди, соб вонэ тэ джювэн и тэ пхурдэн, и вса авэр.

²⁶ Екхэ манушэстар Вов стерда всавэрэ манушэнгэрэ родуря, соб мануша тэ джювэн пав всавири люмля, тай майанглал вытидэня вряма и пхуя лэнгэрэ джювимаста.

²⁷ Вса откада Дэвэл терда, соб мануша тэ родэн Лэ, тэ полэн, тев Вов исин, тай тэ аракхэн Лэ, нэ пав чячима Вов исин надур амэндар.

²⁸ Дэ Лэстэ амэ джювах, пхирах тай исин дэ люмля. Сар пхэнэнас пала кода и койсавэ тумарэ поэтурия: «Амэ исин Лэхкоро родо».

²⁹ И кала амэ Дэвлэхкоро родо, амэнди нащи тэ думисарэ, со Дэвэл поджило пэ кода, со тердо совнакастар, рупатар чи барэстар пав манушэхкири годи.

³⁰ Англэ Дэвэл промукэлас вряма, кала мануша на джянгле пала Лэ, нэ екхатар прыпхэнэл всавэрэ манушэнди пав всавири люмля тэ ачявэ бэзимо.

³¹ Вов екхатар вытидэня диво, кала сундисарэла люмля пав чячима, тай кади ж вытидэня Манушэ, Саво авэла сундисарэга. Дэвэл допхэнда када англа всавэрэн, кала оджювдырда Лэ мулэндар.

³² Кала вонэ ушундэ пала оджюндивимо мулэндар, койсавэ лэндар ачиле тэ асапэ, ай авэр пхэндэ:

— Пала кода амэ пошунага тут дэ авэр моло.

³³ Кадэлэга Павло и ачявда лэнгоро стидэмо.

³⁴ Нэ набут манушэн прыачиле Павлостэ тай патине. Машкар лэн сле Дионисии, саво вджялас дэ Ареопаго, джювли, савя акхарэнас Дамарь, тай авэр мануша.

18

Бути дэ Коринфо

¹ Тунчи Павло ачявда Афины и лагла дэ Коринфо.

² Котэ вов дыкхла иудее пав лавэ Акила, саво бэняпэ дэ Понто. Кодэва надумут авиля Италиятар пэхкиря ромняга, савя акхарэнас Прискилла, колэсти со императоро Клавдий прыпхэнда всавэрэ иудеэнди тэ ачявэн Римо. Павло авиля тэ дыкхэпэ лэнца.

³ Вонэ терэнас кодыя ж бути, со и Павло: терэнас катуны. Колэсти Павло ачиляпэ лэндэ тэ терэлас лэнца бути.

⁴ Кожно суббота вов дэдумэлас дэ синагога иудеэнца тай греконэнца и камля тэ пэрэцырдэ лэн пэ пэхкири риг.

⁵ Кала Македониятар авиле Сила тай Тимофеи, тунчи Павло всавири пэхкири вряма одэня колэсти, соб тэ пхэнэ лав. Тай допхэнэлас иудеэнди, со Исусо исин Христосо.

⁶ Кала вонэ ачиле тэ пэрэмарэ тай тэ кошэ лэ, вов обмарда прахо пэхкиря їдатар тай пхэнда лэнди:

— Тумэ еджинэ дошалэ дэ пэхкэрэ хасявима! Мэ жужо и кана джяв наиудеэндэ!

⁷ Павло выджила котарь тай джила дэ цэр, саво ачелас пашэ синагога. Котэ джювэлас Титий Иусто, мануш, саво тэлэлас Дэвлэсти.

⁸ Пхурэдэр дэ синагога Криспо и всавэрэ лэхкэрэ цэрүнэ патине Раести. Тай бут коринфянурия, савэ шунэнас Павло, патине и сле болдэ.

⁹ Екхвар прытяга Рай пхэнда Павлостэ дэ дыкхлима:

— На дара! Дэдүмэ тай на пэрэач!

¹⁰ Мэ туга, тай нико на терэла тут бибахт. Дэ кадэва форо исин бут Мурэн манушэн.

¹¹ Павло сля котэ бэрш епашэга тай сиклярда лэн Дэвлэхкэрэ Лавести.

¹² Дэ кодья вряма, кала Галлионо сля проконсуло дэ Ахаия, иудея стидэнepэ, схутилдэ Павло тай андэ лэ пэ сындо.

¹³ Вонэ ачиле тэ дошарэ лэ:

— Кадэва мануш сиклярэл тэ полэ Дэвлэ на кади, сар сиклярэл амаро Упхэнимо.

¹⁴ Павло инте нисо на пхэнда, кала Галлионо ачиля тэ дэдүмэ кодэлэнди, ко дошарэнас лэ:

— Иудея, тэ авэл бы када начячимо чи мижо рындо, мэ бы шунаvas тумэн.

¹⁵ Нэ сар тумэ ханпэ пала сиклярима, лава тай тумаро Упхэнимо, тунчи розлэнпэ еджинэ. Мэ на камаv тэ авэ сундисарега дэ кодэлэ.

¹⁶ Тай вов вытpадэня лэн сундисарехкэрэ тханэстар.

¹⁷ Тунчи всавэрэ схутилдэ пхурэдэрэ дэ синагога, савэ акхарэнас Сосфено, тай помардэ лэ англа сундисарехкоро тхан. Нэ Галлионо пэ када нисо на терда.

Павло рисявэл дэ Антиохия

¹⁸ Павло просля инте бут дивэн дэ Коринфо. Тунчи вов розачиляпэ пхралэнца тай Прискиллага и Акиллага лагля пав пане дэ Сирия. Англа колэ, сар лэнди тэ ладэ, Павло обчинда бала дэ Кенхреи, колэсти со калась дэня солах Дэвлэсти.

¹⁹ Вонэ авиле дэ Эфесо. Котэ Павло ачяvда Прискилла тай Акилла, а еджино джиля дэ синагога тай дэдүмэлас иудеенца.

²⁰ Вонэ мангле, соб вов тэ ачелпэ лэндэ пэ савись вряма, нэ вов отпхэндапэ.

²¹ — Мэ рисявава, сар авэла пэ када Дэвлэхкири воля, — пхэнда Павло, кала розачеласпэ лэнца, тай лагля пав пане Эфесостар.

²² Вов лагля дэ Кесария, авиля дэ Ерусалимо, дыкхляпэ котэ кхандиряга тай джиля дэ Антиохия.

²³ Павло просля котэ савись вряма, тунчи котарь тай проджялас галатякири пхув и Фригия, а пав дром подрицарэлас сиклярнэн.

Аполлосохкири бути дэ Эфесо

²⁴ Дэ кодья вряма дэ Эфесо авиля иудеи, савэ акхарэнас Аполлосо. Вов шукар дэдүмэлас, бэняпэ тай бариля дэ Александрия и мишто джянэлас Лила.

²⁵ Вов сля сиклярдо Раехкэрэ Дромэсти тай всавэрэ водега розпхэнэлас пала Исусо чячимага, нэ еджино джянэлас кацик Иоаннохкоро болдимо.

²⁶ Аполлосо ачиля бидаракоро тэ дэдүмэ дэ синагога, и кала Прискилла тай Акила ушундэ лэ, вонэ акхардэ лэ пэстэ тай сар исин фэдэр розпхэндэ пала Дэвлэхкоро Дром.

²⁷ Аполлосо камля тэ джя дэ Ахаия, тай пхрала, соб тэ подрицарэ лэ, искриисардэ лил сиклярнэнди, савэ котэ джюvдэ. Дэ лил вонэ мангле тэ прылэ Аполлосо. Кала вов авиля пордэ, тунчи дэня бари зор кодэлэнди, ко пав Дэвлэхкоро мишчимо ачиля тэ патя.

²⁸ Аполлосо пхабардэс сикавэлас иудеенгоро начячимо тай англэ манушэн допхэнэлас Лилэндар, со Христосо исин Исусо.

19

Павлохкири бути дэ Египто

¹ Дэ кодья вряма, кала Аполлосо сля дэ Коринфо, Павло проджиля пав плаехкэрэ тхана тай авиля дэ Эфесо. Котэ вов дыкхляпэ койсавэ сиклярнэнца.

² — Прылиле тумэ Свэнто Фано, кала патине? — пхучля вов.

— Амэ и на шундэ пала кода, со исин Свэнто Фано, — пхэндэ кодэла.

³Тунчи Павло пхучля:

— Сар жэ тумэ сле болдэ?

— Кади, сар сиклярда Иоанно, — пхэндэ вонэ.

⁴Павло пхэнда:

— Иоанно болдэлас, кала мануш прыджяналас пэхкоро бэзимо. Вов прыакхарэлас манушэн тэ патя дэ Кодэлэ, Касти трэбуни тэ авэ пала лэ, дэ Иусо.

⁵Кала вонэ ушундэ пала када, тунчи болдэнепэ важ Рае Иусохкоро Лав.

⁶И кала Павло тховда пэ лэн васта, пэ лэндэ сджиля Свэнтэ Фано. Тунчи вонэ ачиле тэ дэдумэ авэр чибэнца и тэ пхэнэ Дэвлэстар.

⁷Всавэрэн лэн сля паша дэшудуй манушэн.

⁸Павло трин чёна бидаракоро пхэнэлас дэ синагога. Вов дэдуманя манушэнца пала Дэвлэхкоро Тхагаримо тай допхэнэлас лэнди.

⁹Нэ койсавэ лэндар мижонас и отпхэнэнаспэ тэ патя, тай дэдумэнас англа всавэрэн, со Дром Раехкоро на исин чячюно. Тунчи Павло ачявда лэн. Вов вытидэня сиклярнэн и кожно диво дэдуманя лэнца дэ Тираннохири школа.

¹⁰Кади процырдэняпэ дуй бэрша, и всавэрэ иудея тай грекуря, савэ джювдэ дэ Цыкни Азия, шундэ Раехкоро Лав.

¹¹Дэвэл терэлас Павлохкэрэ вастэнца фартэ барэ дывуря.

¹²Насвалэ лэнаспэ хкоснэндэ тай кущикэндэ, савэн майанглал лэласпэ Павло, тай высатэнас всавэрэ дукхэндар, тай мижэ фануря выджянас лэндар.

¹³Койсавэ иудеенгэрэ джянимаря, савэ пхирэнас пав дромэн, кала выградэнас мижо фано манушэндар, прыакхарэнас Лав Рае Иусохкоро. Вонэ пхэнэнас:

— Прыпхэнав тумэнди важ Иусо, пала Савэ розпхэнэл Павло.

¹⁴Када терэнас и эфта Скевахкэрэ чявэ. А Скева сля иудеенгоро англуно рашай.

¹⁵Нэ мижо фано пхэнда лэнди:

— Джянав Иусо, тай Павло джянав. А ко тумэ кацавэ?

¹⁶Тай мануш, дэ саво сля мижо фано, чутапэ пэ лэн кацавя зорага, со домарда лэн всавэрэн и вонэ вынашле цэрэстар нангэ тай зранглэ.

¹⁷Кала пала када уджянгле иудея тай грекуря, савэ джювдэ дэ Эфесо, лэн всавэрэн обхутилда дар, тай вонэ ачиле тэ отлиджяпэ Рае Иусохкэрэ Лавэстэ баря пативага.

¹⁸Бут савэ лэндар патине, авэнас тай оттердо прыджяненаспэ дэ пэхкэрэн рындонэн.

¹⁹Бут мануша, савэ майанглал залэнас врэжага, анэнас пэхкэрэ джянимахкэрэ лила и англал всавэрэн спхабарэнас лэн. Кала биндэ, сави цимин сля всавэрэ спхабардэ лилэндэ, тунчи выджила пандэша пхангла рупись.

²⁰Кади Дэвлэхкоро лав розджяласпэ тай лэлас зор.

Мануша дэ Эфесо подлэн ваздимо

²¹Пала кадэлэ всавэрэ Павло прылиля дэ гындо тэ заджя пав Македония тай Ахаия, ай тунчи тэ ладэ дэ Ерусалимо.

— Сар мэ авава дэ Ерусалимо, манди трэбуни тэ попэрав и дэ Римо, — пхэнда вов.

²²Вов бичалда дэ Македония дон пэхкэрэн амалэн, Тимофее тай Эрасто, а еджино пэ койсави вряма ачиляпэ дэ Цыкни Азия.

²³Тунчи сля баро ваздимо важ Раехкэрэ Дромэ.

²⁴Мануш, савэ акхарэнас Димитрии и саво залэласпэ рупунэ рындонэнца, терэлас рупастар храмуря, кацавэ, сар храмo, тев телэнас дэвлятия пав лавэ Артемида. И кадэлэга вов дэлас тэ затерэ и авэр пэхкэрэ амалэнди.

²⁵Вов акхарда лэн и аврэн кацавэн бутярнэн дэ кадэва рындо тай пхэнда:

— Тумэ джянен, со кадья бути дэл амэнди лачэ затиримо.

26 Нэ тумэ дыкхэн и шунэн, со кадэва Павло пэрэцэрдэня пэ пэхкири риг тай слиджялда годятар бүтэн манушэн, савэ джювэн на кацик дэ Эфесо, нэ пав всавири Цыкни Азия. Вов пхэнэл, со дэвэла, савэ стердэ вастэнца, — на дэвэла.

27 Када лиджял колэстэ, со на кацик амари бути на авэла дэ патива, нэ и храмо, тев тэлён баря дэвляти Артеמידати, нисо на ачала. Тай еджини дэвли, савяти тэлён всавири Цыкни Азия и всавири люмля, хацарэла пэхкири патив.

28 Кала вонэ ушундэ када, тунчи мижыле тай ачиле тэ типисявэ:

— Бари исин Артемида Эфесохири!

29 Тунчи всаворо форо подваздэняпэ. Мануша схутилдэ кодэлэн, ко авиля Павлога (када сле македонянуря Гаий тай Аристархо), и свавэрэ, сар екх, прастэне дэ театро.

30 Павло камля тэ выдья манушэндэ, нэ сиклярнэ на дэне лэсти.

31 И койсавэ Азиякэрэ пхурэдэра, амала Павлохкэрэ, пэрэдэне лэсти, соб тэ на авэл дэ театро.

32 Мануша, савэ стидэнепэ, выдьянас годятар, колэсти со екх лэндар типисявэнас пала екхэ, ай авэр — пала аврэ. Бут манушэн на полэнас, и сости вонэ пордэ авиле.

33 Лэнгэрэ стидэмастар выцырдэне пэ англал Александро — када тердэ иудеи. Александро сикавда манушэнди вастэга, соб вонэ тэ заачен мулком, и камля тэ отрисарэ пэстар лэнгэрэ лава.

34 Нэ кала свавэрэ уджянгле, со вов исин иудеи, упалэ ачиле фартэ тэ типисявэ:

— Бари исин Артемида Эфесохири!

И типисявэнас паша дуй чясурия.

35 Тунчи екх форохкэрэ пхурэдэрэндар ачиля тэ улэ лэн тай пхэнда:

— Эфесянурия, чи на джянал всавири люмля, со дэ форо Эфесо прыдыкхэн пала храмо, тев тэлён баря Артеמידати тай свэнтонэ барэсти, саво тэлэдэня болыбнастар?

36 Калэсти нико на запхэнэла. Важ кода тумэнди трэбуни тэ улэпэ тай тэ на терэ бибакт.

37 Тумэ андэ кордэ манушэн, нэ ни екх лэндар на обчёрда храмо тай на пхэнда бибактало лав пэ амаря дэвля.

38 А сар исин Димитриестэ и аврэ бутярнэндэ пав кадэва рындо, дэ со лэн тэ дошарэ, тунчи амэндэ исин сындуря тай проконсулы. Котэ пхэнэн, со исин тумэндэ екх пэ екхэ.

39 Кала исин тумэндэ, со тэ пхуче, мэк роздыкхэн када дэ упхэнимахкоро стидэмо.

40 Тэ на дошарэн амэн авдивэ, со терах ваздимо, и амэнди на авэла, со тэ пхэнах.

Кадэла лавэнца вов розмукия лэнгоро стидэмо.

20

Павло ладэл дэ Македония тай Греция

1 Кала ваздимо пэрэачиля, Павло акхарда сиклярнэн, подрицарда лэн, тунчи розачиляпэ лэнца тай джиля дэ Македония.

2 Кала Павло проджялас авэр пхуя, вов бутэ лавэнца подрицарэлас патякунэн. Тунчи вов авиля дэ Греция

3 тай просля котэ трин чёна. Кала вов стидэняпэ тэ ладэ пав пане дэ Сирия, иудея камле тэ умарэ лэ. Нэ вов уджянгла пала када тай прылиля дэ гындо тэ ривявэ пав Македония.

4 Лэга сле Сопатро, Пиррохкоро чяво, Вериятар, фессалоникийцурия Аристархо тай Секундо, Гаий Дервиятар тай Тимофеи, Тихико тай Трофимо Цыкня Азиятар.

5 Вонэ джиле англал и дожутярэнас амэн дэ Троада.

6 Кала проджила сырботори, саво акхарэлпэ Биквасно мандро, амэ сле дэ Филиппы. Тунчи лагле котарь пав пане. Проджила панч дивэ тай амэ дыкхлепэ лэнца дэ Трояда. Котэ амэ просле эфта дивэ.

Евтихо отджювдёл мулэндар

7 Дэ перво куркэхкоро диво амэ стидэнепэ їтханэ, соб тэ пхагэ мандро. Павло дэдумэлас лэнца. И кади сар вов камля пэ авэр диво тэ джя дэ дром, лэхкири дума зацырэдэняпэ ды епашрят.

8 Дэ упралуни цэра, тев амэ стидэнепэ, пхабонас бут лампы.

9 Пэ фэлястра бэшля тэрно мануш пав лавэ Евтихо. Нэ сар Павло бут вряма дэдумэлас, Евтихо засута тай тэлэдэня пэ пхув барэ вучимастар. Кала лэ подлиле, вов сля муло.

10 Павло змукляпэ тэлэ, пэля упрал пэ тэрнэ манушэ и облиля лэ.

— На пэрэджювэн! — пхэнда Павло. — Вов джювдо!

11 Тунчи подваздэняпэ упрал, пхагля мандро и ачиля тэ ха. Вов дэдумэлас ды дэнзор, ай тунчи джиля дэ дром.

12 Тэрнэ ж манушэ отлиджялэ цэрэ джювдэга, и всавэрэ фартэ лошавэнас кадэлэсти.

Дром Троядатар дэ Милето

13 Амэ бэшле пэ корабли тай лагле дэ Ассо, камле котарь тэ залэ Павло. Вов еджино кади прыпхэнда, колэсти со камля тэ джя пэза.

14 Дэ Ассо вов дыкхляпэ амэнца, амэ лиле лэ пэ корабли тай джиле дэ Митилина.

15 Кала амэ отджиле котарь, тунчи пэ авэр диво авиле дэ Хиосо. Проджиля инте екх диво тай авиле дэ Самосо, инте екхэ дивэсти — дэ Милето.

16 Павло прылиля дэ гындо тэ обджя Эфесо, соб тэ на пролиджя бут вряма дэ Цыкни Азия, колэсти со камля сигэдэр тэ авэ дэ Ерусалимо пэ Пандэшахкоро диво.

Павло дэдумэл пхурэдэрэнца кхандирятар дэ Эфесо

17 Милетостар Павло бичалда дэ Эфесо. Вов мангя пхурэдэрэн кхандирятар тэ авэн лэстэ.

18 Кала вонэ авиле, вов пхэнда лэнди:

— Тумэ джянэн, сар мэ джювдом катэ тумэндэ всавири вряма англунэ дивэстар, кала авилём дэ Азия.

19 Мэ на слём пхутярдо и ясвэнца теравас бути Раести и на дыкхавас ни пэ всавири грыжа, сави родэнас важ ман иудея.

20 Мэ на умукавас нисо кодэлэстар, со б тэ авэл мишто важ тумэн, пхэнаvas Лав тай сикляравас тумэн пэ гаса англа всавэрэн и пав цэрэн.

21 Мэ допхэнаvas иудеэнди тай греконэнди, со лэнди трэбуни тэ прыджяне пэхкоро бэзимо англа Дэвлэ и тэ патя дэ амарэ Рае Исусо.

22 Екхатар лиджял ман Фано, тэ джяв дэ Ерусалимо, нэ на джянав, со котэ манца авэла.

23 Джянав кацик, со дэ кожно форо Свэнто Фано допхэнэл манди, со дожутярэн котэ баруно тай бари грыжа.

24 Нэ мэ на тховав цимин пэхкэрэ джювимасты, кацик манди тэ проджя муро дром тай тэ стерэ бути, сави дэня Рай Исусо, тэ розпхэнэ Бахтало Лав пала мищимо Дэвлэхкоро.

25 И екхатар мэ джянав, со всавэрэ тумэ, кага мэ дыкхаваспэ тай розпхэнаvas пала Тхагаримо, никала будэр ман на удыххэна.

26 Колэсти пхэнав тумэнди авдивэ: кала кось тумэндар мэ на авава вуджило дэ кодэлэ,

27 колэсти со мэ на гаравдом ни екх лав пала всавири Дэвлэхкири воля.

28 Дыххэн пала пэстэ и пала всавири кхандири, дэ савя Свэнто Фано тховда тумэн тэ чярэвэн отара Дэвлэхкири, сави Вов тинда Пэсти Пэхкэрэ ратэга тай тэ дыкхэн пала ла.

29 Мэ джянав, со кала уджява, тумэндэ авэна мижэ рува, савэнди на дор отара.

30 И машкар тумэн авэна мануша, савэ чячимо пэрэболдэна дэ хохавимо, соб тэ улиджя сиклярнэн пала пэ.

31 Колэсти на совэн! Рапирэн, со мэ трин бэрша ясвэнца, диво тай рят на пэрэачявас тэ дэ годи кожнонэсти тумэндар.

32 Екхатар мэ отдав тумэн Дэвлэсти тай Лэхкэрэ мищимахкэрэ Лавэсти. И Дэвэл барярэла тумаро патявимо сиклярэла тумэн и дэла тумэнди котор машкар всавэрэн Лэхкэрэн свэнтонэн манушэн.

33 Мэ никастар на камлём тэ лэ ни рупь, ни совнак, ни їда.

34 Тумэ еджинэ джянэн, со мэ пэхкэрэ вастэнца затеравас пэ котор мандро и пэсти и кодэлэнди, ко манца сля.

35 Дэ всавэрэ мэ сикававас, со кади и тумэнди трэбуни тэ терэ бути и тэ дэ зор бизоракэрэ манушэнди тай тэ рапирэ Раехкоро Исусохкоро Лав: «Бахтало мануш, саво прылэл, нэ бахталэдэр кодэва мануш, саво дэл».

36 Кала Павло пхэнда када, вов тэлила всавэрэнца пэ чянга тай помангпя.

37 Всаверэ ровэнас, облэнас Павло тай чюминдэнас лэ.

38 Лэнди сля бибахт лэхкэрэ лавэндар, со на дыкхэна лэ будэр. Тунчи вонэ пролиджялдэ Павло пэ корабли.

21

Павло ладэл дэ Ерусалимо

1 Кала амэ розачилепэ лэнца, тунчи выджиле дэ море. И лагле ворта пэ острово Косо. Пэ авэр диво амэ авиле дэ Родосо тай котарь лагле дэ Потара.

2 Котэ амэ аракхле корабли, саво ладэлас дэ Финикия, бэшле пэ лэстэ и лагле дурэдэр.

3 Амэ облагле Кипро, ачявдэ лэ зэрвонэ ригатар тай лагле дэ Сирия. Амэ прыачиле берегостэ дэ Тиро, колэсти со котэ амарэ кораблести трэбуни сля тэ ачявэ савэсь бужэ.

4 Дэ Тиро амэ аракхле сиклярнэн и просле котэ эфта дивэ. Вонэ дэдумане Павлости Фаностар, соб вов тэ на джял дэ Ерусалимо.

5 Нэ кала авиля вряма, амэ лагле дурэдэр. Всаверэ сиклярнэ, лэнгэрэ ромня тай чяворэ вылиджялдэ амэн форостар. Тай пэ берего амэ чутэ чянга и манглевэ.

6 Тунчи амэ розджилепэ лэнца тай бэшле пэ корабли, а вонэ рисиле цэрэ.

7 Амэ дурэдэр лагле пав пане тай Тиростар авиле дэ Птолемаида. Котэ амэ наисардэпэ пхралэнца и просле лэнца екх диво.

8 Пэ авэр диво амэ упалэ лагле дэ дром, авиле дэ Кесария тай заджиле дэ цэр Филиппостэ. Вов пхэнэлас Бахтало Лав и сля екхэга эфта манушэндар.

9 Лэстэ сля штар чэя. Вонэ сле напаларом тай сле ангунарьки.

10 Амэ просле котэ бут дивэ. Тунчи Иудеятар авиля ангунари пав лавэ Агаво.

11 Вов поджила амэндэ, лиля Павлохкоро кущик, пхангпя пэсти васта и пурэ, тай пхэнда:

— Свэнто Фано пхэнэл: «Кади иудея дэ Ерусалимо спхандэна и отдэна дэ вастэн наиудеенди кодэлэ, какхоро исин кадэва кущик».

12 Кала амэ ушундэ када, тунчи и амэ, и катутнэ мануша ачиле тэ мангэ Павло тэ на джял дэ Ерусалимо.

13 Нэ Павло пхэнда пэ кода:

— Пэ со тумэ ровэн и розчинэн муро їло? Мэ лошало на кацик тэ авав спхангло, нэ и тэ мэрав дэ Ерусалимо пала Лав Рае Исусохкоро.

14 Кала амэ полиле, со нисо лэсти на допхэнага, заачиле мулком тай пхэндэ:
— Мэк стерэлапэ воля Раехкири.

15 Тунчи амэ стидэнепэ тай лагле дэ Ерусалимо.

16 Амэнца джиле койсавэ сиклярнэ Кесариятар. Вонэ андэ амэн дэ цэр, теv джювэв кипреянино Мнасоно, саво думут сля сиклярнэга. Лэстэ амэ и ачилепэ.

Иаково подпхэнэл Павлости

17 Кала амэ авиле дэ Ерусалимо, пхрала прылиле амэн лошага.

18 Пэ авэр диво Павло йтханэ амэнца джиля Иаковостэ. Котэ сле всавэрэ пхурэдэра.

19 Павло наисардапэ лэнца и розпхэнда вса пала кода, со терда Дэвэл машкар наиудеен лэхкэрэ вастэнца.

20 Вонэ шундэ лэ тай лашардэ Дэвлэ. Тунчи пхэндэ Павлости:

— Пхрал, ту дыкхэх скацик пхангья иудеен патине? Тай всавэрэ вонэ фартэ прырицэрэнпэ Упхэнимастэ.

21 И пала тут вонэ шундэ, со ту сиклярэх иудеен, савэ машкар наиудеендэ джювэн, тэ отджян Моисеехкэрэ Упхэнимастар. И со ту пхэнэх, тэ на обчинэн вонэ пэхкэрэн чворэн тай тэ на джювэн кади, сар амэндэ прылило.

22 Со ж тэ терэ? Вонэ шунэна пала кода, со ту авилян.

23 Колэсти тер кода, со амэ пхэнага. Машкар амэн исин штар мануша, савэ дэне солах.

24 Лэ кадэлэн, жужарпэ лэнца и потин пала кода, соб лэнди тэ обчинэн бала пэ шэро. Тунчи всавэрэ полэна, со пала тут пхэнэн начячимо и со ту джювэх пав Упхэнима.

25 А наиудеенди, савэ патине, амэ искриисардэ кади: лэнди нащи тэ ха кода, со андэ дэ жэртва дэвлорэнди, тай мас затасавдэ хулаимастар, тэ пэ рат и тэ терэ биладжявимо йрестар.

26 Пэ авэр диво Павло лиля пэга кадэлэн манушэн, соб тэ жужарэпэ лэнца. Тунчи вов заджиля дэ храмо тай пхэнда, дэ сави вряма вонэ пэрэачена тэ жужарэпэ, и кала пала кожнэ лэндар анэна жэртва.

Павлохоро пханглимо

27 Кала проджянас эфта дивэ, койсавэ иудея Цыкня Азиятар удыхкле Павло дэ храмо, подваздэне гроза манушэн тай схутилдэ лэ.

28 Тай типисявэнас:

— Израильтянуря! Дэн амэнди зор! Кадэва мануш пав всавири люмля сиклярэл всавэрэн, соб вонэ тэ на прылэн амаро народо, амаро Упхэнимо и амаро храмо. Екхатар вов анда дэ храмо греконэн, сога магрисарда кадэва свэнто тхан.

29 Ды колэ вонэ дыкхле дэ форо Павло тай эфесянино Трофимо и думисардэ, со Павло анда лэ дэ храмо.

30 Тунчи всаворо форо подваздэняпэ и спрастэнепэ мануша. Павло схутилдэ тай выцьрдэне храмостар, и храмохкэрэ вударе екхатар затердэ.

31 Вонэ камле тэ умарэ Павло, нэ дума пала кода, со всаворо Ерусалимо подваздэняпэ, доджиля пхангьякэрэ пхурэдэрэстэ дэ римско халавдэнгоро стидэмо.

32 Вов лиля халавдэн тай шэлякэрэ пхурэдэрэн и чутапэ манушэндэ. Кала иудея дыкхле пхангьякэрэ пхурэдэрэ и халавдэн, вонэ пэрэачиле тэ марэ Павло.

33 Пхурэдэр поджиля, прыпхэнда тэ схутилэ Павло тай тэ спхэндэ лэ донца ланчугонэнца. Вов пхучля манушэндэ, ко исин кадэва мануш и со вов терда.

34 Нэ мануша типисявэнас кожно пэхкоро, и пхурэдэр нисо на полэлас. Важ кода прыпхэнда тэ отлидья Павло дэ халавдэнгоро цэр.

35 Кала вонэ подлэнаспэ пав лестница, мануша ачиле тэ стасавэ лэн кади, со халавдэ лиджялдэ Павло пэ вастэн.

36 Гроза манушэн джялас пала лэн тай типисявэлас:
— Мэк вов мэрэл!

Павло пхэнэл лав манушэнди

37 Паша халавдэнгоро цэр Павло пхэнда пханглыкэрэ пхурэдэрести:
— Ту дэга манди тэ пхэнэ тути лав?

— Ту джянэх греческо чиб? — пхучля пхурэдэр.

38 Выдждял — ту на кодэва египтянино, саво надумут подваздэня манушэн тай улидждялда пала пэ дэ шуки пхув штар пханглы прахарен?

39 Павло пхэнда:

— Мэ иудеи Тарсостар, саво дэ Киликия, мануш барэ форостар. Мангав тут, дэ манди тэ дэдумэ манушэндэ.

40 Пхурэдэр домукля кода. Тунчи Павло вщиля пэ лестница и сикавда вастэга, соб вонэ тэ ачен мулком. Кала вонэ пэрэачиле тэ типисявэ, Павло дэдуманя пав еврейско чиб.

22

1 — Пхралалэ тай дада! Дэн манди тэ пхэнэ, со мэ надошало.

2 Кала вонэ ушундэ, со вов дэдумэл пав еврейско чиб, тунчи заачиле мулком. Тай вов пхэнда:

3 — Мэ иудеи, саво бэняпэ дэ Тарсо дэ Киликия, выбраярдо дэ кадэва форо паша пурэн Гамалиилостэ и сиклярдо пав чячима Упхэнимасте амарэ дадэнгоро. Мэ отдэнём еджино пэ Дэвлэхкэрэ рындости, сар и кожно тумэндар авдивэ.

4 Мэ традавас ды мэрима кодэлэн, ко джянас Исусохкэрэ Дромэга, пхандавас муршэн тай джовлен и чувавас лэн дэ барунэ.

5 Допхэнимаря кадэлэсти — англуну рашай тай всавэрэ пхурэдэра. Мэ лилём лэндар лила пхралэндэ дэ Дамаско тай лаглём пордэ, соб тэ пхэндэ кодэлэн, ко котэ сля, тай тэ анэ лэн дэ Ерусалимо и тэ мулярэ.

6 Пэв дром, кала мэ слём пашэ Дамаско, дэ епашдиво, болыбнастар паша ман запхабияпэ душлимо, пэ саво нащи сля тэ дыкхэ.

7 Мэ тэлэдэнём пэ пхув тай ушундом гласо, саво дэдумэлас манди: «Савло, Савло! Сости ту традэх Ман?»

8 Мэ пхучлём: «Кө Ту, Рае?» Вов пхэнда: «Мэ Исусо Назаретостар, Савэ ту традэх».

9 Кодэла, ко сле манца, дыкхле душлимо, нэ гласо, саво манца дэдуманя, вонэ на шундэ.

10 Мэ пхучлём: «Рае, со манди тэ терэ?» Рай пхэнда: «Вщи тай джя дэ Дамаско. Котэ тути пхэнэна вса, со тути трэбуни тэ терэ».

11 Кодэла, ко сле манца, пала васт андэ ман дэ Дамаско, колэсти со мэ корылём душлимахкэрэ пхабаримастар.

12 Котэ мандэ авиля мануш пав лавэ Анания, саво джовда пав Упхэнима и сля дэ патива всавэрэ катутнэ иудеендэ.

13 Вов поджиля мандэ, ачиль пашэ тай пхэнда: «Пхрал Савло! Мэк оттерэнпэ тирэ якха!» Дэ кодыя вряма мэ ачилём тэ дыкхэ и удыхкхлём кадэлэ манушэ.

14 Вов пхэнда: «Дэвэл амарэ дадэнгоро выгидэня тут, соб ту тэ уджянэх Лэхкири воля, тэ удыхкэх Чячюнэ и тэ шунэх лава Лэхкэрэ уштэндар.

15 Ту авэга важ всавэрэн манушэн допхэнимари пала кода, со дыкхлян и шундан.

16 Со ту цырэдэх вряма? Вщи, прыакхар Лэхкоро Лав, болдэпэ и схалав пэхкоро бэзимо».

17 Тунчи мэ рисилём дэ Ерусалимо. И кала мэ манглёмпэ дэ храмо, манди сля дыкхлимо.

18 Мэ удыхклём Рае, Саво пхэнда манди: «Сиго выджя Ерусалимостар, колэсти со катэ на прылэна тиро допхэнимо пала Ман».

19 Мэ пхэндом: «Рае! Кадэла мануша джянэн, со мэ чувавас дэ барунэ и маравас дэ синагоги кодэлэн, ко патян дэ Тут.

20 Кала чюлири рат Стефаностар, саво сля Тиро допхэнимари, мэ ачявас котэ и подавас гласо пала кодэлэн, ко умарэнас лэ, и дыкхлём пала лэнгири їда».

21 Тунчи Рай пхэнда манди: «Джя! Мэ бичалав тут народонэндэ, савэ джювэн дурал».

Павло дэдүмэл пханглярэ пхурэдэрэга

22 Ды кадэлэн лавэн мануша шунэнас Павло, нэ катэ ачиле тэ типисявэ:

— Мэк вов мэрэл! Лэсти нащи тэ джювэ!

23 Вонэ типисиле тай розчинэнас пэхкири їда и чувэнас прахо пхуякоро упрал.

24 Тунчи пханглярэ пхурэдэрэ прыпхэнда тэ улиджя Павло дэ халавдэнгоро цэр. Вов прыпхэнда тэ марэ лэ чукненца тай тэ допхуче, соб тэ уджянэ, сости мануша кади мижон пэ лэстэ.

25 Нэ кала Павло прыпхангле, соб тэ марэ, вов пхэнда шэлякэрэ пхурэдэрэсти, саво ачелас пашэ:

— Чи мишто авэла тэ марэ римсконэ манушэ, ай тэ на пролиджя пав лэ сындо?

26 Кала шэлякоро пхурэдэрэ шунда када, вов джиля тай пхэнда пханглярэ пхурэдэрэсти:

— Со ту терэх? Када римско мануш!

27 Пханглярэ пхурэдэрэ выджиля Павлостэ тай пхучля:

— Ту римско мануш?

— Нэ, — пхэнда кодэва.

28 Тунчи пхурэдэрэ пхэнда:

— Мэ потиндом бут ловэ пала кода, соб тэ аче римсконэ манушэга.

— Ай мэ бэнимастар римско мануш, — пхэнда Павло.

29 Кодэла, савэ камле тэ допхуче лэ, еххатар отджиле лэстар. Кала пхурэдэрэ уджянгля, со пханглярэ ланчукога римсконэ манушэ, вов фартэ пэрэдаравдапэ.

Павло англа Синедрионо

30 Пэ авэр диво пхурэдэрэ закамля тэ уджянэ ды лавэ, дэ со иудея дошарэн Павло. Тунчи розпханглярэ лэ и прыпхэнда, соб тэ стидэнпэ англунэ рашая и всаворо Синедрионо. Тунчи анда Павло и тховда англа лэн.

23

1 Павло вхалепэ яххэнца пэ кодэлэн, ко сля дэ Синедрионо, тай пхэнда:

— Пхралалэ! Ды авдивутно диво мэ всавэрэ ілэга теравас бути Дэвлэсти.

2 Катэ англуно рашай Анания прыпхэнда кодэлэнди, ко ачелас пашэ, тэ марэ Павло пав уштэн.

3 Тунчи Павло пхэнда:

— Дэвэл тут марэла, мануш домуенгоро! Ту бэшэх катэ, соб тэ сундисарэ ман пав Упхэнима. А еджино пэрэхукэх Упхэнимо, кала прыпхэнэх ман тэ марэ!

4 Кодэла, савэ аченас паша Павло, пхэнда лэсти:

— Сости ту кошэх англунэ рашае?

5 Павло пхэнда:

— Пхралалэ, мэ на джянавас, со вов англуно рашай. Колэсти со искрисардо: «На дэдүмэ бибакт пала пхурэдэрэ тирэ народостар».

6 Павло джянгля, со дэ Синедрионо ехх лэндар сле саддукея, ай авэр — фарисея. Колэсти вов зоралэ гласога пхэнда:

— Пхралалэ, мэ фарисеи, чяво фарисеяхкоро. Ман сундисарэн пала кода, со мандэ исин надия пэ отджюндивимо мулэндар.

7 Кала вов када пхэнда, машкар фарисея тай саддукея ваздэняпэ баро гвалто, тай свавэрэ розджилепэ дэ дума.

8 Саддукея пхэнэн, со нэнай ни отджюндивимо, ни ангелонэн, ни фано, нэ фарисея патян, со када вса исин.

9 Ваздэняпэ баро типимо, койсавэ сиклимаря пав Упхэнима фарисеендар вщиле тай пхэндэ:

— Амэ на араках дэ кадэлэ манушэ нисави дош. Со, кала лэсти дэдумэлас фано чи ангело?

10 Гвалто фартэ розпхабиляпэ, и пхангякоро пхурэдэр пэрэдарвадпэ, со Павло розчинэна поепаш. Вов прыпхэнда халавдэнди тэ залэ лэ котарь зорага тай тэ отлиджя дэ халавдэнгоро цэр.

11 Пэ авэр рят англа Павло ачиля Рай тай пхэнда:

— На дара! Сар ту допхэнэгас пала Ман дэ Ерусалимо, кади авэга тэ допхэнэ дэ Римо.

Иудея камэн тэ умарэ Павло

12 Дэнзор койсавэ иудея стидэнепэ тай лиле солах нисо тэ на хан и тэ на пэн ды колэ, сар умарэна Павло.

13 Кади эдэдуманепэ пашэ саранда манушэн.

14 Вонэ джиле англунэ рашаэндэ тай пхурэдэрэндэ и пхэндэ:

— Амэ солахане нисо тэ на ха и тэ на пэ ды колэ, сар умарага Павло.

15 Кана тумэ тай Синедрионо помангэн пхангякэрэ пхурэдэрэ тэ анэ лэ тумэндэ, соб пашэ тэ роздыхкэ кадэва рындо. Ай амэ стидагапэ тай умарага лэ инте ды колэ, сар вов доджяла кадэлэ тханэстэ.

16 Пала лэнгири дума уджянгла Павлохкиря пхэнякоро чяво. Вов джиля дэ халавдэнгоро цэр тай розпхэнда када Павлости.

17 Тунчи Павло акхарда екхэ шэлякэрэ пхурэдэрэндар и пхэнда лэсти:

— Отлиджян кадэлэ чявэ пхангякэрэ пхурэдэрэстэ, лэстэ исин койсо тэ пхэнэ.

18 Шэлякоро пхурэдэр отлиджялда чявэ пхангякэрэ пхурэдэрэстэ тай пхэнда:

— Павло, савэ амэ схутилдэ, акхарда ман тай помангя тэ анэ тутэ кадэлэ чявэ. Лэстэ исин койсо тути тэ пхэнэ.

19 Пхангякоро пхурэдэр лиля чявэ пала вастэ, отлиджялда дэ рига тай пхучля:

— Со ту камэх манди тэ розпхэнэ?

20 Чяво пхэнда:

— Иудея прылиле дэ гындо тэ мангэ тут, соб ту тэ анэх атася Павло дэ Синедрионо. Вонэ пхэнэн, со камэн будэр тэ уджянэ пала лэхкоро рындо.

21 Нэ ту на патя кадэлэсти, колэсти со пэ дром чёрыл дожутярэн лэ саранда манушэн. Вонэ солахане тэ на ха тай тэ на пэ ды колэ, сар умарэна Павло. Важ када лэндэ вса исин. Вонэ дожутярэн кацик лав тутар.

22 Пхангякоро пхурэдэр отмуля чявэ тай прыпхэнда лэсти:

— Никасти на розпхэн пала кода, со ту пхэндан манди.

Павло отбичалэн дэ Кесария

23 Тунчи пхангякоро пхурэдэр акхарда дон шэлякэрэн пхурэдэрэн и прыпхэнда лэнди:

— Стидэн дуй шэла халавдэн, эфтадэша анклистарен тай дуй шэла аврэн халавдэн, соб вонэ тэ джан дэ Кесария, сар авэла еня чясо рятяга.

24 Дэн Павлости грастэ тай дыкхэн, соб лэга тэ на авэл бибахт. И отлиджян лэ барэдэрэстэ Феликсоэстэ.

25 Тунчи вов искриисарда кацаво лил:

26 «Клавдии Лисии

Пативалэ барэдэрэсти Феликсоэсти:

Тэ авэх бахтало!

27 Кадэлэ манушэ схутилдэ иудея тай камле тэ умарэ. Нэ мэ поджилём халавдэнца и выхутилдом лэ лэнгэрэ вастэндар, сар уджянглём, со вов римско мануш.

28 Мэ закамлём тэ уджянэ, дэ со вонэ дошарэн лэ, тай андом лэ дэ лэнгоро Синедрионо.

29 Мэ полилём, со вонэ дошарэн лэ важ лэнгоро Упхэнимо. И со лэ ни пала со тэ мулярэ чи тэ чувэ дэ барунэ.

30 Мэ уджянглём, со лэ камэн чёрыл тэ умарэ, и екхатар отбичалдом лэ тутэ. И прыпхэндом, соб лэ тэ дошарэн англа тутэ».

31 Халавдэ тердэ, сар вов прыпхэнда, лиле Павло тай лиджялдэ рятяга дэ Антипатрисо.

32 Пэ авэр диво анклистаря лагле Павлога дурэдэр, ай кодэла, ко джянас пэза, рисиле дэ Ерусалимо.

33 Кала анклистаря авиле дэ Кесария, вонэ отдэне барэдэрэсти лил тай пэрэдэне лэсти Павло.

34 Барэдэр продинда лил тай пхучля Павло, савя вов пхуятар. Кала вов уджянгля, со Павло Киликиятар,

35 тунчи пхэнда:

— Мэ вышунава тут, кала авэна кодэла, ко дошарэнас тут, — тай прыпхэнда, соб халавдэ тэ аракхэн тхан Павлости дэ райкано цэр, саво терда тхагари Иродо, тай тэ рицарэн лэ котэ.

24

Павло дошарэн

1 Проджиля панч дивэ, и ангуно рашай Анания койсавэ пхурэдэрэнца тай манушэга пав лавэ Тертулло, саво розлэлэспэ дэ римско упхэнима, авиля дэ Кесария, соб тэ дошарэ Павло англа барэдэрэ.

2 Кала Павло андэ, Тертулло ачиля тэ дошарэ лэ.

3 — Пативало Феликсо! Наис тути пала пачя, сави ту дэх амэнди и пала кода, со тердан важ амарэн манушэн пэхкиря баря годяга.

4 Соб бут тэ на зарицарах тут, мэ мангав тэ дэх амэнди набут вряма и тэ вышунэх амэн пав тирэ мицима.

5 Амэ бинах кадэлэ мануш бидага дэ амари пачя. Вов подваздэл иудеен пав всавири люмля тай исин пхурэдэр дэ назариенгоро стидэмо.

6-7 Вов камля тэ магрисарэ храмо, нэ амэ схутилдэ лэ.*

8 Кала ту допхучега лэ, ту еджино уджянэга пала вса, дэ со амэ лэ дошарах.

9 Иудея ж подрицардэ лэ тай пхэндэ, со лэхкэрэ лава исин чячимо.

Павло дэдумэл англа Феликсо

10 Барэдэр сикавда Павлости, соб вов тэ пхэнэл. И Павло пхэнда:

— Мэ джянав, со ту бут бэрша сундисарэх амаро народо. Колэсти лошало тэ пхэнэ лав англа тут, соб тэ сикавэ пэхкоро чячимо.

11 Тути напхаро авэла тэ уджянэ, со пашэ дэшудуй дивэ павпалэ мэ авилём тэ тэлэ дэ Ерусалимо.

12 Кодэла, савэ дошарэн ман, на дыкхле, соб мэ хаваспэ кагась дэ храмо чи подваздавас манушэн дэ синагоги чи дэ форо.

13 Лэндэ на выджяла тэ допхэнэ кода, пала со вонэ дошарэн ман.

* **24:6-7** Дэ койсавэ пуранэ греческа манускрипты исин инте кацавэ лава: «И камле тэ сундисарэ пав амарэ Упхэнима. Нэ пхангякорэ пхурэдэр Лисии зорага залиля лэ амэндар и прыпхэнда кодэлэнди, ко дошарэн лэ, тэ джян тутэ».

14 Мэ прыджянав, со джяв чячюнэ Дромэга, саво вонэ акхарэн хохавимага. Мэ тэлював Дэвлэсти амарэ дадэнгоро и патяв всавэрэсти, со искриисардо дэ Упхэнима тай дэ Англунарен.

15 Мандэ кади ж исин надия пэ Дэвлэ, сар и кадэлэ манушэндэ. Надия пэ кода, со оджювдэна мулэндар сар патякунэ, кади ж напатякунэ.

16 Колэсти прытховав всавири зор, соб муро іло всавири вряма тэ авэл жужо англа Дэвлэ и англа манушэн.

17 Набут бэршэн мэ на слём дэ Ерусалимо, ай тунчи авилём пордэ, соб тэ пэрэдэ мурэ народости даро важ чёrorэн и тэ анэ жэртвы.

18 Вонэ арахкле ман дэ храмо, кала мэ жужараваспэ. Нэ котэ на сля нисави гроза манушэн тай нисаво гвалто.

19 Тунчи авиле койсавэ иудея Цыкня Азиятар. Акэ лэнди трэбуни сля тэ авэ катэ, соб тэ дошарэ ман, кала лэндэ сось исин пэ ман.

20 Чи мэк кодэла, ко исин катэ, пхэнэна, сави дош вонэ арахкле дэ ман, кала ман допхучелас Синедрионо.

21 Чи мэ дошало дэ кодэлэ, со типисилём: «Ман сундисарэн пала кода, со мэ патяв дэ оджюндивимо мулэндар»?

22 Феликсо, саво мишто джянэлас пала Дром, оттховда кадэва рындо.

— Мэ пхэнава лав пав тумаро рындо, кала авэла пхангякоро пхурэдэр Лисию, — дэдуманя вов.

23 Вов прыпхэнда шэлякэрэ пхурэдэрэсти, соб халавдэ тэ дыкхэн пала Павло, нэ и тэ дэн лэсти набут воля и тэ на запхэнэн лэхкэрэ амалэнди тэ лашарэ лэхкэрэ рындуря.

24 Проджиля набут дивэ, тай Феликсо авиля пэхкиря ромняга, сави сля иудеянка пав лавэ Друзилла, и бичалда пала Павло, соб тэ пошунэ пала лэхкоро патявимо дэ Иусо Хресто.

25 Кала Павло ачиля тэ дэдумэ пала джювимо пав чячима, пала кода, со трэбуни мишто тэ дыкхэ пала пэ и пала сындо, саво авэла, Феликсо пэрэдаравапэ тай пхэнда:

— Хутилэла пэ авдивэ, джя! Сар трэбуни авэла, мэ тут акхарава.

26 Лэстэ кади ж сля надия, со Павло дэла лэсти ловэ. Колэсти бут вов молы прыпхэнэлас тэ анэ Павло тай дэдумэлас лэга.

27 Проджиля дуй бэрша, тай пэ Феликсохкоро тхан ачиля Порции Фесто. Нэ Феликсо ачявда Павло дэ барунэ, соб тэ терэ мишто иудеенди.

25

Павло мангэл императорхоро сындо

1 И кади, трин дивэнди Фесто авиля дэ кодья пхув. Тунчи лиля дром Кесариятар дэ Ерусалимо,

2 тев англунэ рашая тай иудеенгэрэ пхурэдэра сикавдэ дош пэ Павло.

3 Вонэ фартэ мангле Фесто, соб вов тэ тховэл пэ лэн патив тай тэ пэрэлиджял Павло дэ Ерусалимо. Еджинэ вонэ камле тэ стидэпэ тай тэ умарэ Павло пав дром.

4 Фесто пхэнда:

— Пала Павло дыкхэн халавдэ дэ Кесария. И мэ сиво котэ авава.

5 Мэк тумарэ пхурэдэра джяна манца и сикавэна дош пэ лэстэ, кала вов терда сось налачэ.

6 Фесто сля лэнца пашэ охто чи дэш дивэ, ай тунчи рисиля дэ Кесария. Пэ авэр диво вов бэшыля пэ сундисарехкоро тхан тай прыпхэнда тэ анэн Павло.

7 Кала Павло авиля, иудея, савэ авиле Ерусалимостар, ачиле тэ дошарэ лэ дэ бутэн пхарэн рындонэн, нэ тэ допхэнэ када лэндэ на выдзялас.

8 Павло ж камля тэ сикавэ пэхкоро чячимо тай пхэнда:

— Мэ на пэрэхуклём иудеенгоро Упхэнимо, и нисо на тердом ни храмошти, ни императости.

⁹ Фесто камля тэ дэ патив иудеенди, колэсти пхучля Павлостар:

— Камэх тэ джя дэ Ерусалимо, соб котэ тут тэ сундисарэн пры ман?

¹⁰ Павло пхэнда:

— Мэ ачяв англа сындо императохкоро, и лэга трэбуни тэ авав сундисардо. Мэ на тердом иудеенди нисо налачё, сар ту еджино джянэх.

¹¹ Кала мэ прахари и затердом мэримо, мэк авэл кади. Нэ кала иудея дошарэн ман ивьа, никастэ нэнай зор тэ выдэ ман лэнди. Мэк ман сундисарэл императоро!

¹² Фесто дэдуманя пэхкэрэ стидэмага тай пхэнда:

— Кала мангэх сындо императохкоро, джяга императостэ.

Павло англа тхагари Агриппа

¹³ Проджиля набут дивэ, тай дэ Кесария тэ ваздэ патив Фестости авиле тхагари Агриппа тай лэхкири ромни Берника.

¹⁴ Вонэ сле котэ койсавэ дивэ, тай Фесто дэдумэлас тхагарега пала Павлохкоро рындо.

— Катэ исин екх мануш, савэ Феликсо ачявда дэ барунэ.

¹⁵ Кала мэ слём дэ Ерусалимо, иудеенгэрэ рашая тай пхурэдэра сикавдэ пэ лэстэ дош. Вонэ мангле тэ сундисарэ лэ.

¹⁶ Мэ пхэндом лэнди, со римсконэ манушэндэ на прылито тэ отдэ манушэ дэ вастэн кодэлэнди, ко лэ дошарэн, кала вов майанглал на дыкхэлапэ лэнца тай на допхэнэла, со вов надошало.

¹⁷ Вонэ авиле манца кордэ, и мэ пэ авэр диво бэшлём пэ сундисарехкоро тхан тай прыпхэндом тэ анэн кордэ кадэлэ манушэ.

¹⁸ Вонэ ачиле паша лэ, нэ нисо на тердэ, соб тэ долиджя лэхкири дош хотэ дэ екх налачё рындо, пала саво мэ думисаравас.

¹⁹ Нэ машкар лэн сля гвалто пала кода, сар трэбуни тэ тэлэ Дэвлэсти, тай пала Исусо, Саво муля, нэ пала Савэ Павло пхэнда, со Вов джювдо.

²⁰ Мэ на джанглём, сар манди тэ роздыкхэ кадэва рындо. Тай пхучлём Павлостар, чи камэл вов тэ джя дэ Ерусалимо тай тэ прылэ котэ сындо.

²¹ Павло закамля, соб лэхкоро рындо тэ роздыкхэл императоро. И мэ прыпхэндом тэ рицарэ лэ дэ барунэ ды колэ, сар отбичалава лэ императостэ.

²² Агриппа пхэнда Фестости:

— И мэ камав тэ пошунэ кадэлэ манушэ.

— Атася шунэга, — пхэнда Фесто.

²³ Пэ авэр диво Агриппа тай Берника барэ пхутимага заджиле дэ цэра сындохири. Лэнца сле пхангякэрэ пхурэдэра тай пативалэ мануша кодэлэ форостар. Фесто прыпхэнда, соб тэ анэн Павло.

²⁴ Тунчи Фесто пхэнда:

— Тхагари Агриппа и свавэрэ, ко катэ исин! Тумэ дыкхэн манушэ, пала савэ гроза иудеен анэнас дош манди дэ Ерусалимо тай катэ дэ Кесария и типисиле, со лэсти нащи тэ джювэ.

²⁵ Мэ ж на аракхав дэ лэ нисави дош, пала сави лэ трэбуни тэ умарэ. Нэ сар вов мангя императохкоро сындо, мэ тховдом дэ гындо тэ отбичалэ лэ дэ Римо.

²⁶ Нэ мандэ нэнай нисо пэ кадэлэ манушэ, соб тэ искрисарав раести. Колэсти мэ вылиджалдом лэ тумэндэ, и англал свавэрэстар тутэ, тхагари Агриппа, соб ту тэ допхучех лэ тай мэ тэ джанав, со манди тэ искрисарэ.

²⁷ Мэ думисарав, со на пав чячима тэ бичалэ барунаре и тэ на пхэнэ, дэ со исин лэхкири дош.

26

Павло допхэнэл пэхкоро чячимо

¹ Агриппа пхэнда Павлости:

— Мишто, дэдүмэ пала пэ.

Павло подлила васт и ачила тэ дэдүмэ:

² — Тхагари Агриппа! Мэ бахтало тэ допхэнэ англа тут пэхкоро чячимо, кала ман дошарэн иудея.

³ Ту ж мишто джянэх, со прылито иудеендэ тай кода, пала со вонэ ханпэ екхэкха. Колэсти фартэ мангав тут, соб ту тэ на холявэх, нэ тэ шунэх ман.

⁴ Иудея мишто джянэн, сар мэ джювдом машкар мурэн манушэн дэ Ерусалимо тэрнэ бэршэндар.

⁵ Вонэ дэмут джянэн ман. И кала закамэна, допхэнэна, со мэ джювдом сар фарисеи тай слём стидэмастар, тев всавири зор прытховэнас, соб тэ терэ пав Упхэнима.

⁶ Авдивэ мэ ачяв англа сындо пала надия пэ Дэвлэхкоро Лав, саво Дэвэл дэня амарэ дадэнди.

⁷ Дэшудуй чянга амарэ народостар диво тай рят терэн бути Дэвлэсти тай дожутярэн, кала заджяла дэ зор кадэва Лав. Пала кадья надия, тхагари, ман дошарэн иудея.

⁸ Сости тумэ на патян, со Дэвэл отджювдярэл мулэн?

⁹ Мэ кади ж на прылаvas Лав Исусохкоро Назаретостар тай мараваcпэ кадэлэ сикляримага.

¹⁰ Када мэ тераvas дэ Ерусалимо, кала манди дэне лачимо англунэ рашая. Мэ бичалаvas дэ барунэ бутэн свэнтонэн и, кала лэн умарэнас, подаvas пала кода пэхкоро гласо.

¹¹ Мэ бут мараvas лэн дэ всавэрэ синагоги, соб вонэ тэ отпхэнэнпэ пэхкэрэ патявимастар. И кади мижылём пэ лэн, со традаvas лэн и дэ авэр форура.

¹² Екхвар мэ ладаvas дэ Дамаско пав кадэва рындо зорага тай прыпхэнимага англунэ рашаендар.

¹³ Тай пав дром пордэ, тхагари, мэ удыхклём дэ епашдиво душлимо болыбнастар, саво пхаболас зоралэдэр кхамэстар. И дэ кодэва душлимо попэлём и мэ, и кодэла мануша, савэ сле манца.

¹⁴ Амэ всавэрэ тэлэдэне пэ пхув, тай мэ ушундом гласо, саво дэдүмэлас манди пав еврейско чиб: «Савло, Савло, сости ту традэх Ман? Пхаро тути пэ Ман тэ выдья».

¹⁵ Мэ пхучлём: «Ко Ту, Рае?» — «Мэ Исусо, Савэ ту традэх, — пхэнда Рай. —

¹⁶ Ваздэпэ, вци пэ пурэн тирэн. Мэ авилём, соб тэ терэ тут Мурэ бутярнэга и допхэнимарега пала кода, со ту дыкхлян и со Мэ терава англа тирэ якха.

¹⁷ Мэ фирисарава тут тирэ манушэндар тай наиудеендар, савэндэ Мэ тут бичалав,

¹⁸ соб тэ оттерэ лэнди якха и тэ рисарэ лэн калимастар душлимастэ, и сатанастар тай лэхкиря зоратар тэ рисарэ лэн Дэвлэстэ. Соб лэнгоро бэзимо тэ авэл отмукло и соб вонэ кади ж тэ авэн машкар кодэлэн, ка Мэ свэнтисардом патявимага дэ Ман».

¹⁹ Тхагари Агриппа, манди наши сля тэ на кандэ болыбнахкэрэ дыкхлима.

²⁰ Мэ пхэнаvas лав майанглал кодэлэнди, ко сля дэ Дамаско, тунчи дэ Ерусалимо тай пав всавири Иудея. Ай тунчи наиудеенди, тэ ачявэн вонэ бэзимо тай тэ обрисывэн Дэвлэстэ, тэ допхэнэн пэхкэрэ рындонэнца, со чячимага ачявдэ бэзимо.

²¹ Пала када иудея схутилдэ ман дэ храмо и камле тэ умарэ.

22 Нэ Дэвэл ды авдивэ дэл зор манди. Тай акэ, мэ ачявэ катэ тай допхэнав цыкнэнди и барэнди. Мэ на прытховав нисо кодэлэстэ, со пхэндэ Моисеи тай англунаря.

23 Нэ пхэнав, со Христости сля трэбуни тэ пэрэлиджя кадья грыжа, пэрвонэсти тэ оджювдэ мулэндар и тэ пхэнэ пала душлимо и амарэ манушэнди, и науудеенди.

24 Кала вов кади допхэнэлас пала пэ, Фесто обчинда лэхоро лав.

— Ту на дэ пэхкиря годя, Павло, — затиписиля вов, — баро їрвалимо терэл тут динилэга!

25 Павло пхэнда:

— Пативало Фесто, мэ на динило. И кода, со мэ пхэнав, исин чячимо тай годявэримо.

26 Тхагари, англа савэ мэ пхэнав бидаракоро, джянал пала када. Нисо кадэлэстар на гаравдо важ лэ, колэсти со терэлэспэ всавэрэндэ пэ якхэн.

27 Тхагари Агриппа, ту патях англунаренди? Мэ джянав, со патях.

28 — Ту думисарэх пала кадья скурто вряма тэ терэ кади, соб мэ тэ авав христианино? — пхэнда Агриппа.

29 Павло дэдуманя:

— Сави б кадья вряма тэ на авэл, скурто чи лунго, мэ мангавпэ Дэвлэсти, соб на казык ту, нэ и всавэрэ, ко шунэл ман авдивэ, тэ авэн кацэвэ, сар мэ, кици тэ на прылэн кадэла ланчугурия.

30 Тхагари вщиля тай лэга вщиле барэдэр, Берника тай кодэла, савэ бэшэнас лэнца.

31 Вонэ выджиле тай дэдумэнас екх екхэсти:

— Кадэва мануш на терда нисо, соб тэ умарэ лэ чи тэ чувэ дэ барунэ.

32 — Лэ б фэдэр тэ отмукэ пэ воля, нэ вов помангя сындо императохкоро, — пхэнда Агриппа Фестости.

27

Павло ладэл дэ Римо

1 Кала сля пхэндо, со амэ ладах дэ Италия, Павло и аврэн барунарен пэрэдэне шэлякэрэ пхурэдэрэсти пав лавэ Юлии, императохкэрэ халавдэнгэрэ стидэмастар.

2 Амэ бэшле пэ адрамитско корабли, савэсти трэбуни сля тэ заджя дэ портурия пав Цыкни Азия, тай лагле. Амэнца сля македонянино Аристархо, саво барилия дэ Фессалоника.

3 Пэ авэр диво амэ авиле дэ Сидоно. Юлии сикавда дорымо Павлостэ тай отмукия лэ, соб вов тэ спхирэл пэхкэрэ амалэндэ и соб вонэ тэ лашарэн лэхкэрэ рындурия.

4 Тунчи амэ упалэ выджиле дэ море тай проджиле Кипро кодэла ригатар, тев на пхурдэлас балвал. А кала на кади, балвал бы пхурдэлас ворта пэ амэн.

5 Амэ пэрэлагле море паша пхувен дэ Киликия тай Памфилия и ачиле дэ форо Мира, саво дэ Ликия.

6 Котэ шэлякоро пхурэдэр аракхля корабли Александриятар, саво джялас дэ Италия, тай тховда амэн пэ лэстэ.

7 Бут дивэн амэ полокхэ ладагас англал. Сля фартэ пхаро тэ ладэ, нэ амэ авиле дэ Книдо. Важ кода со балвал на дэлэс амэнди тэ ладэ, амэ подлагле Критостэ кодэла ригатар, тев на пхурдэлэс балвал, пашэ Салмони.

8 Амэнди сля фартэ пхаро тэ ладэ паша берего, нэ амэ авиле дэ тхан, саво акхарэлпэ Лаче Пристани, надур форостар Ласея.

9 Амэ хасардэ бут вряма и наши сля тэ ладэ пав пане дурэдэр, соб тэ на хасявэ, колэсти со проджиля иудеенгоро посто. Тунчи Павло подпхэнда:

10 — Мэ дыкхав, со тэ ладэ дурэдэр авэла фартэ пхаро. И на кицик мищимо пэ корабли хасявэла, нэ хасявага и амэ.

11 Нэ шэлякоро пхурэдэр на кандэня Павло, ай кандэня кодэлэ, ко лиджялас корабли тай кораблехкэрэ хулае.

12 Ай сар дэ кодэва форо нащи сля тэ пэрэмарэ ївэнд, бут манушэн прылиле дэ гындо, со трэбуни тэ ладэ котарь и тэ авэ дэ Финиксо, тхан пэ Крито, тев заджянас бут корабли, и саво сля оттердо пэ юго тай северо-западо, соб тэ ачепэ котэ.

Пэ море ваздэлпэ бари балвал

13 Пхурдэня южно балвал тай бутярнэ кораблестар прылиле дэ гындо, со када лэнди трэбуни. Тунчи ваздэне якори тай лагле паша Критохкоро берега.

14 Проджила набут вряма тай пхурдэня бари северно-восточно балвал, сави акхарэлпэ Эвракилоно.

15 Амэндэ на сля зора тэ ладэ дэ кодья риг, тев пхурдэлас балвал, колэсти балвал порисарда корабли тай ачиля тэ традэ лэ. Тунчи амэ отдэнепэ кодэлэсти, со авэла, тай балвал традэня корабли пав пане.

16 Амэ подлагле островостэ, саво акхардапэ Кавда. Котэ амэндэ баря зорага выджиля тэ фирисарэ лодка.

17 Кала ла подлиле пэ корабли, бутярнэ змукле доря кораблестар тай обпхангле лэ. Вонэ дарэне тэ заджя дэ Сирто, тев набут пани, колэсти обмукле парусо тай балвал дурэдэр лиджялас амэн пав пане.

18 Бари балвал кади чувэлас корабли дэ рига, со пэ авэр диво вонэ ачиле тэ вычувэ бужэ кораблестар.

19 Пэ трито диво вонэ пэхкэрэ вастэнца вычутэ дэ пани и вса авэр, со ачиляпэ пэ корабли.

20 Койсавэ дивэ на душолас ни кхам, ни чергэня, тай зорали балвал пхурдэлас. Амэ хацардэ надия, со фирисагапэ.

21 Мануша бут вряма нисо на хале. Тунчи Павло вщиля машкар лэн тай пхэнда: — Тумэнди трэбуни сля тэ кандэ ман тай тэ на выладэ Критостар. Тунчи б тумэ на прылиле кадья грыжа и на хацардэ б амарэ бужэ.

22 Нэ кана пхэнав тумэнди, соб тумэ тэ лошавэн. Нико тумэндар на хасявэла, кицик корабли розмарэлапэ.

23 Кодэла рятяга мандэ авиля ангело Дэвлэстар, Кажкоро мэ исин и Касти терав бути.

24 Вов пхэнда манди: «Павло, на дара! Тути трэбуни тэ аче англа императоро. Акэ, Дэвэл отдэня тути всавэрэн, ко ладэл туга».

25 Колэсти лошавэн! Мэ патяв Дэвлэсти. Вса авэла кади, сар манди пхэндо.

26 Корабли вычувэла пэ савось острово.

Корабли розмарэлпэ

27 Пэ дэшуштарто диво, кала амэн инте чувэлас пав Адриатическо море, дэ епашрят бутярнэ кораблестар полиле, со амэ поджях пхуютэ.

28 Вонэ продыкхле панехкоро лунгимо тай выджиля, со лунгимо сля пашэ трянда шов метруря. Ай кала подыкхле инте екх моло, лунгимо сля пашэ бишта эфта метруря.

29 Бутярнэ даранас, со амэн розмарэла пав барэн, и змукле палал кораблестар штар якоря, тай еджинэ мангленэ, соб сигэдэр тэ авэл диво.

30 Вонэ камле тэ нашэ кораблестар тай ачиле тэ змукэ лодка, соб тэ фирисарэпэ, ай сикавэнас, со камэн тэ змукэ якори кади ж и англал кораблестар.

31 Павло пхэнда шэлякэрэ пхурэдэрэсти тай халавдэнди:

— Кала кадэла мануша на аченапэ пэ корабли, тумэ хасявэна.

32 Тунчи халавдэ пэрэчиндэ доря, савэ рицарэнас лодка, и вой тэлэдэня дэ море.

³³ Дэнзор Павло мангя манушэн, соб вонэ тэ хан.

— Дуй куркэ, сар тумэ бэшэн дэ грыжа, аченпэ бокхалэ и нисо на хан, — пхэнда вов. —

³⁴ Мэ мангав тумэн тэ хан, тай када дэла зор тумэнди тэ фирисарэпэ. Никастэ тумэндар ни екх бал на тэлэдэла шэрэстар.

³⁵ Кала Павло пхэнда, вов лиля мандро, наисарда Дэвлэ англа всавэрэн, пхагя и ачиля тэ ха.

³⁶ Мануша лошыле, и всавэрэ хале.

³⁷ Всавэрэн сля пэ корабли дуй шэла эфтадэша шов манушэн.

³⁸ Кала мануша чялиле, вонэ ачиле тэ терэ корабли локхэгa тай тэ чувэ ворзэ дэ море.

³⁹ Дэнзор вонэ на уджянгле пхув, сави сикавдапэ, нэ удыхкле кацик тишаехкоро берега, тев и камле тэ выцырэдэ корабли.

⁴⁰ Бутярнэ обчиндэ якоря тай ачявдэ лэн дэ море, тунчи розпхангле кораблехкири рули, подлиле цыкно парусо тай бичялдэ корабли берегостэ.

⁴¹ Нэ котэ сля набут пани тай корабли заджиля дэ тишай. Епаш корабли сля пэ тишай, а епаш розмарэлас пани.

⁴² Халавдэ ж камле тэ умарэ всавэрэн барунарен, соб вонэ тэ на нашэн, кала выдьяна панестар.

⁴³ Нэ пхангякоро пхурэдэр камля тэ фирисарэ Павло тай на домукля лэн тэ терэ кади. Вов прыпхэнда манушэнди, савэ джянэнас, сар пэ тэ лиджя дэ пани, тэ хукэ дэ море англал всавэрэндар и тэ авэ пэ берега.

⁴⁴ Ай савэ ачилепэ, лэнди трэбуни сля тэ доджэ берегостэ пэ сандя кораблестар тай пэ котора сандендар. Кади всавэрэ фирисардэпэ тай выджиле пэ пхув.

28

Пэ Мальта

¹ Кала амэ фирисардэпэ, тунчи уджянгле, со кодэва острово акхарэлпэ Мальта.

² Мануша, савэ котэ джювдэ, тердэ важ амэн бари патив. Вонэ тховдэ яг тай акхардэ амэн пэстэ, колэсти со сля шылало тай джялас брышынд.

³ Кала Павло стидэня кашта и ачиля тэ чувэ дэ яг, лэсти дэ вастэ вхаляпэ сап, саво выгульда каштэндар, кала фирисарэласпэ ягатар.

⁴ Кала катутнэ мануша удыхкле, со Павлостэ пэ вастэ амгладёл сап, вонэ ачиле тэ дэдүмэ екх аврэсти:

— Душол, со кадэва умарэлас манушэн. Вов фирисардапэ панестар, нэ чячимахкири дэвли отлэл лэхкоро джювимо.

⁵ Нэ Павло счута сапэ дэ яг, и вов на терда лэсти нисаво бибахталимо.

⁶ Мануша жэ дожутярэнас, со вов ачела тэ шулёл чи сиво мэрэла. Вонэ дожутярдэ бут вряма и кала удыхкле, со лэга нисо на терэлпэ, тунчи парувдэ пэхкири дума тай ачиле тэ пхэнэ, со када савось дэвлэ.

⁷ Надур ачелас грэда, тев джювда пхурэдэр пав острово, савэ акхарэнас Публии. Вов пативалэ прылиля амэн, тай амэ сле лэстэ трин дивэ.

⁸ Лэхкоро дад сля насвало тай пашлёлас пэ пато. Лэстэ сля пхабаримо тай фартэ дукхалас води. Павло авиля лэстэ, помангляпэ, тховда пэ лэстэ васта тай састярда лэ.

⁹ Тунчи и авэр насвалэ островостар ачиле тэ авэ лэстэ тай высастярэнаспэ.

¹⁰ Вонэ дэне амэнди бари патив, и кала амэ лагле, стидэне амэнди вса, со трэбуни важ дром.

Амэ авах дэ Римо

11 Проджила трин чёна, и амэ выджиле дэ море пэ корабли Александриятар, саво пролиджялас ївэнд пэ кодэва острово и акхарэласпэ «Дуй пхрала»*.

12 Амэ авиле дэ Сиракузы и просле котэ трин дивэ.

13 Котарь амэ ваздэнепэ тай авиле дэ Ригии. Пэ авэр диво пхурдэня южно балвал, тай дивэга амэ авиле дэ Путеолы.

14 Котэ амэ аракхле пхралэн, тай вонэ мангле амэн тэ пролиджя лэнца састо курко.

Тай акэ, амэ авиле дэ Римо.

15 Пхрала дэ Римо ушундэ, со амэ авиле, тай джиле тэ удыхкэ амэн ды Аппиэхкоро форо тай ды тханэ, саво акхарэлпэ «Трин гостиницы». Кала Павло удыххла лэн, вов наисарда Дэвлэ тай прылила зор.

16 Амэ авиле дэ Римо, тай Павлости дэне воля тэ джювэ екхэсти. Паша лэ джювда кацик халавдо, саво дыкхэлас пала лэ.

Бути дэ Римо

17 Проджила трин дивэ, тай Павло акхарда пативалэн иудеен. Кала вонэ авиле, вов пхэндэ лэнди:

— Пхралалэ, ман спхангле дэ Ерусалимо тай отдэне дэ вастэн римлянонэнди. Нэ мэ на теравас нисо амарэ народости и на отпхэнаваспэ кодэлэстар, со сля прылиго амарэ дадэндэ.

18 Римлянуря роздыкхле муро рындо тай камле тэ отмукэ ман, колэсти со дэ ман нэнай дош, пала савя трэбуни тэ умарэ.

19 Нэ сар иудея на сле пала ман, мэ манглём сындо императохкоро. Мэ тердом кади на важ кода, соб тэ дошарэ муро народо.

20 Колэсти мэ акхардом тумэн авдивэ, соб тэ дыкхэпэ тай тэ подэдумэ тумэнца. Пала надия Израилехкири ман спхангле кадэлэ ланчугонэнца.

21 Кодэла пхэндэ:

— Амэнди нико на искриисарда пала тут Иудеятар. Тай котарь нико пхралэндар амэндэ на авэлас и на дэдумэлас пала тут намишто.

22 Нэ амэ камле тэ пошунэ, со ту думисарэх. Амэ кицик джянах, со мануша пав всаверэн тханэн осундисарэн кадэва сикляримо.

23 Вонэ допхэндэпэ Павлога тай дэ диво, саво вонэ выгидэне, лэстэ цэрэ авилия бут манушэн. Павло дэнзор и ды бельвеля пхэнэлас лэнди пала Дэвлэхкоро Тхагаримо тай допхэнэлас пала Исусо Моисеехкэрэ Упхэнимастар и англунарендар.

24 Екх лэндар патине, ай авэр — нат.

25 Вонэ ачиле тэ хапэ машкар пэстэ, и кала вонэ уджянас, Павло дэдуманя кацавэ лава:

— Мишто пхэндэ Свэнто Фано тумарэ дадэнди уштэнца англунарехкэрэ Исаияхкэрэ:

26 «Джя кадэлэ народостэ тай пхэн:

"Авэна тэ шунэ, нэ на полэна,

авэна тэ дыкхэ, нэ на дыкхэна.

27 Ёло кадэлэ манушэнгоро забарилия чеченэга,

вонэ на шунэн канэнца

тай затердэ якха,

соб тэ на дыкхэн якхэнца,

тэ на шунэн канэнца,

тэ на полэн їлэга

и тэ на обрисывэн,

* 28:11 Пав греческо чиб «Диоскуры», Касторо тай Поллуксо, пала савэн пхэнэнас, со лэнгоро дад сля дэвэл Зевсо. Сар патянас мануша дэ кодыя вряма, кадэла пхрала прыдыкхэнас пала кодэлэн, ко терэнас бути пэ корабли.

соб Мэ састярдом лэн"».

²⁸⁻²⁹ Нэ джянэн кана, со фирисаримо Дэвлэхкоро бичалдо наиудеенди: вонэ и ушунэна кадэва Лав.[†]

³⁰ Павло инте дуй бэрша джювда дэ Римо, тев намисарэлас цэр тай прылэлас всавэрэн, ко авэлас лэстэ.

³¹ Вов нисостар на даралас тай на сля ника, соб тэ запхэнэл лэсти тэ розпхэнэ пала Дэвлэхкоро Тхагаримо и тэ сиклярэ пала Рае Исусо Христо.

[†] **28:28-29** Дэ койсавэ пуранэ греческа манускрипты исин инте кацавэ лава: «Пала кадэлэ, сар вов пхэнда, иудея розджилепэ, ай еджинэ фартэ допхэнэнас екх аврэсти».